





中 華 書

局

卷一四七至卷一六二(傳)第 一 四 册

## 明史卷一百四十七

### 列傳第三十五

解縉 黄淮 胡廣 金幼孜 胡儼

解縉,字大紳,吉水人。 祖子元,爲元安福州判官。 兵亂,守義死。 父開, 太祖嘗召見

論元事,欲官之,辭去。

大庖西室,諭縉:「朕與爾義則君臣,恩猶父子,當知無不言。」縉卽日上封事萬言,略曰 縉幼穎敏,洪武二十一年舉進士。授中書庶吉士。甚見愛重,常侍帝前。 日,帝在

臣聞令數改則民疑,刑太繁則民玩。 嘗聞陛下震怒,鋤根翦蔓,誅其姦逆矣。未聞褒一大善,賞延於世,復及 國初至今,將二十載,無幾時不變之法,無一

其鄉,終始如一者也。

日無過之人。

臣見陛下好觀說苑、韻府雜書與所謂道德經、心經者,臣竊謂甚非所宜也。 說苑

列 傳 第 Ξ -Æ 解 緍

顏、僧、子思、孟子配。 閩、濂、洛,根實精明,隨事類別,勒成一經,上接經史,豈非太平制作之一端歟。 又今 於檢閱,則願集一二志士儒英,臣請得執筆隨其後,上泝唐、虞、夏、商、周、凡,下及關 **爵,以顏路、曾晳、孔鯉配。** |公、稷、契、夷、益、傅說、箕子於太學。 孔子則自天子達於庶人,通祀以爲先師,而以 樂書一經以惠萬世。尊祀伏羲、神農、黃帝、堯、舜、禹、湯、文、武、皐陶、伊尹、太公、周 出 於劉向,多戰國縱橫之論。 自閔子以下,各祭於其鄉。魯之闕里,仍建叔梁紇廟,贈以王 一洗歷代之因仍,肇起天朝之文獻,豈不盛哉 韻府出元之陰氏,抄輯穢蕪,略無可採。陛下若喜其便

誅,不宜加辱。 妄者火之,俾絕其欺誑。 墀,皆爲吉士,虎賁趣馬,悉用俊良。除山澤之禁稅,蠲務鎭之征商。木輅朴居,而土 之工役。流十年而聽復,杖八十以無加。 木之工勿起。 館閣之隆。太常非俗樂之可肄,官妓非人道之所爲。禁絕倡優,易置寺閹。 若夫祀天宜復掃地之規,尊祖宜備七廟之制。奉天不宜爲筵宴之所,文淵未備夫 布墾荒田,而四裔之地勿貪。釋、老之壯者驅之,俾復於人倫。經咒之 治曆明時,授民作事,但申播植之宜,何用建除之謬。所宜著者,日月 絕鬼巫,破淫祀,省冗官,減細縣,痛懲法外之威刑,永革京城 婦女非帷薄不修,毋令逮繫。 大臣有過惡當 執戟陛

之行,星辰之次,仰觀俯察,事合逆順,七政之齊,正此類也。

愈重。 長風采也。 近年以來,臺綱不肅,以刑名輕重為能事,以問囚多寡為勳勞,甚非所以勵淸要 此皆小人趨媚効勞之細術,陛下何不肝膽而鏡照之哉。 御史糾彈,皆承密旨,每聞上有赦宥,則必故爲執持,意謂如 此,則上恩

飾辭。 倚法之條,所謂用之如泥沙。 縮組符<sup>。</sup> 趨,而或布於朝省。 殺,而不知皆臣下之乏忠良也。 陛下進人不擇賢否,授職不量重輕。 出於吏部者無賢否之分,入於刑部者無枉直之判。天下皆謂陛下任喜怒爲生 是故賢者羞爲之等列,庸人悉習其風流。 椎埋囂悍之夫,關茸下愚之輩,朝捐刀鑷,暮擁冠裳,左棄筐篋,右 監生進士,經明行修,而多屈於下僚。 建不爲君用之法,所謂取之盡錙銖,置朋姦 以貪婪苟免爲得計,以廉潔受刑爲 孝廉人材,冥蹈瞽

嚴,訓告之方未備。 鄭氏之家範,布之天下。 古者善惡,鄉鄰必記。今雖有申明旌善之舉,而無黨庠鄕學之規,互知之法雖 臣欲求古人治家之禮, 世臣大族,率先以勸,旌之復之,爲民表帥,將見作新於變,至 睦鄰之法,若古藍田呂氏之鄉約, 今義門

陛下 天資至高,合於道微。 神怪妄誕,臣知陛下洞矚之矣。 然猶不免所謂神道設 於比屋可

封不難矣。

列傳

第

三

十

五

解

縉

四一一七

天無變災,民無患害,聖躬康寧,聖子聖孫繼繼繩鄉,所謂得真符者矣。 敎 寶爲名,渝衆以 者 臣謂 不必然 神 仙 也。 爲徵應也哉 統之輿圖已定矣,一時之人心已服矣,一切之姦雄已慴矣。 何必 興師以取

欺;其歉也,良善困於補納。 或賠辦 之土地、無前日之生植、而今日之徵聚、有前日之稅糧。 税於所過之津,何其奪民之利至於如此之密也。且多貧下之家,不免抛荒之咎。 至有九年之食無難者。 而 稅 反重。 臣觀地有盛衰,物有盈虛,而商稅之征,率皆定額。是使其或盈也,姦黠得以侵 以當役,役重而民困。 欲拯 困 而革其弊,莫若行授田均田之法,兼行常平義倉之舉。 夏稅一也,而茶椒有糧,菓絲有稅。 土田之高下不均,起科之輕重無別,膏腴而 或賣產以供稅,產去而 旣稅於所產之地,又 稅反輕,瘠鹵 積之以漸, 税存; 今日

里胥,額設弓手,兼教民兵。 爲太平。 多有書院學田,貢士有莊,義田有族,皆宜興復而廣益之。 臣聞仲尼曰:「王公設險以守其國。」近世狃於晏安,墮名城,銷鋒鏑,禁兵諱武,以 一旦有不測之虞,連城望風而 開武舉以收天下之英雄,廣鄉校以延天下之俊乂。 靡。及今宜敕有司 `整葺,寬之以歲月,守之以

夫罪人不孥,罰弗及嗣。 連坐起於療法,孥戮本於僞書。 今之爲善者妻子未必蒙

樂,有過者里胥必陷其罪。況律以人倫爲重,而有給配婦女之條,聽之於不義,則又何

取夫節義哉。此風化之所由也。

用,催科督厲,小有過差,蒲鞭示辱,亦足懲矣。 趨,肌膚不保,甚非所以長孝行、勵節義也。臣以爲自今非犯罪惡解官,笞杖之刑勿 恭,相倡以禮。 職 也,而以名於六屬。 孔子曰:「名不正則言不順。」尚書、侍郎,內侍也,而以加於六卿。郎中、負外,內 而今內外百司捶楚屬官,甚於奴隸。 御史詞臣,所以居寵臺閣,郡守縣令,不應迴避鄉邦。 是使柔懦之徒,蕩無廉恥,進退奔 同寅協

臣但知罄竭愚衷,急於陳獻,略無次序,惟陛下幸垂鑒焉。

書奏,帝稱其才。已,復獻太平十策,文多不錄。

韓國公李善長得罪死,縉代郎中王國用草疏白其冤。又爲同官夏長文草疏,劾都御史袁 **縉嘗入兵部索皂隸,語嫚。尚書沈溍以聞。** 帝曰:「縉以冗散自恣耶。」命改爲 御史。

泰。 泰深銜之。時近臣父皆得入觀。 縉父開至,帝謂曰:「大器晚成,若以而子歸,益令進

學,後十年來,大用未晚也。」

謫 河 州衞 歸 八年,太祖崩,縉入臨京師。有司劾縉違詔旨,且母喪未葬,父年九十,不當舍以行。 吏。 時禮 部侍郎董倫方爲惠帝所信任,縉因寓書於倫曰:「縉率易狂愚, 無所避

病,俯仰奔趨,伍於吏卒,誠不堪忍。晝夜涕泣,恒懼不測,負平生之心,抱萬古之痛。 皆不暇戀,冀一拜山陵,隕淚九土。何圖詿誤,蒙恩遠行。揚、粵之人,不耐寒暑,復多疾 第,洊將八載。賓天之訃忽聞,痛切欲絕。母喪在殯,未遑安厝,家有九十之親,倚門望思, 宜待之有禮,稍忤機權,其徒必貳。此類非一,頗皆億中。又嘗爲王國用草諫書,言韓國 远·史舛誤,承命改修,及踵成宋書,删定禮經,凡例皆已留中。 奉親之暇,杜門纂述,漸有次 事,爲詹徽所疾,欲中以危法。伏蒙聖恩,申之慰諭,重以鏹賜,令以十年著述,冠帶來廷。 數鳴知感。 冀還京師,得望天顏,或遂南還,父子相見,卽更生之日也。」倫乃薦縉,召爲翰 顧問,謂 是以

內閣預機務自此始。 成祖入京師,擢侍讀,命與黃淮、楊士奇、胡廣、金幼孜、楊榮、胡儼並直文淵閣,預機

賜備至。 |縉翰林學士兼右春坊大學士。帝嘗召縉等曰:「爾七人朝夕左右, 恒情,愼初易,保終難,願共勉焉。」因各賜五品服,命七人命婦朝皇后於柔儀殿,后勞 尋進侍讀學士,奉命總裁太祖實錄及列女傳。書成,賜銀幣。 又以立春日賜縉等金綺衣,與尚書埓。縉等入謝,帝曰:「代言之司,機密所繫, **股嘉爾勤愼,時言之宮** 永樂二年,皇太子立,進

魏之 且 旦夕侍朕,裨益不在尚書下也。」一日,帝御奉天門,諭六科諸臣直言,因顧縉等曰:「王、 風,世不多有。 若使進言者無所懼,聽言者無所忤,天下何患不治,脫與爾等共勉之。

其年秋,胡儼出爲祭酒,縉等六人從容獻納。 帝嘗虛己以聽。

西布政司參議。 及縉。久之,福等議稍稍傳達外廷,高煦遂譖縉洩禁中語。 聽。 「是啓爭也,不可。」帝怒,謂其離間骨肉,恩禮寖衰。 顧忌,廷臣多害其寵。 「好聖孫。」謂宣宗也。 福言漢王有功,宜立。 卒平之,置郡縣。 縉 少登朝,才高,任事直前,表裏洞達。 旣行,禮部郎中李至剛言縉怨望,改交阯,命督餉化州 帝領之。太子遂定。高煦由是深恨縉。會大發兵討安南,縉諫。 帝密問縉。 又以定儲議,爲漢王高煦所忌,遂致敗。 而太子旣立,又時時失帝意。 **縉稱:「皇長子仁孝,天下歸心。」帝不應。** 引拔士類,有一善稱之不容口。 四年賜黃淮等五 高煦寵益隆,禮秩踰嫡。 明年,縉坐廷試讀卷不公,謫廣 先是,儲位未定,淇國公丘 人二品紗羅衣,而不 縉又頓首日: 然好臧否,無 縉叉諫曰:

逮縉 修朱紘,檢討蔣驥 歸,無人臣禮。 下詔獄,拷掠備至。 永樂八年,縉奏事入京,值帝北征,縉謁皇太子而還。 帝震怒。 、潘畿、蕭引高幷及至剛,皆下獄。 詞連大理 縉時方偕檢討王偁道廣東,覽山川,上疏請鑿實江 丞湯宗,宗人府經歷高得暘,中允李貫,贊善王汝玉,編 汝玉、貫、紘、引高、得暘皆瘐死。十三 漢王言縉伺上出,私覲太子,徑 通南 奏至,

列傳第三

+

五

解

縉

四十七。籍其家,妻子宗族徙遼東。 年,錦衣衞帥紀綱上囚籍。帝見縉姓名曰:「縉猶在耶。」綱遂醉縉酒,埋積雪中,立死。

觀所論列,皆有定見,不狂也。」詔歸縉妻子宗族。 **縉各疏其短長。縉言:「蹇義天資厚重,中無定見。夏原吉有德量,不遠小人。劉儁有才** 量不弘。 方賓簿書之才,駔僧之心。」帝以付太子,太子因問尹昌隆、王汝玉。 幹,不知顧義。 有執守。 方縉居翰林時,內官張興恃寵笞人左順門外。 汝玉文翰不易得,惜有市心耳。」後仁宗卽位,出縉所疏示楊士奇曰:「人言縉狂, 陳瑛刻於用法,尚能持廉。宋禮戆直而苛,人怨不卹。陳洽疏通警敏,亦不失正。 鄭賜可謂君子,頗短於才。李至剛誕而附勢,雖才不端。 縉叱之, 興斂手退。 縉對曰:「昌隆君子而 帝嘗書廷臣名, 黄福秉心易直,確

子禛亮徙遼東,廣欲離婚。女截耳誓曰:「薄命之婚,皇上主之,大人面承之,有死無二。」及 妻之。」廣頓首曰:「臣妻方娠,未卜男女。」帝笑曰:「定女矣。」已而果生女,遂約婚。 縉初與|胡廣同侍|成祖宴。帝曰:「爾二人生同里,長同學,仕同官。|縉有子,廣可以女 縉敗,

得禍。 正統元年八月詔還所籍家產。成化元年復縉官, 後高煦以叛誅。 安南數反,置更未久,復棄去。 悉如縉言。 贈朝議大夫。始縉言漢王及安南事

赦還,卒歸禎亮。

黃淮,字宗豫,永嘉人。父性,方國珍據溫州,遁跡避僞命。

及蹇義 淮進右春坊大學士。 編修,進侍讀。 使迎稍緩,帝重入高煦譖,悉徵東宮官屬下詔獄,淮及楊溥、金問皆坐繫十年。 至夜分,帝就寢,猶賜坐榻前語,機密重務悉預聞。 淮 舉洪武末進士,授中書舍人。成祖卽位,召對稱旨,命與解縉常立御楊左,備顧問。 、金忠、楊士奇輔皇太子監國。十一年再北巡,仍留守。明年,帝征瓦剌還,太子遣 議立太子,淮請立嫡以長。 明年與胡廣、金幼孜、楊榮、楊士奇同輔導太孫。 太子立,遷左庶子兼侍讀。 旣而與縉等六人並直文淵閣,改翰林 七年,帝北巡,命淮 永樂五年,解縉黜,

登萬歲山。 王久蓄異志,中外疑懼,准憂危嘔血。 1 母 憂,乞終制。 仁宗卽位,復官。 父性 命 年九十,奉養甚歡。 主 一會試。 不許。明年進少保、戶部尚書,兼大學士如故。 尋擢爲通政使,兼武英殿大學士,與楊榮、金幼孜、楊士奇同掌內制。 比辭歸,餞之太液池,帝爲長歌送之,且曰:「朕生日,卿其復來。」 及性卒、賜葬祭、淮詣闕謝。值燈時,賜遊西苑,詔乘肩輿 宣德元年,帝親征樂安,命淮居守。明年以疾乞休, 仁宗崩,太子在南京。 漢 明

列

年入賀。英宗立,再入朝。 正統十四年六月卒。年八十三,諡文簡。

玉較大,非所以示遠人、尊朝廷。」帝嘉納。其獻替類如此。 來朝,帝將刻玉印賜之,以璞示淮。淮曰:「朝廷賜諸番制敕,用『敕命』、『廣運』二寶。 分則易制,一則難圖矣。」帝顧左右曰:「黃淮論事,如立高岡,無遠不見。」 西域僧大寶法王 屬 官北地不卽歸附者,當編戍。淮曰:「如是,恐示人不廣。」帝皆從之。阿魯台歸款,請得役 有告黨逆者。淮言於帝曰:「洪武末年已有敕禁,不宜復理。」吏部追論「靖難」兵起時,南人 漢王忌太子有功,詭言彬不可用。潍曰:「彬,老將,必能滅賊,願急遣。」彬卒擒法良。 吐蕃諸部。 或謂解縉之謫,淮有力焉。其見疎於宣宗也,亦謂楊榮言淮病瘵,能染人云 淮 性明果,達於治體。 求朝廷刻金作誓詞,磨其金酒中,飲諸酋長以盟。衆議欲許之。淮曰:「彼勢 永樂中,長沙妖人李法良反。仁宗方監國,命豐城侯李彬討之。 然量頗隘。同列有小過,輒以 今此 叉時

帝稱善,遺太子巡視陝西,後以太子薨,不果。 脅從者千餘人。子祺走謁帥,力言不可,得免。洪武三年以文學選爲御史,上書請都關中。 胡廣,字光大,吉水人。父子祺,名壽昌,以字行。陳友諒陷吉安,太祖遣兵復之,將殺 子祺出爲廣西按察僉事,改知彭州。

方討燕,廣對策有「親藩陸梁,人心搖動」語,帝親擢廣第 冤獄,毁淫祀,修廢堰,民甚德之。遷延平知府,卒於任。 一,賜名靖,授翰林修撰。 廣,其次子也。 建文二年廷試,時

經史。 其不可,遂不許。廣上却封禪頌,帝益親愛之。 諸祥異。 顧勞良苦。廣善書,每勒石,皆命書之。十二年再北征,皇長孫從,命廣與燦、幼孜軍中講 塞,立馬議論,行或稍後,輒遣騎四出求索。 林學士,兼左春坊大學士。帝北征,與楊榮、金幼孜從。 成祖卽位,廣偕解縉迎附,擢侍講,改侍讀,復名廣,遷右春坊右庶子。永樂五年進翰 十四年進文淵閣大學士,兼職如故。 廣乃獻聖孝瑞應頌。帝綴爲佛曲,令宮中歌舞之。 嘗失道,脫衣乘驏馬渡河,水沒馬及腰以上,帝 帝徵烏思藏僧作法會,爲高帝、高后薦福,言見 數召對帳殿,或至夜分。 禮部郎中周訥請封禪。 過山川 廣言 阨

凉,太子爲致祭。 其言。 奔母喪還朝,帝問百姓安否。 廣性縝密。 十六年五月卒,年四十九。 帝前所言及所治職務,出未嘗告人。時人以方漢胡廣。 明年官其子糧翰林檢討。 對曰:「安,但郡縣窮治建文時姦黨,株及支親,爲民厲。」帝納 贈禮部尙書,諡文穆。 仁宗立,加贈廣少師。 文臣得諡, 自廣始。 然頗能 喪還,過南 持 大體。

乃進 與解縉等同直文淵閣,遷侍講。 金 幼 講。 · 孜,名善,以字行,新淦人。 解縉 書,楊士奇易,胡廣詩,幼孜春秋,因進春秋要旨三卷。 時翰林坊局臣講書東宮,皆先具經義,閣臣 建文二年進士。授戶科給事中。 成祖卽位,改翰林檢 閱 正,呈帝

餘 馬 勞 命 帝 年 軰 廣 召 以 從 與 廣 幼 幸 迹 上 永 純 尊。 北京。 樂 榮、幼孜,不獲。 、樂等纂五經四書性理大全,遷翰林學士。 孜 等傍輿行,言敵中事,親倚 Ŧi. 去不顧。 帝重 年遷右輸德兼侍講,因諭吏部,直 明年北 幼孜文學,所過山 **榮爲結鞍行,行** 征,幼孜與廣、榮扈行,駕駐淸水源,有泉湧出。 比至,帝喜動顏色。 又輒墜,榮乘以己騎,明 川要害,輒命記之。 甚。 嘗與廣、樂及侍郎金純失道陷谷中。 自後 內閣諸臣胡廣、金幼孜等考滿,勿改他任。 北征皆從,所撰有北征前後二錄。 十八年與榮並進文淵閣大 幼孜據鞍起草立就。 日始達行在所。 幼孜獻銘,榮獻詩,皆 是夜,帝遣使十 學士 使自 暮夜,幼孜墜 瓦剌來, ·二 年 七

平, 楡 在除暴安民。 木 帝謂榮、幼孜曰:「朕夢神人語上帝好生者再, 是何祥 Jil 一帝崩 年從北 然 秘 火炎崑岡 不 征,中道兵疲,帝以問羣臣。 發喪。 ,玉石俱燬,惟陛下留意。」帝然之,卽命草詔,招諭 榮計京師,幼孜 護 梓宮歸 莫敢對,惟 也。』樂、 幼孜 言不宜深 幼孜 對曰:「陛下此舉,固 入, 諸部。 不聽。 還軍至 次開

仁宗卽位, 拜戶部右侍郎兼文淵閣大學士。 尋加太子少保兼武英殿大學士。 是年十

**怠。」幼孜等頓首稱謝。** 朕與卿等當深用爲戒。」因取五人誥詞,親增二語云:「勿謂崇高而難入,勿以有所從違而或 前代人主惡聞直言,雖素所親信,亦畏威順旨,緘默取容。賢良之臣,言不見聽,退而杜口。 角門閱廷臣制誥,顧三學士曰:「汝三人及蹇、夏二尚書,皆先帝舊臣,朕方倚以自輔。 月命幼孜、榮、士奇會錄罪囚於承天門外。詔法司,錄重囚必會三學士,委寄益隆。 洪熙元年進禮部尚書兼大學士、學士如故,並給三俸。尋乞歸省 帝御西 嘗見

母。

明年,母卒。

時,家人囑請身後恩,不聽,曰:「此君子所恥也。」 政對曰:「太宗尋悔此役,故建憫忠閣。」帝曰:「此山崩於元順帝時,爲元亡徵。」對曰:「順帝 亡國之主,雖山不崩,國亦必亡。」宣德六年十二月卒。年六十四。贈少保,諡文靖。 疾苦,還奏之,帝嘉納焉。從巡邊,度雞鳴山。 幼孜簡易靜默, 宣宗立,詔起復,修兩朝實錄,充總裁官。 寬裕有容。 眷遇雖隆,而自處益謙。<br />
名其宴居之室曰「退庵」。 帝曰:「唐太宗恃其英武征遼,嘗過此山。」幼 三年持節寧夏,册慶府郡王妃。 所過詢兵民 疾革

胡儼,字若思 傅 三十 ,南昌人。少嗜學,於天文、地理、律曆、醫卜無不究覽。 五 金 幼 孜 胡 洪武中以舉人授

華亭教諭,能以師道自任。 母憂、服除,改長垣,乞便地就養,復改餘干。 學官許乞便地自

嚴始。

桐人祀之朱邑祠。 建文元年薦授桐城知縣。 四年,副都御史練子寧薦於朝曰:「儼學足達天人,智足資帷幄。」比 鑿桐陂水,溉田爲民利。 縣有虎傷人。嚴齋沐告於神,虎遁

召至,燕師已渡江。

侍講,掌翰林院事,輔皇太孫留守北京。十九年改北京國子監祭酒。 嘗不欲先人,然少戆。永樂二年九月拜國子監祭酒,遂不預機務。時用法嚴峻,國子生託 事告歸者坐戍邊。儼至,卽奏除之。七年,帝幸北京,召儼赴行在。明年北征,命以祭酒兼 **縉薦,授翰林檢討,與縉等俱直文淵閣,遷侍講,進左庶子。 父喪,起復。 儼在閣,承顧問,** 成祖卽位,曰:「儼知天文,其令欽天監試。」旣試,奏儼實通象緯、氣候之學。 尋叉以解

祭酒。致仕,復其子孫。 學二十餘年,以身率敎,動有師法。洪熙改元,以疾乞休,仁宗賜敕獎勞,進太子賓客,仍兼 嚴館閣宿儒,朝廷大著作多出其手,重修太祖實錄、永樂大典、天下圖誌皆充總裁官。居國

當是時,海內混一,垂五十年。帝方內興禮樂,外懷要荒,公卿大夫彬彬多文學之士。

宣宗卽位,以禮部侍郎召,辭歸。 家居二十年,方岳重臣咸待以師禮。嚴與言,未嘗

及私。 |子之正言,而不爲|公孫之阿曲。」世以爲知人。 自處淡泊,歲時衣食纔給。 初爲湖廣考官,得楊溥文,大異之,題其上曰:「必能爲董 正統八年八月卒,年八十三。

著扈從,胡儼久於國學。 其動輒得謗,不克令終,夫豈盡嫉賢害能者力固使之然歟。 閣權日重,實行丞相事。 正自持,而尤貴於厚重不洩。爲少年高才,自負匡濟大略,太祖俾十年進學,愛之深矣。彼 贊曰:明初罷丞相,分事權於六部。 觀諸臣從容密勿,隨事納忠,固非僅以文字翰墨爲勳績已也。 解縉以下五人,則詞林之最初入閣者也。夫處禁密之地,必以公 成祖始命儒臣直文淵閣,預機務。沿及仁、宣,而 黃淮功在輔導,胡廣、金幼孜勞

## 明史卷一百四十八

#### 列傳第三十六

楊士奇 楊榮 曾孫旦 楊溥 馬偸

給。 策,曰:「此非經生言也。」奏第一。 入內閣,典機務,數月進侍講。[1] 王叔英復以史才薦。遂召入翰林,充編纂官。 多游湖、湘間,館江夏最久。 楊士奇,名寓,以字行,泰和人。早孤,隨母適羅氏,已而復宗。 建文初,集諸儒修太祖實錄, 授吳王府審理副,仍供館職。 尋命吏部考第史館諸儒。 士奇已用薦徵授教授當行, 成祖卽位,改編修。 貧甚。 力學,授徒自 尚書張統得士奇 已,簡

雖至 政使徐奇載嶺南 親厚不得聞。 永樂二年選宮僚,以士奇爲左中允。 土物 在帝前、舉止恭慎、善應對、言事輒中。 **、饋廷臣,或得其目籍以進。** 五年進左諭德。 帝閱無士奇名,召問。 人有小過,嘗爲揜覆之。 士奇奉職甚謹,私居不言公事。 對日「一奇赴廣時 廣東布

列傳第三十

六

楊士

奇

燬

籍

羣 臣 作 詩 文 贈 行 臣 適 病 佛預 ,以故獨 不及。 今受否未可知,且 物 微, 當無他意。」帝 遽命

日 殿下當留意六經,暇 六年, 帝北巡, 命與蹇義、黃淮留輔 則觀 兩漢 詔 令。 太子。 詩 小技,不足爲也。」太子稱善 太子喜文辭,贊善王汝玉以詩法進。

盡徵東 奇以孝 言之。 凡 趙王 所稽 一年正 年少, 初,帝起兵時, 逐罷 敬 遲,皆臣等罪。」帝意解。 宮官黃淮等下 對, 旦, 寵異之。 賀。 且曰:「殿下天資高,即有過必知,知 日食。 明年, 帝北征。 漢王數力戰有 由是 獄。 禮部尚書呂震請勿罷朝賀。 兩王合而 士奇後至,宥之。 行在諸臣交章劾士奇不當 士奇仍輔太子居守。 功。 間 太子, 帝許 帝頗 以事 召問太子 成立爲太子。 S. 侍郎儀智持不可。 必改,存心愛人,決不負陛下 動。 漢王譖太子益急。 事。 九年還南京,召士奇問監 一獨宥,遂下錦衣衞獄, 士奇頓首言:「太子 旣而 不得立,怨望。 士奇亦引朱仁宗事 帝還, 尋 孝 以 託 國 釋之。 迎 敬 。」帝倪 帝 狀 駕緩, 如 又憐 初

削 陛 日 门田 下 兩 將 護衞,處之樂安。 十 徙都,輒請留守南 與 四 |義 年, 俱侍東宮,外人無敢爲 帝還京師, 明年進士奇翰林學士,兼故官。 京 微聞漢王 惟陛 奪嫡謀及諸不 下熟察其意。」帝 臣 兩 人言漢王 軌 事 者。 狀, 默 然,起還宮。 十九年改左春坊大學士,仍兼學士 以問 然漢王 蹇義。 兩遣就藩,皆不肯行。 居數 義不 H 對 了,帝盡 乃問 得 士奇。 漢 王 今知 對

明年復坐輔導有闕,下錦衣衛獄,旬日而釋。

英國 惜薪 士奇 士奇 少 、保,與同官楊榮、金幼孜並賜「繩愆糾繆」銀章,得密封言事。 ,謂二人曰「新華蓋學士來 公張輔服如之。 不 司 गु 傳旨徵棗 即位 震厲聲叱之。 l,擢禮部侍郎兼華蓋殿大學士。 八十萬斤, 朝罷,帝謂左右曰:「梓宮在殯, 易服豈臣 蹇義兼取二說進。 與前詔戾。」帝立命減其半。 ,必有 讀言,試共聽之。」士奇入言:「恩詔減歲供甫 明 帝御便殿,蹇義、 日, 帝素冠麻衣絰而視朝。 服制二十七日期滿,呂震請卽吉。 子所忍言, 尋進少傅。 夏原吉奏事未退。 士奇執是 廷臣 惟 下二月 心也。」進 帝望見 士奇及

卵、股 奇 疏 言。 官, 兼 一使草 兵部 復 乃使牧馬, 叉不 奏,待庭 時 念 ·藩司守令來朝,尚書<u>李慶建議發軍伍餘馬給有司,歲</u>課其駒。 尚書,並 敕行 卿孤 報。 中至 之。 立 有頃,帝御思善門,召士奇謂曰:「朕向者豈真忘之。 是貴畜 食三祿。 恐爲所傷,不欲 一夜漏 士奇 頓首 + 而賤士也,何以示天下後世。」帝許 士奇 刻。 謝。 一辭尚 報可。 羣 因 臣 書 卿言罷耳,今有辭矣。」手出陝西按察使陳智言養馬不 祿 習朝正旦儀,呂震請用樂,士奇與黃淮疏止。未報。 越 H 一,帝 召謂 口...口 「震每事誤朕、非卿等言,悔無及。」 中旨罷之,已而 聞呂震、李慶 士奇 寂然。 道:"田" 朝廷選賢授 輩皆 士奇 復 不 命 便 喜 力 士

帝 監 國 時 ,

域御 史舒仲成 ,至是欲罪之。 士奇曰:「陛下卽位, 詔向忤旨者皆得宥。

列

傳

第

Ξ

+

六

楊

士

奇

治 理 卿虞 仲成 議言事 ,則詔書不信,懼者衆矣。 謙 應韶 不密。帝怒,降一官。 陳言。 若加之罪, 如漢景帝之待衞綰,不亦可乎。」帝卽罷弗治。 則羣臣自此結舌矣。」帝立進謙副都御史,而 士奇爲白其罔,得復秩。 又大理少卿弋謙以言事得罪。 下敕 或有言大 引 過。

心 楊溥 耶? 於 一般 尙 國忘身,屢歷艱虞,曾不易志。 南 未 待 茲創 諸 倶充 歸 時 卿等以至 瘡 有上書頌太平者,帝以示諸大臣,皆以爲然。 臣 慚謝。 制『楊貞 總裁官。 痍 尚未復,民尚艱食。 一誠, 是年四月,帝賜士奇璽書曰:「往者朕膺監國之命,卿侍左右,同 一印』賜卿,尚克交修,以成明良之譽。」尋修太宗實錄, 未幾,帝不豫,召士奇與蹇義、黃淮、楊榮至思善門,命士奇書敕召太子 望匡弼。 惟 及朕嗣位以來,嘉謨入告,期予於治,正固 士奇曾五上章, 卿等皆無一言。 更休息數年,庶幾太平可期。」帝曰:「然。」因顧蹇義等曰: 士奇獨曰:「陛下雖澤被 與黃淮、金幼孜 不二、公節在股 天下,然流徙 心合德,徇 天下太平

辭 縣 ?」士奇曰:「太宗皇帝三子,今上惟兩叔父。 之單家橋 事當 宣宗卽 有 :實,天 一侍郎 位,修仁宗實錄,仍充總裁。 陳山 地 鬼 神 迎謁,言漢、趙二王實同 可欺乎。」際厲聲曰:「汝欲撓大計耶! 宣德元年,漢王高煦反。帝親征,平之。 心,請乘勢襲彰德執趙王。 有罪者不可赦,其無罪者宜厚待之, 今逆黨言趙實 際力贊決。 與謀,何 師還,次獻 疑則防 謂 無

使奉書至趙。趙王得書大喜。泣曰:「吾生矣。」卽上表謝,且獻護衞,言者始息。帝待趙王 惑羣言。」帝曰:「吾欲封羣臣章示王,令自處何如。」」士奇曰:「善,更得一璽書幸甚。」於是發 還京,帝思士奇言,謂曰:「今議者多言趙王事,奈何。」」士奇曰:「趙最親,陛下當保全之,毋 繼之,閽者不納。 之,使無虞而已。 何遽加兵,傷皇祖在天意乎。」時惟楊溥與士奇合。將入諫,榮先入,士奇 尋召義、原吉入。 二人以士奇言白帝。帝初無罪趙意,移兵事得寢。 比

言:「陛下卹民命以綏荒服,不爲無名。漢棄珠厓,前史以爲美談,不爲示弱,許之便。」尋命 且 擇使交阯者。 益親而薄陳山。 國。」帝是之,別遣使。於是棄交阯,罷兵,歲省軍興鉅萬。 英國公張輔、尚書蹇義以下,皆言與之無名,徒示弱天下。帝召士奇、榮謀。二人力 時交阯數叛。屢發大軍征討,皆敗沒。交阯黎利遣人偽請立陳氏後。帝亦厭兵,欲許 蹇義薦伏伯安口辯。士奇曰:「言不忠信,雖蠻貊之邦不可行。伯安小人,往

日

謂士奇曰:「趙王所以全,卿力也。」賜金幣。

高老有疾,趨朝或後,毋論奏。 不敗事。 太后慰勞之。 五 年春,帝奉皇太后謁陵,召英國公張輔、尚書蹇義及士奇、榮、幼孜、溥,朝太后於行 又誨朕當受直言。」士奇對曰:「此皇太后盛德之言,願陛下念之。」尋敕鴻臚寺,士 帝又語士奇曰:「太后爲朕言,先帝在青宮,惟卿不憚觸忤,先帝能從,以 帝嘗微行,夜幸士奇宅。 士奇倉皇出迎,頓首曰:「陛下奈何

列 傳

第三十六

楊

士奇

)奇,告之故。 以 社 稷宗 廟 之身自 且 曰:「 今 輕 一。一帝 ·而後 目 知 卿之愛朕 也。」 言,故來耳。」後數日,獲 盜, 有異謀。 帝召

廷臣 薪芻錢,減官 萬 已久,今更有 同 格者論 一歲 S) 三品品 Щ 輔 帝 佐 以四方屢水旱,召士奇 ,諸學士皆從,賦詩賡和,從容問 如 ,海內號爲治平。 以上及二司官,各舉所 法。」士奇復請撫逃民,察墨吏, 可恤者乎。」士奇曰:「前 田 額 ,理冤滯,汰工 帝乃倣古君臣豫遊 議 役,以廣德意。 知,備方面郡守選。 下詔寬恤,免災傷租稅及官馬虧額者。 詔減官 民間疾苦。 舉文學武勇之士,令極刑 田 事, 租,戶部徵 民大悦。 每歲首, 有所論奏,帝皆虛 皆報可。 如 踰 賜 故。」帝怫然 當是時 百官 年, 旬 帝謂 家 休。 懷 ,帝勵精圖治, 子孫皆得仕進。 聽 士奇 曰:「今首行之, 士奇因請並 車駕· 納 百二位 亦 時 幸西 民部 士奇等 蠲 叉 逋 清 賦 廢 F

之地 將賢否,阨塞險易遠近, 仕。 相 . 甚歡。 力言 金幼孜 帝之初 耶? 士奇 : 「榮曉暢邊務,臣等不及,不宜 卒。 即位 帝亦益親厚之,先後所賜珍果牢體金綺衣幣書器無算。 日 閣中惟 也, 願陛 內閣臣七人。 下以曲容臣者容榮。」帝意乃解。 士奇、榮、溥三人。 敵情順逆。 陳山 然頗 、張瑛 一以小眚介意。」 通 **榮疏**闓 一饋遺, 以東宮舊恩入,不稱,出 邊將歲時致良馬。 果毅,遇事 帝笑日 其後, 敢爲。 語稍稍聞, 「榮嘗短 敷從成祖 帝頗 爲他官。 卿 知之, 樂 及 以此愧士奇, 原吉,卿 北 黃淮 以問 征 一 能 以 乃爲 疾致 知邊

刑 京參贊機務大臣,分遣文武鎭撫江西、湖廣、河南、山東,罷偵事校尉。 事 獄 遣 一般覈 中使 宣宗崩,英宗卽位,方九齡,軍國大政關白太皇太后。太后推心任士奇、際、溥三人,有 治 百司。 閣諮議,然後裁決。 皆允行。 正統之初,朝政清明, 三人者亦自信,侃侃行意。 士奇等之力也。 士奇首請練士卒,嚴邊防,設南 三年,宣宗實錄成,進少 又請以次蠲租稅,慎

師。 四年乞致仕。 不允。 敕歸省墓。 未幾,還。

其 作 饋 樂 威 明 年 金。 福,百官小 是 時 途大興師征麓川,帑藏耗費,士馬物故者數萬。 中官王振 樂先省墓 有牴牾,輒執而繫之。 有寵於帝,漸預外庭事,導帝以嚴御下,大臣往往下獄。 ,歸不之知。 振欲借以傾榮, 士奇力解之, 得已。 廷臣人人惴恐,士奇亦弗能制 又明年,太皇太后崩,振勢益盛,大 樂尋卒,士奇、溥益孤。 也。 靖江王佐敬私

復 威泣 有 ,憂不能起。 人發閥橫虐數十事,遂下之理。 九年三月卒,年八十。 士奇以老疾在告。 贈太師,諡文貞。 天子恐傷士奇意,降韶慰勉。 有司 乃論 殺稷。

土

奇

既耄,

子稷傲很,嘗侵暴殺人。言官交章劾稷。

朝議不卽加

法, 封其狀示士奇。

領, 人,好推轂寒 西番貢 初 正統 (馬亦 初, 一士,所 悉給之。 士奇言瓦剌漸强,將爲邊患,而邊軍 薦達 有初未識面者。 士奇歿未幾, 也先果入寇,有土木之難,識者思其言。 而于謙、周忱、況鍾之屬,皆用士奇薦,居官至一二 ·缺馬,恐不能禦。 請於附近太僕寺關 叉雅 善知

列

傅

第

十年,廉能冠天下,爲世名臣云。

次子隨,以廕補尚寶丞。 成化中,進太常少卿,掌司

決,或至發怒。樂至,輒爲霽顏,事亦遂決。 前職,與在直諸臣同賜二品服。評議諸司事宜,稱旨,復賜衣幣。帝威嚴,與諸大臣議事未 料之審也。」江西盜起,遣使撫諭,而令都督韓觀將兵繼其後。 奏。榮曰:「寧夏城堅,人皆習戰,奏上已十餘日,圍解矣。」夜半,果奏圍解。帝謂榮曰:「何 更名樂。同值七人,樂最少,警敏。一日晚,寧夏報被圍。召七人,皆已出,獨樂在,帝示以 曰:「殿下先謁陵乎,先卽位乎。」成祖遽趣駕謁陵。自是遂受知。 楊榮,字勉仁,建安人,初名子榮。建文二年進士。授編修。 賊就撫奏至,帝欲賜敕勞觀。 既卽位,簡入文淵閣,爲 成祖初入京,榮迎謁馬首

明年,母喪乞歸。 **值盛暑,親剖瓜噉之。尋進右庶子,兼職如故。明年以父喪給傳歸。** 五年命往甘肅經畫軍務,所過覽山川形勢,察軍民,閱城堡。還奏武英殿。 帝以北行期迫不許,命同胡廣、金幼孜扈從。 甘肅總兵官何福言脫脫不 旣葬, 起復視事。又 帝大悅。

花等請降,需命於亦集乃。 命榮往甘肅偕福受降,持節即軍中封福寧遠侯。 因至寧夏,與

寧陽侯陳懋規畫邊務。還陳便宜十事。帝嘉納之。

榮 喪,命中官護行。 請盡以供御之餘給軍,而令軍中有餘者得相貸,入塞,官爲倍償。軍賴以濟。 八 年從 出塞,次臚朐河。 還詢閩中民情及歲豐歉。 選勇士三百人爲衞,不以隸諸將,令榮領之。 榮具以對。 尋命侍諸皇孫讀書文華殿。 師旋,餉不繼。 明年乞奔

侯李彬 子,從還京師。 日 領 者亦降。 尚 寶事。 擇將屯田 議進兵方略。 年,甘肅守臣宋號言,叛寇老的罕逃赤斤蒙古,且爲邊患。 明年復與廣、幼孜從北巡。 凡宣詔出令,及旗志符驗,必得燦奏乃發。 ,訓練有方,耕耨 明年復從北征 際還奏言,隆冬非用兵時,且有罪不過數人,兵未可出。 (有時,卽兵食足矣。」十四年與金幼孜俱進翰林學士,仍兼庶 又明年征 瓦剌,太孫侍行。 帝嘗晚坐行幄,召際計兵食。 帝命際以間陳說經史,兼 乃復遣榮至陝西,會豐城 帝從其言,叛 樂對

故。 帝 目 明 「吾固 年定都 六年,胡 知其可, 北京。 廣卒, 第求代|榮者。」諸大臣乃不敢言。 會三殿災,爍麾衛士出圖籍制誥,昇東華門外。 命際掌翰林院事,益見親任。 諸大臣多忌際,欲疏之,共舉爲祭酒。 十八 (年進)文淵閣大學士, 兼學士如 帝褒之。 樂與幼孜陳

便宜

十事。

報

可

時。 前 繼,死亡十二三。大軍抵答蘭納木兒河,不見敵。 :民復業且二十年,一旦復徵之,非示天下信。」從之。 明年從出塞,軍務悉委際,晝夜見無 席,受上賞。已,復下詔征阿魯台。或請調建文時江西所集民兵。帝問榮。榮曰:「陛下 帝時稱楊學士,不名也。又明年復從北征。當是時,帝凡五出塞,士卒饑凍,饋運不 二十年復從出塞,軍事悉令參決,賚予優渥。師還,勞將士,分四等賜宴,榮、幼孜皆列 帝許之。 帝問羣臣當復進否。 羣臣唯唯,惟榮、幼

詐也,罪不小。」衆曰:「然。」乃具大行月日及遺命傳位意,啓太子。 際與少監海壽先馳計。 旣至,太子命與蹇義、楊士奇議諸所宜行者。 外 人 莫測。或請因他事爲敕,馳報皇太子。二人曰:「誰敢爾!先帝在則稱敕,賓天而稱敕, 去京師尚遠,秘不發喪,以禮斂,鎔錫爲碑,載輿中。所至朝夕進膳如常儀,益嚴軍令, 還次楡木川,帝崩。中官馬雲等莫知所措,密與燦、幼孜入御幄議。二人議,六師在

時,所行喪禮及處分軍事狀。帝賜敕褒勞,賚予甚厚,進工部尚書,食三祿。時士奇、准皆 仁宗卽位,進太常卿,餘官如故。 尋進太子少傅、謹身殿大學士。 旣而有言際當大行

辭尚書祿,榮、幼孜亦固辭。不允。

宣德元年,漢王高煦反。 帝召樂等定計。 際首請帝親征,曰:「彼謂陛下新立,必不自

今出不意,以天威臨之,事無不濟。」帝從其計。 至樂安,高煦出降。 師還,以決策功,

受上賞,賜銀章五,褒予甚至。

輕騎出喜峰口,破敵而還。五年進少傅,辭大學士祿。 三年從帝巡邊,至遵化。 聞兀良哈將寇邊,帝留扈行諸文臣於大營,獨命榮從。 九年復從巡邊,至洗馬林而還。

英宗卽位,委寄如故。 正統三年,與士奇俱進少師。 五年乞歸展墓,命中官護行。 還

至武 林驛而卒,年七十。贈太師,諡文敏,授世襲都指揮使。

如此。 |榮曰:「愚民苦有司,不得已相聚自保。兵出,將益聚不可解。遣使招撫,當不煩兵。」從之, 大事,不愧唐姚崇,而不拘小節,亦頗類之。 總裁官。 悻直取禍,吾不爲也。」故其恩遇亦始終無間。 重修太祖實錄及太宗、仁、宣三朝實錄,皆爲 店、李時勉之不死,都御史劉觀之冤戍邊,皆賴其力。 嘗語人曰:「事君有體,進諫有方,以 盜果息。 樂歷事四朝,謀而能斷。永樂末,浙、閩山賊起,議發兵。 論事激發,不能容人過。 然遇人觸帝怒致不測,往往以微言導帝意,輒得解。 夏原 先後賜賚,不可勝計。 安南之棄,諸大臣多謂不可,獨榮與士奇力言不宜以荒服疲中國。 性喜賓客,雖貴盛無稍崖岸,士多歸心焉。或謂傑處國家 帝時在塞外,奏至,以示際。 其老成持重類

列傳第三十六 楊樂 家富,曾孫曄為建寧指揮,[三以貲敗。詳宦官傳。

廣軍務 浙江 卿極言 |提學副使。 **嘩從弟旦,字晉叔,弘治中進士。** 不可。 ,計平番禺、清遠、河源諸瑤。 會吏部尚書喬字罷,召旦代之,未至,爲給事中陳洸所劾, **瑾誅,累擢至戶部侍郎,督凉、通倉,出** 嘉靖初,遷至南京吏部 歷官太常卿。 以忤劉瑾,左遷知溫 理 餉 尚書。 甘 肅。 張璁、桂萼驟進, 還,進右都御史,總 州府, 勒致仕。 治最, 年七十 且 一率九 督 稍 兩 遷

餘卒。

黄淮 子數周 衞獄 獻。 **嘗讀漢書** 速至 太子 楊溥,字弘濟,石首人。 家 ,大悅。 北京緊獄。 人 ,稱張釋之賢。 供食數絕。 久之,以喪歸。 及金問至,帝益怒曰:「問何人,得侍太子」」下法司鞫,連溥,逮繫錦衣 而帝意不可測, |溥 |日 與楊榮同舉進士。 時太子 釋之誠賢,非文帝寬仁, ,監國, 旦夕且死。 命起視事。 授編修。 溥益奮,讀書不輟。 未得行其志也。」採文帝 十二年, 永樂初,侍皇太子爲洗馬。 東宮遣使迎帝 繫十年,讀經史諸 遲,帝怒。 事 編 太子 類以

仁宗卽位,釋出獄,擢翰林學士。 嘗密疏言事。 帝褒答之,賜鈔幣。 已,念溥由己故久

繼,蹇義薦學錄楊敬、訓導何澄。詔官繼博士,敬編修,澄給事中,日值閣中。命溥掌閣事, 困,尤憐之。明年建弘文閣於思善門左,選諸臣有學行者侍值。 士奇薦侍講王進、儒士陳

親授閣印,曰:「朕用卿左右,非止學問。欲廣知民事,爲治道輔。 有所建白,封識以進。」尋

進太常卿,兼職如故。

九年遷禮部尙書,學士值內閣如故。

宣宗卽位,弘文閣罷,召溥入內閣,與楊士奇等共典機務。 居四年,以母喪去,起復。

幾,宜與五臣共計。」正統三年,宣宗實錄成,進少保、武英殿大學士。溥後士奇、榮二十餘 太后亦久憐之,故爲溥言之如此。太后復顧帝曰:「此五臣,三朝簡任,俾輔後人。皇帝萬 爲太子,被讒,宮僚多死詔獄,溥及黃淮一繫十年,瀕死者數矣。仁宗時時於宮中念諸臣, 年入閣,至是乃與士奇、際並。六年歸省墓,尋還。 公張輔及士奇、傑、溥、尚書胡濙入,諭曰:「卿等老臣,嗣君幼,幸同心共安社稷。」又召溥前 曰:「仁宗皇帝念卿忠,屢加歎息,不意今尙見卿。」溥威泣,太后亦泣,左右皆悲愴。始仁宗 人供職。 英宗初立,與士奇、榮請開經筵,豫擇講官,必得學識平正、言行端謹、老成達大體者數 且請慎選宮中朝夕侍從內臣。太后大喜。一日,太后坐便殿,帝西向立,召英國

是時,王振尙未横,天下淸平,朝無失政,中外臣民翕然稱「三楊」。以居第目士奇曰西

列

第三十六

楊溥

楊,榮曰東楊,而溥嘗自署郡望曰南郡,因號爲南楊。 壽尚寶司 後進望輕。 學行,榮有才識,溥有雅操,皆人所不及云。比榮、士奇相繼卒,在閣者馬愉、高穀、 朝、循牆而走。諸大臣論事爭可否,或至違言。溥平心處之,諸大臣皆歎服。 而後起者爭暴其短,以爲依違中旨,釀成賊奄之禍,亦過刻之端也。 丞。後三年,振遂導英宗北征,陷土木,幾至大亂。時人追思此三人者在,當不至 溥孤立,王振益用事。十一年七月,溥卒,年七十五。贈太師,諡文定。 溥質直廉靜, 無城府。 性恭謹 時謂士奇有 官其孫 曹鼐皆 r, 每入

愉 失言。樂曰:「彼厭吾輩矣,一旦內中出片紙令某人入閣,且奈何?及此時進一二賢者,同 心協力,尚可爲也。」士奇以爲然。翼日,遂列侍讀學士苗衷、侍講曹鼐及隃名以進。由是 而後已。」榮曰:「吾輩衰殘,無以効力,當擇後生可任者,報聖恩耳。」 振喜而退。 士奇咎榮 三十七人進學文淵閣,以隃爲首。正統元年充經筵講官,再遷至侍讀學士。時王振用事 一日,語楊士奇、榮曰:「朝廷事久勞公等,公等皆高年,倦矣。」士奇曰:「老臣盡瘁報國,死 被擢用。五年詔以本官入內閣,參預機務, 馬愉,字性和,臨朐人。宣德二年進士第一。授翰林修撰。 **蓴進禮部右侍郎。十二年卒。贈尚書兼學** 九年秋特簡史官及庶吉士

贈官無職,自愉始。

帝納焉。 輸端 邊警,方命將,而別部使至,衆議執之。腧言:「賞善罰惡,爲治之本。 重簡默,門無私謁。 論事務寬厚。 嘗奏天下獄久者多瘐死, 宜簡使者分道決遣。 波及於善,

非法。

乘人之來執之,不武。」帝然之,厚遣其使。

**耆碩。溥入閣雖後,德望相亞,是以明稱賢相,必首三楊。** 下之務,保璟善守文,以持天下之正。三楊其庶幾乎。 相資,靖共匪懈。史稱房、杜持衆美効之君,輔贊彌縫而藏諸用。 贊曰:成祖時,士奇、 榮與解縉等同直內閣, 溥亦同爲仁宗宮僚,而三人逮事四朝, 爲時 均能原本儒術,通達事幾, 又稱姚崇善應變,以成天 協力

#### 校勘記

數月進侍講 錄卷一一四正統九年三月甲子條改。 侍講,原作「侍讀」,據本書卷一〇九宰輔年表、明史稿傳三三楊士奇傳、英宗實

正固不二 又本傳下文「楊貞一印」,作「貞一」,與「貞固不二」相應。 正固,當作「貞固」,明史考證醬逸卷七:「正,改貞。」按易乾文言:「貞固足以幹事。

列

傅

第

三 十

六

校勘記

四一四六

曾孫曄爲建寧指揮 曄,原作「業」,本書卷三○四汪直傳、明史稿傳三三楊榮傳、憲宗實錄卷

四汪直傳、憲宗實錄卷一六二成化十三年二月丁丑條均作「建寧指揮」。按本書兵志建安未置 一六二成化十三年二月丁丑條均作「楊曄」,據改。建寧指揮,原作「建安指揮」,本書卷三〇

衞,作「建寧」是,據改。

# 明史卷一百四十九

### 列傳第三十七

蹇義 夏原古 俞士吉 李文郁 鄒師顏

右侍郎。是時齊泰、黃子澄當國,外興大師,內改制度,義無所建明。國子博士王紳遺書責 曰:「朕且用義。」由是朝夕侍左右,小心敬愼,未嘗忤色。惠帝旣卽位,推太祖意,超擢吏部 叔後乎。」||瑢頓首不敢對。帝嘉其誠篤,爲更名義,手書賜之。滿三載當遷,特命滿九載, 蹇義,字宜之,巴人,初名瑢。 洪武十八年進士。 授中書舍人,奏事稱旨。 帝問:「汝蹇

容言曰:「損益貴適時宜。前改者固不當,今必欲盡復者,亦未悉當也。」因舉數事陳說本 |燕師入,迎附,遷左侍郎。 數月,進尙書。 時方務反建文之政,所更易者悉罷之。 義從

列傳第三十七 蹇義

末。帝稱善、從其言。

之,義不能答。

文武長東擾民者數人,條興革數十事奏行之。還治部事。明年,帝北征還,以太子曲宥呂 九年,三殿災,敕廷臣二十六人巡行天下。。義及給事中馬俊分巡應天諸府,問軍民疾苦,黜 命兼理他部事,職務塡委,處之裕如。十七年以父喪歸,帝及太子皆遣官賜祭。詔起復。十 戶部尚書夏原吉與議齊名,中外稱曰「蹇、夏」。滿三考,帝親宴二人便殿,褒揚甚至。數奉 七年,帝巡北京,命輔皇太子監國。 永樂二年兼太子詹事。 帝有所傳諭太子,輒遣義,能委曲導意。帝與太子俱愛重之。 義熟典故,達治體,軍國事皆倚辦。時舊臣見親 用者,

|奇嘗於帝前謂義曰:「何過慮。」義曰:「恐鹵莽爲後憂耳。」帝兩是之。 楊榮嘗毀義。 印』賜卿,俾藏於家,傳之後世,知朕君臣共濟艱難,相與有成也。」時惟楊士奇亦得賜「貞 十餘年,夷險一節。朕承大統,贊襄治理,不懈益恭。朕篤念不忘,茲以己意,創製『蹇忠貞 震壻主事張鶴朝參失儀,自罪義不匡正,逮義紫錦衣衞獄。又明年春得釋。 曰:「爨朕監國,卿以先朝舊臣,日侍左右。兩京肇建,政務方殷,卿勞心焦思,不恤身家,二 少保,賜冠服、象笏、玉帶,兼食二祿。歷進少師,賜銀章一,文曰「繩愆糾繆」。已,復賜璽書 |義頓首言:「際無他。即左右有讒榮者,願陛下愼察。」帝笑曰:「吾固弗信也。」 仁宗卽位,義、原吉皆以元老爲中外所信。帝又念義監國時舊勞,尤厚倚之。首進義 尋命與英國公輔及原吉同監修太宗實錄。 義視原吉尤重厚,然過於周愼。 士 帝不直

以爲制。迨世宗營永陵,始益崇侈云。

躬。 軍民建言章奏。 理,共寧邦家。 年從巡邊還。 今黃髮危齒,不宜復典冗劇,傷朝廷優老待賢之禮。 英宗卽位,齊宿得疾。 帝征樂安,義、原吉及諸學士皆從,預軍中機務,賜鞍馬甲胄弓劍。及還,賚予甚厚。三 帝以義、原吉、士奇、榮四人者皆已老,賜璽書曰:「卿等皆祖宗遺老, 畀輔朕 官祿悉如舊。」明年,郭璡代爲尙書。尋以胡濙言,命義等四人議天下官吏 復賜義銀章,文曰「忠厚寬宏」。 遣醫往視,問所欲言。 七年詔有司爲義營新第於文明門內。 對曰:「陛下初嗣大寶,望敬守祖宗成憲, 可輟所務,朝夕在股左右討論至

始終不渝耳。」遂卒,年七十三。贈太師,諡忠定。

之遇人以誠,范景仁之不設城府,義兼有之。」 義 爲 人質直孝友,善處僚友間,未嘗一語傷物。

士奇常言:「張詠之不飾玩好,傅堯兪

子英,有詩名,以廕爲尚寶司丞,歷官太常少卿。

列 僔

第三十七

蹇 義

曹 鄕 生皆 郎 欲 皆悅 宥 務 薦 中 之, 入太 棄 逐 叢 夏 服 市 脞 原 新 處處 學 吉 持 教尚 **外之,移** 建 亦 之悉 選 字 文 可。 維 入 書者, 初, 禁 計 有 帝怒。 擢 駐 條 中 其 蘄 書 戶部 原吉也。」帝曰:「 理 、先德 一,倘 制誥。 州 問 右 興人。 書 侍 郁新 誰 郎。 諸 教若。」新頓首 生或 父時敏,官湘陰教諭,遂家焉。原吉早孤,力學養母。 甚 明 「重之。 喧笑, 年充 原吉能佐 採訪使。 有劉 原吉 日 尚 郞 危 書理 堂後書算生。」 中者 坐嚴 巡 部 福 一。忌其 然。 建,所 事,汝 太祖 能 欲陷 過 郡 帝 詗 會新刻諸 而 邑, 之耶 乃下 異之。擢 核 ·書算 \_! 吏治, 劉 司 郎 生 怠 戶 於 中 事 咨民隱。 部 與 獄 者 主 書 以 劉

不 而 難 聽 繼 與與 成 者,且 祖 蹇義 卽 位 重 同 可或 進尙 困 民,吾 執 書。 原吉 不 以獻。 偕義等詳 恋 也。 帝釋之,轉左侍 定 賦 役諸 制。 鄎。 建 或言原吉建文時用事,行司 三十餘事 背 簡 便易 遵守。 不 可 日:「行之 信。 帝

復 忍 史兪 以 行 獨 時 沙波 蓄 適 士 浙 吉 洩。 西 白茆塘 事 齎 大 竣, 從 水 水 之。 有 利 還京師,言水 劉家河、大黃浦 書 司 役 賜 治不 之。 十餘萬 效。 原 古請 雖 人。 永樂元年 由 原吉 故 循 大理 道 禹 布 入 三江 少卿袁復爲之副。 命原吉治之。 海 衣 入海 徒 而 步,日 支流 故蹟,濬 夜 未 經 盡 尋命侍郎李文郁 吳凇 畫 疏 已,復命陝西參政宋性佐之。 洩, 盛 下 暑 非 流 不 Ŀ 經 張蓋 久 接 計。 爲之副,復使 太 目 湖 明 年 而 民勞, 度 正月,原吉 地 僉都御 爲閘, 吾 九 何

趙居任往 畢,水洩,蘇、松農田大利。三年還。其夏,浙西大饑,命原吉率兪士吉、袁復及左通政 .振,發粟三十萬石,給牛種。 有請召民佃水退淤田益賦者,原吉馳疏止之。姚廣

孝還 自浙西,稱原吉曰:「古之遺愛也。

難 諸 中, 種 或 ,以給邊蘇民,且便商賈。 功臣 時檢閱之。 六年 亡何,郁新卒,召還,理部事。 大起北都宮闕,供億轉輸以鉅萬萬計,皆取給戶曹。 封賞,分封諸藩,增設武衞百司。 命督軍民輸材北都,詔以錦衣官校從,治怠事者。 一日,帝問天下錢穀幾何,對甚悉,以是益重之。 皆報可。 首請裁冗食,平賦役,嚴鹽法、錢鈔之禁,清倉場,廣屯 凡中外戶口、府庫、田賦贏縮之數,各以小簡書置懷 已,又發卒八十萬問罪安南,中官造巨艦 原吉悉心計應之,國用不 原吉慮犯者衆,告戒而後行,人 當是時,兵革初定,論「靖 絀。 通海外

感 悅。

日 非律也,假實爲盜,將何以加了乃止。 七年,帝北巡,命兼攝行在禮部、兵部、都察院事。 有二指揮冒月廩,帝欲斬之。 原吉

决 肅 庶務。 然。 八 (年,帝: 帝還,賜 朝退,諸曹郞御史環請事。 北 征,輔太孫留守北京,總行 鈔幣、鞍馬、牢醴,慰勞有加。 原吉 在九卿事。 口答手書,不動聲色。 尋從還南京,命侍太孫周行鄉落,觀民間疾 時諸司草創,每旦,原吉入佐太孫參 北達行在,南啓監國,京師

列

傳

第

=

+

七

夏 原

吉

臣 . 日 「高皇帝養賢以貽朕。 原吉 取 齏 黍以 進,曰:「願殿下食此,知民艱。」九載滿,與蹇義皆宴便殿,帝指二人謂羣 欲觀古名臣,此其人矣。」自是屢侍太孫,往來 兩京, 在道 隨事

納忠,多所裨益。

罪。 非輕舉也。」言者因劾大臣。 直言,羣臣多言都北京 「吾輩歷事久,言雖失,幸上憐之。 撫流亡,蠲逋負以寬民力。」明年,三殿災,原吉復申前請。 臣等備員大臣 十八年,北京宮室成,使原吉南召太子、太孫。 ,不能協贊大計,罪在臣等。」 非便。 帝命跪 帝怒,殺主事 若言官得罪,所損不細矣。」衆始歎服 午門外質辨。 蕭儀 帝意解, 曰:「方遷都時, 大臣爭詈言者, 旣還,原吉言:「連歲營建,今告成。 兩宥之。 亟 命所司行之。 與大臣密議, 原吉獨奏曰一彼 或尤原吉背初 初 以殿災詔求 而後定, 應 宜 無

窮 恂恂 欲 效韓愈 也。 岩無 原吉雖居戶 從 之。 耶 預 者。 西域法王來朝,帝欲郊勞,原吉不可。 交阯 部,國家大事輒令詳議。 平,帝問 遷官與賞孰 帝毎 便。 對曰:「賞費於一 御便殿闕門,召語移時,左右莫得聞。 及法王入,原吉見,不拜。 時,有限 **"遷官爲後** 帝笑日:「 日 費,無 退 卿 則

沙 有 通謀者。 山 東 唐賽 見反,事平,俘脅從者三千餘人至。 原吉以百口保之,乃得寢。 原吉請於帝,悉原之。 谷王橞叛,帝疑長

遣將往征,勿勞車駕。」帝怒,立命原吉出理關平糧儲。而吳中入對如賓言,帝益怒。召原 能起。太子令出獄,與議喪禮,復問赦詔所宜。對以振饑,省賦役,罷西洋取寶船及雲南、 惟布衣瓦器。明年北征,以糧盡引還。已,復連歲出塞,皆不見敵。還至楡木川,帝不豫, 古繫之內官監,幷繫大理丞鄒師顏,以嘗署戶部也。實懼自殺。遂幷籍原吉家,自賜鈔外, 等議,皆言兵不當出。未奏,會帝召賓,賓力言軍興費乏,帝不懌。召原吉問邊儲多寡,對 交阯採辦諸道金銀課。悉從之。 顧左右曰:「夏原吉愛我。」崩聞至之三日,太子走繫所,呼原吉,哭而告之。原吉伏地哭,不 曰:「比年師出無功,軍馬儲蓄十喪八九,災眚迭作,內外俱疲。況聖躬少安,尙須調護,乞 十九年冬,帝將大舉征沙漠。命原吉與禮部尚書呂震、兵部尚書方賓、工部尚書吳中

尙書如故,食三祿。原吉固辭,乃聽辭太子少傳祿。賜「繩愆糾繆」銀章,建第於兩京。 尋加太子少傅。 呂震以太子少師班原吉上,帝命鴻臚引震列其下。 進少保,兼太子少傅、 艱難。卿有喪,股獨無喪乎。」厚賜之,令家人護喪,馳傳歸葬,有司治喪事。原吉不敢復言。 仁宗卽位,復其官。方原吉在獄,有母喪,至是乞歸終制。帝曰:「卿老臣,當與朕共濟

年,漢王高煦反,亦以靖難爲辭,移檄罪狀諸大臣,以原吉爲首。帝夜召諸臣議。楊榮首勸 已而仁宗崩,太子至自南京。原吉奉遺詔迎於盧溝橋。宣宗卽位,以舊輔益親重。明

帝 親 且兵 征 貴神速,卷甲趨之,所謂 帝 難 原吉日 :「獨不見李景隆 先人有奪人之心也。 已事耶? 臣昨見所遣將,命 樂策善。」 帝意遂決。 下卽 色變,臨 師還, 賚予加 事 可 知

等,賜閽者三人。原吉以無功辭。

不

聽

繪 世 以 朝實錄成,復賜金幣、鞍馬。 何凍而斃之。」反覆力諫。 世 事,嘗親畫壽星圖 大官之饌,且犒將士。 無 三年,從北巡。 所 與。 以賜。 帝取原吉橐糗嘗之,笑曰:「何惡也。」對曰:「軍中猶有餒 從閱武兔兒山,帝怒諸將慢,褫其衣。 帝曰:「爲卿釋之。」再與蹇義同賜銀印,文曰「含弘貞靖」。帝雅 其他圖畫、服食、器用、銀幣、 旦入謝,歸而卒,年六十五。 玩好之賜,無虛日。 贈太師,諡忠靖。 原吉曰:「將帥, 敕戶部 五. 者。」帝命 國 年正 爪牙, 復其家, 月,兩 善 奈 賜

犯未 請。 服金 入朝引咎,帝命易之。 嘗不 平江 織 原吉 賜 怒。 |伯陳瑄初亦惡原吉,原吉顧時時稱瑄才。 衣。 曰:「此歲終大辟奏也。」與同列飲他所,夜歸值雪,過禁門,有欲不下者。 有雅量,人莫能測其際。 始忍於色,中忍於 原吉曰:「勿怖,汚可浣也。」 呂震嘗傾 原吉。 心,久 同列有善,卽採納之。 則 震爲子乞官,原吉以震在「靖難」 無可忍矣。」嘗夜閱爱書,撫案 又有汚精微文書者,更叩頭請死。 或問原吉:「量可學乎?」曰:「吾幼 或有 小過,必爲之掩覆。 而歎, 時有 筆欲 守城功,為之 原吉 下 不 原吉日 吏汚 問,自 輒 止 所

「君子不以冥冥墮行」。其愼如此。

之世,外兼臺省,內參館閣,與三楊同心輔政。議善謀,榮善斷,而原吉與士奇尤持大體,有 原吉與義皆起家太祖時。 義秉銓政,原吉筦度支,皆二十七年,名位先於三楊。仁、宣

子暄,以廕爲尚寶司丞。喜談兵,景泰時,數上章言兵事,有沮者,不獲用。終南京太

常少卿。

古大臣風烈。

蘇、松。旣而復職,還上聖孝瑞應頌。帝曰:「爾爲大臣,不言民間利病,乃獻諛耶」, 擲還 州及湖廣,能辨釋冤獄。成祖卽位,進僉都御史。奉詔以水利書賜原吉,因留督浙西農政。 悉得免。尋爲都御史陳瑛所劾,與大理少卿袁復同繫獄。復死獄中,士吉謫爲事官,治水 湖州逋糧至六十萬石,同事者欲減其數以聞。 | 土吉曰:「欺君病民,吾不爲也。」 具以實奏, 俞士吉,字用貞,象山人。建文中,為兗州訓導。上書言時政,擢御史。 出按鳳陽、徽

之。宣德初,仕至南京刑部侍郎,致仕。 李文郁,襄陽人。永樂初,以戶部侍郎副原吉治水有勞。 後坐事調遼東二十年。仁宗

即位,召還,爲南京通政參議,致仕。

列傳

第三十七

夏原吉

校勘記

呂震聞於朝,宣宗命驛舟送之。詔京官卒者,皆給驛,著爲令。 戶部,與原吉同下獄。 鄒師顏,宜都 仁宗立,釋爲禮部侍郎。 永樂初,爲江西參政,坐事免。 省墓歸、還至通州、卒、貧不能歸葬。 尋以薦擢御史,有直聲,遷大理 丞,署 尙書

太祖,至成祖益任以繁劇。而二人實能通達政體,諳練章程,稱股肱之任。仁、宣繼體,委 遠矣哉。 寄優隆,同德協心,匡翼令主。 贊曰:壽曰「敷求哲人,俾輔于爾後嗣」。 用使吏治修明,民風和樂,成績懋著,蔚爲宗臣。 蹇義、夏原吉自筮仕之初,即以誠篤幹濟受知 樹人之效,

### 校勘記

- (一)以太子曲宥呂震肾主事張鶴朝參失儀 三六呂震傳、紅格本太宗實錄卷二五一永樂二十年九月丙寅條改 張鶴, 原作「張鸀」,據本書卷一五一呂震傳、明史稿傳
- 或言原吉建文時用事 原脫「或」字,句無主語。 據明史稿傳三四夏原吉傳、 明書卷二八夏原

吉傳補。

## 列傳第三十八

郁新 趙 羾 金忠 李慶 師逵 古朴 向寶

陳壽 虞謙 呂升 馬京 許思溫 仰瞻 嚴本 劉季箎 湯宗 劉辰 楊砥

疾歸。 五萬 右侍郎。 塞下,按引支鹽,邊儲以足。 石,新定議減五之四,並定郡王以下祿有差。 郁新,字敦本,臨淮人。 嘗問天下戶口田賦,地理險易,應答無遺,帝稱其才。 洪武中,以人才徵,授戶部度支主事。 夏原吉爲戶部主事,新重之,諸曹事悉委任焉。 又以邊餉不繼,定召商開中法,令商輸 尋進尙書。 遷郞 中。 時親王歲祿米 踰年, 擢本部 建文二年引

栗

列

贖罪者於南京倉。 武官例,米鈔兼給。 石。 可 得輸官。 至八柳樹諸處,令河南車夫陸運入衞河,轉輸北京。」從之。又言:「湖廣屯田所產不一,請皆 淮河、沙河運至陳州潁溪口跌坡下,復用淺船載二百石者運至跌坡上,別用大船運入黃河。 代者。」輟朝一日,賜葬祭,而召夏原吉還理部事。 豆、麥、芝蔴與米等。」著爲令。 二年議公、侯、伯、駙馬、儀賓祿,二百石以上者,請如文 初,轉漕北京,新言:「自淮抵河,多淺灘跌坡,運舟艱阻。 成 祖卽位,召掌戶部事,以古朴爲侍郎佐之。永樂元年,河南蝗, 粟穀、糜黍、大麥、蕎穄二石,准米一石。稻穀、薥秫二石五斗,移稗三石,各准米一 皆允行。是年八月卒於官。帝歎曰:「新理邦賦十三年,量計出入,今誰 三年以士卒勞困,議減屯田歲收不如額者十之四五,又議改 請別用淺船載三百石者,自 有司不以聞,新劾治 納 米北京

|新長於綜理,密而不繁。其所規畫,後不能易。

阨 寒,並 趙 永樂二年使交阯,還奏稱旨。 M,字雲翰,夏人,徙祥符。 屯戍所宜以進。 帝以爲才,遷員外郎。 洪武中,由鄉舉入太學,授兵部職方司主事。 擢刑部侍郎,改工部,再改禮部。 建文初,遷浙江參政,建策捕海寇,有功。 五年進尚書,賜宴華蓋 圖天下要

州縣 殿,撤膳羞遺其母。 狐 不以奏。 ,撫綏新集,民安其業。 帝怒曰:「是且使朕失遠人心。」遂下之獄。 初,孤每以事爲言者所劾,帝不問。 十五年丁母艱。 起復,改兵部尚書,專理塞外兵事。 尋得釋,使督建隆慶、保安、永寧諸 九年秋,朝鮮使臣將歸,例有賜齊, 帝北征,

仁宗嗣位,改南京刑部。 宣德五年,御史張楷劾狐及侍郎兪士吉怠縱。 正統元年卒,年七十三。 召至,命致仕。

轉餉

有方。

問,術益驗,且時進謀畫。 編卒伍,賣卜北平市,多中。 得鑄印 金忠,鄞人。 乘軒之卦。 少讀書,善易卜。 曰:「此象貴不可言。」自是出入燕府中,常以 **遂拜右長史,贊戎務,爲謀臣矣。** 市人傳以爲神。 兄戍通州亡,忠補戍,貧不能行,相者袁珙資之。 僧道行 南兵數攻城不克。 稱於成祖 所占勸 成祖將起兵、託疾召忠卜, 已, 舉 召置左右,有疑輒 大事。 成祖 旣至, 深信

烫子 高煦從戰 成祖 稱 帝,論佐命功,擢工部 有 功,許 以爲太子。 右侍郎,贊世子守北京。 至是淇國公丘福等黨高煦,勸帝立之。獨忠以爲不可,在 尋召還,進兵部尙書。帝起 兵時,

列

傅

第

Ξ

+

八

趙

羾

金

忠

帝前 子爲皇太子,而忠爲東宮輔導官,以兵部尚書兼詹事府詹事。 歷數古嫡孽事。 帝不能奪,密以告解縉、黃淮、尹昌隆。 縉等皆以忠言爲是。於是立世 六年命兼輔皇太孫

忠発冠 十二年北征還,悉徵 帝 北 頓首流涕,願 征,留忠與蹇義、黃淮、楊士奇輔太子監國。 東宮官屬下獄。 連坐以保之。 以故太子得無廢,而宮僚黃淮、楊溥等亦以是獲全。 以忠勳舊不問,而密令審察太子事。 是時高煦奪嫡謀愈急,蜚語譖 忠言無有。帝怒。 太子。

師 恒 推讓之。 ,諡忠襄。 忠 起卒伍至大位,甚見親倚,每承顧問,知無不言,然愼密不洩。 明年四月卒。 官子達翰林檢討。 給驛歸葬, 達剛直敢言,仕至長蘆都轉運使。 命有司治祠墓,復其家。 洪熙元 處僚友不持兩端,退 年,追贈榮祿大夫少

目 爲迂叟,放還。 忠 有兄華,負志節。 日,讀宋史至王倫附秦檜事,放聲長歎而逝。 忠守通州有功,欲推恩官之,辭不就。 嘗召賜金綺,亦不受。 里中稱為白雲先生。 成祖

府。 永樂元年召爲刑部侍郎。 李慶,字德孚,順義 人。 洪武中,以國子生署右僉都御史,後授刑部員外郎,遷紹興知 性剛果,有幹局,馭下甚嚴。 帝以爲才、數命治他事,不得時

四一六一

起復。 至部。 鎭守德州都督曹得黷貨。皆被責。中外凜其風采。十八年進工部尚書,尋兼領兵部事。 運夫,盜賣軍餉。都督譚靑、朱崇貪縱。慶劾之,皆下吏。已,劾都督費瓛欺罔,梁銘貪暴, 與民爭利。 時勳貴武臣多令子弟家人行商中鹽,爲官民害。 然屬東與罪人交通私饋餉,慶輒知之,繩以重法。 今都督蔡福等旣行罰,公侯有犯,亦乞按問。」帝命嚴禁如制。 忻成伯趙彝擅殺 ` 慶言:「舊制,四品以上官員家不得 五年改左副都御史。兩遭親喪,並

諫止。及太子還北京,遂留慶南京兵部。 多嚴憚之,號爲「生李」。奉命侍皇太子謁|孝陵,在途約束將士,秋毫無所擾。太子欲獵,慶 帝尋悟,降敕自責,並責震等,震等甚愧此兩人。山陵事多,趣辦中官有求,執不與,人 仁宗立,改兵部,加太子少保。弋謙以言事忤旨,呂震等交口詆之,惟慶與夏原吉無所

伏敗死。慶病遂篤,明日亦死,一軍盡沒。 意 |輕賊,不爲備。郎中史安、主事陳鏞言於慶。 宣德二年,安遠侯柳升討黎利,命慶參贊軍務,許擇部曹賢能者自隨。 時慶已病甚,强起告升。 升不聽,直前,中 師至鎭夷關,升

師逵,字九達,東阿人。 傳第三十 八 李 麼 少孤,事母至孝。年十三,母疾,思藤花菜。 師 塗 逵出城南二十餘

四一六二

察使。獄囚淹繫千人,浹旬盡決遣,悉當其罪。母憂去官,廬墓側,不飮酒食肉者三年。 史出按事,爲御史所劾,逮至。帝偉其貌,釋之,謫御史臺書案牘。久之,擢御史,遷陝西按 里求得之。及歸,夜二鼓,遇虎。逵驚呼天,虎舍之去。母疾尋愈。洪武中,以國子生從御

亂。左中允周幹劾之。時仁宗監國,以帝所特遣,置不問。八年,帝北征,命總督餽餉,逵 湘,以十萬衆入山闢道路,召商賈,軍役得貿易,事以辦。然頗嚴刻,民不堪,多從李法良爲 成祖卽位、召爲兵部侍郎、改吏部。永樂四年建北京宮殿、分遣大臣出採木。逵往湖、

戶部尚書,兼掌吏部。宣德二年正月卒官,年六十二。 達住蹇義在東部二十年,人不敢干以私。仁宗嗣位,與趙孤、古朴皆改官南京,而逵進

請量程置頓堡,更遞轉輸。從之。

部扈從臣,不貪者惟逵而已。」 達廉,不殖生產,祿賜皆分宗黨。 有子八人,至無以自贍。成祖在北京嘗語左右曰:「六

陳家貧、願得祿養母。帝嘉之、除工部主事。母殁、官給舟歸葬。服闋、改兵部、累遷郎中。 古朴、字文質、陳州人。洪武中以太學生清理郡縣田賦圖籍、還隸五軍斷事理刑。自

建文三年擢兵部侍郞。

宗卽位,改南京通政使。 聞並患水潦,轉運艱難,而北京諸郡歲幸豐。 建北京,命採木江西,以恤民見褒。 成祖卽位,改戶部。 明年就拜戶部尚書,出督畿內田賦。 永樂二年,朴奏:「先奉詔令江西、湖廣及蘇、松諸府輸 七年,帝北巡,皇太子監國,召還,佐夏原吉理戶部。 宜發鈔命有司增價收糴,減南方運。」從之。營 師逵病,命朴代之。宣德三年 糧 北京,今

敗。 誣,得釋。 |朴在朝三十餘年,自郎署至尚書,確然有守,不通干請,與右都御史向寶,俱以淸介稱。 初,戶部主事劉良不檢,乞中貴人求上考。。朴不可。 他日,吏部奏予良誥。仁宗曰:「此人素無行,且嘗誣大臣,不可與。」良後果以贓 良遂誣奏朴罪、朴就速。成祖察其

二月卒於官。

對力辭,改應天府尹。 鹽運判官。 事,多可採者。 寶,字克忠,進賢人。洪武中,以進士授兵部員外郎。 仁宗在東宮,知其廉。及卽位,召爲右都御史兼詹事,並給 宣德初,改南京。 建文時,坐事謫廣西。 三年入覲,帝憫其老,命致仕。 成祖卽位、召復職。 九年無過,擢通政使,以不善奏 歸卒於途。 已,復坐事 兩俸。 下獄,降兩浙 尋應詔陳八

寶有文學, 寬厚愛民, 而持身廉直, 屢遭困阨不稍易, 平居言不及利。 列 傅 第 Ξ + Л 古 朴 歷仕四十餘年,

卒之日,家具蕭然。

啓殯 言左右干恩澤者多,恐累明德。 至以愛民爲務。 公如生。 陳壽, 九 年以漢王高煦譖,下獄,貧不能給朝夕。 隨人。 仁宗卽位,贈工部尚書,諡敏肅,官其子曉中書舍人,後亦至工部侍郎。 用夏原吉薦,召爲工部左侍郎。 洪武中,由國子生授戶部主事。 太子深納之。 嘗目送之出,顧侍臣曰:「侍郎中第 官屬有饋之者,拒不受,竟死獄中。 皇太子監國南京,壽日陳兵 永樂元年遷員外郎。 出爲山東參政,所 民因, 叉乘間 人也。」 踰 年,

與壽同下獄死者,有馬京、許思溫。

郎。 惊, 皇太子守北京人 武功人。 洪武 命兼輔導, 中,以進士授翰林編修,歷左通政、大理卿。 盡誠翊贊,太子甚重之。 數爲高煦所譖 永樂元年為行部左侍 ,謫戍廣西 一, 仍 坐前

事,逮下獄。

有勞,擢刑部侍郎,改吏部,兼贊善。 思溫,字叔雍,吳人。以國子生署刑部主事,累官北平按察副使。燕師起,思溫佐城守 亦以讒下獄。 皆瘐死。 仁宗立,贈原少傅,諡文簡,思

械者, 賜 衣 鈔,擢陜西參政。 劉季箎,名韶,口以字行,餘姚人。 緩爲期。 民感其德,悉完納。 陝有逋賦,有司峻刑督,民不能輸。 陝不產碙砂,而歲有課。 洪武中進士。 除行人。 季箎至,與其僚分行 季箎言於朝,罷之。 使朝鮮,却其飽贐。 郡縣,悉縱 洪渠 帝聞, 水

溢,爲治堰蓄洩,遂爲永利。

掠,誣服。 民家, 盗夜入殺 辭,誣也,釋之。 司 疑朱殺之,考掠誣服。 建文中,召爲刑部侍郞。 季箎使人懷刀就其里潛察之。 人,遺刀屍傍,刀有記識,其隣家也。 吏虧官錢,誣千餘人,悉爲辨免。 季箎獨曰:「是非夙讎,且其裝無可利。」緩其獄,竟得殺趙者。揚 民有爲盜所引者。 一童子識曰:「此吾家物。」盜乃得。 逮至,盜已死,乃召盜妻子使識之。 河陽逆旅朱、趙二人異室寢。 官捕鞫之。 隣曰:「失此刀久矣。」不勝 趙被殺,有 聽其 州

列條

第

=

+

八

陳

靐

劉季節

永樂初,纂修大典,

命姚廣孝、解縉及季箎總其事。

八年坐失出下獄,謫外任。

逡巡未

駐 師嚴州,辟置幕下。元帥葛俊守廣信,盛冬發民浚城濠。文忠止之。不聽。 劉辰,宇伯靜,金華人。國初,以署典籤使方國珍。 國珍飾二姬以進,叱却之。 文忠怒,欲臨 李文忠

以兵。

辰請往諭之。俊悔謝,事遂已。以親老辭歸。

仰練湖益水,三斗門久廢。辰修築之。 故,以辰言得除。 建文中,用薦擢監察御史,出知鎭江府,勤於職事。瀕江田八十餘頃,久淪於水,賦如 京口閘廢,轉漕者道新河出江,舟數敗。辰修故閘,公私皆便。漕河易涸, 運舟旣通,湖下田 益稔。

與都司、按察使不相得,數爭,坐発官。 賜 田 糧。 敕及鈔幣,令致仕。 永樂初,李景隆言辰知國初事,召至,預修太祖實錄。遷江西布政司參政,奏蠲九郡荒 歲饑,勸富民貸饑者,蠲其徭役以爲之息。 卒於途,年七十八。 十四年起行部左侍郎,復留南京者三年。帝念其老, 官爲立券,期年而償。 辰居官廉勤尚氣,

譏萬世。 楊砥,字大用,澤州人。 董仲舒天人三策及正誼明道之言,足以扶翼世敎。 洪武末,由進士授行人司右司副。 今孔廟從配有雄無仲舒,非 上疏言、「揚雄爲葬大夫,

胎

是。」帝從之。 歷官湖廣布政司 參議。 建文中,言:「帝堯之德始於親九族。 今宜惇睦諸藩,

無自剪枝葉。」不報。父喪歸。

道及 部。 廣,水草豐美,其屯軍人養種馬一 立羣頭一 土河 永樂十年遷北京行太僕寺卿。 成 祖 人,五十馬立羣長 以殺 即位,起鴻臚寺卿,乞終制。 水勢。 帝命工部侍郎藺芳經理之。 一人,養馬家歲蠲租 匹,租亦発半。 時吳橋 服闋,擢禮部侍郎,坐視河渠失職,降工部主事,改禮 至天津大水決 帝命軍租 糧之半。 定牧馬法,請令民五丁養種馬 堤傷稼。 .盡蠲之,餘悉從其議。 而薊州以東至山海諸 砥請開德州東南黃 衛,土地 於是馬大 匹,十 河 馬 寬 故

砥 剛介有守,尤篤孝行。 十六年,母喪哀毁,未至家,卒。 蕃息。

虞謙 ,字伯益,金壇 人。 洪武中,由國子生擢刑部 郎中、出 知杭 州府。

建文中請限僧道田,人無過十畝,餘以均給貧民。

從之。

永樂

初召爲

大理

寺少

卿。

時

耳。 有詔 ,建文中上言改舊制 釋弗問。 而 僧道 限田 者悉面 制 竟 罷 陳。 都察院論誆騙罪, 謙乃言前 事請罪。 準洪武榜例 帝見謙怖, 梟首 笑日 以徇 此 秀才闢老、佛 謙奏:「比奉

列

僔

第三

+

八

劉

辰

楊

砥

嬔

識

主者 詔 [準律 盜 斷 用 罪, 多 一,縱 誆 火自 騙 當 蓋。 杖 流,梟首非詔書意。」帝從之。 逮幾八百人,應死 者百。 謙白其濫,得論 天津衞倉災,焚糧 滅 十萬

傷 一,発田 七 租 ,贖民 帝 北 巡, 所 鬻子女。 皇太子 奏謙爲右 明年,謙請振,太子諭之曰:「軍民困 副都御史。 明年偕 給 事 中杜欽巡視淮、 極,而 卿等從容請 鳳 抵陳州災 啓 一,彼 汲

謡

何

如

人

也

給 處之,疫遂息。 少 多 廩,官牛一百,暇 糧 遠 運 多 尋 者存 命督 謙 留本 兩浙 建 議 未幾,偕給 蘇、 士。 分四 時 等 聽民耕,大舟至, 松諸府糧,輸南、北京及徐州、淮安。 民利賴之。 丁多糧 事 中許能 最 又言: 少者運北京, 巡撫浙江 用以 徐州 挽。 、呂梁二洪,行 次 人 以爲 少者運徐州 便。 富民 舟多阻, 請 嘗督 )路有司, 1 運木,役者大疫。 糧 等者運南京、淮安,丁 每洪 率得近地, 增挽夫 二百, 謙令散 而 貧 月 民

隆 無爈 愼 言 謙 小 刑 斯斯 歷 卿 仁宗卽位召還,改 獄 事 謙 我 三朝,得大臣體。 無爈 等亦 日 楊 矣。」 悉 ì 土 嘗 奇 奏當。 奏事 應 大理寺卿。 詔 ·畢,不 帝 凡 E 日 言 法 一一一一百亦悔之。」遂命復 七 司 退。 事 時呂升 及 ', 皆 四方 帝問:「欲何言, 切 所 爲 中 上獄 少 時 卿,仰瞻爲丞,而 務。 ,謙等再 有言 職。 得 非為 其奏事 四 宣宗立,謙言:「舊制,犯 参復,必 虞 謙 謙 不密,市 平? 又薦嚴本爲 求 」士奇 其平 恩於 。嘗 因 外者。 寺 具 語 白 Ē 人 死 一。帝 其 日 罪者, 帝 誣,且 ::「彼 方矜 怒,

罰役終身。今所犯不等,宜依輕重分年限。」報可。 宣德二年三月卒於官。

謙美儀觀,風采凝重。 工詩畫,自負才望。 工部侍郎蘇瓚以鄙猥班謙上,恒怏怏,人以

是隘其量云。

呂升,山陰人。永樂初爲溧陽敎諭,歷官江西、福建按察僉事,所至有淸愼聲。 入爲

理寺少卿。宣德八年致仕卒。

爲右寺丞,執法愈堅,在位者多不悅。 走其門,惟瞻與大理卿薛瑄不往。 仰瞻,長洲人。永樂中由虎賁衞經歷遷大理寺丞。 會與瑄辨殺夫冤獄,益忤振,下獄,謫戍大同。景泰初,召 移疾歸,加大理 少卿。 正統間,宦官王振 用事,百官多奔

言,本曰:「吾辦矣。」 蓋已寓書其子,鬻田爲 少當意者,獨重本,疑獄輒俾訊之。 {義 四卷。 嚴本,字志道,江陰人。少通羣籍,習法律,以傅霖刑統賦辭約義博,註者非一,乃著輯 永樂十一年以薦徵,試以疑律,敷析明暢。 奉命使徽州,時督辦後期,例罰工,本不忍迫民。或以爲 工作償也。 授刑部主事。 侍郎 張本掌部事,官吏

仁宗立,以刑部尙書。金純及虞謙薦,改大理寺正。 斷獄者多以「知情故縱」及「大不敬」

列

傅

第三十八

虡 謙

論罪。 「解人與囚同舟。爲盜,囚必知之。」按驗,果得實,遂抵卒罪。 **莒縣屯卒奪民田,民訟於官,卒被笞。夜盜民驢,民搜得之,卒反以爲誣,擒送千戶,民被** 絞。|本曰:「丞罪當。告者因疑而訴,律以誣告致死,是丞與告者各殺一人,可乎。]駁正之。 謙韙之,悉爲駁正。良鄉民失馬,疑其隣,告於丞,拷死。丞坐決罰不如法,當徒,而告者坐 客舟於河西務,一卒死。懼事覺,誣隣舟解囚人爲盜,其侶往救見殺。皆誣服。本疑之曰: 禁死。法司坐千戶徒。本曰:「千戶生,則死者冤矣。」遂正其故勘罪。蘇州衞卒十餘人夜劫 本爭之曰:「律自叛逆數條外,無『故縱』之文。卽『不敬』,情有重輕,豈可概入重比。」

|本立身方嚴,非禮弗履。 其使||徽也,知府饋酒肴亦不受。 年七十八卒。

遷刑部郎中,出知蘇州府。蘇連歲水,民流,逋租百餘萬石。宗諭富民出米代輸。富民知 變,言按察使陳瑛受燕邸金錢,有異謀。詔逮瑛,安置廣西,而遷宗山東按察使。坐事,左 湯宗,字正傳,浙江平陽人。洪武末,由太學生擢河南按察僉事,改北平。建文時上

|永樂元年有言其坐視水患者。遠下獄,謫判祿州。以黃淮薦,召爲大理寺丞。或言宗

「愛民,不三月悉完納。

宗閱牘歎曰:「醫與使者何讐,而故殺之乎。」卒辨出之。尋命振饑河南,還署戶部事。 雨,極陳民間饑困狀。 下獄,詞連宗,坐繫十餘年。 曾發潛邸事。 帝曰:「帝王惟才是使,何論舊嫌。」時外國貢使病死,從人謂醫殺之。 帝爲蠲租免役,罷不急之務。宣德二年卒。 仁宗立,復官,再遷南京大理卿。宣宗初,清軍山東。會天久不 獄具, 解縉

未竟其用。金忠奮身卒伍,進自藝術末流,而有士君子之行。當其侃侃持論於文皇父子間, 忠直不撓,卒以誠信悟主,豈不偉哉。 獄,可謂能其官矣。李慶、師逵諸人,清介有執,皆列卿之良也。陳壽、馬京遭讒早廢,惜乎 贊曰:·永、宣之際,嚴飭吏治,職事修舉。若<u>郁</u>新之理賦,楊砥之馬政,劉季箎、虞謙之治

### 校勘記

洪武中由國子生授戶部主事 微錄卷五 一工部左侍郎陳壽傳稱「永樂初,舉鄉貢,下第,入太學,擢戶部主事。」 洪武中,仁宗實錄卷八上洪熙元年甲戌條作「永樂初」。 都和傳文 國朝獻

不同。

列

傅

(二) 劉季箎名韶

按詩小雅何人斯「仲氏吹篪」,

作「篪」與名「韶」相應、疑是。 **箎,四庫全書總目卷一三七永樂大典條作「篪」。** 

# 明史卷一百五十一

## 列傳第三十九

茄瑞 嚴震直 張紞 毛泰亨 王鈍 鄭賜

呂震 李至剛 方賓 吳中 劉觀

刑部尚書暴昭發其贓罪,出掌河南布政司事。尋復召爲兵部尚書。 副都御史,又試兵部尚書,尋實授,加太子少保。及惠帝卽位,改吏部,與黃子澄不相能。 **茄瑺,衡山人。洪武中,由監生除承敕郎,歷通政使。勤於職,太祖賢之。二十三年拜** 

吾即解甲謁孝陵歸藩。」瑺等唯唯頓首還。 曰:「吾無罪而削爲庶人,今救死,何以地爲! 流汗,不能發一言。成祖曰:「公等言卽言耳,何懼至是。」久之乃言奉詔割地講和。成祖笑 燕兵至龍潭,帝遣瑺及曹國公李景隆、都督同知王佐詣燕軍議和。 且皇考封諸子,已各有分地矣。其縛姦臣來, **瑺等見成祖,伏地** 

傳第三十九 茹瑞

列

重 成 祖 封瑺忠誠伯, 入京師,召瑺。 食祿一千石,終其身。 <sup>瑞</sup>首勸進。 成祖旣卽位,下詔言景隆、瑺、佐及陳瑄事太祖忠,功 仍兵部尚書、太子少保。 選其子鑑為秦府長安

郡主儀賓。

刨

命端出營郡主府第

所沒 論。 **瑺知不免,命子**銓市毒藥,服之死。 田 後 還朝, 時方重藩王禮,谷王又開金川門有功,帝意嚮之。 廬。 以銓實承父命,減死,與兄弟家屬二十七人謫戍廣西河池。 坐不送趙王,遣歸里。旣而爲家人所訟,逮至京,釋還。 時永樂七年二月也。 陳瑛遂劾瑺違祖制、逮 法司劾 銓毒其父, 仁宗立,釋還。 過長沙不謁谷王,王以 請以謀殺父母 下錦 宣宗與 衣獄。

之,役者稱便。 下工匠於京師,凡二十餘萬戶。 二十三年特授通政司參議,再遷爲 嚴震直,字子敏,烏程人。 鄉民訴其弟姪不法,帝付震直訊。 洪武時以富民擇糧長,歲部糧萬石至京師,無後期,帝才之。 震直請戶役 工 一部侍郎。 人, 二十六年六月進尙 具獄上,帝以爲不欺,赦其弟姪 書其姓名所業於官, 書。 時朝廷事營建,集天 有役則 按籍 更番召 坐

事降御史,數雪冤獄。

安縣靈渠。 增高中江石堤,建陡閘三十有六,鑿去灘石之礙舟者,漕運悉通。 二十八年討龍州, 審度地勢,導湘、灘二江,浚渠五千餘丈,築漢潭及龍母祠土堤百五十餘丈,又 使震直偕尚書任亨泰諭安南。還,條奏利病,稱旨。 歸奏,帝稱善。 尋命修廣西興

o 請分三十萬八千餘引貯廣東,別募商入粟廣西乏糧衞所,支鹽廣東,鬻之江西南安、贛 三十年二月疏言:「廣東舊運鹽八十五萬餘引於廣西,召商中買。 今終年所運,纔十之

州、吉安、臨江四府便。」帝從之。 其年四月擢右都御史,尋復爲工部尚書。 廣鹽行於江西自此始。

召見,命以故官巡視山西。 至澤州、病卒。 建文中,嘗督餉山東,已而致仕。 成祖卽位,

特令吏部勿考。 誠信相孚,克恭 平,出爲左參政。 <u></u>張紞,字昭季,富平人。洪武中,舉明經。爲東宮侍書,累遷試左通政。 乃職,不待考而殷知其功出天下十二牧上。 賜璽書曰:「曩者討平西南,命官撫守,爾紞實先往,於今五年。 陛辭,帝賦詩二章賜之。歷左布政使。二十年春入覲,治行爲天下第一, 故嘉爾績,命爾仍治滇南。 十五年,雲南 諸蠻聽服, 往,

列傳第

三十

九

嚴

震

直

張紞

欽 哉。」 舱 在 滇 凡十七年,土地貢賦、法令條格皆所裁定。 民間喪祭冠婚咸有定制, 務變其

俗。 滇 人 遵用 之。 朝 土董倫、王景輩謫 其地、皆接以 禮意

惠 帝 即位 召 爲 吏部尙書。 韶徵 遺逸 土 工集闕 下。 紞 所 選 用,皆當其才。會修太祖 實錄,

命 試 翰 林 編纂官, 휎 奏楊士奇第一。 士奇由 是 知名。

於 歎 吏部後堂,妻子相率投池 ,咎建文時之改官制者。 成 祖 入京師,錄 中 朝姦臣二十九 乃令紞 中死 及戶 人,統 、部尙 與焉。 書王鈍解職務,月給半俸,居 以茹瑺言,宥仍故職。 京師。 無何, 紞 帝臨朝而 懼 ら自 經

旭 徒 經 滋 紀 人口 紞 其 在 喪。 順 吏部,值 公力持之。」就不 世 傳 變 滅師 官制,小吏張祖 入京, 統卽自 能用,然心賢祖,奏爲京衞 言曰:「高皇帝立法創制,規模甚遠。 經死,嚴震直 奉使至雲南,遇建文君悲愴吞 知事。 後紕死, 屬吏無敢 今更之, 1金死。 視者, 未 必勝, 唯

諸國史,非其實也。

時 有 毛泰亨者, 建文時為 吏部侍郎,與紞同事。 **|**統死,泰亨亦死

王鈍 字士魯,太康人。 元末猗氏縣尹。 洪武 中,徵授禮部主事,歷官福建參政,以廉

愼聞。 遺諭麓川, 却其贈。或曰:「不受, 恐遠人疑貳。」與乃受之, 還至雲南, 輸之官庫。二

十三年遷浙江左布政使。在浙十年,名與張紞埓。帝嘗稱於朝,以勸庶僚。 命同工部尚書嚴震直等分巡山西、河南、陝西、山東,又同新昌伯唐雲經理北平屯種。承制 建文初,拜戶部尚書。成祖入,踰城走,爲邏卒所執,詔仍故官。未幾,與紞俱罷。尋

再上疏言事,皆允行。永樂二年四月賜敕以布政使致仕。旣歸,鬱鬱死。

母喪起復,入覲,留攝部事。尋以老乞歸,卒。 二章以獻。語切,與王不合。召改戶部郞中。英宗卽位,擢戶部右侍郞,巡撫浙江,有惠政。 子瀹、永樂四年進士。仁宗時遷鄭王府左長史,數以禮諫王。 嘗擬荀卿成相篇、撰十

寧輯、苗、僚畏懷。母喪、去。服除、改北平參議、事成祖甚謹。 藥,多所全活。秩滿當遷,湖廣布政司參議闕,命賜與檢討吳文爲之。二人協心剗弊,民以 賜嘗奉命於龍江編次行伍。方暑,諸囚憊甚。賜脫其械,俾僦舍止息,周其飮食,病者與醫 鄭賜,字彥嘉,建寧人。洪武十八年進士。 授監察御史。 時天下郡邑吏多坐罪謫戍, 復坐累謫戍安東屯。 及惠

列

祖 帝 耳。」帝笑釋之,授刑部尙書。 入京師,李景隆計賜罪亞齊、黃。逮至,帝曰:「吾於汝何如,乃相背耶。」賜曰:「盡臣職 即位,成祖及楚王楨皆舉賜爲長史。 不許,召爲工部尚書。 燕兵起,督河南軍扼燕。 成

戰艦 省母、會母疾、留侍九閱月不行。賜請逮問孔高、罪當杖。 遽舍,況有疾,可矜也。」命復其官。 與陳瑛同刻耿炳文僭侈,炳文自經死。 以禦燕軍,燕知其有備,取他道南下,故賜劾之。二年劾李景隆陰養亡命,謀不軌。 永樂元年刻都督孫岳擅毀太祖所建寺,詔安置海南。岳,建文時守鳳陽,嘗毀寺材,修 皆揣帝意所惡者。 帝曰:「母子睽數年,一旦相見難 祁陽教諭康孔高朝京師還,枉道 叉

元順溺佛教,有罪者不刑,紀綱大壞,此豈可效」,是年六月朔,日當食,陰雲不見,賜請賀。 三年秋,代李至剛爲禮部尙書。 賜言「宋盛時嘗行之」。帝曰:「天下大矣,京師不見,如天下見之何。」卒不許。 四年正月,西域貢佛舍利,賜因請釋囚。 帝曰:「梁武、

語未竟,帝曰:「微汝言,幾誤疑賜。 自 盡。楊士奇曰:「賜有疾數日,惶懼不敢求退。昨立右順門,力不支仆地,口鼻有嘘 賜爲人頗和厚,然不識大體,帝意輕之。爲同官趙羾所間,六年六月憂悸卒。 賜固善人,才短耳。」命予葬祭。洪熙元年贈太子少保, 帝疑其 無吸。」

諡文安。

郭資,武安人。洪武十八年進士。累官北平左布政使,陰附於成祖。 及兵起,張昺等

死,資與左參政孫瑜、按察司副使墨麟、僉事呂震率先降,呼萬歲。成祖悅,命輔世子居守。 成祖轉戰三年,資主給軍餉。及卽位,以資爲戶部尚書,掌北平布政司。北京建,改行

起戶部尙書,奉職益勤。 八年十二月卒,年七十三。 贈湯陰伯,諡忠襄。 官其子佑戶部 職無廢事。仁宗立,以舊勞兼太子賓客。尋以老病,加太子太師,賜敕致仕。 部尙書,統六曹事。定都,仍改戶部。時營城郭宮殿,置官吏及出塞北征,工役繁興,資舉 宣德四年復

下不奉行,使陛下恩澤不流者,資也。」 資治錢穀有能稱,仁宗嘗以問楊士奇。 對曰:「資性强毅,人不能干以私。 然蠲租詔數

**貢賦**。 呂震,字克聲,臨潼人。洪武十九年以鄉舉入太學。 震承檄之兩浙,還奏稱旨,擢山東按察司試僉事。 列 傳 第三十九 郊 資 呂 震 入為戶部主事,遷北平按察司食 時命太學生出稽郡邑壤地,以均 四一七九

怒,下震及蹇義於錦衣衞獄,已,復職。 刑部尙書。六年改禮部。 宣德元年四月卒。 | 燕兵起,震降於成祖,命侍世子居守。 永樂初,遷眞定知府,入爲大理寺少卿。 皇太子監國,震壻主事張鶴朝參失儀,太子以震故宥之。 仁宗卽位,命兼太子少師,尋進太子太保兼禮部尚 三年遷 帝聞之

腰絰。洪熙元年分遣羣臣祀嶽鎭海瀆及先代帝王陵。震乞祀周文、武、成、康。便道省母, 孝皇后崩,旣釋縗服,太宗易素冠布腰絰。」震勃然變色,詆其異己。仁宗黜震議,易素冠布 大體。成祖崩,遺詔二十七日釋縗服。 **慶嘗三奉命省親,兩值關中饑,令所司出粟振之,還始以聞。** 及期,震建議羣臣皆易烏紗帽,黑角帶。近臣言:「仁 然無學術,爲禮官, 不知

受面斥,然終不能改。 其非,又欲因之進媚,豈君子專君之道。」郎中周訥請封禪,震力贊之,帝責其謬。 三。」 震言:「此山川效靈。」 帝曰:「山谷之聲, 空虛相應, 理或有之。 私以妻喪柩與香帛同載。 下治安,無麒麟何害。」貴州布政使蔣廷瓚言:「帝北征班師,詔至思南大巖山,有呼萬歲者 震爲人佞諛傾險。 而隆平侯張信奏太和山五色雲見,侍郎胡濙圖上瑞光榔梅靈芝,震率羣臣先後表 金水河、太液池冰,具樓閣龍鳳花卉狀。帝召羣臣觀之。震因請賀。 永樂時,曹縣獻騶虞,榜葛刺國、麻林國進麒麟,震請賀。 祀太廟致齋, 飲酒西番僧舍, 大醉歸, 一夕卒。 震爲國大臣, 帝曰:「天 震雖累 不能辯

事。 章當達行在。」三問,對如前。遂以擅留奏章,殺右給事中李能。 留 昌隆之禍 日 南京。 通奏。 震亦自危。 成祖初巡北京,命定太子留守事宜。 報可。 ,由震構之。 帝忘震前請,曰:「章奏宜達行在,豈禮部別有議耶。」問震。 帝令官校十人隨之,曰:「若震自盡,爾十人皆死。」 十一年、十四年,震再請如前制。 事具昌隆傳。 夏原吉、方賓以言北征餉絀得罪,以震兼領戶、兵部 震請常事聽太子處分,章奏分貯南京六科,回變 十七年,帝在北京,因事索章奏,侍臣言 衆知能冤,畏震莫敢言。尹 震懼罪,日:「無之,奏

有娛。 奏。 官往錄之。 子熊。 震旣兼三部,奏牘益多,皆自占奏,侍郎不與也。 震有精力,能强記,才足以濟其爲人。 嘗扈北狩,帝見碑立沙磧中,率從臣讀其文。 宣宗初立,震數於帝前乞官,至流涕。 震言不須造使,請筆札帝前疏之。 凡奏事,他尚書皆執副本,又與左右侍郎更進迭 帝密使人拓其本校之,無一 帝不得已,授兵科給事中。 後一年,與諸文學臣語及碑,詔禮部遣 情狀委曲,千緒萬端,背誦 字脫悞者。 如流、未嘗

李至剛,名鋼,以字行,松江華亭人。 洪武二十一年舉明經。 選侍懿文太子,授禮部郎

列

傅

第

Ξ

中。 之。 建文 坐累 中 謫 戍 調 邊,尋召爲工部郞中,遷河 湖 廣左參議,坐事繫 獄 南右參議。 河決汴堤,至剛議借王府積木,作筏濟

七十。 當 事, 連 與 解縉 大 至 甚 行 剛 成 見 亦 晏駕,不宿 再歲,歿於官 後先進 祖 親信, 卽 坐 位, 繫十餘年。 講。 尋 左右 公署,飲 進 已,復 禮部 稱其才, 尚書。 坐事 仁宗卽位,得釋,復以爲 酒食肉,恬無戚容。 下獄,久之得釋,降禮 遂以爲右通政。 永樂二年册立皇太子,至 帝念至剛 與修太祖實錄, 左 通政。 部 郎中。 先朝舊人,出爲興化 剛兼左春坊大學士,直 給 事 恨解縉, 朝夕在上左右,稱說 中梁盛等劾至 中傷之。 .知府, 剛 輩 縉 東 十十餘 下 宮講 時年已 洪 獄 武 筵, 詞 中

西進瑞 多 令遣 得 不 上 還。 心 甪 至 一務爲 麥, 剛 至 爲 至 剛 人敏給,能治繁劇,善傅會。首發建都北平議, 佞諛。 剛率百官賀。 言 中國三 嘗言太祖 人,安知 帝皆 忌辰,宜傚宋制,令僧道 不 聽。 非彼私匿? 中官使眞臘,從者逃三人,國王 |帝曰:「朕 誦 以至誠待內外,何用 經。 請禁言事者挾私,成祖 山 東 野蠶 成繭 以國中三人 至 逆詐。」 剛 詩賀。 從之。 補之,帝 所 建白 陜

言。」帝怒,誅信。 妻 父麗 重法,至剛 初, 爲乞発。 至剛 與解縉交甚厚。 帝 曰:「獄 輕 重,外 帝書大臣姓名十人, 人何以 の知之。こ 至剛曰:「都御史黃信爲 命縉疏其人品,言至 剛 臣

端。縉謫廣西,至剛遂奏其怨望,改謫交阯

尚書出征黎利,賓理部事,有幹才,應務不滯。 七年進尙書,扈從北京,兼掌行在吏部事。明年從北征,與學士胡廣、金幼孜、楊榮,侍郎金 方賓,錢塘人。洪武時由太學生試兵部郎中。 性警敏,能揣上意,見知於帝,頗恃寵貪恣。 建文中,署應天府事。 坐罪戍廣東。 四年,儁以 以

宫。 賓言糧餉不足,召原吉,亦以不給對。帝怒,遣原吉視糧開平,旋召還下獄。 賓方提調靈濟 中使進香至,語賓以帝怒。賓懼,自縊死。 十九年議親征。尚書夏原吉、吳中、呂震與賓共議,宜且休兵養民。 帝實無意殺賓,聞賓死,乃益怒,戮其屍。 未奏,會帝召賓,

純並與機密。自後帝北巡,實輒扈從。

功, 累遷至右都御史。 吳中,字思正,武城人。 永樂五年改工部尙書。 洪武末、爲營州後屯衞經歷。 從北征,艱歸。 成祖取大寧、迎降。 起復,改刑部。 十九年與夏 以轉餉捍禦

列傳第

三十

ル

年,殿工成,進少師。 宣德元年從征樂安。三年坐以官木石遺中官楊慶作宅,下獄,落宮保,奪祿一年。正統六 原吉、方賓等同以言北征餉絀,忤旨繫獄。仁宗卽位,出之,復其官,兼詹事, 明年卒,年七十。 追封在平伯,諡榮襄。 加太子少保。

塡委,規畫井然。然不恤工匠,又湛於聲色,時論鄙之。 中勤致多計算。 先後在工部二十餘年,北京宮殿,長、獻、景三陵,皆中所營造。 職務

御史。坐事下獄,尋釋。出爲嘉興知府,丁父憂去。 劉觀,雄縣人。洪武十八年進士。授太谷縣丞,以薦擢監察御史。三十年遷署左僉都

宜遽折辱,特賜書諭太子。八年,都督僉事費瓛討凉州叛羌,命觀贊軍事。還,坐事,謫本 部吏。十三年還職,改左都御史。十五年督浚河漕。十九年命巡撫陝西,考察官吏。 書。十二月與刑部尚書呂震易官。 江,未幾還。明年冬,帝以山西旱,命觀馳傳往,散遣採木軍民。六年,鄭賜卒,擢禮部尙 殘刻,右都御史<u>吳中寬和,觀委蛇二人間,務爲容悅。 四年,北京營造宮室,觀奉命採木</u>浙 永樂元年擢雲南按察使,未行,拜戶部右侍郎。二年調左副都御史。時左都御史陳瑛 坐事爲皇太子譴責。帝在北京聞之,以大臣有小過,不

仁宗嗣位,兼太子賓客,旋加太子少保,給二俸。時大理少卿弋謙數言事,帝厭其繁瑣。

尚書呂震、大理卿虞謙希旨劾奏,觀復令十四道御史論其誣妄,以是爲輿論所鄙。

觀竟客死。七年,士奇請命風憲官考察奏罷有司之貪汚者,帝曰:「然。向使不罷劉觀,風 觀引伏,遂下錦衣衞獄。明年將置重典。士奇、榮乞貸其死。乃謫輻戍遼東,而命觀隨往, 怒,逮觀父子,以彈章示之。觀疏辯。帝益怒,出廷臣先後密奏,中有枉法受賕至千金者。 出觀視河道,以佐爲右都御史。於是御史張循理等交章刻觀,並其子輻諸贓汚不法事。帝 帝問:「今日誰最甚者。」一揆對曰:「劉觀。」又問:「誰可代者。」」士奇、榮薦通政使顧佐。帝乃 年來貪濁成風,何也。」」士奇對曰:「永樂末已有之,今爲甚耳。」榮曰:「永樂時,無踰方寶。」 憲安得肅。」 貪縱無忌。三年六月朝罷,帝召大學士楊士奇、楊榮至文華門,諭曰:「祖宗時,朝臣謹飭。 時未有官妓之禁。宣德初,臣僚宴樂,以奢相尙,歌妓滿前。觀私納賄賂,而諸御史亦

西,張紞之於雲南,治效卓然。王鈍、鄭賜爲方伯、監司,聲績頗著,至其晚節,皆不克自振, 贊曰:成祖封茹瑺,以事太祖有功。然考之,未有所表見,意史軼之歟。嚴震直之於廣

郭資、呂震之徒,有幹濟才,而操行無取。 李至剛之險,吳中、劉觀之墨,又不足

四一八六

# 明史卷一百五十二

### 列傳第四十

董倫 王景 儀智 子銘 鄒濟 徐善述 王汝玉二 梁潛

周述 弟孟簡 陳濟 陳繼 楊翥 兪山 兪綱 潘辰

錢習禮 周敍 劉嚴 柯潛 羅璟 孔公恂 司馬恂

董倫,字安常,恩人。洪武十五年以張以寧薦,授贊善大夫,侍懿文太子,陳說剴切。

之。 謫雲南敎官。 太祖嘉之,進左春坊大學士。太子薨,出爲河南左參議。肇州吏目蘭溪諸葛伯衡廉,倫薦 帝遽擢爲陝西參議。又言儒學訓導宜與冠帶, 雲南初設學校,倫以身教,人皆嚮學。 別於士子。 訓導始注選。三十年坐事

建文初,召拜禮部侍郎兼翰林學士,與方孝孺同侍經筵。 御書「怡老堂」額寵之, 又賜

列

位,倫年已八十,命致仕,尋卒。 髹儿、 玉鳩 杖。 解縉謫河州, 以倫言得召還。 倫質直敦厚, 嘗勸帝睦親藩,不聽。 成祖卽

景頓首言:「宜用天子禮。」從之。 部。 修太祖實錄。 命作朝享樂章,定藩王朝觀儀。累官山西參政,與倫先後謫雲南。 其 與倫同時爲禮部侍郎者,有王景,字景彰,松陽人。 用張統薦,除禮部侍郎兼翰林侍講。 永樂六年卒於官。 成祖卽位,擢學士。 洪武初,為懷遠教諭。 建文初,召入翰林, 帝問葬建文帝禮, 以博學應

儀智,字居眞,高密人。 洪武末,舉者儒,授高密訓導,遷萃縣教諭 擢知高郵州,

興學,吏民愛之。

幾, 常,智持不可。 儒,忠以智對, 遷湖廣右布政使。 永樂元年遷寶慶 即日召之。 會左諭德楊士奇亦以爲言,乃免賀如智議。 知府。 坐事謫役通州。 旣至,拜禮部左侍郎。 土人健悍, 六年冬, 獨畏智, 十一年元旦,日當食,尚書呂震請朝賀如 湖廣都指揮使龔忠入見。 相戒不敢犯。 召爲右通政兼 帝問 右中允。 湖湘間 老 未

進講書史,必反覆啓迪,以正心術爲本。十九年,年八十,致仕,卒於家。洪熙元年贈太子 曰:「舉禮部侍郞儀智,議未決。」帝喜曰:「智雖老,能直言,可用也。」遂命輔導皇太孫。 大悞,悔無及。 廷臣中老成正大,無踰智者。」是日午朝,帝顧太子曰:「侍太孫講讀得人未。」太子對 十四年詔吏部、翰林院擇耆儒侍太孫。 智誠端士,然老矣。」士奇頓首言:「智起家學官,明理守正。雖耄,精神未 士奇及蹇義首薦智。太子曰:「吾嘗舉李繼鼎, 每

勞,改銘修撰。正統三年預修宣廟實錄成,遷侍講,後改郕府長史。 季子銘,字子新。 宣宗即位,以侍郎戴綸薦,授行在禮科給事中。 九年秩滿,帝念智舊

少保,諡文簡。

官。 保、召爲兵部尚書兼詹事。 外,惟銘與兪山、兪綱、蕭鎡、趙琬數人而已。尋進南京禮部尚書。 族振,衆譁始息。景帝卽位,力贊征伐諸大事。尋以潛邸恩,授禮部右侍郞。 帝每臨講幄,輒命中官擲金錢於地,任講官遍拾之,號恩典。 |郕王監國,視朝午門。廷臣劾王振,叫號莫辨人聲。|銘獨造膝前,発冠敷奏。下令旨 文臣與者,內閣高穀等 懷獻太子立,加太子太 明年兼經筵

蘇州、淮安諸郡積雪,民凍餓死相枕。 伽 第 四 -|-僟 智 沙灣築河,役山東、河南九萬人,責民間鐵器數 四一八九

萬具。 銘請於帝,多所寬恤。 因災異,言消弭在敬天法祖,省刑薄斂,節用愛人,錄皇明祖

訓錄以進,深見獎納。卒,諡忠襄。

科給事中。 銘少學於吳訥。 並以父恩授云。 天性孝友,易直有父風。 長子海,錦衣衛百戶。 季子處,舉於鄉,爲禮

遷國子學錄、助敎,以薦知平度州。 府司奏記。還爲廣東右參政,再遷左春坊左庶子,授皇孫經。 鄒濟,字汝舟,餘杭人。事母以孝聞。博學强記,尤長春秋。爲餘杭訓導,師法嚴。 永樂初,預修太祖實錄成,除禮部郎中。 征安南,從幕 累

有不諱,當提攜卿息,不使墜蓬蒿也。」卒,年六十八。洪熙元年贈太子少保,諡文敏。 王汝玉、馬京、梁潛輩被讒,相繼下獄死。濟積憂得疾。皇太子以書慰曰:「卿善自攝。 濟爲人和易坦夷,無貴賤皆樂親之。秩滿,進少詹事。當是時,宮僚多得罪,徐善述、 命有 刨

司立祠墓側,春秋祀之。

子幹,字宗盛,濟卒時尚幼。 仁宗監國,命爲應天府學生,月賜鈔米。 舉正統四年進

避 士。 兵 者 景帝初,由兵部郎中超擢本部右侍郎,以才爲于謙所倚。 號 城下求入, 幹開門納之。 尋改 禮部,兼庶子,考察山 也先入寇,九門皆閉。 西官吏、黜布 政 使侯復 自此 以 下 百姓

五十 餘 人。 巡視 河南 、鳳陽 水災,與王竑請振。 又請令諸 生輸粟入監讀書。 納 栗 入監

始。 成化二年振畿內饑,再 遷禮部尚書,三加 太子少保。 被劾乞休,卒,諡 康靖。

洪武中,行歲貢

法,善述首貢入太學。

授桂陽州

、學正。

永樂

徐善述,字好古,天台人。

初, 以國子博 士擢春坊司直郎。 見重於皇太子,每稱爲 先生,嘗致書賜酒及詩。 遷左贊善,

坐累死。 與 鄒濟同 日贈 太子 少師、諡文肅。 立祠、春秋 祀 亦 如 濟

王汝玉,

名璲,以字行,長洲

人。

穎敏

强記。

少

從楊維

楨學。

年十七,

舉於鄉。

永樂

特被寵 初 太子監國 遣 当由 官祭其家。 應天府學訓導,擢翰林 遇。 , 宥之, 以爲翰林典籍。 羣臣 應制撰神龜 赋, 五經博士, 汝玉第 尋進左贊善,坐解縉累,瘐死。 一,解縉次之。 歷遷右春坊右贊善,預修永樂大典。 七年 坐修禮書紊制度, 洪熙初,贈太子賓客,諡 仁宗在東宮, 當戍邊。 皇

江、陽春,皆以 梁潛 字 用之, 廉 平 稱。 泰 和 永樂元年召修太祖實錄。 洪武· 末, 舉 郷試。 授四川 書成, 擢修撰。 蒼溪訓導。 尋兼右 以薦除知四會縣, 春 坊右贊善,代鄭 改陽

FI]

傅

貸還。 逮至行在,親詰之。潛等具以實對。帝謂楊榮、呂震曰:「事豈得由潛」然卒無人爲白者, 俱繫獄。或毁冕放恣,遂併潛誅。潛妻楊氏痛潛非命,不食死。 臣,翰林獨楊士奇,以潛副之。有陳千戶者,擅取民財,令旨謫交阯。 賜總裁永樂大典。帝幸北京,屢驛召赴行在。十五年復幸北京,太子監國。 或讒於帝曰:「上所謫罪人,皇太子曲宥之矣。」帝怒,誅陳千戶,事連潛及司諫周冕, 數日後念其有軍功, 帝親擇侍從

功。 却其厚餽。 子檪,由進士爲刑部主事,善辨冤獄。用薦擢廣西副使,進布政使。將士多殺良民報 撫服梗化女土官,民夷服其信義。終浙江布政使。

授翰林編修。尋韶解縉選曾樂等二十八人讀書文淵閣,述、孟簡皆與焉。 **「祿給朝暮饌,禮部月給膏燭鈔人三錠,工部擇近宅居之,一時以爲榮。** 周述,字崇述,吉水人。永樂二年與從弟孟簡並進士及第。帝手題二人策,獎賞之,並 司禮監給紙筆,

| 弼儲君者,對稱旨。 宣宗時,進左庶子。 | 正統初,卒官。 述嘗扈北巡, 累進左春坊諭德。仁宗卽位, 命從皇太子謁陵南京。 召至楊前,問所以

孟簡在翰林二十年,始遷詹事府丞,出爲襄王府長史。 有言宜留備顧問者,帝曰:「 輔

朕弟,尤勝於輔**朕也。**」

述溫 厚簡靜,未嘗有疾言遽色,文章雅贍。 孟簡謙退不伐, 生平無睚眦於人。 並爲世

所重云。

濟質問,應 貲之半市書,口誦手鈔。 悉以屬濟。 衣召爲都總裁,修撰會棨等爲之副。 浩無端倪。 陳濟,字伯載,武進人。 口辨析無滯。 濟與少師姚廣孝等數人,發凡起例,區 隨事敷奏,多所裨益。 書成,授右贊善。 十餘年,盡通經史百家之言。成祖詔修永樂大典,用大臣薦,以布 讀書過目成誦。 五皇孫皆從受經。 詞臣纂修者,及太學儒生數千人,繙秘庫書數百萬卷, 謹愼無過,皇太子甚禮 嘗以父命如錢塘,家人齎貨以從。 分鉤考,秩然有法。 居職十五年而卒。 重之。 執筆 年六十二。 凡稽古纂集之事 者有所疑,輒就 **比還,以其** 

自謙 云:「文貴 抑 濟 少有酒過,母戒之,終其身未嘗至醉。 如布帛菽粟,有益於世爾。」 所居蓬戶葦壁, 裁蔽日 風雨, 終日危坐,手不釋卷。 弟恰爲兵部尚書,事濟如 爲文根據經史,不事葩藻。 父。 濟深懼盛滿,彌

目 潛 ,李賢皆出之爲 邸 恩, 其 後 與 有 兪 陳 山 繼、楊翥者,亦以布衣通經。 參議。 俞綱等皆至大官。 布衣 無得預館閣者,而 自天順後, 用楊士奇薦,繼由博士入翰林。 弘治間潘辰獨以才望得之,一 始漸 拘 資格。 編 修馬昇、 檢討傅宗 而翥竟用景帝 時詫 異 不 、數焉。 由科

{經 仁宗 蘇 奉 心博士 松 母 至孝 卽 陳 繼 ,直弘文閣。 得其 位 `,府縣交薦, 以母老不 , 字嗣初 文, 開 弘文閣。 歸 以示 |吳 宣宗初 人。 士奇,士奇心識之。 帝臨 幼狐 遷 幸, 檢 母母 就。 問一一今山 討。 吳氏,躬織以 母卒, 引 疾 歸 哀毁過人。 及帝問,逐 林亦有名士乎。」楊 卒。 資誦讀。 以繼對。 永樂中, 比長, 士奇初不識繼。 召爲國 復 貫穿經學,人 舉孝行, 子博士 旌 ,尋改翰 呼爲 其 夏 母 原吉治水 陳 日 貞 五 林 節。 經。 狂.

年 右 翰 解 卒,年八十 林 館 長 院 舍讓 史。 楊 翥 檢 討 之, 字 之, 仲舉 而己 五 歷 Bĺ 修 年 | 霧篤行 撰。 敎 亦吳人。 授他 歸。 IE 紀俗,一時縉紳厚德者,鸞爲 所。 王 統 卽 中 少 大位,入朝 士奇 孤 詔 貧,隨兄戍武 簡 心賢之。 成[ 王府 ,拜 僚。 禮 及 貴, 昌 部右侍 諸 ,授徒自給。 薦翥 翰 林皆 最。 郎。 經 明行 不欲行 景泰 旣沒 修。 楊士奇微時,流寄窘 景帝念之,召其子肆入觀, 年進尙 宣宗 乃出 侍講 詔 書 試 給 儀銘 吏部 祿 ,稱旨,授 致 及 乏,翥 仕 翥 爲 明 左 軱

授

本邑主簿。

仕去。 辭 諸 ,守本官。 生繕寫實錄,試中書舍人,授郕府審理。 兪 綱加 山,字積之,秀水人。 太子少保。 景帝將易東宮, 英宗復辟,山以致仕得免。 山密疏諫。 由鄉舉為城府伴讀。 不聽。 景帝時,以兵部右侍郎入閣預機務。 懷獻太子立,加太子少傅, 景帝時,拜吏部右侍郎。 而綱當景泰時,能周旋二帝間,故得 山意 而嘉興兪綱由 居三日,固 不自安,致 調

南京

禮

部。

成化

初致仕,卒。

年,超 薦, 隱 疵,復降爲 於 堅却之。 乃 潘辰 Щ 擢 授翰林待詔。 林者。 太常 字 典籍,俄還故官。 時用, 少卿,致仕歸, 士大夫重其學行,稱爲南屛先生。 府尹 唐恂 景寧人。 久之, 掌典籍 舉辰,吏部以辰生長京師 卒, 少孤,隨從父家京師,以文學名。 南京缺祭酒,吏部推 特賜祭葬。 事。 預修會典成,進五經博士。 辰居官勤愼,晨 石珤及辰。 ,寢之。 恂復奏,給 入夜歸。 帝以命珤,而擢辰編 弘治六年詔天下舉才德之士 正德中,劉 事中王綸 典制誥時,有以幣酬 、夏昂 蓮摘會典 修。 亦交章 居 九 小

王直 書機密文字。 王英, 字時彦, 與修太祖實錄,授翰林院修撰,進侍讀。 金谿 人。 永樂二年進士。 選庶吉士,讀書文淵閣。 帝察其愼密,令與

四

諭 氏。 大 征,彼必遠遁,願勿窮追。」帝笑曰:「秀才謂朕黷武邪?」因曰:「軍中動靜,有聞卽入奏。」且 而 學士,乞省親歸。 城北門有石出土尺餘。發之,乃元時李陵臺驛令謝某德政碑也,碑陰刻達魯花赤等名 中官勿阻。 具 帝喜其詳審,曰:「爾是二十八人中讀書者,朕且用爾。」因問以北伐事。 ハ以奏。 十年扈 帝曰:「碑有蒙古名,異日且以爲己地,啓爭端。」命再往擊碎之。沉諸河,還 從 立功官軍有過,命勿與糧,相聚泣。 北 征 一。師旋, 過李陵城。帝聞城中有石碑,召英往視。 以英奏,復給予。仁宗卽位,累進右春坊 旣至,不識碑所。 英曰:「天威親

優渥。 年 江 中官護 勉之,毋俾前人獨專其美。」修太宗仁宗實錄成,遷少詹事,賜麒麟帶。 子 卒,年七十五。 民疫,遺祭南鎮。 按察副 宣宗立、還朝。 歸。 嘗謂英曰:「洪武中,學士有宋濂、吳沉、〔三〕朱善、劉三吾,永樂初,則解縉、胡廣。 使裕坐事 尋起復。 賜祭葬,諡 下獄。 是時海內宴安,天子雅意文章,每與諸學士談論文藝,賞花賦詩,禮接 時久旱,英至,大雨,民呼侍郎雨。年七十,再乞休。 正統元年命侍經筵,總裁宣宗實錄,進禮部侍郎。 英上疏待罪。 文安。 宥不問。明年進南京禮部尚書, 俾就閒逸。居二 母 八年命理部事。 不許。 喪,特與葬祭,遣 十二年,英 汝

英端凝持重,歷仕四朝。 在翰林四十餘年,屢爲會試考官,朝廷制作多出其手,四方求

姻戚。 錢習禮,名幹,以字行,吉水人。 旣仕,鄉人以奸黨持之,恒惴惴。 永樂九年進士。 楊榮乘間言於帝, 選庶吉士,尋授檢討。 帝笑曰:「使子寧在,朕 習禮與練子寧 **猶當用** 

官。 宣宗實錄成,擢學士,掌院事。 宣德元年修兩朝實錄,與侍講陳敬宗、陳循同召還,進侍讀學士。 七年以故鴻臚寺爲翰林院。 落成,諸殿閣大學士皆至, 英宗開經筵,為講

之,況習禮乎。」仁宗卽位,遷侍讀,知制誥,以省親歸。

習禮不設楊士奇、楊溥座,曰:「此非三公府也。」士奇等以聞。 帝命具座。 後遂爲故事。

旨 復 擢習禮於 上章乞骸骨,乃得歸。 正統 九年乞致仕。 、禮部。 習禮力辭。 不許。 習禮篤行誼,好古秉禮, 不允。 明年,六部侍郎多闕,帝命吏部尚書王直 王振用事,達官多造其門,習禮恥爲屈。 動有矩則。 家居十五年卒,年八十有九。 會大臣推舉, 十二年六月 而特

諡文肅。

列傳

第四十

錢

習

僧道 格。 陛 旨,授編修。 年遷南京侍講學士。 下實躬虔禱,而臣下不聞效忠補過之言,徒陳情乞用而已。 一數萬,日耗戶口,流民衆多,莫爲矜恤。」帝以章示諸大臣。 司 周 敍 國 計者不問耕桑,惟勤賦斂。 ,字公敍,吉水人。年十一,能詩。 歷官侍讀,直經筵。 正統六年上疏言事,帝嘉納焉。 軍士困役作,刑罰失重輕,風憲無激揚,言官務緘默。 永樂十六年進士。選庶吉士。作黃鸚鵡賦,稱 掌銓選者罔論賢否,第循資 王直等皆引罪求罷。 八年夏又上言:「比天旱,

明、親 政 又請復午朝,日接大臣,咨諏治道,經筵之餘,召文學從臣講論政事,幷詔天下臣 勇者効力,務掃北庭,雪國恥。 、缺失。 成3 經史、修軍政、選賢才、安民心、廣言路、謹微漸、修庶政八事。玉嘉納之。 王 帝因詔求言。 監國,馳疏言:「君父之讐不共戴天,殿下宜臥薪嘗膽,如越之報吳。 先遣辯士,卑詞重幣乞還鑾輿,暫爲君父屈。」因條上勵剛 使智者獻謀, 民直言時 景泰二年

志 ,正統末,請於朝。 **殺負氣節,篤行誼。** 詔許自撰,銓次數年,未及成而卒。 曾祖以立,在元時以宋、遼、金三史體例未當,欲重修。 

国 邑劉儼,字宣化。 正統七年進士第一。 歷官太常少卿。 景泰中,典順天鄉試,黜大

學士陳循、王文子,幾得危禍。 嚴立朝正直,居鄉亦有令德云。 詳高穀傳。 天順初,改掌翰林院事,卒官。 贈禮部侍郎、諡

柯潛, 字孟時,莆田人。景泰二年舉進士第一。 歷冼馬。 天順初,遷尚寶少卿,兼修

羅璟上章,請合葬裕陵。廷臣相繼爭。 心。」與璟皆再疏爭,竟得如禮。連遭父母喪,詔起爲祭酒,固乞終制。 憲宗卽位,以舊宮僚擢翰林學士。英宗實錄成,進少詹事。 未報。濟曰:「朝廷大事,臣子大節,舍是奚所用 慈懿太后之喪,潛與修撰 許之。未幾卒。

人稱其亭爲柯亭,柏爲學士柏。院中有井,學士劉定之所浚也。|柯亭、劉井,翰林中以爲美 潛邃於文學,性高介。 爲學士時,卽院中後圃構淸風亭,鑿池蒔芙蓉,植二柏於後堂,

談云

累官洗馬。孝宗爲太子, 李孜省指璟爲旻黨,調南京禮部員外郎。 羅璟,字明仲,回泰和人。天順末,進士及第。授編修,進修撰。 簡侍講讀。 母喪歸。 孝宗嗣位,王恕等言璟才,乃授福建提學副 璟與尚書尹旻子侍講龍同娶於孔氏。 預修宋元通鑑綱目。 旻得

列

傅第

四十

周敍

柯潛

使。弘治五年召爲南京祭酒。久之,卒。

部,具言其故,乃遣使召之。日且午,不及備試卷,命翰林院給以筆札。登第,卽丁母憂歸。 孔公恂,字宗文,先聖五十八世孫也。景泰五年舉會試,聞母疾,不赴廷對。 帝以問禮

行聖公孔彥縉卒,孫弘緒幼弱,詔遣禮部郎治喪,公恂理其家事。天順初,授禮科給事

后曰:「吾今日得聖賢子孫爲汝子傅。」孝肅皇后者,憲宗生母,方以皇貴妃有寵。於是具冠 恂,宋大賢溫國公光後。宜輔導太子。」帝喜。同日超拜少詹事,侍東宮講讀。入語孝肅皇 弘緒已襲封,大學士李賢妻以女,公恂因得交於賢。賢言:「公恂,大聖人後,贊善司馬

服拜謝,宮中傳以爲盛事云。

建言得罪者官,乃還故秩,涖南京詹事府。 久之,卒。 事,諸武臣譁然,給事御史交章駁之。下獄,謫漢陽知府。未至,丁父憂。服闋,商輅請復 憲宗嗣位,改公恂大理左少卿。 公恂言不通法律,乃復少詹事。成化二年上章言兵

司馬恂、字恂如、浙江山陰人。正統末,由舉人擢刑科給事中,累遷少詹事。 憲宗立、

命兼國子祭酒。 卒,贈禮部左侍郎。 **恂强記敦厚,與物無忤,居官無所表見。** 

美,蓋皆異於浮華博習之徒矣。 智父子仍世以儒術進,從容輔導,蓋其賢哉。 布衣,列禁近而善始終,固有幸不幸歟。 贊曰:建文之初,修尊賢敬老之節。 董倫以宿儒見重,雖寡所表見,當非苟焉已也。 二周、王英、錢習禮、周敍、柯潛謙和直諒,各著其 鄒濟諸人,以宮僚被遇而讒構不免,陳濟輩

起

議

校勘記

王汝 玉 原列在「徐善述」之上,據傳文次第改正。

ヘニコ 成化二年振畿內饑再遷禮部尚書 成化二年,原作「成化十二年」。 按鄒幹任禮部尚書在成化

五年, 見本書卷一一一七卿年表、憲宗實錄卷七〇成化五年八月庚 中條。 他振幾內饑應在成

化五 化二年」,據改。 年以前。 明史稿傳三二鄒濟傳附鄒幹傳、 孝宗實錄卷六二弘治五年四月戊午條均作 「成

\_ 吳沉 原作「吳沈」,據本書卷三太祖紀、卷一三七吳沉傳改。

列

傳

羅璟字明仲

孝宗實錄卷二〇一弘治

十六年七月庚寅條、國朝獻徵錄卷七四羅公璟墓志銘改。

原「明仲」二字倒置,據明史稿傳三八柯潛傳附羅璟傳、

# 明史卷一百五十二

## 列傳第四十一

宋禮 陳瑄 王瑜 周忱

侍郎。 報可。 |文初,薦授||陝西按察僉事,復坐事左遷刑部員外郞。 宋禮,字大本,河南永寧人。 七年丁母憂,詔留視事 永樂二年拜工部尚書。 嘗請給山東屯田牛種,又請犯罪無力准工者徙北京爲民,並 洪武中,以國子生擢山西按察司僉事,左遷戶部主 成祖卽位,命署禮部事,以敏練擢禮 事。

部

樂初,建北京,河海 多。 牓,引|汝絕|濟,屬之|衞河,爲轉漕道,名曰會通。 然岸狹水淺,不任重載,故終|元世海運爲 明初輸餉遼東、北平,亦專用海運。 九年命開會通河。 兼運。 會通河者,元至元中,以壽張尹韓仲暉言,自東平安民山鑿河至臨 海運險遠多失亡,而河運則由江、淮達陽武,發山西、河南丁夫, 洪武二十四年,河決原武,絕安山湖,會通遂淤。永

自 入洸 會 陸 使 使 十 流 旬 百 通 河 興 有 分 達 輓 而 五. 公安伯 臨 之 水 + 不 I 百 而 成 , 而 北 淸 源 病 餘 北 1 漕,命 里,淤 + 至 者十之六。 歸 徐亨、工 必資 達於淮 臨淸,地降九十尺,置閘十有七,而達於衞 海 叉奏濬 里入衞 汶水。 禮 者乃三之一,濬之便。」於是命禮及刑部侍郎金純 匯諸 部 兼董之。 沙河 河 侍郎蔣廷瓚會金純,濬 凡 南旺 泉之水 發 歷 乃用汶上老 入馬常泊, 山 八 地 「遞運所、民苦其勞。 八 東 ,盡出汶上,至南 勢高,決其水,南北皆注,所謂 月還 及徐州、 人白英策,築堽城及戴村壩,横亙五里, 京師、論 以 益汶。 應天 鎭江 功第 祥符魚王 語詳 旺,中分之爲二道,南流 至是濟寧州同知潘叔正 .民三 ,受上賞。 河渠志。 口 一十萬, 南至 至中欒下 是年, 水脊也。因 沾 蠲 潘 頭 租 叔 , 帝復 正亦 百 都 地降百十有六尺,置 復 舊 接徐 督 相 賜 黄河 用 十萬 周 上言: 地置閘,以 衣 工 長往治之。 、沛者十之四, 遏 一部侍 鈔 道 汶流, 石有奇, 舊 以 郎 「會通 張信言, 時 殺 使無 蓄洩。 水 禮 河 北 南 四 以

自 海海 德 運 計 州 以此 明 經 西 海 年 歷 北 船 而 險阻 以 論 開支河 御 艘, 一,每 史許 利病較然。 用 歲船 堪 泄 白 言衞 人 輒 水入舊 而 損 請撥鎭江、 河 運千 敗, 水 黄河, 有漂 息,命禮 石, 其費 沒者。 使至 鳳陽 往 口 海豐大沽河 經 辦 淮安、 有司 畫。 河 船容 修補, 禮 揚州 請 入海 自 迫於期限 及兗州糧, 白 魏 石者二十,船 家灣 帝 、多科 開 命俟秋 支河二,泄 合百萬石,從河運給北 斂爲民病 成後爲之。禮還言: 用 十人, 水 一而 入 可 土河,復 船 運 亦 四 尔

京。 其海道則三歲兩運。」已而平江伯陳瑄治江、淮間諸河功,亦相繼告竣。 於是河運大便

利,漕栗益 多。 十三年遂罷海運

出谷中抵江上, 聲如雷, 不偃一草。」朝廷以爲瑞。及河工成, 復以採木入蜀。十六年命治 獄 江西。 禮性剛,馭下嚴急,故易集事,以是亦不爲人所親。卒之日,家無餘財。 初,帝將營北京,命禮取材川蜀。 明年造番舟,自蜀召還。 以老疾免朝參,有奏事令侍郎代。 禮伐山通道,奏言:「得大木數株,皆尋丈。 一夕,自 二十年七月卒於官。 洪熙改元,禮

部尚書呂震 清子葬祭如 制。 弘治中,主事王寵始請立祠。 韶祀之南旺湖上, 以金純、周長

配。 隆慶六年贈禮太子太保。

妄得罪。 民甚 一德之。 |藺芳, 奏上,帝曰:「吾固知妄也。」得寢。已,坐事謫辦事官,從宋禮治會通河,復爲工部都水 今皆樹藝地,安所得銀礦。」芳詰告者, 夏縣人。 吉水民詣闕言縣有銀礦,遣使覆視。 洪武中舉孝廉。 累遷刑部郎中。 父老遮芳訴曰:「聞宋季嘗有言此者,卒以 知其誣。 永樂中,出爲吉安知府。 獄具,同官不敢署名, 芳請獨 寛厚 廉潔, 任

十年,河決陽武,灌中牟、祥符、 列 傅 第 四 + 宋 禮 尉氏, 造芳按視。 芳言:「中鹽隄當暴流之衝,請加築 主事

長策 道,以分水勢。」復命苦往治之。所經郡邑, 塞。」又言:「自中灤分導河流,使由故道北入海,誠萬世利。」又言:「新築岸埽,止用草索,不 卿 能 卒於官。 楊 三堅人。 也。」 砥言:「吳橋、東光、興濟、交河及天津屯田、雨水決隄傷稼。 宜 編木成 韶悉從之。 大囷,貫樁其中,實以瓦石,復以木橫貫樁表,牽築隄上,則殺水固隄之 其後築隄者遵用其法。 有不便民者輒疏以聞。 以宋禮薦,擢工部右侍郎。 乞開德州良店東南黄河故 事 竣還,十五 亡何,行 年十一月 太僕

芳 受命唯謹,由是爲良吏云。 芳自 奉約,布衣蔬食。 事母至孝。 母甚賢。 **芳所治事,暮必告母。** 有不當,輒加敎誠。

哈剌 事戍 越巂 賊 熾 甚。 遼陽,瑄伏闕 討 陳瑄,字彥純,合肥人。父聞,以義兵千戶歸太祖,累官都指揮同知。 ,以奇兵涉打沖河,「三得間道,作浮梁渡軍。 建 瑄將: 昌 叛番月魯帖木兒,踰 中軍,賊圍 請代,詔併原其父子。 之數 重 梁山,平天星寨,破寧番諸蠻。 這下馬射,傷足,裹創戰。 瑄少從大將軍幕,以射雁見稱。 旣渡,撤梁,示士卒不返, 自巴 復 至酉,全師還。 征鹽井,進攻 屢從 瑄代父職。 連戰破賊。 征南番 ト水 又從征賈 叉 瓦寨。 父坐 征

會雲南兵征百夷有功,遷四川行都司都指揮同知。

祖遂渡江。旣卽位,封平江伯,食祿一千石,賜誥券,世襲指揮使。 建文末,遷右軍都督僉事。 燕兵逼,命總舟師防江上。 燕兵至浦口,瑄以舟師迎降,成

於直沽,城天津衞。先是,漕舟行海上,島人畏漕卒,多閉匿。暄招令互市,平其直,人交便 運舟還,會倭寇沙門島。 瑄追擊至金州白山島,焚其舟殆盡。 永樂元年命暄充總兵官,總督海運,輸粟四十九萬餘石,餉北京及遼東。 **遂建百萬倉** 

泊於此,無高山大陵可依。請於靑浦築土山,方百丈,高三十餘丈,立堠表識。」旣成,賜名 以四十萬卒築治之,爲捍潮隄萬八千餘丈。明年,瑄言:「嘉定瀕海地,江流衝會。海舟停 九年命與豐城侯李彬統衙、閩兵捕海寇。海溢隄圮,自海門至鹽城凡百三十里。命瑄

寶山,帝親爲文記之。

呂梁洪險惡,於西別鑿一渠,置二閘,蓄水通漕。又築沛縣刁陽湖、濟寧南旺湖長隄,開泰 洩。 石,寖至五百萬石,國用以饒。時江南漕舟抵淮安,率陸運過壩,踰淮達淸河,勞費甚鉅。十 三年,瑄用故老言,自淮安城西管家湖,鑿渠二十里,爲淸江浦,導湖水入淮,築四閘以時宣 又緣湖十里築隄引舟,由是漕舟直達於河,省費不訾。其後復濬徐州至濟寧河。 朱禮旣治會通河成,朝廷議罷海運,仍以瑄董漕運。議造淺船二千餘艘,初運二百萬 叉以

規畫,精密宏遠,身理漕河者三十年,舉無遺策。 州 勢置閘四十有七,作常盈倉四十區於淮上,及徐州、臨淸、 淺,自淮 白塔河 至通州置舍五百六十八,舍置卒,導舟避淺。 .]通 大江。 又築高郵湖隄,於隄內鑿渠四十里,避風濤之險。 復緣河隄鑿井樹木,以便行人。 凡所 通州皆置倉,便轉輸 又自淮至 臨淸,相 慮漕舟 膠 水

革罷。 尋賜券,世襲平 所叉於其隙,雜役 兵食虛乏,乞選練銳士,屯守兼務。 軍伍竄亡,乞覈其老疾者,以子弟代,逃亡者追補,戶絕者驗除。六曰開平等處,邊防 快船、馬船所載不過五六十石,每船官軍足用,有司添差軍民遞送,拘集聽候,至有凍餒,請 去北京遠,往復踰 無循資格,選朝臣公正者分巡天下。 仁宗卽位之九月,瑄上疏陳七事。 四日教職多非其人,乞考不職者黜之,選俊秀補生員,而軍中子弟亦令入學。 江伯 以重困之,乞加禁絕。帝覽奏曰:「瑄言皆當。」令所司速行。遂降敕獎諭: 年,上逋公租,下妨農事。 七曰漕運官軍,每歲北上,歸卽修船, 三曰天下歲運糧餉, 一日南京國家根本,乞嚴守備。二日推舉宜覈實, 乞令轉至淮、徐等處,別令官軍接運至京。 又 湖廣、江西、浙江 勤苦終年。 及蘇、松諸 要地, 五日 該衞 府並

十二萬人疏濬,半月可成。」帝念瑄久勞,命尚書黃福往同經理。 宣宗卽位,命守淮安,督漕運如故。 宣德四年言:「濟寧以北,自長溝至棗林淤塞,計用 六年,瑄言:「歲運糧用軍

運爲兌運,自此始也。八年十月卒於官,年六十有九。追封平江侯,贈太保,諡恭襄。 十二萬人,頻年勞苦。乞於蘇、松諸郡及江西、浙江、湖廣別僉民丁,又於軍多衞所僉軍,通 所,官軍運載至京,量給耗米及道里費,則軍民交便。」帝命<u>黃福及侍郎王佐議行之。</u> 更民 湖廣、江西、浙江及蘇、松、安慶軍士,每歲以空舟赴淮安載糧。 若令江南民撥糧與附近衞 爲二十四萬人,分番迭運。又江南之民,運糧赴臨淸、淮安、徐州,往返一年,失悞農業,而 初,瑄以濬河有德於民,民立祠淸河縣。正統中,命有司春秋致祭。

卒。[三]贈黟國公,諡莊敏。 從之。景泰五年,山東饑,奉詔振卹。尋守備南京。天順元年召還,益歲祿百石。七年 之,進封侯。也先入犯,出鎭臨淸,建城堡,練兵撫民,安靜不擾。明年召還,父老詣闕請留。 孫豫,字立卿,讀書修謹。 正統末,福建沙縣賊起,以副總兵從寧陽侯陳懋分道討平

多所 督漕運。建淮河 日本貢使買民男女數人以歸,道淮安。鼢留不遣,贖還其家。淮、揚饑疫,煮糜施藥, 存濟。 子 | 鍛嗣伯。成化初,分典三千營及團營。 弘治六年,河決張秋,奉敕塞治。還,增祿二百石,累加太傅兼太子太傅。十三 口石閘及濟寧分水南北二閘。築隄疏泉,修舉廢墜。總漕十四年,章數十 尋佩平蠻將軍印,總制兩廣。移鎭淮陽,總

列

年,火篩寇大同。 住,其年卒。回 鼢以總兵官佩將軍印往援。 旣至,擁兵自守,爲給事中御史所刻,奪祿閒

衞 ,奪誥券。熊故黷貨,在淮南頗殃民。雖爲瑾搆陷,人無惜之者。瑾誅,赦還復爵。卒,無子。 子熊嗣。正德三年出督漕運。 劉瑾索金錢,熊不應,銜之。 坐事,逮下詔獄,謫戍海南

也。 角。 保。 寇亦尋退。董築京師外城,加太子太傅。 請出戰,營於盧溝,寇退而止。 四十石。」主能與士卒同甘苦。聞賊所在,輒擐甲先登。深箐絕壑,衝冒瘴毒,無所避,以故 **圭深嫉鸞,鸞數短圭於世宗,幾得罪。** 復平柳慶及賀連山賊,加太保,蔭一子。安南范子儀等寇欽、廉,黎岐賊寇瓊厓,相掎 再從子圭嗣。 以薦出鎭兩廣。封川寇起,圭督諸將往討,擒其魁,俘斬數千,加太子太 明年,寇復入古北口,或議列營九門爲備,主以徒示弱無益, 卒,贈太傅,諡武襄。 鸞敗,帝益重圭,命總京營兵。寇入紫荆關,圭

斬三萬餘。 子王謨嗣。 論功加太子太保,蔭一子。 萬曆中出鎭淮安,至總漕運,入掌前軍府事。卒, 賊張璉反,屠掠數郡。 王謨會提督張臬討平之,擒

贈

少保、諡武靖。

傳至明亡,質絕。

計。」垂涕諫。 結、謀弑帝,廢太子而立趙王。 王瑜,字廷器,山陽人。 不聽。 正懼謀泄,將殺瑜,瑜遂詣闕告變。 以總旗隸趙王府。 其黨高正者,瑜舅也,密告瑜。 永樂末,常山護衛指揮孟賢等與宦官黃嚴 按治有驗,賢等盡伏誅,而授瑜 瑜大驚曰:「奈何為 此族滅

不爲苛細,廷中稱其賢。

遼海衞千戶。

仁宗卽位,擢錦衣衞指揮同知,厚賜之,幷戒同官,事必白踰乃行。踰持大體,

事 命 財 安, 「訟弟不友,無親不孝。」杖而斥之。 於傷恩。」即代償,勸其敦睦。 有枉者。 ,抵敗舟 瑜故鄉也,人以爲榮。 宣德 八年進都指揮僉事,充左副總兵,代陳瑄鎭淮安,董漕運,累進左軍都督僉事。 一板耶。」竟得末減。 正統四年,議事入京。得疾,東兩手如高懸狀,號救求解而 在准數年,守瑄成法不變,有善政。 歲凶,發官廩以振。 二卒盜敗舟一板,有司 又有負金不能償,至翁壻兄弟相訟者。 然性好貨,為英宗切責,而前所發不軌 以盜官物,坐卒死。 民有親在與弟訟產者。瑜曰: 卒。 瑜 瑜 曰:「兩卒之 日:「奈何以

周忱 字恂 如,吉水人。 永樂二年進士。 選庶吉士。 明年,成祖擇其中二十八人,令進

列

學文淵閣 忱自陳年少乞預。 帝嘉其有志,許之。 尋擢刑部主事,進 員 外郎

理,而 宣德初,有薦爲郡守者。 忱 江南 有經世才,浮沉郎署二十年, 爲甚,蘇州 郡,積逋至八百萬石, 原吉曰:「此常調也,安足盡周君。」五年九月, 人無知者,獨夏原吉奇之。 思得才力重臣往釐之。 洪熙改元,稍遷越府 乃用大學士楊榮薦, 帝以天下財賦多不

遷忱工部右侍郎,巡撫江南諸府,總督稅糧

收。 次年 綱運 而已。 糧長 忱止設正 例,糧長正副三人,以七月赴南京戶部領勘合。 乃創爲平米法,令出耗必均。 加 聽 即家貯之,曰:「此致逋之由也。」遂令諸縣於水次置囤,囤設糧頭、囤戶各一人,名轄 始至,召父老問逋稅故,皆言豪戶不肯加耗,幷徵之細民,民貧逃亡,而稅額益 至六七萬石以上,始立糧長一人總之,名總收。 五. 其 置 、塡注剝淺諸費,歸以償之。 |撥運、網運二簿。 一副各一人,循環赴領。 撥運記支撥起運之數,預計所運京師、 又請敕工部頒鐵斛,下諸縣準式,革糧長之大入小出 **訖事**,有司類收上之部。 支撥羨餘,存貯在倉,日餘米。 旣畢,復齎送部。 民持帖赴囤,官爲監納,糧長但奉期會 民大便。 往反資費,皆科斂充之。 通州諸倉耗,以次定支。 忱見諸縣 次年餘多則 收糧 加六徵,又 無團局, 者。 缺。

初,太祖平吳,盡籍其功臣子弟莊田入官,後惡富民豪幷,坐罪沒入田產,皆謂之官田,

按其家租籍征之,故蘇賦比他府獨重。 官民田租共二百七十七萬石,而官田之租乃至二百

六十二萬石,民不能堪。

忧在任,江南數大郡,小民不知凶荒,兩稅未嘗逋負,忧之力也。 寡給之,秋與糧並賦,凶歲再振。其姦頑不償者,後不復給。定爲條約以聞。帝嘉獎之。終 遂置倉貯之,名曰濟農。振貸之外,歲有餘羨。凡綱運、風漂、盜奪者,皆借給於此,秋成, 府支給,與船價米一斗,所餘五斗,通計米四十萬石有奇,并官鈔所糴,共得米七十萬餘石, 故時公侯祿米,軍官月俸,皆支於南戶部。蘇、松民轉輸南京者,石加費六斗。、忱奏令就各 減,民始少甦。七年,江南大稔,詔令諸府縣以官鈔平糴備振貸,蘇州遂得米二十九萬石。 抵數還官。其修圩、築岸、開河、濬湖所支口糧,不責償。耕者借貸,必驗中下專力及田多 時宣宗屢下詔減官田租,忱乃與知府況鍾曲算累月,減至七十二萬餘石,云池府以次

合。兌軍或後期阻風,則令州縣支贏米。設厫於瓜洲水次,遷米貯之,量支餘米給守者。由 洲又益五升。其附近幷南京軍未過江者,卽倉交兌,加與過江米二斗,襯墊蘆蓆與折米五 業。忱與平江伯陳瑄議,民運至淮安或瓜洲水次交兌,漕軍運抵通州。淮安石加五斗,瓜 時漕運,軍民相半。軍船給之官,民則僦舟,加以雜耗,率三石致一石,往復經年失農

列傳

是漕費大省。

於 旣 納 兩 月 馬 貴 稅 俸 布 頭 皆 重 民 疋 準 勢 間 折 持 有 重 馬 亦 三斤抵 耗 納 俸 草 金花 容細。乞自今不 帖 損 歲 り則 赴 運 領 糧一石。 銀 馬 兩京,勞費 () 每兩 南京。 頭 横 科補買。恍 當米四石,解京兒俸,民出 米 比解,以 拘 不訾。 賤 輕 詩い 重,務 縷粗 俸帖七八石,僅易銀 令田 忱請每束折銀三分,南京則輕齎即 取長 見斥者十八 一畝出 廣 米升九合, 如式。」從之。 九。 甚少,而 與秋糧俱征 忱言:「布縷細 兩。 各郡驛馬及一 官 俸常足。 忱 請 檢重 一,驗馬 地 必輕,然 嘉定、崑 額官田 買納。 切 上 中 供 下 價 極 帳 京師 Щ 直 益 ,舊皆領 諸 貧 給 百官 下戶 縣 米 歲 o

竈 言 置 江 抵 左 一 贍 侍 鹽 明 1 艘 鹽 0 課 年 郎 正 田 統 須 倉 因 華亭、 六年 Ŀ 初 米 租 益 便宜 竈 千 淮 補 石。 命 、揚災,鹽課虧,敕忱巡視。 上海二縣逋課至六十三萬 逃亡缺 戶 四事 兼 得 忱 理 納 以成成 , 湖 額。 鹽給米。 命速行 州 大事不宜惜費,第減二 、嘉興二府稅 由 是鹽課大殖。 之。 時米貴 忱為節 鹽賤,官 糧,又命 餘 i 竈 戶 奏令蘇州諸府,撥餘 浙江 引, 運耗,得 得積 同 竈丁 一十石 一當造 刑 科都給 鹽 逃亡。 ·,奏於 海 一,民 船 米 三萬二千餘石。 得 五十艘,下忱計 朝, 事 忱謂 食 中 米 竟得 米一二萬石 郭瑾錄 田 、公私 賦宜養農 報可。 大濟。 南 京 度。 以 亦 運 刑 夫, 揚 忱 九 倣 尋 獄 州 載 召 濟 鹽 敕 農 秩 間 鹽 一課宜 兼 場,聽 滿 都 倉 理 進 匠, 法, 養 松

面 恍"「公不及胡公。」恍笑曰:「胡卿敕旨 忱 素 樂易 先是 大理 卿胡 巡 撫 用 在 法 祛除民害。 嚴 忱 切 朝廷 治 以簡 命我,但 易, 告託 云安撫 者 軍民。 輒 委寄 或

從容問 IE 同耳。」旣久任江南,與吏民相習若家人父子。 所疾苦,爲之商略處置。 其馭下也,雖卑官冗吏,悉開 每行村落,屏去騶從,與農夫餉婦相對, 心訪納。 遇 長吏有能,如況鍾

詣 及 松江 松江 相 知府趙豫、常州知府莫愚、同知趙泰輩,則推心與咨畫,務盡其長,故事無不舉。 視 水利,見嘉定、上海間,沿江生茂草,多淤流,乃濬其上流,使崑山、顧浦諸所水,

間 ,朝廷委任益專。 聽。

壅遂盡滌。暇時以匹馬往來江上,見者不知其爲巡撫也。

歷宣德、正統二十年

讯

流駛下,

兩遭親喪,皆起復視事。忧以此益發舒,見利害必言,言無不

資等。 之 改 田 可 見 征 餉 多併於富室,宜徵其租,沒於江者除之,則額不虧而貧富均。 以足國 財 租 過客,無稍 初,欲減松江官田額,依民田起科。戶部郭資、胡濙奏其變亂成法,請罪之,宣宗切責 賦 米。」悉報可。 |忧嘗言:「吳淞江畔有沙塗柴場百五十頃,水草茂盛,蟲蜢多生其中。 充溢,益務廣大。修葺廨舍學校、先賢祠墓、橋梁道路,及崇飾寺觀,贈遺 .課,消蟲災。」又言:「丹徒、丹陽二縣田沒入江者,賦尙未除。 吝惜。 其因災荒請蠲貸,及所陳他利病無算,小者用便宜行之,無所 胥吏漁蠹其中,亦 不甚訾省。 以故屢召 無錫官田賦白米太重,請 國初 (蠲稅之家,其 請募民開墾, 中 顧慮。久 ·朝官,

不問。 九 年, 先是,奸民尹崇 給事 中李素等劾忱妄意變更,專擅科斂,忱上章自訴。 禮 欲撓忱法,奏忱不當多徵耗米,請究問倉庫主者,忱因罷前法。 帝 以餘米旣爲公用,置 旣

列

傳

第

四

周

忱

尚書。 丽 兩稅復逋,民無所賴,咸稱不便。、忱乃奏按崇禮罪,舉行前法如故。 尋以江西人不得官戶部,乃改工部,仍巡撫 再以九載滿,進戶部

罪。」禮部尚書楊寧言:「妄費罪乃在忧,今估計餘值,悉征於民間,至有棄家逃竄者,乞將正 設法剗弊,節省浮費,於是歲無逋租,更積贏羨。凡向之公用所須、科取諸民者,悉於餘米 統以前者免追。」詔許之,召鑑等還。旣而言官猶交章劾忱,請正其罪。景帝素知忱賢,大 諭,許臣便宜行事,以此支用不復具聞,致守學訐奏,戶部遣官追徵,實臣出納不謹,死有餘 隨時支給。或振貸未還,遇赦宥免,或未估時值,低昂不一。[+] 緣奉宣宗皇帝幷太上皇敕 叉 以給事中金達言,召忱還朝。忱乃自陳:「臣未任事之先,諸郡稅糧無歲不逋。自臣蒞任, 景泰元年,溧陽民彭守學復託忱如崇禮言,戶部遂請遣御史李鑑等往諸郡稽覈。 明年

不可校,公私饒足,施及外郡。 用之,努力種朝廷田,秋間又納朝廷稅也。」其所弛張變通,皆可爲後法。 不追取。 然當時言理財者,無出忱右。其治以愛民爲本。濟農倉之設也,雖與民爲期約,至時 每歲徵收畢,踰正月中旬,輒下檄放糧,曰:「此百姓納與朝廷賸數,今還與百姓 景泰初,江北大饑,都御史王竑從忱貸米三萬石。 忱為計至 諸府餘米,數多至

亦多保持之,但令致仕。

來年麥熟,以十萬石畀之。

言倉米數百萬,可充京軍一歲餉,令自往取,則立盡,何至遂付煨燼。頃之,詔趣造盔甲數 朽腐,請出煎膠,俟歸市皮償庫。 爲汝斷理,敢相紿耶。」三殿重建,詔徵牛膠萬觔,爲綵繪用。 忱言是日江中 性 機警。 無風,其人驚服。 錢穀鉅萬,一屈指無遺算。 土木之變,當國者議欲焚通州倉,絕寇資。 有奸民故亂其舊案嘗之。忱曰:「汝以某時就我決事,我 嘗陰爲册記陰晴風雨。 **忱適赴京,言庫貯牛皮,歲久** 或言某日江 中遇風失米, **忱適議事至**,

其後吳大饑,道殣相望,課逋如故矣。 文襄。 忱 旣 ]被劾,帝命|李敏代之,敕無輕易|忱法。 然自是戶部括所積餘米爲公賦,儲備蕭然。 沉鍾等自有傳。 民益思忱不已,即生祠處處祀之。景泰四年十月卒。

忱計

明盔浴鐵工多,令且沃錫,數日畢辦。

用 籠 廩有 巧 重 餘羨。 困 取,為科斂之術者也。 贊 曰:宋禮、陳瑄治河通運道,爲國家經久計,生民被澤無窮。 분 非 此無他故,殫公 成 功之有迹者易以循,而用法之因人者難其繼哉。 然河渠之利,世享其成,而忱之良法美意,未幾而澌滅無餘,民 心以體 國,而才力足以濟之。 誠異夫造端 雖然,見 周忱治財賦,民不擾而 興事,徼一時 小 利 而樂紛更, 之功,智

## 不能不爲當日之曉曉者惜也。

#### 校勘記

- 則殺水固隄之長策也 策,原作「築」,據明史稿傳三七宋禮傳附藺芳傳改。
- (ニ) 以奇兵渉打沖河 打沖河, 原作「打中河」,據本書卷三一一建昌衛傳、太祖實録卷二一九洪武
- 二十五年七月癸未條改。

天順九月甲申條改

- 七年卒 原作「三年卒」,據本書卷一〇六功臣世表、明史稿傳三七陳瑄傳、 英宗實録卷三五七
- 其年卒 月甲寅條,應作「十五年」。 其年,指弘治十三年。 依本書卷一〇六功臣世表、孝宗實録卷一九四弘治十五年十二
- 五 萬曆中出鎮淮安 十月癸丑條均繫王謨出鎮淮安于隆慶四年。 萬曆中,應作「隆慶中」。本書卷一〇六功臣世表、穆宗寶録卷五〇隆慶四年
- [六]減至七十二萬餘石 減至,本書卷七八食貨志作「減」,國朝獻徵録卷八三況鍾傳作「減省」,文
- 「ヤ」或未估時值低昂不一 英宗實録卷二〇五景泰二年六月丙子條作「有估計時值低昂不一者」。

義較明晰

# 明史卷一百五十四

## 列傳第四十二

張輔 高士文 徐政 黄福 劉 儁 呂毅 劉昱

陳洽 侯保 馮貴 伍雲 陳忠 李任等 李彬

柳升

崔聚

史安

陳鏞

李宗昉

潘禋

梁 銘 通 陶季容 陳汀

從戰夾河、藁城、彰德、靈璧,皆有功。 **張輔,字文弼,河間王玉長子** 也。 從入京師,封信安伯,祿千石,予世券。 **臙師起,從父力戰,爲指揮同** 知。 玉歿東昌,輔 妹爲帝妃。丘 嗣 職

[福、朱能言輔父子功俱高,不可以私親故薄其賞。 永樂三年進封新城侯,加祿三百石

是時安南黎季犛弑其主, 自稱太上皇,立子蒼爲帝。其故王之孫陳天平自老撾來奔,

列

俥

第

四

+

張

帕

洁 八 十萬 亦 死 請 ,會左副將軍西平侯沐晟,分道進討。 帝 歸 大怒,命成國公朱能爲征夷將軍,輔爲右副將軍,帥豐城侯李彬等十八將軍,兵 國 帝遣 一都督黃中以兵五千送之,前大理卿薛嵓爲輔。季犛伏兵芹站,殺天平, 兵部尚書劉儁贊軍事,行部尚書黃福、日之大

理

寺卿陳洽給饋餉

進 進 癘 隘 象 南 Щ 梯 陳 攻 旭 未 取 , 城 迎 傅 有康、西二都、依宣、洮、海、富良四江 盡 戦 多 0 興 取西都 其 四 棚 邦城。 ( ) 宜及 會帝 年 城 橋艦 緣江 進破隘留、雞 十月,能卒於軍,輔代領其衆。自憑祥進師,度坡壘關,望祭安南境內山川,檄季犛 輔 ,又分軍破賊援兵。 都 聞朱能卒,敕拜輔爲將軍,制詞以李文忠代開平王常遇春爲比,且言乘 以 木 時滅賊。 相連九百餘里,兵衆七百萬,欲據險以老輔師。 佯欲 畫 指 棚 揮蔡福 獅 俘斬 蒙馬 他攻以懈賊,令都督黃中等將死士,人持 十二月,輔軍次富良江北,遣驃騎將軍朱榮破賊嘉林江,遂 陵二關,道芹站,走其伏兵,抵新福。 無算。 衝之, 先登,士蟻附而 翼 進克東都 季犛焚宮室倉庫逃入海,三江州縣皆望風降。 以 神 機 上,角鳴,萬炬齊舉,城下兵鼓噪繼進,遂 火器。 . 為險,賊緣江 朝 吏民,撫降附 象皆反走,賊大潰。斬 [南北岸立栅,聚舟其中,築城於多 來歸者 晟軍亦自雲南至,營於白鶴。安 **炬火銅角,夜四鼓,越重濠,** 峬 自新福移軍三帶州,造 日 以萬計。 其 帥二人,追至傘圓 遣別將李彬 入城。賊 與晟合 冬 月 船 驅 雲 軍 邦 圖

級 明 賊 年 ·春 ,輔遣淸遠伯王友等濟自注江,悉破籌江、困枚、萬劫、普賴諸寨,斬首三萬七千 盡得

安南 横撃 還 水 尋 餘 撃破 軍 漲 平。 ,大破之,馘斬數萬,江水爲赤,乘勝窮 ,遂畢渡。 季犛舟 將胡杜 得府 城 、師於木丸江,斬首萬級,擒其 州四十八,縣一百八十,戶三百十二萬。 五月至奇羅海口 聚舟盤灘江。 一个都督 柳升守之。 輔使降將陳封襲走之, ,獲季犛及其子蒼,並僞太子諸王將相大臣等,檻 已,賊由富良江 追。 將校百餘人,溺 時 天旱水淺,賊棄舟陸走。 求陳氏後不得,遂設交阯 入。 死者無算。 其舟。 輔與晟夾岸迎戰。 遂定東潮、<br />
諒江諸府州。 追至膠水縣 官 軍至,忽大雨 升等以舟 布 悶 政司,以 送京師 海 師

舟, 舟 至 將 予 太平海 六百餘 軍 世 招諒江 削 券。 。 六年 帥 口 保保 其 夏,輔振 北 師 年冬,陳氏故臣 往討。 江 諸避寇 賊 東南岸。 將阮景異以三百艘迎敵,三復大破之。 旅還京師。 者復業。 時 簡 輔帥 定 Ē 簡定復叛。 管 逐進 陳 再賜宴奉天殿,帝爲賦平安南歌,進封英國公,歲祿三千石, 旭等以划 稱 至 越上皇,別立 一慈廉州 命沐晟討之,敗績於生厥江。 船戰,乘 破喝 陳季擴爲皇,勢張甚。 風 門江,克廣威州 縱 火火,擒 於是季擴 賊 帥 孔目 二百餘 自言陳氏後,遺使求紹 明 棚 年春,復 輔就 人,盡得 遇 叱覽 賊 命輔 減 鹹子 其 Щ 舟。 伐 佩 關。 木 征 賊 追 造 虜

官

奉

表

稱

其

地

內

屬。

自

唐之亡,交阯淪於蠻服者四百餘年,至是復

入版圖。

帝爲詔告天下,

諸王百

列

傅

步騎 及其黨送京師。八年正月進擊賊餘黨,斬數千人,築京觀,惟季擴未獲。帝留冰晟討之,召 ·先進,輔帥舟師繼之。 自黃江至神投海,會師清化,分道入[磊江,獲]簡定於美良山中, 輔曰:「向者遍索陳王後不應,今詐也。 吾奉命討賊,不知其他。」遂遣朱榮、蔡福等以

鯆

班師。

謁帝於興和,命練兵宣府、萬全,督運北征

相繼 息兵。 進,官軍與相鉤連,殊死戰。自卯至巳,大破賊,擒渠帥七十五人。進軍乂安府,賊將降者 月破賊帥阮景異於月常江,獲船百餘,生擒偽元帥鄧宗稷等,又捕斬別部賊首數人。以瘴癘 申軍令。 東卒侵擾,往往起附賊,乍服乍叛,將帥益玩寇。 九年正月仍命輔與冰晟協力進討。 時陳季擴雖請降,實無悛心,乘輔歸,攻剽如故,晟不能制。 交人苦中國約束,又數爲 明年八月擊賊於神投海。 都督黃中素驕,違節度。詰之不遜,斬以徇。將士惕息,無敢不用命者。 賊舟四百餘,分三隊,銳甚。 輔衝其中堅,賊却,左右隊迭 其年七

崖 象 |奔還,自蹂其衆。 裨將楊鴻、韓廣、薛聚等乘勢繼進,矢落如雨, 賊大敗。 擒其帥五十六 側徑,騎不得進。 追至 十一 年冬,與晟會順州,戰愛子江。賊驅象前行。輔戒士卒,一矢落象奴,二矢射象鼻。 一愛母江,盡降其衆。明年正月進至政平州。 輔與將校徒步行山箐中。夜四鼓抵其巢,悉擒阮景異、鄧容等。[三]季 聞賊屯暹蠻、昆蒲諸栅,遂引兵往。懸

四十二 張輔

列

傅

第

以 擴 賊 走老撾,遣指揮師祐以兵索之,回破其三關。 所 取占城地、設升、華、思、義 四州,增置衞所,官其降人,留軍守之而還。 **逐縛季擴及其孥, 送京師。** 賊平。 十三年春至 承制

京。 而 黎利反,累遣將討之,無功。 旋 鯆 命 凡四至交阯,前後建置郡邑及增設驛傳遞運,規畫甚備。 爲交阯總兵官往鎭。 至宣德時,柳升敗沒,王通與賊盟,倉卒引還。廷議棄交阯, 而餘寇陳月湖等復作亂,輔悉討平之。 交人所畏惟輔。 十四年冬召還。 輔還一年

輔爭之不能得

也。

吉,惟輔 經 百官俸米皆給於南京,此蓋特恩云。 筵事,監修實錄。 仁宗即位 與學士楊 l,掌中軍都督府事,進太師,並支二俸。 士奇服如帝。 帝歎曰:「輔,武臣也,而知禮過六卿。」益見親重。 成祖喪滿二十七日,帝素冠麻衣以朝。 尋命輔所受太師俸於北京倉支給。時 而羣臣皆已從 尋命知

狀, 柱 四 年 國 因請將兵擊之。 ,都御史顧佐請保全功臣。 ,朝朔望。 英宗即位,加號翊運佐 帝決策親征,命輔扈行。 韶輔解府務,朝夕侍左右 理 ,知經筵、監修實錄 事平,加祿三百石。 ,謀畫軍 如故。 國 輔威名益盛,而久握兵。 重事 ,進階光祿大夫左

宣德元年,漢王高煦謀反,誘諸功臣爲內應,潛遣人夜至輔所。

輔執之以聞,盡得其反

輔雄 毅 方 人嚴,治 軍 整肅,屹如山岳。 三定交南,威名聞海外。 歷事 四朝,連姻帝室,而

不敢言。 臣望塵頓首,惟輔與抗禮。 小心敬愼,與蹇、夏、三楊,同心輔政。二十餘年,海內宴然,輔有力焉。 至土木,死於難,年七十五。追封定興王,諡忠烈。 也先入犯,振導英宗親征,輔從行,不使預軍政。 王振擅權,文武大 輔老矣,默默

嗣。 冠。 然性豪侈,又頗朘削軍士,屢爲言者所糾。嗣公凡六十六年,握兵柄者四十年,尊寵爲勳臣 真武觀, 免織造, 召還中官董織者。 武宗即位, 與羣小狎遊, 懋率文武大臣諫, 其言皆切直。 上言防邊事宜,諫止發京營兵作圓通寺。弘治中,御史李興、彭程下獄,懋論救。復請罷作 正德十年卒,年亦七十五。贈寧陽王,諡恭靖。萬曆十一年與朱希忠並削王號。孫崙 子懋,九歲嗣公。 傳爵至世澤,流寇陷京師,遇害。 憲宗閱騎射西苑。 懋三發連中、賜金帶。歷掌營府、累加至太師。嘗

初,輔之定交阯也,先後百餘戰。其從征死事最著者,有高士文、徐政。

善騎射。從成祖起兵,累官都督僉事。從張輔征交阯。 士文,咸陽人。<br />
洪武中,以小校從征雲南及<br />
金山有功,為燕山左護衛百戶。<br />
質直剛果, 五年八月,士文帥所部敗之廣源,進圍其寨。晝夜急攻,垂破,賊突走。士文追與戰, 黎季犛旣擒,餘黨竄山谷中,出沒

四二二五

其子福嗣,祿千三百石,予世券。三傳至孫霳,無子,以義子爲嗣,事覺,爵除。 中飛石死。所部復追賊,賊失巢潰散,遂爲指揮程瑒所滅。朝廷念士文功,追封建平伯,令

船於三帶江以濟大軍。拔西都,戰鹹子關,皆有功。陳季擴反,盤攤地最要衝,張輔遣政守 七年八月,賊黨阮景異來攻,與戰,飛鎗貫脇,猶督兵力戰,竟敗賊。 徐政,儀眞人。建文時,爲揚州衞副千戶,以城降成祖,累遷都指揮同知。從征交阯,奪 **賊退,腹潰而死。** 

官。未幾,拜工部尙書。永樂三年,陳瑛劾福不恤工匠,改北京行部尙書。明年坐事,逮下 奇之、超拜工部右侍郎。建文時、深見倚任。成祖列姦黨二十九人、福與焉。成祖入京師、 詔獄,謫充爲事官。已,復職,督安南軍餉。 |福迎附。|李景隆指||福姦黨,||福曰:「臣固應死,但目爲姦黨,則臣心未服。」帝置不問,復其 **黄福,字如錫,昌邑人。洪武中,由太學生歷金吾前衞經歷。上書論國家大計。** 

瀘江北岸至欽州,設衞所,置驛站,以便往來。開中積鹽,使商賈輸粟,以廣軍儲。官吏俸 繁劇,腷隨事制宜,咸有條理。上疏言:「交阯賦稅輕重不一,請酌定,務從輕省。」又請:「循

安腐旣平,郡縣其地,命福以尚書掌布政、按察二司事。時遠方初定,軍旅未息,庶務

列傅

第四十二

黄稲

皆報 召還, 交阯 廩, 如 鎭之以 歸。 倉 賊 可。 栗 命 遂 鎭 靜,上下 不足則給以公田。」又言「廣西民餽運、陸路艱險、宜令廣東海運二十萬 兼詹 守中官馬騏怙寵 劇,訖不 於是編氓籍,定 事,輔太子。 ·帖然。 能靖。 時羣 仁宗崩 赋 虐民,福數裁 ·臣以細故謫交阯者衆,福咸加拯恤,甄 福在 稅,興學校,置官師。 交阯 ,督獻陵工 凡十九年。 抑之。 0 騏 誣 數召父老宣諭德意,戒屬 及還,咬人扶攜走送,號泣不忍別。 福有異志。 帝察其妄,不問。仁宗卽位, 其賢者與共事,由 吏毋苛 石以 擾 是至者 福 給。」 一切

我豈得 行 母 南 司 在 也,公不去,我 事 京,召赴闕,敕曰:「卿惠愛交人久,交人思卿,其爲朕再行。」仍以工部 工 宣德 反哉 部 比至,柳升敗死,福走還。 尙 元年 書 遭 ,馬騏激交阯 人馳往守護,饋白金、餱糧,肩 曹不至 此。」力持之。 復叛。 至雞陵關,爲賊所 時陳洽以兵部尚書代福,累奏乞福還撫交阯。 黎利 聞之曰「中國遺官吏治交阯,使人 輿送出境。 執 欲 自殺。贼羅拜下 至龍州、盡 取 所遺 尚書兼詹事, 江 歸之官。 人如黃尚書 會福 還爲 奉使 領

徐、臨淸,而 間 雖營建北京,南討交阯,北征沙漠,資用未嘗乏。 四 年 與 平江 令軍 伯 士接運至北京,民大稱 董 漕 事, 議令江西、湖廣、浙江 便。 五 年 陳 及江南北諸郡民, **此國** 足兵食省役之要。 無大費,而歲用僅給。 量地遠近, 其言足 食,謂 卽 轉粟於淮、 不幸有水 水樂

名,事微細無不謹。憂國忘家,老而彌篤。自奉甚約,妻子僅給衣食,所得俸祿,惟待賓客 隆用福言,政肅民安。 正統五年正月卒,年七十八。 南京兵部。英宗卽位,加少保,參贊南京守備襄城伯李隆機務。留都文臣參機務,自福始。 者。]對曰:「福受知太祖,正直明果,一志國家。永樂初,建北京行部,綏輯凋察,及使交阯, 乃朝暮奔走勞悴,殊非國家優老敬賢之道。」帝曰:「非汝不聞此言。」士奇又曰:「南京根本 總蕃憲,具有成績,誠六卿所不及。福年七十矣,諸後進少年高坐公堂理政事,福四朝舊人, 官行視田以俟開墾。」帝從之。命吏部郎中趙新等經理屯田,福總其事。旣而有言軍民各 歲可得二百八十萬石。」帝善之,下行在戶、兵二部議。郭資、張本言:「緣河屯田實便,請先 重地,先帝以儲宮監國。福老成忠直,緩急可倚。」帝曰:「然。」明日改福官南京。明年兼掌 以五萬頃爲率,發附近居民五萬人墾之。但山東近年旱饑,流徙初復,衞卒多力役,宜先遣 有常業,若復分田,役益勞擾,事竟不行。改戶部尚書。 七年,帝於宮中覽福漕事便宜疏,出以示楊士奇曰:「福言智慮深遠,六卿中誰 福丰儀修整,不妄言笑。歷事六朝,多所建白。公正廉恕,素孚於人。當官不爲赫赫 倫比

年自食,次年人收五石,三年收倍之。旣省京倉口糧六十萬石,又省本衞月糧百二十萬石,

旱,征調將何以濟了請役操備營繕軍士十萬人,於濟寧以北,衛輝、眞定以東,緣河屯種。初

南京,聞福疾,往候之。 貶。 曰:「南|交草木,亦知公名,安得不識。」|福卒,贈諡不及,士論頗不平。 兵部侍郎徐琦使安南回,福與相見石城門外。 贊守備者邪 周匱乏而 |福參贊||南京時,嘗坐||李隆側。 已。 了。本不變。 初,成祖手疏大臣十人,命解縉評之,惟於福曰:「秉心易直,確乎有守。」無少 福驚日:「公輔幼主, 然隆待福甚恭。 士奇寄聲曰:「豈有孤卿而旁坐者。」 公退,卽推福上坐,福亦不辭。 或指福 日不可去左右, 問安南來者曰:「汝識此大人否?」 奈何遠出了士奇深服其言。 成化初,始贈太保,諡 福 士奇之省墓也, 曰:「焉有少保 對 道 而

劉儁,字子士,江陵 二十八年擢右侍郎。 人。 建文時,爲侍中。 洪武十八年進士。除兵部主事,歷郎中。 成 祖卽位,進尙 書。 遇事善剖決,爲帝所

口 未幾,簡定復叛 司不言,未加褒卹,敕責禮官。 颶 永樂四年大征安南,以儁參贊軍務。 風 作,揚沙 傷 再 出 き事 且戰且行,為賊所圍, 參贊沐晟軍務。 乃賜祭,贈太子少傅,諡節愍。 六年冬,晟與簡定戰生厥江,敗績。 **傷** 自經死。 人縝密勤敏,在軍佐畫籌策有功,還受厚賚。 洪熙元年三月,帝以儁陷賊不屈,有 官其子座給事中。 **儁行至大安海** 

與儁同死者呂毅、劉昱。

奪官。 佐 征 南將軍韓觀鎭廣西。 毅 帝薄毅罪,起爲鷹揚將軍,從張輔討季犛有功,掌交阯都司事。 項城人。 以濟南衛百戶從成祖渡江,積功至都督僉事。與同官黃中充左右副將軍, 尋與中將兵送故安南王孫陳天平歸國,至<u>芹</u>站,天平被劫去,坐 至是與賊戰,深入陷

昱,武城人。 自吏科給事中遷左通政,出爲河南參政,改交阯。嚴肅有治材,吏民畏憚。

軍敗,亦死之。

陣死。

恰奔喪。 事 中。 陳洽,字叔遠,武進人。好古力學,與兄濟、弟浚並有名。 嘗 會蠻叛道梗,冒險間行,負父骨以歸。 奉命閱軍,一過輒識之。 有再至者,輒 叱去。 建文中以茄瑺薦,起文選郎中。 帝嘉其能,賜金織衣。 洪武中,以善書薦授兵科給 父成五開殁,

大軍 成祖 出,逐命贊軍務,主饋餉。 即位,擢吏部右侍郎,改大理 安南平,轉吏部左侍郎。是時黃福掌布、按二司事,專務寬大, 卿。 安南 兵起,命洽赴廣西,與韓觀選士卒從征。

列

傅

第四十

興 兼署 拊 輔 循 往 禮 其 交阯 民。 部 工部 ,討陳季擴。 洽 甄拔 事 o 才能,振 七年 居五 復 參 以風紀,覈將士功罪,建置土官,經理兵食,剖 張輔 年,進兵部尚書,復留贊李彬 軍討簡定,平之。 還,從帝北 軍 事 征 一,與 輔 練兵塞 決如 流。 還朝, 九年 命 復

利尤 歎 麾 籠 日 通 黨 至 兵徑渡,陷泥淖 曰:「大臣 州 羽 交阯 一架點。 吾爲 一帝乃 仁宗 漸盛,將不可 國 召黄福還,以洽掌 削智、政官 大臣, 以身殉國,一代幾 + 而榮昌伯陳智、都督方政 月進師 食祿 制。 中。 舒。 四十 乞諭 伏發,官軍大敗。 應平,次寧橋。 命成山侯王通 年,報 諸將速滅 布、按二司,仍參軍務。 人!贈少保,諡 國在 賊,毋爲 不 一个日, 冷與諸將言地險惡,恐有伏,宜 相能,寇勢日張。 治躍馬 佩 征 義 節愍。 夷將 所餌。」宣宗 不苟生。」 入賊陣,創甚 軍印 中宣 官其子樞 往討,治仍贊其 |揮刀殺 馬騏貪暴,治不能制,反者 隆 治上疏言:「賊雖乞降,內懷詭 .敕切責智等,令進兵,復敗於茶 墜馬。 刑科給 賊 數 左右 人, 事 一駐師 軍。 中。 自 欲 剄 宣德 扶還 覘 贼 元 治張 事聞 年 通 四 九月, 起,黎 不 目叱 聽,

## 自黎利反,用兵三四年,將吏先後死者甚衆。

級,以保知交州府,遷右參政。 侯保 一贊皇 人。 由 或 子生 歷 永樂十八年,黎利反,保以黃江 知襄城 博 興 一縣 有 善 要害,築堡守之。 政。 交阯 初 設府 縣, 賊至, 擇 力 人

數月,出戰,不勝死。

政使。然貴嘗言交阯產金,遂命以參議提督金場,時論非之。 敏,善撫流亡。土兵二千人,驍果善戰,貴撫以恩意,數擊賊有功,中官馬騏盡奪之。黎利 反,貴以贏卒數百,禦賊於瑰縣,力屈而死。仁宗時,尚書黃福言狀,贈貴左布政使,保右布 馮貴,武陵人。舉進士,爲兵科給事中。 從張輔征交阯,督兵餉。 累遷左參政。涖事明

有功。 賊平,調昌江衞。 仁宗初,隨方政討黎利於茶籠,深入陷陣死。 伍雲,定遠人。以荆州護衛指揮同知從征交阯,破坡壘、隘留、多邦城,拔東、西二都,皆

阯 州左衞。 自箇招市昇小舟入江,劫黎季犛水寨,破之。 攻多邦城,先登。論功,還故官,調交 屢與賊戰有功,進都指揮同知。黎利寇淸化,忠戰死。仁宗憫之,與雲皆優恤如

陳忠,臨淮人。初爲寬河副千戶。以「靖難」功,積官指揮同知。坐事戍廣西。從征交

制

|任於城上駡||福曰:「汝爲大將,不能殺賊,反爲賊用,狗彘不食汝餘。」發礮擊之。 賊擁||福去, 阯,守昌江。黎利以昌江爲官軍往來要路,悉力攻之。時都督惑福爲賊所獲,逼令招任降。 大集兵象飛車衝梯,薄城環攻。任與指揮顧福帥精騎出城掩擊,燒其攻具。 李任,永康人。以燕山衞指揮僉事從成祖起兵,累功爲都指揮同知。宣德元年從征交 賊又築土山,

列

自剄死。 臨射城中,鑿地道潛入城。任、福隨方禦之。死守九月餘,前後三十戰。賊聞征夷將軍柳升 兵將至,益兵來攻。二年四月城陷,任、福猶帥死士三戰三敗賊。 賊驅象大至,不能支,皆 內官馮智、指揮劉順俱自經。城中軍民婦女不屈死者數千人。

與守將集兵民死守亦九閱月,與昌江先後同陷。子輔曰「「吾義不汚賊刃。」即自縊死。一子 不苟許與,獨稱子輔賢。遷廣東按察使。坐累,左遷諒江知府,善撫循其民。黎利反,子輔 妾皆死。 劉子輔、廬陵人。由國子生擢監察御史,巡按浙江。性廉平,浙人德之。 按察使周新

至昌江,內官徐訓泄其謀。賊遂拘忠、勝,臨以白刃。二人瞋目怒駡不屈,並忠子皆被害。 言事忤旨,出爲政平知州,民安其政。寧橋之敗,王通詭與賊和,而請濟師於朝,爲賊所遮 不得達。 徐麒,桂林中衞指揮使,與南寧千戶蔡顒守丘溫。 何忠,字廷臣,江陵人。由進士爲監察御史。廉慎,人莫敢干以私。永樂中,三殿災, 賊遣使奉表入謝。<br />
通乃遣<br />
忠及副千戶<br />
柱勝與偕行,以奏還土地爲辭,陰令請兵。 時賊勢已熾,將吏多棄城遁。丘溫被

圍,麒與顒猶帥疲卒固守,城陷皆死,無一降者。

人。以國子生授諒山知府,有善政。 歲滿還朝,郡人乞留。 韶進秩三品還

任。賊破諒山,先自縊死。

四三三三

宣以其衆詣賊降。安等至富良江爲賊所蹙,俱陷賊。 衆謀,俟官軍至爲內應。 手」與指揮陳麟躍起奪賊刀,殺數人,皆自刎死。所部九千餘人,悉被殺。 周安以指揮僉事守備义安。 包宣覺之,以告利。利收安,將殺之,安曰:「吾天朝臣子,豈死賊 黎利勢張,都督蔡福以芻糧將盡,退就康關。旣行,千戶包 賊逼蔡福詣諸城說降。 安憤甚,潛與

等六人,盡棄市,籍其家。 智太監,並予誥賜祭。 知 ,安指揮同知,願指揮愈事,<br />
勝正千戶,並令子孫承襲。<br />
子輔、先布政司參政,<br />
忠府同知, <u>交阯布政使弋謙以任等十二人死事聞。宣宗歎息,贈任都督同知,福、順、麒都指揮同</u> 惟麟嘗與朱廣開門納賊,故贈恤不及。已而黎利稱臣,歸蔡福、朱廣

叛寇,命彬帥師策應。未至,寇平,命以所統鎭廣東。 傅友德出塞,斬獲多。還,與築諸邊城。成祖起兵,彬歸附,爲前鋒,轉戰有功,累遷右軍都 月,以左參將賷征夷副將軍印授沐晟,進討安南。十二月,彬及雲陽伯陳旭破安南西都,又 督僉事。永樂元年四月,以丘福議,封豐城侯,祿千石,予世券。明年,襄城伯李濬討永新 李彬,字質文,鳳陽人。父信,從太祖渡江,積功爲濟川衞指揮僉事。彬嗣職,從潁國公 四年召還,捕南陽阜君山寇。 其年七

第

備 大 倭 敗 海 賊 上,移 於 木丸江 )兵討擒長沙賊李法良,又帥浙、閩 0 安南 平,論功,與旭皆以臨敵稽緩,不益封, 兵捕 海寇。 加祿五百石 尋充總兵官,

凉 道 州 遠 酋 老 餉 年 難繼 命往 年從 的罕叛,都指 写宜 甘肅與西寧侯宋號經略降會。 北 征,領右哨,破敵於忽失溫,追奔至土刺河。 緩圖之。 揮 何銘 明年代號鎭甘肅,赤斤蒙古縛老的罕以獻。 戰死,英追躡,盡俘其衆。 彬 與柳升嚴兵境上,而令土官李英防 老的罕走赤斤蒙古。 師還,受上賞,移鎭 帝嘉彬 帝欲 功, 陜 野馬川 西 發兵,彬 賜

政 暑 及 襲 北 हिंग 利 畫 旋 諸 五 於 寒。 可 年二月 藍 棚 明 命佩 ,獲其將軍阮箇立等。 年,清化府土巡檢黎利反,彬遣 征夷將軍印、鎭交阯。 利走老撾。 至 則 廣討破之。 破 擒 師還,復出爲寇。 陸那縣賊阮貞,遺 利遁去。 都指揮黃誠擊走之,以 十七七 都 督朱廣等平順 年遣都 督同 知方 州

|僚 者 誠 1, 竄老撾 宗老 於 惡 當 江 於 是 大灣, 都指 時, 知 府 交 朱廣討 都指揮師 也 揮 人反反 王 爲 忠 者 討楊恭 中 譚 四 祐 官 興邦等於 起,彬遣諸將分道往討:方政討車綿子等於嘉興,鄭公証於南策, 馬 帥師往。 騏 於 峽 所 虐,反 別 Щ 僚以老撾兵迎戰,破之農巴林,悉降其衆。 部 皆先後 ,都指揮徐 衙儀。 報捷。 彬撃 謜 敗之,追至 討 而 范軟 賊 勢尤劇者,彬 於俄樂,至指 玉 麻 州,擒 輒 揮陳 其會,進 自 將 往擊。 原 范 瑰計陳直 焚 玉者,塗 ) 賊棚。 潘僚

都指揮陳忠等累敗之於小黃江,彬自將追捕,至鎭蠻,盡縛其衆。 山寺僧也,反東潮州。 彬往討,敗之江中。 玉脫走,追獲之東潮。 於是諸賊略平,惟黎利數 而鄭公証之黨黎姪復起,

出沒,聚衆磊江,屢爲徐謜、方政所敗,復遁去。

暎、陳智、李安、方政,皆不能討。 之。 將發兵入老撾索黎利。 十九年,彬以餽運不繼,請令官軍與土軍參錯屯田,並酌屯守征行多寡之數 老撾懼,請自捕以獻,會彬疾作 王通代鎭,賊勢益盛,交阯遂不可守。 而 龍 明年正月卒。 以聞。帝從 繼之者孟

|彬卒,贈|茂國公,諡剛毅。

子賢嗣,宣德三年從出塞,還修永寧、隆慶諸城。 正統初,鎭大同, 尋守備南京。

一年卒,贈豐國公,諡忠憲。

傅。 遠鎭無內黨,召代之,尋坐事罷。 嘉靖初,鎭湖廣,有威惠,楚人安之。 子勇嗣,再傳至孫旻。 正德中鎮貴州,擒思南、石阡流賊,平武定諸蠻有功, 卒諡武襄,無子。 徙兩廣。 武定侯郭勛典京營,以罪罷。 世宗以旻 加太子太

陽叛蠻。 從子 卒,無子。 一熙嗣, 出鎭湖廣。 從子懦嗣,傳至孫承祚,天啓時附魏忠賢,請設海外督理內臣,又請予 楚世子獄,株連甚衆,熙言於御史,平反二百餘人。討平沅州、麻

列

傅

忠賢 (九錫。 崇禎 初 ,奪爵戍邊。 子開先嗣爲伯,都城陷,遇害。

予世 海 從 口 張輔征交阯,破賊魯江,斬其帥阮子仁等。 陸 . 参。 得 柳升,懷寧人。 兵亦數萬人。 舟三百。 部卒得季犛及其子澄。 襲父職爲燕山護衞百戶。 輔將步騎,升將水軍,夾攻,大敗之,獲爲尚書阮希周等。又敗賊於奇羅 **升賷露布獻俘,被賞賚。師還,封安遠伯,祿千石,** 守鹹子關。 大小二十餘戰,累遷左軍都督僉事。永樂初, 賊入富良江,舟亙十餘里,截江立

火器 斬 回 叛將 曲 津 破 七 敵 馮答蘭帖木兒等。 年同陳瑄帥舟師巡海,至青州海中,大破倭,追至金州白山島而還。 語神機火器爲前鋒,大敗阿魯台。 召還,總京營兵。 進封侯, 十二年復從北征,將大營兵戰忽蘭、 加祿五 百 石,仍世伯爵。 明年從北征 出 . 鎭 忽失溫 寧夏,討 一,至 一,以

都 意 指揮衛 輕 賊 十八年, 青力戰解安丘 賊乞降,信之。 蒲臺妖婦唐賽兒反。 圍。 夜 爲 升忌其功,摧辱之。 所襲, 命升與都指揮劉忠將京軍往剿, 忠中 流 矢死,賽兒 徵 下獄 遁去。 及明始覺,追獲其黨 圍 「其寨。 升自以大將, 百餘人。

一十年復從北征,將中軍破兀良哈於屈裂兒河,予世侯。 帝五出塞, 升皆從, 數有功,

寵待在列侯右。 仁宗卽位,命掌右府,加太子太傅。

陷泥淖中,中鏢死。其日,銘病卒。明日,慶亦卒。又明日,崔聚帥軍至昌江。賊來益衆,官 史安、陳鏞及李宗昉、潘禋皆死之。 軍殊死關。 强起告升,升不爲意。至倒馬坡,與百餘騎先馳度橋,橋遽壞,後隊不得進。賊伏四起,升 驕者,兵家所忌。賊或示弱以誘我,未可知也。防賊設伏,璽書告誠甚切,公宜力言之。」慶 以賊屢敗,易之。時李慶、梁銘皆病甚。郎中史安、主事陳鏞言於慶曰:「柳將軍辭色皆驕。 **僞爲國人上書,請立陳氏後,升不啓封以聞。 賊緣途據險列栅,官軍連破之,抵鎭夷關。** 言昌江被圍急。帝授三人百戶,敕升急進援,而昌江已於四月陷。九月,升始入隘留關。 勢已盛,道路梗絕,朝廷久不得交阯奏報。二年六月,有軍丁李茂先者三人,間道走京師, 左副總兵,CKJ都督崔聚爲參將,尚書李慶贊軍務,帥步騎七萬,會黔國公沐晟往討。 宣德元年冬,成山侯王通征黎利,敗聞。命升爲征虜副將軍,充總兵官,保定伯梁銘爲 賊驅象大戰。陣亂,賊大呼:「降者不死。」官軍或死或走,無降者,全軍盡沒。 時賊 利

事。 至是力戰被執,賊百計降之,終不屈死。 崔聚,懷遠人。從成祖起兵。八年從北征,敗敵於廣漠戍。 洪熙元年累遷左軍都督愈

列傳第四十二 柳升

軍援絕,遂 升 質直寬和,善撫士卒,勇而寡謀,遂及於敗。升敗,沐晟師不得進,亦引還。 棄交阯。 朝議以升喪師,不令子溥襲爵,久之乃許。 正統十二年贈升融國公、諡 王通孤

佩 召掌右府,總 相 煽為 平房大將 薄,初掌中府,出鎭廣西。 軍印往禦。 神機營。 事定,復出鎭。 敵再入涼州,溥閉壁不出,敵飽掠去,躡取數十級報捷,被劾,落太 廉慎,然無將略,承山雲後,不能守成法,過於寬弛。 天順初召還,防宣府、大同,累進太傅。 景泰初,兵事亟, 陝西有警,命 瑤、僮

印 征安南莫登庸。 孫景嗣,景子这,文子珣,凡三世皆鎭 登庸乞降,加太子太傅。 兩廣,有平蠻功。 又以討瓊州黎賊功,加少保。 嘉靖十九年命珣佩征夷副將軍 卒 脂太保, 諡

傅閒

住。

尋復起掌神機營。

卒, 諡武

肅

史安,字志靜,豐城 人。 廉重好學,由進士歷官儀制 司郎 武

傳至明亡,舒絕。

陳鏞 字字 叔 振 线塘 人。由庶吉士授祠祭司主事。楊士奇稱其清介端確,表裏一出於正。

中。

李宗昉,不知何許人,亦以主事從。

敗,格鬭死。

銘 祿千石,予世券。 位,進都 督僉事 病卒。 梁銘,汝陽人。以燕山前衞百戶從仁宗守北平。 ,侍 督 路勇敢善戰,能得士卒心。 仁宗監國。 同 知。 宣德初,御史石璞劾其貪黷,下獄,當奪爵,宥之。 以參將佩征西將軍印,同都督同知陳懷鎭寧夏。 永樂八年坐事下獄。 既死,崔聚獨以衆入,全軍遂覆。 十九年赦復職,副都督胡原捕倭 李景隆圍城,戰甚力。 副柳升 追論守城 征交阯。 積功至後軍都 廣東。 功,封保定伯, 仁宗卽 )升敗

之香罏 攻,大敗之,斬首七千有奇,破寨五百。 謫 充為 與暎 子 事官。 山,俘偽王韋同烈等,擒斬數千人。分兵攻都勻 珤 嗣。 討平之。 從石亭立功,復爵。 正統末,充副總兵,討福建盜鄧茂七,擊斬餘賊於九龍山。班師,而賊黨復作, 論 功,進侯,益祿五百石。 景泰元年拜平蠻將軍,代王驥討貴州苗。其冬,分四道 明年自沅州進兵,與都督方瑛破賊於興澤,又大破 四年計平湖廣淸浪叛苗。天順元年出鎭陝西 草塘諸苗,悉震恐降。師還,苗復叛, 淮

列

破敵 凉州,又破敵靖虜堡。 召還,理左府事。 成化初卒。 贈蠡國公,諡 裹婧。

爵至世勳,崇禎初提督京營。 **珤天資平恕,數總兵柄,未嘗妄殺** 京師陷,遇害。 子弟從征,以功授官,輒辭不受,人以爲賢。傳

復以父死事故,封武義伯,祿千石,予世券。 命掌後府,加太子太保。 二百石。明年從北征,領左掖。[t] 二十年從出塞,以大軍殿,連出塞,並領右掖。仁宗卽位, 王通,咸寧人,金鄉侯眞子也。 嗣父官爲都指揮使,將父兵,轉戰有功,累進都督僉事 永樂七年董營長陵。十一年進封成 山侯,加祿

善攻交州城,都督陳濬等擊却之。會通至,分道出擊。參將馬瑛破賊於石室縣。〔○〕通引軍 楊時習執不可,通厲聲叱之。 與瑛合,至應平之寧橋中伏,軍大潰,死者二三萬人,尚書陳洽與焉。 張,數破郡邑,殺將吏,智出兵數敗。 义安聞之,自將精卒圍 時交趾總兵官豐城侯李彬已前卒,榮昌伯陳智、都督方政以參將代鎭,不 東關。 清化守羅通亦不肯棄城,與指揮打忠堅守。 通氣沮,陰遣人許爲利乞封,而檄清化迤南地歸利。 宣宗削智爵,而命通佩征夷將軍印,帥師往討。 通中傷還交州,利在 朝廷遣柳升等助 協。 黎利 按察使 黎利弟 益

通

昌江、諒江,而圍交益急。通斂兵不出。利乞和,通以聞。會柳升戰歿,沐晟師至水尾縣不 惶懼欲走。 二年二月,利攻城。 通益懼,更陷利和,爲利馳上謝罪表。 諸將請乘勝急擊。通猶豫三日不出,賊勢復振。樹棚掘濠塹,四出攻掠,分兵陷 通以勁兵五千出不意擣賊營,破之,斬其司空丁禮以下萬餘級。利

官嚮義者陶季容、陳汀之屬,乃往往自拔來歸。 不與焉,至是棄去。官吏軍民還者八萬六千餘人,其陷於賊及爲賊所戮者不可勝計。 會廷議厭兵,遂棄交阯。交阯內屬者二十餘年,前後用兵數十萬,餽餉至百餘萬,轉輸之費 十二月,通令太監山壽與陳智等由水路還欽州,而自帥步騎還廣西,至南寧,始以聞。 其 年十月大集官東軍民出城,立壇與|利盟,約退師,因宴|利,遺|利錦綺,|利亦以重寶爲 而土

督僉事,守京城。 子琮嗣成山伯。 明 年,通還京,羣臣交劾,論死繫獄,奪券,籍其家。 宗子鏞,成化時,賜原券。 禦也先有功,進同知,守天壽山,還其家產。 傳爵至明亡。 正統四年特釋爲民。 景泰三年卒。天順元年韶通 景帝立,起都

陶季容者,世爲水尾土官。 列 第 += **交阯平,以爲土知縣。** 歷歸化知州,遷宣化府同知,守北閑

傅

四

王

通

爲動。宣宗聞之,擢宣化知府,降敕獎勞。賊復遣人誘季容,季容執以送沐晟,而導官軍敗 宣德元年遣所部阮執先等追賊、至淸波縣爲所獲。 旣而遣執先還,招季容,脅以兵,不

以官,令守交州東關。汀挈其家九十餘人從間道走。賊追之,家屬盡陷,汀獨身入欽州。帝 陳汀,古雷縣千夫長,數從方政擊賊有功,政信倚之。王通棄地,汀北行,爲賊所得,授

**卹,資糧器用官給之。** 他若土官阮世寧、阮公庭,皆不願從利,率所部來歸,乞居龍州、陳州之地。帝命加意撫 嘉其義,以爲指揮,厚賚之。

賊於水尾。

王通棄交阯,季容率官屬入朝。

外,良以其得不爲益,失不爲損,事勢所不必爭,非獨憚於勞民而絀於籌餉也。嘗考黃福與 張輔書言:「惡本未盡除,守兵不足用。 馭之有道,可以漸安。守之無法,不免再變。」權咬 雖黃福惠愛在交,叛人心折,而大勢已去,再至無功。宣宗用老成謀國之言,廓然置之度 亡之道矣。蠻疆險遠,易動難馴,數年之間叛者數起,柳升以輕敵喪師,王通以畏怯棄地。 贊曰:成祖因季犛篡立、興師問罪以彰天討、求陳氏後不得、從而郡縣其地,得取亂侮

## 校勘記

- 行部尚書黃福 行部,原作「刑部」,據本書卷一一一七卿年表、又本卷黃福傳、太宗實錄卷三
- 四 永樂三年四月癸未條改。 按其時刑部尚書爲呂震,黃福已改行部尚書。
- 賊將阮景異以三百艘迎敵 阮景異,原作「鄧景異」,據大越史記全書卷九後陳紀改。

鄧容,原作「阮鎔」,據大越史記全書卷九後陳紀改。

全書稱:「阮景眞子

下同。

景異,鄧悉子容,皆憤其父死非辜,領順化軍回淸化。」

=

悉擒阮景異鄧容等

- 29 遣指揮師祐以兵索之 指揮,本卷李桃傳、本書卷三二一安南傳都作「都指揮」。 按本書往往稱
- $\frown$ 五 討范軟於俄樂 俄樂,本書卷三二一安南傳作「浮樂」。

都指揮爲指揮。

- ベン 保定伯梁銘為左副總兵 傳三一柳升傳附梁銘傳改。 保定伯,原作「保定侯」,據本書卷九仁宗紀、又本卷梁銘傳、明史稿
- 領左掖 改。 按太宗實錄領右掖者爲譚青,此應作「左掖」。 左掖,原作「右掖」,據明史稿傳三一 王通傳、太宗實錄卷九一永樂十二年二月庚戌條

列

你

第四

+

校勘

記

**参將馬瑛破賊於石室縣** 

明史稿傳三一王通傳作「破賊淸威」,明史卷三二一安南傳作「馬瑛

敗賊淸威,至石室」,王世貞安南傳二作「大破賊於淸威,至石室」。

## 明史卷一百五十五

## 列傳第四十三

宋晟 薛禄郭義 金玉 劉榮 朱榮 費職 譚廣

陳懷馬亮

蔣貴孫琬

任禮

趙安

趙輔

劉聚

路,擒元海道千户也先帖木兒、國公吴把都刺赤等,俘獲萬八千人,送酋長京師, 千人補卒伍,餘悉放遣。召還,復爲都指揮,進右軍都督僉事,仍鎮凉州。 江西、大同、陝西。洪武十二年坐法降凉州衞指揮使。十七年五月討西番叛酋, 殁,晟嗣其職。既而朝用請老,晟方從鄧愈克徽州,召還,襲父官。累進都指揮同知, 宋晟,字景陽,定遠人。父朝用,兄國興,並從渡江,皆積功至元帥。 攻集慶, 至亦集乃 簡其精鋭 國興戰 歷鎮

倍道疾馳,乘夜至城下。質明,金鼓聲震地,闔城股栗,遂克之。擒其王子别兒怯帖木兒,气口 二十四年充總兵官,與都督劉真討哈梅里。 列 傳 第四十三 宋 晟 其地去肅州千餘里。晟令軍中多具糧糗,

及 《偽國 公以下三十餘人,收其部落輜重以歸。 自是番戎慴服,兵威極於西域。 明年五月從

藍玉征罕東,徇阿眞川,土酋哈昝等遁去。 師還,調中軍都督 僉 事

甘肅 兵討平五開、 畜而還。 二十八年六月從總兵官周興出開原,至忽剌江。 明年拜征南右副將軍,討廣西帡幪諸寨苗, 龍里苗。 三十一年出鎭開平,從燕王出塞,還城萬全諸衞。 擒斬七千餘 部長 西陽哈遁, 人。 叉明 追至甫答迷城, 年,總羽林 建文改元,仍鎮 俘 衞

都 見灰等部落五千人,獲馬駝牛羊萬六千。 成祖 即位,入朝,進後軍左都督,拜平羌將軍,遣還鎮。 封西寧侯,祿千一百石,世指揮使 永樂三年招降把都帖木兒、 倫

奏請輒 法。 命營河西牧地,及圖出塞方略。 卽 晟 敕 報 凡四鎮凉州,前後二十餘年,威信著絕域。 人晟以 可。 便宜從事。 御史劾晟自專。 晟嘗請入朝。 帝曰:「任人不專則不能成功,況大將統制一 會病卒,五年七月也。 報曰:「西北邊務,一以委卿,非召命,毋輒來。」 帝以晟舊臣,有大 將材, 專任 邊,寧能 以 邊事,所 盡 拘 文

瑄弟號, 尚成祖女安成公主, 得嗣侯, 予世券。 晟三子。 長瑄,建文中爲府軍右衞指揮使,戰 靈壁,先登,斬數級,力鬭死 八年佩前將軍印,鎭甘肅。 十年

捕 洪熙元年坐不敬奪爵,幷削駙馬都尉官。 宣德中復都尉。

兵官,督大同守將朱冕、石亨等戰陽和,全軍敗沒,瑛及冕皆戰死。 號 旣 廢,弟瑛嗣。 瑛尙咸寧公主。 正統 1中,歷掌左軍前 府事 o 贈鄆國公, 瓦剌 也先入寇,瑛充總 諡 忠順

甘肅 九傳 至孫裕德,死流寇難。 子 、傑嗣。 誠 有 材 武,嘗出獵至涼州,遇寇掠牛馬北去。 景泰中典禁兵宿衛,以謹 [慎稱。卒,子誠嗣。 誠三矢殪三人,寇鷘散,盡驅所掠還。 署右府事 ,復佩平羌將軍印,鎭

陣,出 卒,馳還復戰,大 北 白 真定之戰,左副將軍李堅迎鬭。 鋒始交,祿持槊刺堅墜馬,擒之。 下大寧、富峪 平。 溝 河 薛禄 入數十戰,破 庸檄眞定諸將屯威縣 追奔至濟南,遷指揮使。 , 膠人。行六, 軍中呼曰薛六。旣貴, 乃更名祿。 、會州、寬河。 敗 公安軍。 之,追 奔至夾河,斬馘 掠 還救北平,先驅敗南軍游騎。進指揮同 深州 順德、大名、彰德。 戰東昌,以五十騎敗南 邀燕 〔無算。 歸路。 攻西水寨,生擒都指 戰單家 禄皆擊走之。 橋,爲 兵 、數百。 禄以卒伍從燕起兵, 首奪九門。 平安所 戰滹沱河, 時成 知。 擢指 揮花英。 執, 祖 攻大同,爲先鋒。 揮僉事。 奮脫 爲盛庸所敗,還走 右 軍却。 縛, 乘勝下 從 拔 援永平, 禄 刀殺守 東阿 馳 赴 戰

剜

東平、汶上,連戰淝河、小河、靈壁,功最。入京師,擢都督僉事

豫敎。 永樂六年進同知。八年充驃騎將軍,從北征,進右都督。十年上言:「自古用人,必資 今武臣子弟閒暇不教,恐緩急無可使者。」帝韙其言。會四方送幼軍數萬至,悉隸祿

年 ·將右哨從北征。還,討平長興盜。二十二年再領右哨從北征。 十八年十二月定都北京,授奉天靖難推誠宣力武臣,封陽武侯,祿千一百石。二十一

操習之。

十五

一年以行在後軍都督董營造。

寇功,益祿五百石。是年碩諸將軍印於各邊鎮,祿佩鎭朔大將軍印,巡開平,至大同邊。 仁宗卽位,命掌左府,加太子太保,予世劵。洪熙元年充總兵官,備禦塞外。 尋以獲

餉, 城、雲州、獨石宜築城堡,便守禦。詔發軍民三萬六千赴工,精騎一千五百護之,皆聽隊節 論 帥精兵畫伏夜行,三夕至。縱輕騎蹂敵營,破之,大獲人畜。師還,敵躡其後,復奮擊敗之, 留 由 禄 。是夏復 出 是遠遁。 與尙書張本鎭撫之。明年春,奉詔巡視畿南諸府城池,嚴戒軍士毋擾民,違者以軍法 宣宗卽位,召還,陳備邊五事。尋復遣巡邊。宣德元年從征樂安,爲前鋒。高煦就擒, 開 平、宣府間。 佩大將軍印,北巡開平,還駐宣府。敵犯開平,無所得而退,去城三百餘里。隊 召還。 三年從北征,破敵於寬河,留鎭薊州、永平。 五年遇敵於鳳凰嶺,斬獲多,加太保。上言永寧衞團山及 復數佩鎭朔印, 巡邊護 **鵰鶚、赤** 

敵

君也 制。 臨行賜詩,以山甫、南仲爲比。 滁 拊心曰:「祿安敢望前賢, 然敢不勉圖報上恩萬一。」其年六月有疾,召還。 **醁武人不知書**, 以問楊士奇。 士奇曰:「上以古賢人待 踰月

卒。 贈鄞國公,諡忠武。

脉 有勇而好謀,謀定後戰,戰必勝。 紀律嚴明,秋毫無犯。 善撫士卒,同甘苦,

用。 「靖難」諸功臣、張玉、朱能及滕三人為最,而祿逮事三朝,歸然爲時宿將。 孫詵嗣。 至曾孫翰卒、無子,族人爭襲,久之不得請,田宅並入官,世絕者三十餘年。

萬曆 五年乃復封翰族子縣爲侯。 再傳至濂。 崇禎末,京師陷,被害。

永樂中從起兵北平,後積功至大將,封侯伯不以「靖難」功者,薛祿及郭義、金玉 劉榮、

朱榮凡五人,而義、玉與祿同日封云。

**曠職調交阯立功,已而宥之。** 郭義,濟寧人。洪武時,累功爲燕山千戶。 數從出塞,有功,封安陽侯,祿千一百石,亦授奉天靖難武臣 從成祖入京師,累遷左都督。 水樂 九年坐

號。時義在南京,疾革,聞命而卒。

永樂三年進都督僉事。 金玉,江浦人。襲父官爲羽林衞百戶,調燕山護衞。 八年充鷹揚將軍從北征。 師旋、爲殿。 從起兵有功,累遷河南都指揮使。 至長秀川,收敵所棄牛羊雜

列

傳

第

十四年討平山西妖賊劉子進。 論前後功,封惠安伯,祿九百石。 十九年卒。

妾田氏自經以殉,贈淑人。

畜亙

一數十里。

擊,大敗之,斬首數千,擒指揮王雄等七十一人。遷都指揮使。從至淝河,與白義、王眞以 輕騎誘致平安,敗之。 往援,文引却。江聲言還北平,行二十餘里,卷甲夜入永平。 河,奪浮橋,掠館陶、曹州,大獲。還軍救北平,敗平安軍於平村。 三千,夜襲南軍於滑口,斬數千人,獲馬三千,擒都指揮唐禮等。 多智略,成祖深器之,授密雲衛百戶。從起兵爲前鋒,屢立戰功。徇山東,與朱榮帥精騎 劉榮,宿遷人。 初冒父名江。從魏國公徐達戰灰山、黑松林。爲總旗,給事燕邸。雄偉 |文聞江去,復來攻。||江突出掩 累授都指揮僉事。 楊文以遼東兵圍永平,江 戦滹沱

成 祖 大怒,欲斬之。 時南軍駐宿州,積糧爲持久計。 諸將叩首請,乃免。 成祖患之,議絕其餉道。 渡江策功,以前罪不封,止授都督僉事。 命江將三千人往,趦趄不行。 遷中府右

永樂八年從北征,以遊擊將軍督前哨。乘夜據清水源,敗敵斡難河,復敗阿魯台於靖虜

都督。

四二五〇

鎭。 年復鎭遼東。 師還爲殿,即軍中進左都督,遺鎭遼東。 十二年再從北征,仍為前鋒,將勁騎偵敵於飲馬 敵闌入殺官軍。 帝怒,命斬江,旣而宥之。 河。 見敵騎東走, 追至康 哈 九

里孩,擊斬數十人。復與大軍合擊馬哈木於忽失溫,下馬持短兵突陣,斬獲多,受上賞。 復

充總兵官,鎭遼東

伯、祿千二百石、予世券、始更名樂。 却。 倭三十餘舟至,泊馬雄島,登岸奔望海堝。 **堝築城堡**, 兩路夾擊, 盡覆之, 斬首千餘級, 生擒百三十人。 自是倭大創, 不敢復入遼東。 賊入伏中,礮舉伏起,自辰至酉,大破賊。 倭 數寇海上,北抵遼,南訖浙、閩,瀕海郡邑多被害。江度形勢,請於金線島西北望海 設烽堠,嚴兵以待。十七年六月,瞭者言東南海島中舉火。 尋 遣 還 鎮。 江依山設伏,別遣將斷其歸路, 賊走櫻桃園空堡中。 明年四月卒。 江開西壁縱之走,復分 江急引兵赴堝上。 以步 卒迎戰,佯 詔封廣寧

**榮爲將,常爲軍鋒,所向無堅陣。** 馭士卒有紀律,恩信嚴明。 諸欵塞者,撫輯備至。 旣

卒,人咸思之。 贈侯、諡忠武。

見,登不可。 子 湯嗣。 安出 卒, 見,伏哭帝前。 無子,弟安嗣。 景帝降敕切責。 正統十四年與郭登鎭大同, 安馳至京師,言奉上皇命來告敵情,且言 也先擁英宗 至城下, 邀登出

F 傅

第

四

+

 $\equiv$ 

劉 榮

知,守備白羊口,復伯爵。」英宗復位,予世侯,再益祿三百石。曹欽反,安被創,加太子少 進己爲侯。羣臣交劾,下獄論死。會京師戒嚴,釋安充總兵官,陣東直門。寇退,進都督同 成化中卒。贖嶧國公,諡忠僖。傳爵至明亡。

朱榮,字仲華,沂人。洪武十四年以總旗從西平侯沐英征雲南。累官副千戶。守大

寧,降於成祖。襲孫霖於滑口,圍定州,斷南軍餉道,大小二十餘戰,論功授都督僉事。

永樂四年從新城侯張輔征交阯,破雞陵關,會沐晟於白鶴。輔等議於嘉林江上流濟

右都督,賜白金鈔幣。七年復從輔討賊餘黨,平之。 江登岸。榮等奮擊,大破之。大軍進克多邦城,榮功爲多。帝以榮嘗怠事,師還論功,僅擢 師,自造機陣下流十八里,日增其數以惑賊。又作舟筏爲欲濟狀,以牽制之。賊果分兵渡

充總兵官,鎭大同。修忙牛嶺、冤毛河、赤山、楡楊口、水勝諸城、、三寇不敢近。居三年,召還。 明年督右掖,從征阿魯台,與劉榮並進左都督。十二年復從北征,與榮俱爲前鋒。其冬

大軍次玉沙泉。榮帥銳士三百人,人三馬,齎二十日糧深入。敵已棄牛羊馬駝北走,悉收 十八年代劉榮鎭遼東。二十年復從北征,爲前鋒。駐鵬鶚詗寇,以五千騎視敵所向。

之,焚其輜重,移師破兀良哈。 已,還鎭。 洪熙元年佩征房前將軍印,鎭如故。 師還,封武進伯,祿千二百石,仍鎭遼東。 其年七月卒於鎭。 贈侯、諡忠靖。 二十二年復從北

年, 征。 佩 子 征 冕嗣。 西將 軍印, 以晉王濟熿新 鎭大同。 廢, 十四年從北征,戰於陽和,死之。 命鎭山西, 葬召還。 六年命輸餉獨石,因巡其地。 諡忠慤。 子瑛嗣。 正統 傳爵 至 四

明亡。

費瓛,定遠人。 祖愚、洪武時 爲燕府左相,改授燕山中護衞指揮使,傳子肅。 至職從成

阻 |起兵有功,累進後軍都督僉事

其右。 職往 顏 帖 討。 木兒等應之。 永樂 贼 大敗走, 至涼州, 八年春,涼州衛千戶虎保、永昌衛千戶亦令眞巴等叛,衆數千,屯據 斬首三百餘級。 西鄙 智及都指揮陳懷 震動。 都指揮李智擊之不勝。 追奔至黑魚 以師會, 遂進兵鎮 海,獲賊千 番。 賊聲言攻永昌、 餘,馬駝牛羊十二萬。 遇賊於雙城。 涼州 瓛 撃其 驛路。 城 左,懷等擊 皇太 虎保等遠 新附伯 子命

十二年充總 列 傳 第 四 兵官 + Ξ 一。鎭甘肅 朱 桀 糓 | 蹴以 庸州兵多糧少,脫有調發,猝難措置,請以 臨鞏稅糧付 瓛

遁。

功

班

師

諸邊率用宦官協鎮、恣睢專軍務、瓛亦爲所制。 近邊軍丁轉運 又以凉州多閒田,請給軍屯墾。 仁宗知之,賜璽書責之曰:「 從之。 洪熙元年予平羌將軍印。 爾以 名臣後,受 永樂時,

或 重寄,乃俯首受制於人,豈大丈夫所爲! 其痛自懲艾,圖後效。」瓛得書陳謝

驛。 宣宗嗣 帝念前鋒薛祿 位,進右府左都督。 軍少,命臟帥兵益之。還,予世券,復鎭甘肅。 元年七月入朝,封崇信伯,祿千一 白 二年,沙州衛賊屢劫撒馬 石。 從 征高煦,次流河

兒罕及亦力把里貢使,職討破之。明年卒於鎭。

| 蹴爲人和易,善撫士。 在鎭十五年,境內寧謐。

子 釗 嗣 o 從征鄧茂七,還掌都督府。 天順中,受武定侯郭英次孫昭賂,誣嫡孫昌不孝,

奪其爵。 法 司請逮治。 詔解府事。 卒,子淮嗣爵。 傳至明亡乃絕。

欲

韓 百 觀 騎 掠 帥 譚 師 廣,字仲宏,丹徒人。 涿 州 十二 生 萬來攻。 得 將校三十人。 廣以孤 洪武初,起卒伍,從征金山,為燕山 軍 戰白溝、眞定、夾河 力拒四 十餘 日,伺 成有 間破 走之。 功, 屢 遷指揮使,留 護衛 百戶。 從成 守保定。 祖 起兵,以 都督

永 樂 九年進大寧都指揮僉事。四董建北京。旣而領神機營,從北征,充驍騎將軍。

四二五 五.

年 練 軍 乘勝 山西。 夾擊,賊大敗。 明年從征九龍口,爲前鋒。 論功,進都督僉事 賊數萬憑岸,廣命挽强士射之。 萬矢齊發,死

守有餘,但命永樂中調戍者勿遣。 伺 帝 山 從戶 JII 竊發無時。 仁宗 祉 ,部議, 稷 壇。 嗣位,擢左都督,佩鎭朔將軍印,鎭宣府。 令他衛軍戍宣府者,悉遣還屯種。 六年以宣府 脫有警,徵兵數百 糧少,請 里外,勢豈能及。 如開平、獨石召商中鹽納粟,以足兵食。 廣上言:「臣所守邊一千四百餘里,敵人窺 宣德三年請軍衞如郡縣例,立風雲雷雨 屯種之議,臣愚未見其可。」 帝以邊卒戍 俱從之。 明年,

頭。 塞 略。 優 詔 不許。 帝 廣等各上議,大要謂 正 統初 遇敵 納 其言。 明年 い朝議 則量 一力戰守,間諜以偵之,輕兵以躡之。 十月召還陛見。 六年十一月以禦敵功,封永寧伯,祿千二百石,仍鎭宣府。 以脫歡雖款塞,狡謀未可測,命廣及他鎭總兵官陳懷、李謙、王彧圖上方 :「邊寇出沒不常,惟守禦爲 帝憫其老,免常朝。 上策。 是月卒,年八十二。 寇來無所得,去有所懼 宜分兵扼要害,而 諡 寒毅。 り則 八年乞致仕。 間 遣 邊 患可 精銳巡 少

名將。 備 增驛傳,又 廣 嘗逞 長身多 憤 杖 請 力,奮跡行伍至大將,大小 殺 頒給火器於 都 司 經 歴, 、各邊。 又以私憾杖百戶,並爲言官所劾。 將校 失律,卽奏請 百餘戰,未嘗挫 置罪, 衄。 而撫 在宣府二十 置 士 一不問。 卒有恩。 年, 旣卒,吏部言非 修 邊徼 屯堡,嚴 帖 ·然,稱

列

傅

第

世券,授其子序指揮使。

指揮: 使, 陳懷,合肥人。 涖山西 |都司 襲父職爲眞定副千戶。 事。 再從張輔擒安南賊簡定, 永樂初,積功至都指揮僉事。 從都督費職征涼州叛 人虎保,皆有功。 從平安南,

仁宗立,進都督同知。

鎭四川 吳瑋往招 |潘 行。 劾。 州薛繼賢 一百餘 、疊溪、圍威 宣德 帝 千戶錢宏與衆謀,詐言番叛,帥兵掠麥匝諸族。 降 卢 擊賊,復松潘。 敕責 `,歸所掠軍民二千二百餘人,事遂定。 之,而 元年代梁銘爲總兵官,鎭寧夏。 在鎭 讓 驕 、茂諸州。指揮吳玉、韓整、高隆相繼敗績,西鄙騷然。 命懷統劉昭、趙安、蔣貴帥師數萬隨其後。 ,復以御史王禮彈章示之。 縱不法,干預民事,受賕庇罪 **地**|懐 至,仍用瑋前鋒,遂復疊溪, 時官軍征交阯者屢敗, 懷引罪。 人,侵奪屯田, 進左都督,厚賚金幣,而 番人震恐,遂反。 置 不 降二十餘寨, 問 瑋等至, 賊不順 答辱 詔發松潘軍援之, 韶遣鴻臚 殺指揮陳傑等,陷 絀 招 撫復 瑋 命。 功 丞何敏、指揮 業者萬 瑋 數爲言官 不 與龍 錄 將 士憚 懷 州 所 留 知 松

六年,松潘勒都、北定諸族暨空郎、 龍溪諸寨番復叛。 懷遣兵戰敗,指揮安寧等死者三

旨行遣。且日荒於酒,不飭邊備,致城寨失陷。」<u>宣宗</u>怒,召懷還,命文武大臣鞫之,罪當斬。 久之,巡按御史及按察使復奏:「懷**僭侈踰分。每旦,令三司官分班立,有事跪白。懷中坐,稱** 兒骨賊復聚生苗邀戰。擊破之, 百餘人。懷乃親督兵深入,破革兒骨寨,進攻空郎乞兒洞。 剿戮殆盡。於是任昌、牛心諸寨番聞風乞降,羣寇悉平。 賊敗,斬首墜崖死者無算。

二年,以老召還,命理中府事。九年春,與中官但住出古北口,征兀良哈。還與馬亮等同 正統二年以原官鎭大同。 時北人來貢者日給廩餼,爲軍民累。 懷言於朝,得滅省。居 下都察院獄,宥死落職。

封,而懷得平鄉伯。十四年扈駕北征,死土木。贈侯,諡忠毅。 如初,中旨許嗣。 政鎭兩廣久,自陳軍功,乞世券,東部復執不可,韶予之。 政卒,子信嗣。 子輔乞襲爵,吏部言非世券,執不許。景帝以懷死事,許之。輔卒,子政請襲,吏部執

弘治中卒,無子,弟俊嗣指揮使。

哈之役,偕中官劉永誠出劉家口,至黑山、大松林、流沙河諸處,遇賊勝之,還封招遠伯。是 馬亮,棋人。以燕山衞卒從成祖起兵,累功至都指揮僉事。宣宗時官至左都督。兀良

役也,王振主之,故諸將功少率得封。

傳

第四十

 $\equiv$ 

陳懷

· 虎善騎射,每戰身先士卒,所向克捷,時稱驍將。 爲伯三年卒。 諡榮毅。

揮同知。從大軍征交阯及沙漠,遷都指揮僉事,掌彭城衞事 蔣貴,字大富,江都人。以燕山衛卒從成祖起兵。 雄偉多力,善騎射,積功至昌國

巢,一日十數戰,大敗之。進都指揮同知,鎭守密雲。七年復命爲參將,佐懷鎭松潘。 死者無算。捷聞,進都督同知,充總兵官,佩平蠻將軍印,代政鎭守。 破任昌大寨,會都指揮趙得、宮聚兵以次討平龍溪等三十七寨,斬首一千七百級,投崖墜水 進都督僉事,充副總兵,協方政鎭守。 宣德二年,四川松潘諸番叛,充右參將,從總兵官陳懷討之。 叉明年, 諸番復叛, 政等分道進討。 募鄉導,絕險而進, 貴督兵四千,攻 薄其 明年

人。侍郎徐晞刻貴, 凉,邊將告急,命佩平廣將軍印,帥師討之。 英宗卽位,以所統皆極邊地,奏增軍士月糧。正統元年召還,爲右都督。 朝議以貴方選軍甘州,勢不相及,而莊浪乃晞所統,責晞委罪,置貴 賊犯<u>莊</u>浪,都指揮江源戰死,亡士卒百四十餘 阿台寇甘、

明年春,諜報敵駐賀蘭山後。 詔大同總兵官方政、都指揮楊洪出大同迤西,貴與都督

列 傳 年四月,王驥以捷聞,論功封定西伯,食祿一千二百石,給世券。明年代任禮鎭甘肅。 道疾馳三日夜,抵其巢。阿台方牧馬,貴猝入馬羣,令士卒以鞭擊弓韣驚馬,馬盡佚。敵失 敵勢稍弱。貴帥輕騎敗之於狼山,追抵石城。已,聞朶兒只怕依阿台於兀魯乃地,貴將二 爲疑兵,轉戰八十里。會任禮亦追敵至黑泉,阿台與朶兒只伯以數騎遠遁,西邊悉平。三 馬,挽弓步劚。 千五百人爲前鋒往襲。 鎰言狀,E 尚書王驥出理邊務,斬敬,責貴立功。 貴感奮,會朶兒只怕懼罪,連遣使入貢, 趙安出凉州塞會剿。貴至魚兒海子,都指揮安敬言前途無水草,引還。鎮守陝西都御史陳 貴縱騎蹂擊,指揮毛哈阿奮入其陣,大敗之。復分軍爲兩翼,別遣百騎乘高 副將李安沮之,貴拔劍厲聲叱安曰:「敢阻軍者死。」遂出鎭夷,間 叉明

籠 山七寨及馬鞍山象陣,「台功皆第一。事詳王驥傳。明年,師還,進封侯,益祿三百石。 六年命佩平蠻將軍印,充總兵官,與王驥帥師抵金齒。 分路進搗麓川上江寨, 破杉木 年冬,以征麓川蠻思任發,召還京。

渥,加歲祿五百石。是役也,貴子雄乘敵敗,帥三十人深入。敵扼其後,自刎沉於江。贈懷 八年夏,復佩平蠻將軍印,與王驥討思任發子思機發,攻破其寨。明年,師還,賞賚甚

遠將軍、彭城衞指揮使。

第 四十三 十四年正月,貴卒,年七十。贈涇國公,諡武勇。

自 囊負,不役一人,臨陣輒身先之,以故所向有功。 貴 起卒伍,不識字,天性樸實,忘己下人,能與士卒同甘苦。 出境討賊, 衣糧器械常身

屯堡。 子議,病不能嗣,以義子随嗣侯。 天順末, 佩平羌將軍印, 總兵甘肅, 築甘州沙河諸

時論 其 民 言:「大同、宣府諸塞下,腴田無慮數十萬,悉爲豪右所占。 騎長驅直薄城下,可以爲鑒。今西北隅故址猶存,亟行勸募之令,濟以工罰,成功不難。」又 「太祖肇建南京,京城外復築土城以衞居民,誠萬世之業。今北京但有內城。 (科額; 失業。 麗之。 成 化八年召還, 畿內民田,嚴戢豪右毋得侵奪。庶兵民足食而內外有備。」章下所司。 脫使邊關有警,內郡何資。運道或梗,京師安給。請遣給事、御史按覈塞下田,定 十三年帥京軍防秋大同、宣府、陳機宜十餘事。 協守南京,兼督操江。十年入督十二團營,尋兼總神機營兵。上言: 畿內八府,良田半屬勢要家,細 皆報可。 十五年偕汪直按遼東 己巳之變,敵 雖不盡行,

一十年佩將軍印, 出禦邊寇。 寇退班師, 累加太保兼太子太傅。 卒,贈涼國公, 諡

邊

敏

毅。

貲。 再傳至孫傅。 子骥嗣,典京營兵。弘治中充總兵官,歷鎭薊州、遼東、湖廣。 嘉靖中,累典軍府。 佩征蠻將軍印,鎭兩廣。 以平海賊及慶遠瑶功,加 官中外二十年,家無餘

太子太保。明亡,舒絕。

立,進都指揮同知。從平樂安,又從征兀良哈,還爲後拒。英宗立,進左都督。 **擢都督僉事,從北征,前行偵敵,還受厚賞。仁宗卽位,命掌廣西都司事,尋改遼東。** 任禮,字尚義,臨漳人。以燕山衞卒從成祖起兵,積功至山東都指揮使。永樂二十年 宣宗

出塞,敗朶兒只伯於石城,復分道至梧桐林、亦集乃,進至黑泉而還。斬獲多,封寧遠伯,祿 二年復寇莊浪。 正統元年佩平羌將軍印,充左副總兵鎭甘肅。阿台、朶兒只伯數犯肅州,璽書譙讓 都指揮魏榮擊却之,擒朶兒只伯姪把禿孛羅。 禮以聞。三年與王驥、蔣貴

千二百石。明年還朝。又明年代貴鎭甘肅。

不許。 塞上田者,每頃輸糧十二石。禮連請於朝,得滅四石。是時邊塞無警,禮與巡撫曹翼屯田 八年,赤斤蒙古衞都督且旺失加苦也先暴横,欲移駐也洛卜剌。禮以其地近肅州,執 已,奏請建寺於其地。禮復言許其建寺,彼必移居,遺後患,事竟寢。時邊將家僮墾

列

傅

第四十三

任禮

**積栗,繕甲訓兵,邊備甚固。** 

盛,封喃哥弟鎖南奔爲祁王。禮以二寇合則勢益難制,遣人招之。 師直抵罕東,繁之以歸。帝大喜,賜禮鐵券,令世襲。 肅州境內。 下欲奔瓦剌,禮進兵逼之,遂收其全部千二百餘人以還。 十一年,沙州衞都督喃哥兄弟爭,部衆離貳。 禮因遣都指揮毛哈刺往撫其衆,而親帥兵繼其後。 禮欲乘其饑窘,遷之內地。會喃哥亦請居 事聞,賜賚甚厚。 比至,喃哥復持 鎖南奔欲從未決, 時瓦剌也先方 兩端 禮潛 其部

就第。 十四年,也先分道入寇,抵肅州。 景泰初,提督三千營,以老致仕。 禮遣裨將禦之,再戰再敗,失士馬萬計。 久之,復起守備南京,入掌中府。 徵還,以伯

征滿四失律,宥死戍邊。 禮自起卒伍,至大將,恪謹奉法。 子弘,予世指揮使。 成化初卒。 贈侯、諡僖武。 子壽嗣,總兵鎭陝西。

坐

趙安,狄道人。從兄琦,土指揮同知,坐罪死,安謫戍甘州。 永樂元年進馬,除臨洮百

戶,使西域。 從北征 有功,累進都指揮 同 知

宣德二年,松潘番叛。 充左參將,從總兵陳懷討平之,進都督僉事。 時議討兀良哈,詔

四二六三

從史昭 安與史昭統所部赴京師。 討 曲先,斬獲多。九年,中官宋成等使鳥思藏,命安帥兵千五百人送之畢力术江。〔3〕 兀良哈旋來朝,命回原衛。 使烏思藏,四年還。 明年復以左參將

尋與侍郎

徐晞出塞討阿台、杂兒只伯,敗之。

伯,祿千石。 三年,復與王驥、任禮、蔣貴分道進師,至刁力溝執右丞、達魯花赤等三十人。 正統 元年進都督同知, 明年移鎭涼州。 充右副總兵官,協任禮鎭甘肅。 安家臨洮,姻黨厮養多爲益,副使陳斌以聞。 明年與蔣貴出塞,剿寇無功。 在涼州 以功封 又多招 會川

無賴爲僮奴,擾民,復爲御史孫毓所劾。 韶皆不問。

同 知 安 勇敢有將略,與貴、禮並稱西邊良將。 九年十二月卒。 子英爲指揮使,立功,進都督

都 指揮僉事 趙 輔 ,字良佐,鳳陽人。襲職爲濟寧衞指揮使。 ,充左參將,守懷來。 天順 初,徵入右府涖事

景帝嗣位,尚書王直等以將才薦,擢署

成 化元 年以中府都 督同知拜 征夷將軍,與韓雍討兩廣蠻,克大藤峽,還封武靖伯。 已

而 蠻入潯州,言官交劾。 廣西巡按御史端宏謂:「賊流毒方甚,而輔妄言賊盡,冒封爵,不罪

列

傅

第

四 + Ξ

趙

安

趙

輔

輔無以示 戒。」輔乃自陳戰閥,委其罪於守將歐信。 帝皆弗問。 三年總兵征迤東,與都御史

李秉從撫順深入,連戰有功,進侯。

言上命內官盧永征南蠻,黃順、汪直征東北,皆莫大功, 卒不問。 其世伯, 弛兵玩寇罪。」帝不納。 六月入平凉、鞏昌、臨洮、殺掠人畜。 深入大掠。 年,廷議大舉搜河套,拜輔將軍,陝西、延綏、寧夏三鎭兵皆聽節制。 侯如故,僅滅祿二百石。言官力爭。 十二年解營務。 輔不能制,與王越疏請罷兵。 輔還,猶督京營。 家居十年卒。 迨七月而縱橫慶陽境內。 贈容國公,諡 言官交論 言者攻益力,詔姑置之。 不聽。 其罪。 輔復 恭 肅 宜付史館。 上疏暴功,言滅祿無以贍老。 命給事中郭蹚往勘,還言:「寇於 輔與越至楡林不進,宜治其 余子俊等請置輔於法, 輔辭侯,乞世伯。 輔至楡林, 寇已 帝 許

輔 少俊辯 有才,善詞 翰,多交文士,又好結權幸。 故屢遭論劾,卒無患。

子 承 慶嗣伯,協守南京。 正 |德初,坐傳寫諫官劉蒞疏,爲劉瑾所惡,削半祿閒住。 四傳

至玄孫光遠,萬曆中鎭湖廣。明亡乃絕。

劉聚者,太監永誠從子也。 爲金吾指揮同知。 以「奪門」功, 進都指揮僉事,復超擢都

督同知。與計曹欽,進右都督。

頃復 與都督范瑾等擊寇青草溝,敗之。 成化六年以右副總兵從朱永赴延綏, 永等追寇牛家砦,聚亦據南山力攻。 追賊黃草梁。 遇伏,鏖戰傷頦, 麾下力捍以発。 寇大敗,出境。

論功進左都督,以內援特封寧晉伯。

擊却之。 八年冬代趙輔爲將軍,總陝西諸鎭兵。 還至高家堡,寇復至,敗之。 追奔至漫天嶺,伏起夾擊,又敗之。 寇入花馬池,率副總兵孫鉞、遊擊將軍王璽等 鉞、 璽亦別破賊

於井油山。捷聞,予世券。

官范瑾等六將, 所報首功百五十,僅十九級。 **贼退,適王越自紅鹽池還,妄以大捷聞,璽書嘉勞。** 其冬、孛羅忽、滿都魯、癿加思蘭連兵深入,至秦州、安定、 殺被掠者冒功。 帝以寇旣遁,置不問。 部科及御史交章劾。 頃之,紀功兵部員外郎張謹劾聚及總兵 聚尋卒。 韶遣給事中韓文往勘, 贈侯、諡威勇。 會寧諸州縣,縱橫數千里。 還奏如謹言。

言聚無大功,子孫不宜再襲。 傳子祿 及福。 福,弘治中掌三千營,加太子太保。 世宗不允,命文嗣。 亦傳至明亡乃絕。 卒,子岳嗣。 卒,從子文請嗣。 吏部

並以勳爵鎮禦邊陲,故類著於篇。 恪謹奉職,有足尚者。 廣守保定,宣力最著。 主,世列徹侯,功名盛矣。薛禄以下諸人,皆與「靖難」。禄東昌、滹沱之戰,劉榮守永平,譚 宋晟在太祖時, 雖策勳之日,未卽剖符,而各以積閥受封。 其善撫士卒, 趙輔、劉聚猷績遠遜前人,而帶礪之盟,與國終始,誠厚幸哉。 即與開國諸元勳參迹戎行,其後四鎮凉州,威著西鄙。 慎固封守, 兩子尚 諸人

### 校勘記

擒其王子别兒怯帖木兒 别兒怯帖木兒之「别」字原誤作「列」,據本書卷三三〇哈梅里傳及太

祖實録卷二二洪武二十四年八月乙亥條改。

輔等議於嘉林江上流濟師 卷六二永樂四年十二月辛卯條改。 嘉林江,原作「嘉陵江」,據本書卷一五四張輔傳、紅格本太宗實録

. = U 修忙牛嶺冤毛河赤山榆楊口來勝諸城 Ш 地書不載「來勝」, 疑爲「東勝」之譌。讀史方輿紀要卷四四大同府東勝城注云:「洪武 冤毛河、赤山, 本書卷四一地理志作「冤毛川」、「赤兒

北連大山、榆楊等口, 二十六年城東勝。」又云:「正統三年邊將周諒言,東勝州廢城西濱黃河, 中有赤兒山, 東西坦平, 二百餘里,其北連亘官山,實外寇出没必經之 東接大同, 南抵偏關,

地。」其所言地望,與「東勝」合。

△□□永樂九年進太寧都指揮僉事 永樂九年,明史稿傳三〇譚廣傳、英宗實録卷一二二正統九年十

月甲子條均作「永樂元年」。「九」疑爲「元」之譌。

(五)鎮守陝西都御史陳鎰言狀 陳鎰,明史稿傳三〇蔣貴傳、英宗實錄卷三五正統二年十月辛巳條

均作「羅亨信」。按本書卷一七二羅亨信傳也說羅亨信「上章言貴逗留狀」,應以「羅亨信」爲是。

C六」破杉木籠山七寨及馬鞍山象陣 補。按本書卷二四七劉綎傳、明一統志卷八七、蠻司合誌卷九作「沙木籠山」,本書卷三一四麓 杉木籠山,原作「木籠山」,脱「杉」字,據本書卷一七一汪驥傳

ヘゼン命安帥兵千五百人送之畢力术江 三三一朵甘傳,明史稿傳三〇趙安傳改。 畢力术江,原作「畢力木江」,據本喜卷三三○阿瑞衞傳、卷

川傳則二名錯出。

# 明史卷一百五十六

## 列傳第四十四

吳允誠子克忠 孫瑾 薛斌子授 弟貴 李賢 吳成 滕定

毛忠 金順 孫銳 金忠蔣信 和勇 李英 從子文 羅秉忠 毛勝 焦禮

**徠功,封西寧侯。** 秉誠,授後軍都督**僉事。餘授官賜冠帶,給畜產**鈔幣有差,使領所部居凉州耕牧。 都兒灰率妻子及部落五千、馬駝萬六千,因宋晟來歸。帝以蒙古人多同名,當賜姓別之。尚 書劉儁請如洪武故事,編爲勘合。 允誠得賜姓名,授右軍都督僉事。 倫都兒灰亦賜姓名柴 吳允誠,蒙古人。名把都帖木兒,居甘肅塞外塔溝地,官至平章。永樂三年與其黨倫 自是降附者益衆,邊境日安,由允誠始。 晟以招

列

傳 第

四

+

四

吳允

誠

都 督。 七 年 尋 往 進 亦集乃覘敵,擒哈剌等二十餘人,進都督同知。 左 都 督。 與 中官王安追闊脫赤,至把力河獲之。 明年從出塞,敗本雅失里,進右 封恭順伯, 食祿千二百石,予

世

脅允誠 降 汗 敕獎 鬼力赤 允 衆 誠 之,賜縑鈔羊 遇弑,其下 ,欲叛去。 三子: 答蘭、管者、克勤。 多潰。 允誠妻與管者謀,召部將都指揮保住、卜顏不花等擒其黨,誅之。帝喜, 米甚厚,授管者指揮僉事。 答蘭與別立哥請出塞自效, 允誠與二子從軍,留其妻及管者居凉州。 保住賜姓 有 功。 名楊效誠, 別立 哥者, 授指揮僉 秉 誠 番人虎保等誘 事。 子 也

帝 征 瓦 刺 允誠 父子皆從。 師還 ,命仍居涼州備邊。 允誠卒,贈國公,諡 忠壯

熙元 巡 邊。 年 命 答蘭 正統 以戚 九 里恩,克忠進侯。 更名克忠,襲其爵。 年統兵出喜峰口,征兀 時管者已積 再征 良哈,有功,加太子太保。 阿魯台, 功至都指 從行。 揮 三征阿魯台, 同 知, 亦 封 廣義伯。 復從。 兄弟皆有功。 克忠嘗充 副 總兵 洪

如 雨 官軍 土木之變,克忠與其弟都督克動 死傷 略盡。 克忠 下馬射,矢竭,猶殺數 子瑾 爲後拒,寇突至,驟戰不勝。 人,與克勤俱歿於陣。 敵兵據 贈邠 國公、諡忠勇。 山上,飛矢石

克動贈遵化伯,諡僖敏。

**運被執** ,逃歸,嗣侯。 英宗嘗欲使瑾守甘肅,辭曰:「臣,外人,若用臣守邊,恐外裔輕中

國。」帝善其言,乃止。 曹欽反,瑾與從弟踪聞變,椎長安門上告。 門閉, 欽攻不得入, 逐縱

火。 **瑾將五六騎與欽** 力戰死。 贈涼國公、諡忠壯、予世券。

三傳至曾孫繼爵,嘗守備 南京。 傳子汝胤孫惟英,與繼爵皆總督京營戎政。 崇 順 末,

都城陷,汝胤弟勳衞汝徵偕妻女投繯死。

爵除。 弟<u>克</u>勤子 琮嗣,鎭守寧夏。 管者卒,子玘嗣。 管者妻早奴亦有智略,嘗親入朝獻良馬。 成化四年,滿四反。 | 踩坐激變,且臨陣先退,下獄論死。 謫戍邊, 朝廷多其忠。 **郑卒**,管者

嗣 一職,從起兵,累遷都督愈事。 薛斌,蒙古人,本名脱歡。 父薛台,洪武中歸附,賜姓薛,累官燕山右護衞指揮僉事。斌 從北征有功,進都督同知。永樂十八年封永順伯,祿九百石,

世指揮使。

年秋與成國公朱勇等遇敵於鷂兒嶺。 斌卒,子壽童方五歲,從父貴引見仁宗,立命嗣伯,賜名綬。 軍敗,弦斷矢盡,猶持空弓擊敵。 長,驍 勇善戰。 敵怒, 支解之。 正統十四 旣

列

伯。 而 知其本蒙古人也, 曰:「此吾同類, 宜勇健若此。」相與哭之。 勳子璽乃嗣指揮使,如券文。 諡武毅。 子輔、孫勳、並得嗣

子瑶嗣。弘治中卒,子昂降襲指揮使。 卒,贈濱國公,諡忠勇。無子,從子山嗣爲指揮使。天順改元,以復辟恩,命山子忠嗣伯。卒, 進都督僉事。永樂二十年封安順伯,[]祿九百石。宣德元年進侯, 貴,本名脫火赤,斌之弟。以舍人從燕王起兵,屢脫王於險,積官都指揮使。再從北 加祿三百石,予世券。

愈事,再進右都督,賜賚甚渥。 廷所降詔敕,皆命賢譯。 授燕府紀善。 李賢,初名丑驢,韃靼人。元工部尚書。曰洪武二十一年來歸,通譯書。 侍燕世子最恭謹。「靖難」師起,有勞績,累遷都指揮同 賢亦屢陳所見。 尋召見,憫其病,封忠勤伯。 成祖皆採納之。 仁宗卽位,念舊勞,進後軍都督 食祿千一百石。尋卒。 知。 凡塞外表奏及朝 太祖 賜姓名,

俱。 三遷都指揮僉事,始知名。 買驢更今姓名,充總旗,數從大軍出塞。 吳成,遼陽人,初名買驢。父通伯,元遼陽行省右丞。 南軍聞吳買驢名,多於陣上指目之。設伏淝河,進兵小河,合戰 建文元年授永平衛百戶。降燕,從戰皆有功, 太祖時,觀童來降,通伯父子與

齊眉山,攻敗靈壁軍,皆殊死鬭,功多。

武備。 朱榮 **祿千一百石,予世券。從征樂安,復與薛祿爲前鋒。** 武侯薛祿征大松嶺,爲前鋒,有功,增祿米。 三年,帝北征,從敗賊於寬河,進侯,祿如故。 兵爲前鋒,追至闊灣海。 成祖即位,授都指揮使。 寇伺其出獵,卒入城,掠其妻拏以去。 從征本雅失里。 召還,進都督僉事。又三從出塞。 帝聞之,置不罪。已而阿魯台入貢,還其家口。 宣宗初,以成嘗宿衞東宮,錄舊勞,封淸平伯, 八年卒。贈渠國公,三諡壯勇。 疾戰,本雅失里以七騎遁。 事定,出守備興和。 洪熙元年 成好畋獵而不修 進左都督。 從征 阿魯台,合 從陽

四傳至玄孫遵周。四崇禎末,京師陷,被殺。 子忠前死,忠子英嗣伯。卒,子璽嗣。坐貪淫奪爵。久乃復之。卒,無子,從弟琮嗣。

進燕山右衞指揮使。卒,定嗣官,屢從出塞,有功,進至都督僉事。 滕定,父瓚住,元樞密知院。 正統初卒。 子福嗣,爲指揮使。 洪武中,來降。 授會州衞指揮僉事,賜姓滕。 宣德四年封奉化伯,祿 從燕起兵,

累進都督僉事。 金順,本名阿魯哥失里。永樂中來降,授大寧都指揮僉事。從敗本雅失里,又敗阿魯台, 宣德三年從巡北邊,有斬捕功。 明年封順義伯,祿八百石。卒,子忠嗣,爲

列傳

第四

十四四

吳成

指揮僉事。

嗣位,加太子太保,並支二俸。 師復出,倉皇渡答蘭納木兒河遁去。忠、懋至河不見寇,抵白邙山,卒無所遇,乃班師。仁宗 初不許。會大同、開平警報至,諸將請從忠言。帝復出塞,忠與陳懋爲前鋒,而阿魯台聞王 過望。班師在道,忠騎從,數問寇中事,眷寵日隆。明年,忠請爲前鋒,討阿魯台自效。帝 姓名、封忠勇王、賜冠帶織金襲衣、命坐列侯下、輟御前珍羞賜之、復賜金銀寶器。忠大喜 北,至上莊堡,率妻子部屬來降。時六師深入,寇已遠遁。帝方恥無功,見其來歸,大喜,賜 金忠者,蒙古王子也先土于也。素桀黠,爲阿魯台所忌。永樂二十一年,成祖親征漠

酌以金卮,遂賜之。明年加太保。六年秋卒。命有司治喪葬。 「去留任所欲耳。朕有天下,獨少此二人邪。」二人獲數十人、馬牛數百來獻。帝喜,命中官 宣德三年親征兀良哈,敗寇於寬河。 忠與把台請自效,帝許之。或言不可遣,帝曰:

把台者,忠之甥,從忠來降,授都督僉事。 宣德初,賜姓名蔣信。 正統中,封忠勇伯。從

駕陷土木,也先 ,竟從駕還,詔 使隸賽罕王帳下。 復給其祿。 景泰 五年卒。 信雖居朔漠、志常在中國。 贈侯,諡 僖順。 子也兒索忽襲爵。 每詣上皇所慟哭,擁衞 天順初,更名 頗 至

善。弘治中卒。無子,爵絕。

李英,西番人。 父南哥,洪武中率衆歸附,授西寧州同知,累功進西寧衛指揮僉事。

嗣官。

貢 進 都 使貲,納逋逃,交通外域,肆惡十餘年。 指揮僉事 永 樂十年,番會老的罕叛。 番僧張答里麻者,通譯書。 英擊之。 討來川,俘斬三百六十人。夜雪,賊遁,追盡獲之, 英發其事,磔死,籍其家。 成祖 授以左覺義。 居西寧、恣甚。 西陲快之。 以計 取西

書諭 里。 **遁,安定王桑爾** 哈三孫散 赤斤 至雅 末年 ・,中官 令闊,與安定賊遇,大敗之 哥、曲先指揮散卽思 、罕東及安定、曲先,詰賊主名,而敕英與土官指揮康壽等進 加失夾等懼 喬來喜、鄧誠等使西域,至道安定、 一詣闕 實殺使者,遂率兵西入。 謝 经。 俘斬千一百餘人,獲馬 宣宗嘉英功,遣使褒諭, 曲先, 賊驚走。 遇賊見殺,掠所齎金幣。 牛雜 畜十四萬。 追擊,踰崑崙 宴勞之,令馳驛 討。 英 曲先 詗知安定 Щ 入朝。 深 賊 仁宗 聞 入 指 數 風 遠 百 揰

列

僔

第

至,擢右府左都督,賜賚加等。 宣德二年封會寧伯,「以一祿千一百石,幷封南哥如子爵。

 

 專進都指揮使,用薦擢左軍都督僉事,屢分典營務,以嚴愼稱。
 攜成赴京辯。英遣人篡取太平及其義兒杖之,義兒竟死。言官交劾,幷及前罪,遂下英詔 追逃者入官。七年,西寧指揮祁震子成當襲父職。庶兄監藏,英甥也,欲奪之。成從祖太平 獄,奪爵論死。[刊]正統二年始釋。後稍給其祿。尋卒。英宗復辟,官其子景錦衣指揮同知。 諭之。 英恃功而驕, 英家西寧,招逋逃七百餘戶,置莊墾田,豪奪人產,復爲兵部及言官所劾。帝宥英, 所爲多不法。寧夏總兵官史昭奏英父子有異志。南哥上章辯。 賜敕慰

西陲以寧。累官都指揮使。 求不得。會思俄可以畜產鬻於邊,肅誣以盜,收掠致死,番人惶駭思亂。文劾之,逮肅下吏, 英從子文,宣德間爲陝西行都司都指揮僉事。西番思俄可嘗盜他部善馬,都指揮穆肅

率師敗之,封高陽伯。石亭敗,革奪門冒功者官。文自首,帝以守邊不問。 天順元年冒迎駕功,進都督僉事。未幾,以右都督出鎭大同。寇二千餘騎犯威遠,文

文下詔獄,論斬。帝宥文死,降都督僉事,立功延綏。 四年秋,孛來大舉入寇,文按兵不戰,遂入雁門,大掠忻、代諸州,京師震恐。寇退,徵 旣而進都督同知。成化中,哈密爲土

魯番所併, 求救於朝。 韶文與右通政劉文往甘肅經略之,無功而還。 弘治初卒。 正德初贈

至都指揮同知,無子。 毛膨 ,字用欽,初名福壽,元右丞相伯卜花之孫。 勝父安太嗣爲羽林指揮使,傳子濟, 伯父那海, 無子,勝嗣。 洪武中歸附, 論濟征北功,進都 以「靖難」功

指揮使。

嘗逃歸塞外,尋復自還。

勝 與都督冉保統六百人往。 正統七年以征麓川功,擢都督僉事。 已,再征麓川,即命二人充左右參將。 賊平,進都督同知 靖遠伯王驥請選在京番將舍人,捕苗雲南。 乃命

以武清伯石亨薦,景帝進勝左都督,督三千營操練。 十四年夏,也先謀入寇,勝偕平鄉伯陳懷等率京軍三萬鎭大同。 懷遇寇戰歿,勝脫還。

兵西直門外,解都督孫鐘圍。 貴州苗大擾,詔勝往討。未行,而也先逼京師。 明日,都督武興戰歿於彰義門,寇乘勝進。勝與都御史王竑 勝禦之彰義門北,擊退之。越二日,引

急援之,寇遂引却。<br />
勝追襲至紫荆關,頗有斬獲。 夷赴貴州。 賊首韋同烈據香鱸山作亂,勝與總兵梁路、右副總兵方瑛等從總督王來分道夾 事定,乃命以左副總兵統河間、東昌降

列傅

第

勝進自重安江,大破之。 會師山下,環四面攻之。 賊窘,縛同烈降。

伯, 予世券。 還討湖廣巴馬諸處反賊,克二十餘寨,擒賊首吳奉先等百四十人,斬首千餘級,封南寧 疏請更名,從之。 移鎭騰衝。 金齒芒市長官刀放革潛結麓川遺孽思卜發爲

變,勝設策擒之。

患。 詔巡撫覆實,卒置不問。|天順二年卒。 巡按御史牟棒劾其貪暴不法數十事,且言勝本降人,狡猾難制,今又數通外夷,恐貽邊 贈侯、諡莊毅。

子樂嗣。 坐石亨黨,發廣西立功。 成化初,鎭貴州,尋移兩廣。 卒,子文嗣。 弘治初協

守南京,傳爵至明亡乃絕。

燥,無子,以勝弟謙嗣,累功至都指揮同 焦禮,字尚節,蒙古人。父把思台,洪武中歸附, 知。卒,子管失奴幼,謙弟禮借襲其職,備禦遼東。 爲通州衞指揮僉事。 子勝嗣, 傳至義

累進 也先逼京城、詔禮率師入衞。 都指揮同知。 宣德初,禮當還職。宣宗念禮守邊勞,命居職如故,別授管失奴指揮使。 正統中,積功至右都督。 寇退還鎭。 景泰四年,賊二千餘騎犯興水堡,禮擊走之。 英宗北狩,景帝命充左副總兵,守寧遠。 禮尋以年勞, 未幾, 璽

書獎勵,進左都督。

八十,不可獨任,奏遣都指揮鄧鐸協同守備。 英宗復辟,以禮守邊有功,召入觀,封東寧伯,世襲,賜賚甚厚,遣還鎭。 居無何,禮奏鐸欺侮,請更調。 命都指揮張俊 兵部以禮年垂

代鐸。天順七年卒於鎭。贈侯、諡襄毅。

兵湖廣。卒,贈太子太保,諡莊僖。傳爵至明亡乃絕。 以葬,哀憤得疾卒。無子,以再從子棟嗣。嘉靖中,提督五軍營,兼掌中府。踰十年,改總 江,出鎭貴州、湖廣。。俊少事商販,旣貴,能下士,而折衝非所長。卒,子淇嗣。嘗分典京營。 正德中,賄劉瑾,出鎭兩廣。踰年卒,弟洵嗣。洵雖嗣爵,先業盡爲淇妻所有。生母卒,無 禮有膽略,精騎射,善以少擊衆。守寧遠三十餘年,士卒樂爲用,邊陲寧謐。 孫壽嗣爵。卒,無子,弟俊嗣。成化末,歷鎭甘肅、寧夏。弘治中,掌南京前府,兼督操

拜都從征哈密,亦戰歿。父寶以驍勇充總旗,至永昌百戶。 毛忠,字允誠,初名哈喇,西陲人。曾祖<u>哈喇歹,洪武初歸附,起行伍爲千戶,戰歿。祖</u>

忠襲職時,年二十,膂力絕人,善騎射。常從太宗北征。宣德五年征曲先叛寇,有功。

列傳第四十四

焦禮

毛忠

八年征亦不剌山 ,擒僞少師知院。 九年出脫歡山,十年征黑山寇,皆擒其酋。 各進一

指揮同知。

進同 將,協守甘肅 三年率師至罕東,生繁喃哥弟偽祁王饋南齊幷其部衆,擢都督僉事,始賜名忠。 知,始賜姓。 正統三年從都督蔣貴征朶兒只伯,先登陷陣,大獲,擢都指揮僉事。 明年從總兵官任禮收捕沙洲衞都督喃哥部落,徙之塞內,進都指揮使。 十年以守邊勞, 尋充右參

京師。 大辟。 帶、織金蟒衣。 忠,欲陷之,遂宣言忠與也先交通,而朝廷不察也。英宗在塞外獨知之,比復辟,卽召還。 而忠在福建亦屢有斬馘功,乃擢都督同知,充左副總兵,鎭守甘肅。陛見,慰諭甚至,賜玉 景泰初,侍郎李實使漠北,還言忠數遣使通瓦剌。 初忠之征沙漠也,獲番僧加失領眞以獻。英宗赦不誅。後逃之瓦剌,爲也先用,憾 景帝不許。請貶官,發福建立功。乃遣之福建,而官秩如故,令甘肅守臣徙其家屬 詔執赴京。旣至,兵部論其罪,請置

戰一日夜,矢盡力疲。賊來益衆,軍中皆失色。 以鎭番破賊功,進左都督。五年,孛來以數萬騎分掠西寧、莊浪、甘肅諸道,入涼州。 |天順二年,寇大入甘肅,巡撫||丙釗劾奏諸將失事罪。 忠意氣彌厲, 拊循將士, 復殊死鬭。 賊見終 部議忠功足贖罪,置不問。 忠鏖

傅第四十四 毛忠

列

與總兵官衞穎分討之。忠先破巴哇諸大族。 不可勝,而援軍亦至,遂解去,忠竟全師還。 其昝咂、馬吉思諸族,他將不能下者,忠復擊 七年,永昌、凉州、莊浪塞外諸番屢爲邊患。忠

破之。

論功,忠止增祿百石,而顯乃得世券,忠以爲言,遂封伏羌伯。

溝直抵礮架山下,多所斬獲。賊稍却,冒矢石連奪山北、山西兩峰。 東峰,及石城東、西二門。 賊大窘,相對哭。忽昏霧起,他哨舉烟掣軍,賊遂倂力攻忠。 力戰不已,爲流矢所中,卒,年七十五。從子海、孫鎧前救忠,亦死。 成化四年,固原賊滿四據石城反。 韶忠移師討之,與總督項忠等夾攻賊巢。 而項忠等軍亦克山之 忠由木頭

東,春秋致祭。 弘治中,從有司言,建忠義坊於蘭州,以表其里。又從巡撫許進言,建武勇祠於甘州城 忠爲將嚴紀律,善撫士。其卒也,西陲人弔哭者相望於道。事聞,贈侯,諡武勇,予世

年,劉瑾欲殺尚書劉大夏,坐以處置田州事失宜,幷逮銳下詔獄。 問。思恩土官岑濬反,與總督潘蕃討平之。旣又討平賀縣僮賊。加官至太子太傅。正德三 書獎勵。九年以廣西破賊,增歲祿二百石。言官劾戲廣置邸舍,私造大舶以通番商。置不 孫戧,襲伯爵。成化中,協守南京。弘治初,出鎭湖廣,改兩廣。平蠻賊,累有功,咸璽 獄具, 革其加官幷歲祿五

百石。 大用討之。 會許泰援軍至,僅免。言官交劾,乃召還。 已而賄瑾,起督漕運。 所統京軍皆驕惰不習戰。 踰年,瑾誅, 明年正月遇賊於長垣, 以與大用同事,竟不罪。世宗卽位,復起鎭湖廣 被劾罷。六年,盜劉宸等擾畿甸,命銳與中官谷 與戰大敗, 身被傷, 、亡將印。

又再傳而明亡。 其所至貪墨,詔褫職逮問。 傳子江及漢。漢,嘉靖中掌南京左府,提督操江,改總督漕運。 卒,無子,從子恒嗣。卒,子暨嗣,萬曆中,掌中軍府事垂二十年。 未上,給事中楊上林劾

居三年卒。

贈太傅、諡威襄。

廷進彪官,勇亦進右都督。 總兵顏彪無將略,賊勢愈熾。 蹙,款塞來歸。 天順元年詔加同知,賜姓名。久之以兩廣多寇,命充遊擊將軍,統降夷千人往討。 和勇,初名脫脫孛羅,和寧王阿魯台孫也。阿魯台旣爲瓦剌脫歡所殺,子阿卜只俺窮 宣宗授以左都督,賜第京師。卒,勇襲指揮使,帶俸錦衣衞,積功至都督僉 旣而師久無功,言官劾文武將吏之失事者。 廣西巡撫吳禎殺降冒功,得優賞。彪效之,亦殺平民報捷。朝 韶停勇俸, 充爲事

官。

列

傅

第四

+

四

和 勇

羅秉

忠

親搗 石。 ;賊巢,縶其魁,誅其黨,還被掠男女四千人。 今輔巳封伯,而臣止進秩,惟陛下憐察。」 三年召督効勇營訓練。尋上言:「大藤峽之役,臣與趙輔同 成化初,趙輔、韓雍征大藤峽賊,詔勇以所部從征。 其冬,賊大破,進左都督, 功。 輔還京,餘賊復叛。 增祿百 臣

勇 性廉謹。 在兩廣時、諸將多營私漁利、勇獨無所取。 時論稱之。

十年卒。

諡武敏,世襲指揮使。

憲宗以勇再著戰功,特封靖安伯。

器,所以撫恤甚厚。 秉忠爲指揮使, 羅 秉忠,初名克羅俄領占,沙州衞都督僉事困即來子也。兄喃哥旣襲父職,英宗復命 協 理衞 喃哥卒,秉忠爲都指揮使,代領其衆 事。 旣而喃哥率千二百人內 .徙, 詔居之東昌、 平山二衞, 給田廬什

義伯。 都掌蠻,秉忠以遊擊將軍從。 番官多從之者。 南 征 一,即擢 英宗北狩,塞上多警。 十六年卒。 秉忠都督僉事,率所部援剿。 **秉忠亦坐下獄,籍其家。** 諡榮壯,子孫世指揮使。 朝議恐降人乘機爲變,欲徙之南方。 旣抵 永寧,分兵六道。 積戰功至左都督。 久之,上章自辯,乃得釋。 |東忠由|金鵝江進,大破之。 天順初,始賜姓名。 會貴州苗亂,都督毛福壽 成化 初,尚 書程信討山 論功,封順 曹欽之反,

奮,錫券受封,傳世不絕。 政日弛,火篩、俺答諸部騷動無寧歲。 遠圖,震耀威武,於是吳允誠、金忠之徒,率衆來屬,遂得列爵授任,比肩勳舊。 贊曰: 明興、諸番部懷太祖功德、多樂內附,賜姓名授官職者不可勝紀。 視夫陸梁倔强者,順逆殊異,不其昭歟! 盛衰之故概可考焉。 土木以還,勢以不競,邊 繼以成祖銳意 或以戰 功自

#### 校勘記

永樂二十年封安順伯 二十年,原作「二十二年」, 第二個「二」字行,據本書卷七成祖紀、卷一

〇六弧臣 .世表,太宗實錄卷一二四永樂二十年九月辛未條删。

= 贈渠國 元工部尚 公 書 渠國公,本書卷一○七功臣世表三作「梁國公」。 工部尚書,仁宗實錄卷六洪熙元年正月丁 丑條 作「兵部尚書」。

ष्ट्र 四 . 傳 至玄孫遵周 遵周,原作「遵用」,據本書卷一〇七30E世表、 小腆紀年附考卷四改。 按遵

周字鼎盟,名字相應。

五 中官喬來喜鄧誠等使西域 鄧誠,原作「鄧成」,據本書卷三三○西域傳、又卷三三一尼八剌國 配

傳、太宗實錄卷一一一永樂十六年八月戊寅條改。

CKJ 封會寧伯 本書卷三三〇西番諸衞傳作「會昌伯」。

「正統二年三月癸巳,有罪革爵」,與此不合。

(で)遂下英詔獄奪爵論死 傳繫奪爵於宣德七年,本書卷一○七功臣世表、英宗實錄卷二八均作

## 明史卷一百五十七

## 列傳第四十五

金純 張本 郭敦 郭 璡 鄭辰 柴車 劉中敷 孫機二〕

林鴞 張 鳳 潘榮 周瑄 子紘 夏時正 楊 鼎 翁世資 黄鎬 胡拱辰 陳俊

十一年出爲江西布政司右參政。 採木湖廣。 金純,字德修,泗州人。洪武中國子監生。 永樂七年從巡北京。 成祖卽位,以蹇義薦,召爲刑部右侍郎。 八年從北征,遷左侍郞。 以吏部尚書杜澤薦,授吏部文選司郎中。三 時將營北京,命

間,使大將軍徐達開塌場口,通河於泗,又開<u>濟寧西耐牢坡引曹、</u>鄆河水,以通中原之運。其 九年命與宋禮同治會通河,又同徐亨、蔣廷瓚濬魚王口黃河故道。 初,太祖用兵梁、晉

列

傳

第

四十

五.

金純

P3

閘

後故道 [寖塞,至是純疏治之。 自開封北引水達鄆城,入場場, 出穀亭北十里爲永通、

十 四年改禮部左侍郎。 越二月, 進尙書。 十五年從巡北京。 十九年同給事中葛紹

巡撫 宣德 四 ]]] 三年,純 仁宗卽位,改工部。 有疾,帝命醫視療。 居數月,又改刑 稍間,免其朝參,俾護疾 部。 明年兼太子賓客。 視 事。 會暑,敕法司 理滯 囚

純數從朝貴飲,爲言官所劾。 帝怒曰 純 以疾 不 朝 而 燕於私,可乎?」 命繫錦衣 獄。 既念純

老臣,釋之,落太子賓客。八月予致仕去。

勿論 純 純亦務寬大,每誠屬吏不得妄椎擊人。 在 刑部,仁宗嘗 諭 純 法司近尚 羅 織,言者輒以誹謗得罪, 故當純時,獄 無瘐死 甚無謂。 者。 正統 五年 自今告誹 卒 贈 謗

陽伯。

抗,爲守將 張本, 所 字致中 縛。 本 , 東阿 쬰 父老迎 人。 降。 洪武 中, 成 旭 自國 以 滁 子生授江都 泰二 知 州房吉、 知縣。 田 燕 慶 兵至揚州, 成 率先歸附, 御 命 史王 ·與本並 杉 據城 爲

揚

州

知府,偕見任

知府譚友德同

涖府事。

尋擢本江西布政司

右參政。

永樂四年召爲工部左侍郎。 坐事発官,冠帶辦事。 明年五月復官。 尋以奏牘書銜誤

左爲右,爲給事中所劾。帝命改授本部右侍郞而宥其罪

得無滯。會疾作,太子賜之狐裘冠鈔,遺醫馳視。十九年將北征,命本及王彰分往兩直隸、 七年、皇太子監國、奏爲刑部右侍郎。善摘奸。命督北河運。 躬自相視,立程度,舟行

山東、山西、河南,督有司造車挽運。明年即命本督北征餉。

納之,遂留行在兵部。 仁宗卽位,拜南京兵部尚書兼掌都察院事。召見,言時政得失,且請嚴飭武備。 帝嘉

五衞所,爲匠者暫役其一丁。若盡取以來,家以三四丁計之,數近十萬。軍伍旣缺,人情驚 宣德初,工部侍郎蔡信乞徵軍匠家口隸錦衣衞。本言:「軍匠二萬六千人,屬二百四十

駭,不可。」帝善本言。

請分牧於山東、河南及大名諸府。山東、河南養馬自此始。晉王濟熿坐不軌奪爵,本奉命 脫籍,而援平民實伍,言於帝。擇廷臣四出釐正之。時馬大孳息,畿內軍民爲畜牧所困。本 征漢庶人,從調兵食。庶人就擒,命撫輯其衆,而錄其餘黨。還以軍政久敝,奸人用貨

四年命兼太子賓客。戶部以官田租減,度支不給,請減外官俸及生員軍士月給。帝以

其護衞軍於邊鎭。

傅第四十五

張本

宜。 軍 四 十萬 還 一艱,不聽減,餘下廷議。 奏稱旨, 石,少者亦十萬石,儲侍頓充。 命兼掌戶部。 本等持不可,乃止。 本慮邊食不足,而諸邊比歲稔,請出絲 六年病卒,賜賻三萬緡,葬祭甚厚。 陽武侯薛祿城獨石諸戍成,本往計守禦之 麻 布 帛 輸邊易 穀,多者

賜之。 本 獨 廉 本案設陶器, 介有執持,尚 諭 刻 少恕。 曰:「卿號『窮張』,銀器無所用。」本頓首謝,其爲 錄高煦黨,脅從者多不免。 成祖宴近臣,銀器各 上知 如 此。 一案,因以

衢俗, 其禁。 郭 貧者死 敦,字仲厚,堂邑人。 弗 聽,疾 不葬, 亦 瘳。 輒 焚其屍。 洪武中, 以鄉舉入太學。 敦 爲厲禁, 且立義阡,俗遂革 授戶 、部主事。 禁民聚淫 遷衢州知府,多 祠 ō 敦疾、民勸弛 惠政。

御 史。 遷 河 南 左參 政,調 陝西。 十六年春,胡濙言敦有大臣體,擢 禮部右侍郎兼太僕寺卿,

偕給事中陶衎巡撫順天。二十年督北征餉。

在

衢

七

年

永樂初

,坐累徵,耆老數

百人伏闕乞留,不得。

後廷臣言敦廉正,召

補

監察

,

年 進尙書。 仁宗 卽 位 陝西旱, ,以大行喪不 命與隆平侯張信整飭庶務當行者, 齊宿,降太 僕 卿。 旋進 戸 部左侍 同三司官計 郎, 兼詹 議 事 奏行 府少詹事。 敦乃請蠲逋 宣德二

郭 敦 郭 瓔

列 傅

第四十五

王田之奪民業者,令民開荒不起科。 賦,振貧乏,考黜貪吏,罷不急之務,凡十數事。 建漕運議,民運至瓜洲、儀眞、資衞卒運至京。民甚 悉從之。歲餘,召還。在部多所興革,罷

便之。

不釋卷。六年,卒官,年六十二。 敦事親孝,持身廉。同官有爲不義者,輒厲色待之,其人悔謝乃已。性好學。公退,手

郭璡、字時用、初名進、新安人。永樂初,以太學生擢戶部主事。歷官吏部左、右侍郎。

仁宗卽位,命兼詹事府少詹事,更名璡。

以呂蒙正夾袋,虞允文材館錄故事。雖由是留意人才。識進士李賢輔相器,授吏部主事,後 楊士奇言恐璡不足當之,宜妙擇大臣通經術知今古者。帝乃止。 宣宗初,掌行在詹事府。吏部尚書蹇義老,輟部務,帝欲以璡代。璲厚重勤敏,然寡學 踰年,卒爲尚書。諭

命御史、知縣,皆聽京官五品以上薦舉。 **避雖長六卿,然望輕。又政歸內閣,自布政使至知府闕,聽京官三品以上薦舉。旣又** 要職選擢,皆不關吏部。正統初,左通政陳恭言:

果爲名相。時外官九年考滿,部民走闕下乞留,輒增秩復任。〕雖慮有妄者,請覆實。從之。

「古者擇任庶官,悉由選部,職任專而事體一。今令朝臣各舉所知,恐開私謁之門,長奔競之 風,乞杜絕,令歸一。」下吏部議。 ) 雖遜謝不敢當,事遂寢。

李庸等被劾者二十人。 正統六年,御史曹恭以災異請罷大臣不職者。 帝切責而宥之。 帝命科道官參議。 **) 選子虎受賂為人求官。 璡及尚書吳中、侍郞** 事覺, 御史孫

|毓等劾))進。

乃令雖致仕,而以王直代。

察之,盡得其踪跡。帝語方賓曰「是眞國家耳目臣矣。」 囚萬人。蜚語言役夫謗訕,恐有變,命辰往驗。 辰往廉之,具得誣狀。 鄭辰,字文樞,浙江西安人。 福建番客殺人,復命辰往。 永樂四年進士。 無實,無一得罪者。 止坐首惡,釋其餘。 授監察御史。 江西安福民告謀逆事,命 谷庶人謀不軌,復命辰 南京敕建報恩寺、役

皆感泣,復爲良民。 山海貸償之。辰曰:「山西民貧而悍,急之恐生變。不如緩之,使自通有無。」用其言,卒無 方以事朝京師,奏曰:「民苦徭役而已,請無發兵。」**帝然之。還則屏騶從,親入山谷撫諭。盗** 十六年超遷山西按察使,糾治貪濁不少貸。潞州盜起,有司以叛聞,詔發兵討捕。 禮部侍郎蔚綬轉粟給山海軍,辰統山西民輦任。 民勞,多逋耗,緩令即 辰

逋者。 丁內艱歸,軍民詣御史乞留。御史以聞,服闋還舊任。

蹇義等薦九人。獨辰及邵玘、傅啓讓,帝素知其名,卽眞授,餘試職而已。 宣德三年召爲南京工部右侍郎。初,兩京六部堂官缺,帝命廷臣推方面官堪內任者。

逐寢。 時河堤決,即命辰伺便修塞。或議自大名開渠,引諸水通衞河,利灌輸。辰言勞民不便,事 布政使周璟居妻喪,繼娶。辰劾其有傷風敎,璟坐免。正統二年,奉命振南畿、河南饑。行 英宗卽位,分遣大臣考察天下方面官。辰往四川、貴州、雲南,悉奏罷其不職者。 遷兵部左侍郎,與豐城侯李彬轉餉宣府、大同。鎭守都督譚廣撓令,劾之,事以辦。

喪,資遣其妻子。 辰爲人重義輕財。初登進士,產悉讓兄弟。在山西與同僚杜愈事有違言。杜卒,爲治

八年得風疾,告歸。明年卒。

柴車、字叔輿、錢塘人。永樂二年以舉人授兵部武選司主事、歷員外郎。八年、帝北征、

坐事,左遷兵部郎中,出知岳州府,復入爲郎中。

從尚書方賓扈行。還遷江西右參議。

傳第

四十五

鄭辰

柴車

宣德五 年擢兵部 侍郎。 明年,山西巡按御史張勖言大同屯田多爲豪右占據,命車往

按。得田幾二千頃,還之軍。

直。 冒如能者,實繁有徒,臣方次第按覈。 寇涼州,副總兵劉廣喪師,不以實聞, 以待之。了朝廷雖從能請,然嘉車賢,遣使勞賜之。 岷州土官后能冒功得陞賞,車奏請加罪。 初,西鄙不靖。以車廉幹,命協贊甘肅軍務。 今宥能,何以戢衆? 顧飾功要賞。 能復請,命宥之。 車劾其罪。 **調軍給餉,悉得事宜。** 若無功得官, 車反覆論其 械廣至京,賜車金幣,旌其 則捐軀死敵者, 不可, 初,杂兒只伯 曰:「詐 何

益堅。 長來 河間 德州。 歸,未幾叛去。 正統三年,以破朶兒只伯功,增俸一 嘗建言:「漠北降人,朝廷留之京師,雖厚爵賞,其心終異。 帝報可。 今乃復來,安知他日不再叛,宜徙江 後降者悉以此令從事。 級。 在邊、章數十上、悉中時病。同事多不悅、車持 稽覈. 屯田豪占者,悉清出之,得六百餘頃。 南,離其黨類。」 如長脫脫木兒者,昔隨其 事 下兵部,請處之

代出鎭。 四年進兵部尚書,參贊 及 類病甚,詔遣大理寺少卿程富代翼,而命車歸治疾。 (如故。 尋 命 兼理陝西屯田。 明年召還,命與僉都御史曹翼歲更 未及行,六年六月卒。

日,「公不 知故人矣」,却不受。 同事邊塞者多以宴樂爲豪舉。 車惡之,遂斷酒肉。 其介特

廣信守,故人也,

飽蜜

罌。

發視之,

乃白金。

多此類。

車在

江西

時,以採木入閩,經廣信。

宗監國 劉 一命署 中敷,大興 部事,賜今名,遷江西右參議。 人,初名中学。 燕王舉兵,以諸生守城功,授陳留丞。 宣德 三年遷山東右參政,進左布 擢工部員外郎。 政 使。 質直 廉 仁

靜,吏民畏懷。歲大侵,言於巡撫,減賦三之二。

侍郎吳璽等,下獄,釋還職 **振假以立威,**屢摭大臣 正統改元,父憂奪情,俄召拜戶部尚書。 一小過, 導帝 用重典, 大臣下吏無虛歲。 帝沖年踐阼,慮羣下欺己,治尙嚴。 三年諷給 事御史劾中敷 而中官 與 左 王

**壓及右侍郎** 六年,言官劾中敷專擅。 陳瑺請以供御牛馬分牧民間。 韶法司於內廷雜治。 言官劾其變亂成法, 當流,許輸贖。 並下獄論 帝特宥之。 斬。 其冬,中敷、 韶 荷校長

門外, 以 母病 凡十六日 ,特許歸省。 而釋。 明年冬,當決囚, 瓦剌入貢,詔問馬駝芻菽數,不能對, 法司以請。 命璽、瑺戍邊、中敷俟母 復與璽、 瑺論 終具奏。 斬 繋獄。 中 敷

宜撙節以備 景帝立,起戶 緩急。 部左侍郎 帝 嘉納。 兼太子賓客。 景泰四年卒。 時方用兵,論功行賞無虛日。中敷言府庫財有限, 贈尙書。

爲民。

列傳第四十五 劉中敷

中敷性淡泊、食不重味、仕宦五十年、家無餘貲。

子璉,正統十年進士。授刑科給事中,累官太僕寺卿。 耻華靡,居官剛果。 左遷遼東

苑馬寺卿,卒。

機即召任之,昂以無朝命辭。 <del>其</del>膽識。 乞歸。 起南京兵部尚書,參贊機務。流賊犯江上,衆議擇將。 子機、幼有孝行。成化十四年進士。改庶吉士。 致仕歸,卒。 機曰:「機奉敕有云,『敕所不載,聽便宜』。此卽朝命也。」衆服 正德中,代張綵爲吏部尚書,以人言 適都督李昂自貴州罷官至,

進士。授刑部主事。讞江西叛獄,平反數百人。 張鳳,字子儀,安平人。父益,官給事中。永樂八年從征漠北,歿於陣。鳳登宣德二年

明年 乞運龍江倉及兩准鹽於鎭遠府易米。 鳳以龍江鹽雜泥沙, 不堪易米給軍, 盡以准鹽予之, 命提督京倉。六年改戶部,尋調南京。適尚書久闕,鳳遂掌部事。 正統三年十二月,法司坐事盡繫獄,遂擢鳳本部右侍郎。以主事擢侍郎,前時未有也。 貴州奏軍衛乏糧,

然後以聞。 帝嘉賞。 又言留都重地,宜歲儲二百萬石,爲根本計。 從之, 遂爲令。 南京 糧

儲,舊督以 都御史。 十二年冬命鳳 兼理。 廉謹善執法、號「板張」。

者非之。 停征, 息, 租,不惟永絕爭端,亦且少助軍國。」報可。 以災傷蠲賦 日:「國初都江南,轉輸易。 而災傷特甚,帝屢詔寬恤。 景泰二年進尙書。 或 用 何 多,國 以取 用益詘,乃奏言:「國初天下田八百四十九萬餘頃,今數旣減半,加以水旱 給。 京畿及河南、山東無額田, 四年改兵部,參贊軍務。 今居極北,可守常制耶。」 鳳偕廷臣議上十事。 給事 中 戶部尚書金濂卒,召鳳代之。 成章等劾鳳擅更祖制,楊穟等復爭之。帝 甲方墾闢,乙卽訐其漏賦。 四方報凶荒者, 明年復先後議 上八事。 鳳請令御史勘實。 咸報可。 請準 時四方兵 輕 則 征 鳳

英宗復辟,調南京戶部,仍兼督糧儲。五年二月卒。

斥<u>鳳</u>過,及爲鳳屬官猶然。 鳳有孝行。 性淳樸。 故人死,聘其女爲子婦,敎其子 鳳待之如初。 聞其貧,卽賙給之。 而養其母終身。 同學友蘇洪好

周瑄,字廷玉 列 傳 第 四 + 一,陽曲 Ŧi. 張 鳳 由鄉 周 舉 瑄 入國學。 正統中,除刑部主事,善治獄。 四二九七 十三年遷員外

郎。 受財縱 明年,帝北征。 盜,以警人代。 郎中當扈從者多託疾,瑄請行。 **瑄辨雪之,抵校尉罪。外郡送囚,一日至八百人。** 六師覆沒, 瑄被創歸, 擢署郎中。 瑄慮其觸熱,三日 校尉

決遣之殆盡

部事。 坐者三千人,皆白其誣,獨械首從一人論罪。及是居部,與瑄並稱長者。 屬吏不敢欺。 大獄。 十六萬五千,給牛種各萬餘,奏行利民八事。事竣還,明年轉左。帝方任門達、逯杲,數與 復位。 景泰元年,以尙書王直薦,超拜刑部右侍郎。 暄委曲開論,多所救正,復飭諸郎毋避禍。以故移部定罪者,不至冤濫。 有司請召還。不聽。 意主寬恕,不爲深文。 復賜敕,令便宜處置。 同佐部者安化孔文英,爲御史時按黃巖妖言獄,當 久之,出振順天、河間饑。 瑄遍歷所部,大舉荒政,先後振饑民二 七年命瑄署掌工 未竣,而英宗 官刑部人,

無失期者。 令諸司事不須勘者,毋出五日,獄無滯囚。暑疫,悉遣輕繫者,曰:「召汝則至。」囚歡呼去**,** 奸者數輩,宿弊爲淸。 瑄恬靜淡榮利。 成化改元,爲侍郎十六年矣,始遷右都御史。 鳳陽、潍、徐饑,以瑄言發廩四十萬以振。久之,遷南京刑部尙 督理 南京糧儲,捕懲作

爲尙書九載,屢疏乞休。 **人之乃得請。** 家無田園,卜居南京。卒,贈太子少保,諡莊懿。

長子經,尚書,自有傳。 次子紘,進士,爲南京吏科給事中。 兩以災異言事。 帝並嘉

納。 楊鼎,字宗器,陝西咸寧人。家貧力學,舉鄉會試第一。 未幾,與御史張昺閱軍,爲中官蔣踪誣奏,貶南京光祿署丞。 正統四年,殿武第二。 仕終山東參議。 授編

帑,而以他稅物充武臣俸。 聽。 備、通漕三邊二事。 景泰三年進侍講兼中允。 五年超擢戶部右侍郎。 三年冬以陪祀陵寢不謹下獄,贖杖還職。帝嘗命中官牛玉諭旨,欲取江南折糧銀實內 同輩誚其迂,鼎益自信。也先將寇京師,詔行監察御史事,募兵兗州。 ' 鼎不可。馬牛芻乏,議徵什二,又以民艱力沮。 天順初轉左。 陳汝言譖之。 皆報罷。 七年,

修。

久之,與侍講杜寧等十人,簡入東閣肄業。

鼎居侍從,雅欲以功名見。嘗建言修飭戎

患流民。 生變,置之有後憂。 成化四年代馬昂為戶部尚書,而以翁世資爲侍郎。 然寇害止邊塞,流民則疾在腹心。漢中僻居萬山,襟喉川蜀,四方流民數萬,急之 請暫設監司一人,專領其事。 其願附籍者聽之,不願者資遣。 六年, 鼎疏言:「陝西外患四寇, 內 兼與守

**尙書年富有疾,詔鼎掌部事。** 

列

傳第

臣 庫貯銀布,易米備災。 練 鼎議上贖罪、中鹽、折鈔、徵逋六事行之。由是諸倉有儲蓄。尋加太子少保。 士馬,修城池,庶 可弭他日患。」詔從之。湖廣頻歲饑,發廩已盡,及是有秋,用鼎言,發 淮、徐、臨、德四倉,舊積糧百餘萬石,後**餉乏民饑,輒請移用,**粟且

馳驛歸,命有司月給米二石,歲給役四人,終其身。大臣致仕有給賜,自鼎始也。卒,贈太 鼎居戶部,持廉,然性頗拘滯。十五年秋,給事御史劾鼎非經國才,鼎再疏求去。 賜敕

子時陽,進士,累官侍講學士。 多識典故,有用世才。時敷,舉人,廬墓被旌,官兵部

司務。

子太保,諡莊敏。

饑,發倉儲五十餘萬石以振,撫流亡百六十二萬人。召爲戶部右侍郎,佐鼎。久之,代薛遠 **資,遂下詔獄,謫衡州知府。成化初,擢江西左布政使。坐事下吏,尋得白。 大軍征兩廣,** 書趙榮、左侍郎霍瑄難之,世資請身任其咎,乃連署以諫。帝果怒,詰主議者。榮等委之世 轉江西餉,需十萬人,世資議齎直就易嶺南米。 四年命中官往蘇、松、杭、嘉、湖增織彩幣七千匹。世資以東南水潦,民艱食,議滅其半。尚 翁世資者,莆田人。 正統七年進士。除戶部主事,歷郞中。 民得不擾。以右副都御史巡撫山東。歲 天順元年拜工部右侍郎。

喉,無平越是無貴州也。」乃偕諸將固守。 置密疏竹筒中,募土人間行乞援於朝,且刻驥等 覆師狀。 軍大敗。 食之,死者相枕籍,城卒全,鎬功爲多。復留按一年。久之,遷廣東僉事,改浙江。 十四年按貴州。 黃鎬,字叔高,侯官人。正統十二年以進士試事都察院。未半歲,以明習法律授御史。 鎬赴平越,遇賊幾死。夜跳入城,賊圍之。 景帝命保定伯梁珤等合川、湖軍救之,圍始解。 羣苗盡叛,道梗塞。靖遠伯王驥等自麓川還,軍無紀律,苗襲其後,官 議者欲棄城走,鎬曰:「平越,貴州咽 城被困已九月,掘草根煮弩鎧而

政使。 成化初,以大臣會薦,擢廣東左參政。高、雷、廉負海多盜,鎬討平之。再遷廣西左布 以右副都御史總督南京糧儲,歷吏部左、右侍郎。 十六年拜南京戶部尚書。

有才識,敏吏事,理鹽政,多所釐剔,時論稱之。十九年致仕,道卒。贈太子少保,諡

<del></del>裁 敏。

鎬

列

胡 拱 辰,字共之,淳安人。 正統四年進士。 爲黟縣知縣,有惠政,擢御史。 疏陳時弊八

父艱 歸

貴州 至畢節,平宣慰使隴富亂,威行邊徼。 左參政。 景帝卽位、詔科道官憂居者悉起復。拱辰至,屢疏以選將、保邦、修德、弭災爲言,出爲 白水堡仡佬頭目沈時保素梗化,拱辰言於總兵官方瑛遣將擒之。 一方遂寧。

母憂去,御史追劾其受賕事,下浙江按臣執訊。事白,

調廣東。 歷廣西、四川左、右布政使,皆有平寇功。

皆便之。以年至乞歸。 崔恭等請册立,言甚切。其年復就改左副都御史總理糧儲,就進工部尙書。 成化八年拜南京右副都御史,提督操江。十一年就遷兵部右侍郎。 儲位虛久,與尚書 節財省事,人

詔 三年正月卒。 有 司月給廩二石,歲隸四人。正德元年,年九十,遣行人齎敕存問,賚羊酒,加賜廩、隸。 弘治中,巡按御史陳銓言:「拱辰退休十餘年,生平淸操如一日,乞加禮異以勵臣節。」 贈太子少傅,諡莊懿。

陳俊,字時英,莆田人。 舉鄉試第一。正統十三年進士。除戶部主事。 督天津諸衛軍 列 傅 第 14 + 五 胡 拱 辰 陳 俊 採草,奏減新增額三十五萬束。 豪猾侵蘇、松改折銀七十餘萬兩,俊往督,不數月畢輸。 尙

書金 濂以 爲能,俾典諸曹章奏。 歷郎中。

興賴以無乏。 天順 五年,兩廣用兵,俊督餉。 母喪,不 聽歸,蠻平始還。 時州縣殘破,帑藏殫虛,弛鹽商越境令,引加米二斗,軍 初,慘爲主事,奔父喪,賻者皆却之。 至是文武將

**吏醵金賻,亦不納。** 

河南 吏部左、右侍郎。 險遠,轉輸難,乃發金於內地市易,修西安、韓城、同官徑道,以利飛輓。 六錢,豪猾乘時射利。 餉,奏請遝至,裁決咸當,尚書楊鼎深倚之。 、山、陝,會巡撫諸臣畫芻餉,發帑金二十萬助之。 成化 初,擢南京太常少卿。 俊請糴以升斗爲率,過一石勿與,饑民獲濟。 四年召拜戶部右侍郎。 京師大饑,先後發太倉粟八十萬石平糶。 俊以邊庾空竭,歲又不登,而 俊練習錢穀。 尋議用兵河套,敕俊 四方災傷,邊鎭急芻 還朝,進俸一 楡林道 級,歷 石 丰 値

切。 遠後,繼以俊,遂爲定制。 帝多采納。 九載滿,拜南京戶部尚書。 而權倖所不便者,終格不行。明年乞致仕。 久之,就改吏部。 尋改兵部,參贊機務。 二十一年,星變,率九卿陳時弊二十事,皆極痛 先是,參贊之任,不專屬兵部, 詔加太子少保, 賜敕馳傳還 自醉

卒, 諡康懿。

林鶚,字一鶚,浙江太平人。景泰二年進士。 授御史,監京畿鄉試。 陳循等計考官,鶚

邑子林挺預薦,疑鶚有私,逮挺考訊。 挺實無他,得白。

意。 鶚感激,革弊舉廢,治甚有聲。漕故經孟瀆,險甚。 英宗復辟,傲先朝故事,出廷臣爲知府,鶚得鎭江。 巡撫崔恭議鑿河,自七里港引金山 召見,賜膳及道里費, 諭 所 以 擢 用

舟。 上流 通丹陽避之。鶚言:「道里遠,多石,且壞民廬墓。 春夏啓閘,秋冬度壩,功力省便。」恭從其議,遂爲永利。居五年,以才任治劇,調蘇州。 請按京口閘、甘露壩故迹,濬之令通

兵禦之,遁去。廣信妖賊妄稱天神惑衆,捕戮其魁,立解散。 成化初,超遷江西按察使。有犯大辟賄達官求生者,鶚執愈堅。 歷左、右布政使。 廣東寇剽贛州急。 歲饑,奏減 調

民租十五萬石。

成化六年擢南京刑部右侍郎。 母憂服除,召爲刑部右侍郎。 執法不撓。 十二年得

疾卒。

紀其喪。 鶚 事 鶚在蘇州,先聖像剝落。 母孝謹,對妻子無惰容。 鶚曰:「塑像,非古也,昔太祖於國學用木主。」命改從之。 不妄交與,公餘輒危坐讀書。 殁不能具棺斂, 友人為經

潘榮,字尊用,龍溪人。正統十三年進士。 犒師廣東,還,除吏科給事中。

此令一下,廷臣喪氣,以言爲諱。 巨寇陸梁,塞上多事,奈何反塞言者路。 要,莫切於納諫。比以言者忤聖意,諭禮部,凡遇建言,務加審察,或假以報復,具奏罪之。 景泰初、疏論停起復、抑奔競數事。 帝納之。 尋進右給事中。 國家有利害,生民有得失,大臣有奸慝,何由 望明詔臺諫,知無不言,緘默者罪。 四年九月上言:「致治之 並敕閣部大 而 知?况今

臣,勿搜求參駁,虧傷治體。」疏入,報聞。

黑,豈非應天之道有未盡歟。夫人君敬天,不在齋戒祈禱而已。政令乖宜,下民失所,崇尙 下日御便殿,召大臣極陳缺失而釐革之,庶災變可弭。」時萬妃專寵,羣小夤緣進寶玩,官賞 珍玩,費用不經,後宮無序,恩澤不均,爵濫施於賤工,賞妄及於非分,皆非敬天之道。 見。陛下降詔自責,躬行祈禱,詔大臣盡言,宜上天感格。而今乃風霾晝晦,沴氣赤而 冗濫,故榮等懇言之。 天順六年使琉球,還,遷都給事中。 帝不能用。是年遷南京太常少卿。 成化六年三月偕同官上言:"近雨雪愆期,災異迭 願陛 復

等言:「近禁勢家中鹽,詔旨甫頒,而陽 十七七 況 一,所 |頻年水旱,國用未充,所請不可許。」事乃寢。 年召爲 叉七年, 司 輒 滅歲祿, 非祖宗報功意。 戶部左侍郎,尋署部 就 擢 戶部右侍郎。 事。 尋改右副都御史、總督南京糧儲。 英國公張懋等四十三人自陳先 等輒違犯,宜正其罪。」帝爲切責陽等。 中官趙陽等乞兩淮鹽十萬引 世以大功錫爵,子 積奇羨數萬石以備荒。 功何以勸賞? 帝已許之。榮 孫承

七十有八。 南 京 戶 部尚 贈太子太保。 書黃鎬罷,以榮代之。 孝宗嗣位、謝政歸。 賜月廩、歲夫如制。 九年卒,年

之, 然後 出 死 且推行 時正 以 罪六十餘 夏時正, 聞。 叉言:「 之天 因言:「凡 字季爵,仁和人。 人。 F 通 番 中 福建減 及 有減死、 劫 盜 |諸獄,以待 死囚,俱 詔 正統十年進士。 充所 宜戍之北方。」 在濱海衞 會讞, 淹引 軍者, 除刑部主事。 ,時月, 法司 時正慮其入 是其言, 囚 多 瘐 景泰六年以郎 死。 海 而請治 島爲 請 令所 變, 違詔罪。 司 轉 中錄囚福 斷 發 決。」 之山 帝特 詔 東 從

天順初,擢大理寺丞。 **外之,以便養,遷南京大理少卿。** 成化五年遷本寺卿。 明年春

濱江 錄彈章示之,遂乞休歸。 命巡視江西災傷。 [堤及豐城諸縣陂岸,民賴其利。 除無名稅十餘萬石,汰諸司冗役數萬,奏罷不職吏二百餘人,增築南昌 僦居民舍,布政使張瓚爲築西湖書院居之。 嘗上奏,不具齎奏人姓名,吏科論其簡恣。 家食三十年,年近九 帝宥其罪,

時正 雅好學。 閒居久,多所著述,於稽古禮文事尤詳。 ·而卒。

廉事,周瑄 贊曰:金純等黽勉奉公,當官稱職。 之治獄,皆有仁人之用心,君子哉。 加之禔躬清白、操行無虧,固列卿之良也。 鄭辰之

校勘記

孫機 原作「子機」。 按本傳,中數子璉,璉子機,明史稿傳四七劉中數傳同,據改。

.\_ \_ 正統二年 正統二年六月乙亥條改。 奉命振南畿河南 饑 正 統二年,原作「正統元年」, 據本書卷一〇英宗紀、英宗實錄卷

## 明史卷一百五十八

## 列傳第四十六

黄宗載 顧佐 邵玘 陳勉 賈諒 嚴升 段民 吾紳

章敞 徐琦 劉戩 吳訥 朱與言 魏驥 魯穆

耿九疇 軒軦 陳復 黃孔昭

黄宗載,一名屋,字厚夫,豐城人。 洪武三十年進士。授行人。奉使四方,未嘗受餽遺,

累遷司正。

|載榜數其罪,曰:「不改,必置之法。」衆莫敢犯。 己,男女至年四十尙不婚。宗載以理諭之,皆解悟,一時婚者三百餘家。 永樂初,以薦爲湖廣按察司僉事。 巨奸宿猾,多謫戍鲖鼓、五開間,陰持官吏短長。 武陵多戎籍,民家慮與爲婚姻,徭賦將累 鄰邑效之,其俗遂 宗

列

傳第

四十六

黄宗

載

變。 駕北征,徵兵湖廣,使者貪暴失期。 徵詣文淵閣修永樂大典。 書成,受賜還任。 宗載坐不舉劾,謫楊靑驛驛夫。 董造海運巨艦數十艘,事辦而民不

者,巡按御史及兩司覈實舉按以聞。」帝是之。及歸,行李蕭然,不攜交阯一物。尚書黃福語 方者,皆不善撫字。 人曰:「吾居此久,所接御史多矣,惟宗載知大體。」丁祖母憂,起復,改詹事府丞。 尋起御史,出按|交阯。時|交阯新定,州縣官多用 宗載因言:「有司率不稱職。 若俟九年黜陟,恐益廢弛。 兩廣、雲南舉人及歲貢生員之願仕遠 請任二年以

居九年,乞休。 江。 復職,而吏部不言,爲御史所劾, 三年督採木湖 洪熙元年擢行在吏部侍郎。 章四上,乃許。 湘。 英宗初,以侍郎羅汝敬巡撫陝西,坐事戴罪辦事。 九年七月卒於家,年七十九。 宗載及尚書郭璡俱下獄。 少師蹇義領部事,宗載一輔以正。 未幾,得釋,遷南京吏部尚書。 宣德元年奉 汝敬妄引 命清 軍浙

宗載持靡守正,不矯不隨,學問文章俱負時望。 公卿大夫齒德之盛,推宗載云。

顧佐,字禮卿,太康人。 建文二年進士。 除莊浪知縣。 端陽日,守將集官僚校射,以佐

文士,難之。

持弓矢一發而中,守將大服。

畏服,人比之包孝肅。北京建,改尹順天。權貴人多不便之,出爲貴州按察使。洪熙元年 慶遠蠻,督採木四川,從北征,巡視關隘。遷江西按察副使,召爲應天尹。 永樂初,入爲御史。七年,成祖在北京,命吏部選御史之才者赴行在,佐預焉。 剛 直不 撓,吏民 奉命招

召爲通政使。

束諸御史。 爲佐所奏,且言暟謀害己。詔戮暟於市。帝北巡,命偕尙書張本等居守。還復賜敕,令約 舉進士鄧棨、國子生程富、謁選知縣孔文英、教官方瑞等四十餘人堪任御史。帝使歷政三月 送東部補選。。 佐視事,即奏黜嚴瞪、楊居正等二十人,謫遼東各衞爲東,降八人,罷三人;而 爲京尹,政淸弊革。帝喜,立擢右都御史,賜敕獎勉,命察諸御史不稱者黜之,御史有缺,舉 而後任之。 宣德三年,都御史劉觀以貪被黜,大學士楊士奇、楊榮薦佐公廉有威,歷官並著風采, 於是糾黜貪縱,朝綱肅然。 居正等六人辨愬。帝怒,幷諸爲吏者悉戍之。旣而暟自戍所潛還京,脅他賄,

下法司治。」士奇對曰:「細事不足干上怒。」帝乃以吏狀付佐曰:「汝自治之。」佐頓首謝,召 帝知之,故增中朝官俸。」帝歎曰:「朝臣貧如此。」因怒訴者曰:「朕方用佐,小人敢誣之,必 俸薄,僕馬薪芻資之隸,遣隸半使出資줲役。隸得歸耕,官得資費,中朝官皆然,臣亦然。先 居歲餘,姦吏奏佐受隸金,私遣歸。帝密示士奇曰:「爾不嘗舉佐廉乎。」對曰:「中朝官

列傳

曰:「此必重囚敎之。」命法司會鞫,果千戶臧淸殺無罪三人當死,使人誣佐。帝曰:「不誅淸, 吏言:「上命我治汝,汝改行,吾當貸汝。」帝聞之益喜,謂佐得大體。 或告佐不 理冤訴。 帝

已,入見。帝慰勞之,令冤朝賀,視事如故。 八年秋,佐有疾,乞歸。 不許。以南京右都御史熊概代理其事。 踰年而概卒。 佐疾良

則佐法不行。」磔清於市

之。入內直廬,獨處小夾室,非議政不與諸司羣坐。 **并切責佐。佐上章致仕去。** 尚書郭璡亦言宗不應與在任者同考。帝遂責佐。而御史張鵬等復劾宗微過。帝以鵬朋欺 佐孝友,操履清白,性嚴毅。 正統初考察御史不稱者十五人,降黜之。 賜敕獎慰,賚鈔五十貫,命戶部復其家。十一年九月卒。 每旦趨朝,小憇外廬,立雙藤戶外。百僚過者,皆折 邵宗九載滿,吏部已考稱,亦與焉。 人稱爲「顧獨坐」云。然持法深,論者 宗奏辨, 旋避

時零都陳勉、嶧縣賈諒先後爲副都御史,與佐同舉臺職,而蘭谿邵玘官南京,與佐齊

名,繁昌嚴升名亦亞於迅。

以爲病。

田,字以先,水樂中進士。 授御史。 仁宗監國,知其廉直。每法司缺官,即命旺署,有重

點御史不職者十三人,簡黜諸司庸懦不肖者八十餘人,風紀大振。居二年,以疾卒官。玘負 獄輒付之。 歷仕中外, 所過人不敢犯。 宣德三年由福建按察使入爲南京左副都御史。奏

氣,好侮同列,治獄頗刻深。然持身廉潔,內行修,專母以孝聞

卒。勉外和內剛,精通法律,吏不敢欺。 起,命勉撫之,招徠三千六百餘人,亂遂定。景泰初,仕至南京右都御史,掌院事。[1]致仕, 陳勉,與玘同年進士。仁宗初,以楊士奇薦,由廣東副使擢左副都御史。信、豐諸縣盜

清軍侍郎金庠受賄,罷之。郎中胡珏、蕭翔等十一人,御史方鼎三人,以不職被劾。帝未信, 四年還至德州,卒。諒內行修,當官有風采。 假。正統二年,江北、河南大水,命諒及工部侍郎鄭辰往振。 芒、碭山盜爲患,諒捕獲甚衆。 副都御史。偕錦衣指揮王裕、參議黃翰、中官張義等巡視四川、江西、湖廣,按治豪强不少 命諒及張居傑密察之。得實,悉貶官。明年又劾陽武侯薛祿朋比不敬,廷中肅然。尋拜右 賈諒,字子信。永樂中由鄉舉入太學,選侍皇太孫說書,擢刑科給事中。 宣德四年劾

殿升、建文時進士。歷官大理寺右少卿。清軍蘇、松、執法不撓。 剛果自信,嘗著純羊賦以見志焉 調南京僉都御史,與

段民,字時舉,武進人。永樂二年進士。 選庶吉士。 與章敞、吾紳輩俱讀書文淵閣,又

俱授刑部主事。民旋進郞中。

Ш 東 妖婦唐賽兒作亂,三司官坐縱寇誅,擢民左參政。 當是時索賽兒急,盡逮山東、北

原尼及天下出家婦女,先後幾萬人。 民力爲矜宥,人情始安。

還, 敕與巡按御史考所過府縣吏廉墨以聞 車駕 北征,餉舟由濟寧達潞河,陸輓出居庸至塞外。 民深計曲算,下不擾而事集。

旣

十惡 罪,而 治聞。 有未安,請更擬。」帝是之。帝以民廉介端謹,特賜敕,令考察南京百官。 人。 外並 宣德三年召入京,命署南京戶部右侍郎,踰年實授。 .越訴禁甚嚴,犯者戍遼東。民上言:「依定例,卑幼之罪得贖,而尊長反遠竄,揆於 民至,紀綱修舉,宿弊以革。上元人有爲姪歐者,憤甚,詣通政司告。時方令納米贖 民自陳狀,給事中年富等劾民。 減 等。 有重囚三十餘人,例不得赦,民亦減其罪。 帝知民賢,不問 又明年改刑部。 後有旨報決,乃復追還,而 八年,詔書罪囚 初,二部皆以不 逃 自 理

化 間,葉盛請褒卹不果。 九 年二月卒於官,年五 其後百有餘年,始追諡襄介。 十九。 貧不能 險,都御史吳訥稅以衣衾。 帝聞,命有司營葬。成

考察兩廣、福建方面官。有故人官參政,素貪黷,權要多爲之地。紳至,竟黜之,時稱其公。 「紳出自翰林,可佐卿典禮矣。」旣而爲懷所擠,出爲廣凍參政。尋召爲南京刑部侍郎,奉敕 吾紳,字叔縉,衢州人。官刑部主事,治獄有聲。歷郎中,拜禮部侍郎。成祖謂呂震曰:

納淸强有執,澹於榮利。初拜侍郎,賀者畢集,而一室蕭然,了無供具,衆笑而起。

復改禮部。正統六年卒於官。

詞色異者一人,餘悉遣出。明日訊之,留者盜,餘非也。遷郞中,改吏部。 章敞,字尚文,會稽人。由庶吉士授刑部主事。山西盜發,捕逮數百人。敞察其冤,留

付貢使。及關、悉閱貢物、封其贐、付關吏。利死、子麟嗣、敞復奉詔往、却贐如初。 使者,所以尊朝廷,奚白爲。」利聽命,趨拜下坐。噉以聲色,不爲動。還致厚贐,不受,利以 宣德六年擢禮部侍郎。偕徐琦使安南,命黎利權國事。利遣人白相見禮,敞曰:「汝敬

年十二月卒。子瑾亦累官至禮部侍郎。 正統初、纂洪武以來條格,使諸司參酌,更無能爲奸。尚書胡濙寬大,敞佐以嚴肅。

列傳第四十六 段民 章敞

復往。 落琦戍籍,宴賚甚厚。 南,亦不受餽。還拜南京兵部右侍郎。 進士。授行人,歷兵部員外郎。 徐琦,字良玉。先世錢塘人,其祖謫戍寧夏,遂家焉。 時黎利已死,其子麟疑未決。 明敏有斷,居官務持大體。 琦曉以禍福,麟懼,鑄代身金人,貢方物以謝。帝悅,命 八年,帝以安南貢賦不如額,南征士卒未盡返,命琦 幼力學,通經史。 宣德六年擢右通政。 永樂十三年舉 副敞使安

測。」事得寢。 屬悉宜北徙,朝議欲行之。 事。 悉嘉納。 正統初,與工部侍郎鄭辰考察南畿有司,黜不法者三十人。時災異屢見,琦陳弭災十 五年命參贊南京機務。十四年進尚書,參贊如故。 軍衞無學校,琦請天下衞所視府州縣例皆立學。從之。 琦奏:「安土重遷,人之情也。 今驟徙數萬衆,人心一搖,事或回 有言往年分調南京 軍家

諡貞襄。 景泰元年,靖遠伯王驥贊機務,琦專理部事。 驥解任,琦仍參贊。 四年三月卒,年六十

敞、琦皆以使安南不辱命著稱。 安南多寶貨,後使者率從水道挾估客往以爲利, 交人

頗輕之。

列傳第四十六

吳訥

交一語,越宿卽行,餽遺一無所受。使人要於途,固致之,卒麾去,與敞、琦皆爲咬人所重。 弘治時,侍講劉戩往頒詔,由南寧乘傳抵其國,交人大驚。 

戬,字景元,安福人。

吳訥,字敏德,常熟人。父遵,任沅陵簿,坐事繫京師。尉上書乞身代。事未白而父歿,

訥威奮力學。

永樂中,以醫薦至京。仁宗監國,聞其名,命敎功臣子弟。成祖召對稱旨,俾日侍禁

廷,備顧問。

年七月,進南京右僉都御史,尋進左副都御史。 即冤不得越告。從之。繼按貴州,恩威幷行,蠻人畏服。將代還,部民詣闕乞留。不許。五 出按浙江,以振風紀植綱常爲務。時軍犯逃者,往往令家人妄愬,逮繫至千人。酌請嚴禁, 洪熙元年,侍講學士沈度薦訥經明行修,授監察御史。敬愼廉直,不務矯飾。 宣德初,

正統初,光祿丞董正等盜官物,訥發之,謫戍四十四人。 右通政李畛者,奉使蘇、松,行

事多不謹 而釋之。 英宗初御經筵,錄所輯小學集解上之。 訥微誠之, 畛不悅, 誣訥稽延詔書等事。 四年三月,以老致仕,以朱與言代。 訥疏辯。 互爲臺省所劾,俱逮下獄,旣

之言偃祠 環堵蕭然。 訥 博覽,議論有根柢。 周忱撫江南,欲新其居,不可。 於性理之奧,多有發明,所著書皆可垂於後。 家居十六年而卒,年八十六。 歸家, 諡文恪,鄉人祀 布衣蔬食,

京師 盜起 方廉慎,爲政務大體。 ,境內以 ,督吏目熊鼎斬六十餘人,賊勢遂衰。 朱與言,字一鶚,萬安人。 寧。 正統元年召爲南京右副都御史,入代訥領院事。 數建白,多切時弊。 永樂九年進士,授湖廣按察僉事。 家居門庭淸肅,鄉人有不善,惟恐與言知之。 事聞,擢鼎合州同知。 雅州 宣德中遷四川副使。合州 年老致仕,卒。 妖 入 爲亂,與言 與言剛 執送

生感奮,多成就者。 魏 驥,字仲房,蕭山人。 召修永樂大典。 永樂中,以進士副榜授松江訓導。 書成,還任。 用 師達薦,遷太常博士。帝謂曰:「劉履節 常夜分攜茗粥勞諸生。

爲御史九年,

高皇帝方授是官,不輕予人也。」

列傳第四十六 魏駿

未衰,如念其老,宜令去繁就簡。乃改南京東部。復以老辭。不允。十四年進尚書。 英宗 年實授。 宣德初,遷東部考功員外郎,歷南京太常寺少卿。正統三年召試行在東部左侍郎。踰 屢命巡視幾甸遺蝗,問民疾苦。八年改禮部,尋以老請致仕。 吏部尚書王直言驥

北 1.狩,驥率諸司條上時務,多施行。 景泰元年,年七十七,致仕。

終制,求考功。同官將許之。臟持不可。法司因旱卹刑,有王綱者,惡逆當辟,或憫其少, 欲緩之。 驥曰:「此婦人之仁,天道不時,正此故也。」 獄決而 驥居官務大體。在太常,山川壇獲雙白兔,圻內生瑞麥,皆却不進。在吏部,有進士未 酮。

循 臣,當爲天下進賢才,不得私一座主。」退語人曰:「渠以朝廷事爲一己事,安得善終。」竟致 ,驥門生也,請問曰:「公雖位冢宰,然未嘗立朝。 願少待,事在循輩。」驥正色曰:「君爲輔 正統中,王振怙寵,凌公卿,獨嚴重驥,呼「先生」。景泰初,以請老至京師。大學士陳

仕去。

行 捍江潮,興湖利。鄉人賴之。居恒布衣糲食,不殖生產。 田 間。 **驥端厚祗愼。顧勁直,好別白君子小人。恒曰:「無是非之心,非人也。」家居,憂國憂** 彌篤。蕭山故多水患,有宋時縣令楊時湖隄遺跡。驥倡修螺山、石巖、畢公諸塘堰, 嘗遇錢塘主簿,隸訶之。答曰「蕭山魏驥也」。 主簿倉皇謝慰而去。 事兄教諭騏,雖耄益恭。

弟力田,增隄濬湖,捍禦災患。所行動應禮法,倡理學,勖後進。 恐勞民,可謂純臣矣。」許之。蕭山民德驥不已,詣闕請祀於德惠祠,以配楊時。 如禮,諡文靖。其子完以驥遺言詣闕辭葬,乞以其金振饑民。帝憮然曰:「驥臨終遺命,猶 施行。」帝覽奏嘉歎,遣行人存問,賜羊酒,命有司月給米三石。使命未至而驥卒。 召者,有賜几杖者,上齒德也。 驥齒德有餘,爵在上卿,可稱達尊。 乞下所司,酌前代故事 百年化育,滋此人瑞。臣讀前史,有以歸老賜祿畢其身者,有尊養三老五更者,有安車蒲輪 平學行醇篤,心術正大,諳世事,瞭國體。致仕二十餘年,年九十八歲,四方仰德,有如卿雲, 成化七年,御史梁昉言:「臣先任蕭山,見致仕尚書臣魏驥里居,與里人稠處,敎子孫孝 雖在林野,有補治化。驥生 制曰「可」。 賜祭葬

餽之贐,穆曰:「吾方從仕,未能利物,乃先厲州里乎。」弗受。 除御史。 漢王官校多不法,人莫敢言。穆上章劾之,不報,然直聲振朝廷。 魯穆,字希文,天台人。永樂四年進士。家居,褐衣蔬食,足跡不入州府。比謁選,有司 仁宗監國,屢上封

而室其妻。李之宗人訴於官,所司納林賂,坐訴者,繫獄久。 福建僉事。 理冤濫,摧豪强。泉州人李某調官廣西,其姻富民林某遣僕耽李於道, 穆廉得其實,立正林罪。漳民

四三二

去、盡奪其貲、妾訴之。穆召縣父老及周宗族、密置妾子羣兒中。咸指兒類允文、遂歸其產。 周允文無子,以姪爲後,晚而妾生子,因析產與姪,屬以妾子。允文死,姪言兒非叔子,逐

民呼「魯鐵面」。時楊榮當國,家人犯法,穆治之不少貸。榮顧謂穆賢,薦之朝。

英宗卽位,擢右僉都御史。明年奉命捕蝗大名。還,以疾卒。命給舟歸其喪。

始穆入爲僉都御史,所載不過囊衣,尚書吳中贈以器用,不受。至是中爲治棺衾,乃克

想。子<u>崇志,歷官應天</u>尹,廉直有父風。

淸望。 耿 九疇,字禹範, 盧氏人。永樂末進士。宣德六年授禮科給事中。議論持大體,有

弊,條奏便宜五事,著爲令。母喪去官,場民數千人詣闕乞留。十年正月起爲都轉運使。節 儉無他好,公退焚香讀書, 康名益振, 婦孺皆知其名。 正統初,大臣言兩准鹽政久壞,宜得重名檢者治之,於是推擇爲鹽運司同知。痛革宿

**| 谨下獄,九疇及江淵等議貶其官。 瑾壻給事中|王汝霖銜之,與同官葉盛、張固、林聰等論刑** 以事見誣,逮下吏,已,得白,卽留爲刑部右侍郎。屢辨疑獄,無所撓屈。 禮部侍郎章

列

傳第

四十

· 六

魯

穆

耿九

耕守,招來流民七萬戶,境內以安。 於用人,置汝霖等不問,瑾如奏。 部不公。 九疇、淵遂劾盛等,且言汝霖父永和死土木,嬉笑自如,不宜居職。時景帝新立,急 鳳陽歲凶,盜且起,敕往巡視招撫。奏留英武、飛熊諸衞軍

兼 撫江北諸府。 兩淮自九疇去,鹽政復弛。 景泰元年仍命兼理。 尋敕錄諸府重囚,多所平反。 十月命

帥罪。 |疇言:「邊將所以禦寇衞民也,今使民避寇失業,安用將帥。] 因禁民入徙。 罰 如得靑者,具刻以聞。 問信,則人人自奮。不然,徒冗食耳。」乃不增戍。邊民春夏出作田,秋冬輒徙入塞,九 三年三月代陳鎰鎭陝西。 邊將請增臨洮諸衞戍,九疇言:「邊城士卒非乏。 都指揮楊得靑等私役操卒,九疇劾之。 韶按治,且命諸邊 將帥能嚴紀律,賞 有被寇者,治守

神宗買浙燈事,事乃寢。 右副都御史。大臣鎭守、巡撫皆授都御史,自九疇始。有旨市羊角爲燈。 四年,布政使許資言:「侍郎出鎮,與巡按御史不相統,事多拘滯,請改授憲職便。」乃轉 災異求言,請帝延儒碩,公賞罰,擇守令,簡將帥。 九疇引朱蘇軾諫 優詔報焉

者不給米。九疇爲言,乃日給一升,遂爲令。已,上疏陳崇廉恥、淸刑獄、勸農桑、節軍賞、 天順初,議事京師。 帝顧侍臣曰:「九疇,廉正人也。」留爲右都御史。 罪人繁都察院獄

重 |臺憲五事。帝皆嘉納。是年六月,御史張鵬等劾石亨、曹吉祥。 亨等謂九疇實使之,逐

幷下獄,謫江西布政使,尋調四川。

改南京刑部尚書。 明年,禮部缺尙書。 四年卒。諡淸惠。子裕,自有傳。 帝問李賢。 賢曰:「老成清介,無如九疇。」乃召還。 旣至,憐其老,

軒輗,字惟行,鹿邑人。永樂末年進士。授行人司副。宣德六年用薦改御史。按福建,

剔蠹鋤奸,風采甚峻。

阮隨、布政使孫原貞、杭州知府陳復、仁和知縣許璞居官皆廉,〔三一方大治。 外諧司有事,多擅遣御史,非制,請禁之。」立報可。是年,超擢浙江按察使。前使奢汰,輗 不得過一斤。僚屬多不能堪。故舊至,食惟一豆。或具雞黍,則人驚以爲異。 力矯之。 |正統元年淸軍||浙江,劾不職官四十餘人。 五年言:「祖宗設御史官,爲職綦重。今內 寒暑一青布袍,補綴殆逼,居常蔬食,妻子親操井臼。與僚屬約,三日出俸錢市肉, 時鎭守內臣

位,以大臣議罷之。 溫 、處有 銀場,洪武間歲課僅二千八百餘兩,永樂時增至八萬二千兩,民不堪命。 至是參政兪士悅請復開,謂利歸於上,則礦盜自絕。 下三司議,輗力持 帝即

列

傅

不 可 乃 此。 旣而 給事中陳傅復請,朝廷遽從之,遂致葉宗留之變。

降 衣 冠 於 元, 之藏,伯泰言非誣。 會稽 北 趙 去, 伯 山 泰, 陰安得墓? 宋苗 裔 詔 也, 戍豪民於邊,停琳等俸。 伯泰 奏孝宗、 不平,復訴。 、理宗及 福王陵墓,俱爲 帝命輗及巡按御史歐陽澄 遭 親喪,起復。 豪民 了侵奪。 十三年奏陳 一覆按。 御史王琳謂 朝言 四 福 ·, 俱 王 福 切 蓋

改 田 督 諸 縣,輗 南 景帝立, 京 糧儲。 與原貞討平之。 以右 五. 副 年復改 都御史鎭守浙江。 左副 賊首 都御史,掌南院事 羅丕、廖寧八 景泰元年命兼理兩浙鹽課。 復自 o 圖 考黜御 抵浙。 史不 朝等防! 職者數 遏有功 園賊吳金八等流劫青 人。 進 等。明年

時

弊

,帝悉從之。

臣 行 中 李 誰 僅 天順 曾 **簏**,乃 居 元年二月召拜 此 職 卿耶 者。 ] 輗 賢以 刑 頓首謝。 朝對,且 部 尚書。 稱 賜白 數月, 其 廉,乃命以 金慰遣之。 引疾乞歸。 公左都御· 明 年,南京督理 帝召 史往。 見, 問 八 日「昔浙江 糧儲缺官,帝 年夏以 老乞骸骨,不 廉 問 使考滿 李 )賢,大

報

徑

歸

抵

家

趣

具浴,欠伸而

卒。

也 表 慶賀,屏居一室,撤燭端坐,事 在 輗 南 孤 都 峭 都御 遇 人 史張純置 無賢否, 酒 拒 不 延 客。 · 竣竟歸,未嘗與僚友一 與 接。 輗 爲按察使, 惡其汰, 不 嘗飲同僚家,歸撫其腹曰:「此 往 語。 徹 饌 僚友聞 、遺之, 其來,亦輒避去,不樂與 亦 不 納 歲 時詣 中有 禮 贓 部 物 拜

第四十六 黄孔昭

列

傅

之處。 事,衆頗不直輗。然淸操聞天下,與耿九疇齊名,語廉吏必曰軒、耿。 量頗編隘。御史有訐人陰私者,輒獎其能。嘗令御史劾南京祭酒吳節,節亦發睨私

皇,與曹掾講讀律令而已。遭喪,部民乞留,詔起復,未幾卒。(輗倡僚屬助之,乃克斂。吏 民相率致賻,其子盡却之,稱貸歸。 陳復,福建懷安人。
朝同年進士,由戶部主事知杭州。
廉靜無私,獄訟大省。日端坐堂

四年進士,授屯田主事。奉使江南,却餽弗受,進都水員外郎。 成化五年,文選郎中陳雲等爲吏所訐,盡下獄貶官,尚書姚夔知孔昭廉,調之文選。九 黃孔昭,黃巖人。初名曜,後以字行,改字世顯。年十四,遭父母喪,哀毁骨立。舉天順

以人才,書之於册。除官,以其才高下配地繁簡。 饑;才不預儲,安能濟用。苟以深居絕客爲高,何由知天下才俊。」公退,遇客至,輒延見,訪 年進郎中。故事,選郎率閉門謝客。孔昭曰:「國家用才,猶富家積栗。粟不素積,豈足贍 與尙書尹旻爭,至推案盛怒。 孔昭拱立,俟其怒止,復言之。是亦信其諒直。是暱通政談 由是銓敍平允。其以私干者,悉拒之。嘗

都謁孔昭,至屈膝。 倫 ,欲用爲侍郎,孔昭執不可。 孔昭益鄙之。 是令推舉,孔昭曰:「彼所少者,大臣體耳。」是謂其人曰: 是卒用之,倫果敗。<br />
是欲推故人爲巡撫,孔昭不應。 其人入

「黃君不離銓曹,汝不能遷也。」

進,斥退之。 奏復之。奉詔薦舉方面,以知府樊瑩、僉事章懋應。後皆爲名臣。 孔昭嗜學敦行,與陳選、林鶚、謝鐸友善,並爲士類所宗。 爲郎中滿九載,始擢右通政。久之,遷南京工部右侍郎。 掘地得古鼎, 急命工鐫文廟二字, 送之廟中。 俄中貴欲獻諸朝,見鐫字而 弘治四年卒。嘉靖中,贈禮部 有官地十餘區爲勢家所侵, 郎官主藏者以羨銀數千 止

尚書,諡文毅。子/備,亦舉進士,爲文選郎中。 |備子網,以議「大禮」至禮部尚書,自有傳。

憲,風紀爲之一淸。段民、吳訥、魏驥、魯穆皭然秉羔羊素絲之節。 營競,介特之性然也。仁、宣之際,懲吏道貪墨,登進公廉剛正之士。宗載佐銓衡,顧佐掌邦 贊曰:國家盛時,士大夫多以廉節自重,豈刻意勵行,好爲矯飾名譽哉。亦其澹嗜欲,恥 軒、耿、孔昭矯厲絕俗,

物不能干。章敞、徐琦、劉戩律己嚴正,異域傾心。廉之足尚也卓矣。

仁和知縣許璞居官皆廉

記

列

傅

[一] 景泰初仕至南京右都御史掌院事 稿傳四三顧佐傳附陳勉傳、英宗實錄卷二三六景泰四年十二月己亥條删。 許璞,原作「許僕」,據明史稿傳四三軒輗傳改。 南京右都御史,原作「南京右副都御史」,行「副」字,據明史

# 明史卷一百五十九

## 列傳第四十七

熊概 葉春 陳鎰 李儀 丁璿 陳泰 李棠 曾翬 賈銓

王字 崔恭 劉孜 宋傑 那宥 李侃 雷復 李綱 原傑

牟俸 夏熏子鍭 高明 楊繼宗

至無捍禦,顧煩王耶? 擢 廣西按察使。 熊概,字元節,豐城人。幼孤,隨母適胡氏,冒其姓。 峒谿蠻大出掠,布政使議請靖江王兵遏之。 且寇必不至,戒嚴而已。」已而果然。 永樂九年進士。 **外之,調廣東。** 概不可,日「吾等居方面,寇 授御史。十六年

南還,代以左通政趙居任,氣督農務。 洪熙元年正月命以原官與布政使周幹、參政葉春巡視南畿、浙江。 居任不恤民,歲以豐稔聞。 成祖亦知其誣罔。 初,夏原吉治水江 旣卒,

列

傳第四

+

左通 年八月 政 岳 ,幹還,言有司多不得人,土豪肆 福 繼 之, 庸懦 不事 事。 仁宗 監國時,嘗 惡 而 福 不任 命概 以御史署刑部,知其賢,故有是命。 職 0 宣宗 召 福還,擢概 大 理 寺卿,與 |春 是

同 往

巡

撫。

南畿

、浙江設巡撫自

此

始

百餘 繼,軍乏食。 罪 人。 慨 浙 西 豪 槪 持那 捕誅之。 概 以便宜發諸府贖罪米四萬二千餘石 邑短長爲不法。 已,悉捕豪惡數十輩,械至京,論 海鹽民平康暴橫甚,御史捕之,遁去。 膽軍, 如 法,於是奸宄帖 乃聞 於朝。 帝 息。 悅, 會赦還, 諭 諸衛 戶 部 益 所 聚黨 勿 糧 以 運

擅

諸 擾 當 民。 興革 慨 帝 用 法 者皆列以 弗 問 嚴,姦民憚之,騰謗書於朝。 陰使御 聞 史廉之, 時屢遣部官至 無所得。 江南造紙 宣德二年,行 由是益任 市 槪 銅 在都 鐵 o 明 年 御 |槪 史劾概 七 言 水 月 賜 勞民饑,乞罷 與春所 璽 書 獎 至作 勵 之。 威 槪 亦 福 自信 縦 兵

職, 衆署刑 |槪 五. 性剛 年還朝,始復 部 決,巡視 九年 江南 姓。 十 月 、錄囚, 亡何,遷右 ,威名甚盛。 自朝 都 至 御史,治南 及掌臺憲,聲稱 日宴,未暇 院 食。 事。 漸損 忽 行 風 於 在 眩 初。 卒。 都 御 史 賜 顧佐疾,驛召 祭,給舟歸其 槪 喪。 代 領 其

葉 春者,海鹽 人。 起家掾吏、歷禮部郎中兩淮鹽運使,改四 川右參政, 與概巡撫江、 浙

諸府。 人無議其私者。概遷都御史,春同日進刑部右侍郎。卒於官。 既復奉命與錦衣指揮任啓、御史賴英、太監劉寧巡視。 先後凡三涖浙西,治事於鄉,

儲蓄。 所廢置。 悉停免。 <u></u>
鎰道出大名見之,疏陳其狀,詔줲賦役。<br/>
正統改元,<br/>
鎰言陝西用兵,民困供億,派徵物料,<br/>
乞 英宗卽位之三月,擢右副都御史,與都督同知鄭銘鎭守陝西。 陳鎰,字有戒,吳縣人。永樂十年進士。授御史。遷湖廣副使,歷山東、浙江,皆有聲。 所部六府饑,請發倉振。帝從輔臣請,修荒政。鑑請偏行於各邊,由是塞上咸有 詔可。明年五月,以勞績下敕獎勵,因命巡延綏、寧夏邊。所至條奏軍民便宜,多 北方饑民多流移就食。

以陝人乞留,詔仍舊任。時倉儲充溢,有軍衞者足支十年,無者直可支百年。 棄可惜,請每歲春夏時,給官軍爲月餉,不復折鈔。從之。 六年春,以縊久勞於外,命與王鰯歲一更代。七年, 鰯調遼東, 鎰復出鎮。歲滿當代, 鎰以陳腐委

漸强,遣人授罕東諸衞都督喃哥等爲平章,又置甘肅行省名號。。鎰以聞,請嚴爲之備。已, 九年春進右都御史,鎭守如故。|秦中饑,乞蠲租十之四,其餘米布兼收。 時瓦剌也先

陳

列傳

第四十七

命與靖遠伯 王驥巡 視 甘肅、寧夏、延綏邊務,聽便宜處置。 以災沴頻仍,條上撫安軍民二十

四事,多議行

益

思鎰言。

行 ,而當事者不以爲意。 <u>鎰嘗恐襄、漢間流民嘯聚爲亂,請命河南、湖廣、陝西三司官親至其地撫恤之。</u> 王文亦相繼力言有司怠忽,恐遺禍。 至成化時,乃有項忠之役,人 得旨允

薦,出撫畿內。 英宗北狩, 事寧,召還,進左都御史。 景帝監國,鎰合大臣廷論王振。 於是振姪王山伏誅。 也先將入犯,以于謙

鎮陝,先後十餘年,陝人戴之若父母。 景泰二年,陝西饑,軍民萬餘人,「願得陳公活我」。 每還朝, 必遮道擁車泣。 監司以聞,帝復命之。 再至, 則 歡迎 數百里不絕。 鎰至是凡三

其得軍民心,前後撫陝者莫及也。

少風裁,譽望損於在陝時。 爲刑部照磨。 三年春召還,加太子太保,與王文並掌都察院。 明 年秋以疾致仕。 卒,贈太保, 文威嚴,諸御史畏之若神。 諡僖敏。 天順七年詔官其子伸 **鎰性寬恕**,

**益衆。帝封其詞,遣使諭王如儀指。王卽獻護衞,趙卒無事。** 亦言:「往歲孟賢謀逆,趙王未必不知。 李儀,涿人。 永樂間以薦舉授戶部主事。 高煦亦謂與趙合謀。 宣宗旣平高煦,儀請去趙王護衞。 。儀尋出知九江府,有惠政。 儀言是。」帝不聽。 尚書張本 旣而言者

萬一乘虛襲我,少有失,適足爲笑,乞敕政等無窮追。」不納。 備禦有方耳。 議遣方政、楊洪出塞,與甘肅將蔣貴、史昭合擊朶兒只伯。 儀言:「四裔爲患,自古有之,在 史巡撫其地,盛有所建置。明年請以大同東西二路分責於總兵官羅文、方政。從之。時朝 英宗卽位之歲,始設諸邊巡撫。 和寧殘部,窮無所歸,乍臣乍叛,小爲邊寇,邊將謹待之,將自遁,何必窮兵。 **愈都御史丁璿方督大同、宣府軍儲,而儀以右愈都御** 

敬等。 儀居官廉謹,邊人素德之。聞其死,建昭德祠以祀。 督糧參政劉璉不職,儀劾之。 随止停俸二歲。儀雖引罪,自負其直,詞頗激,遂被劾下吏瘐死。正統二年二月也。 **| 儀誤緘咨牒於核餉主事文卷中,戶部以聞,致亨、 敬相奏訐。 璉乃誣儀淫亂事。適參將石亭欲奏鎭守中官郭敬罪,先** 詔儀、 璉自陳, 而切責

尋言用兵便宜,遂命撫雲南。 麓川平,召爲左副都御史,所至有聲。 丁璿,上元人。永樂中進士。 由御史擢居是職。正統五年將征麓川,命乘傳往備儲餉。

列傳第四

陳泰, 字吉亨, 光澤人。 幼從外家曹姓, 旣貴, 乃復故。 舉鄉試第一, 除安慶府學

訓導。

吏部尚書郭璡等數十人。已,復出按山東。 給事中糾彈大臣,去其尤不職者,而後所司各考覈其屬。」帝從之。 足養廉,然後治贓汚,則貧風自息。事格不行。六年夏言:「連歲災異,咎在廷臣,請敕御史 殺以冒功,泰奏罷之。再按山西。時百官俸薄,折鈔又不能即得。 正統初,廷臣交薦,擢御史,巡按貴州。 官軍征麓川,歲取土兵二千爲鄉導,戰失利,輒 泰素勵操行,好搏擊。 於是御史馬謹等交章劾 三爲巡按,懲奸去貪,威 泰上章乞量增祿廩,俾

擅杖武職,毆輿夫至死。 九年超擢四川按察使,與鎭守都御史寇深相失。十二年八月,參議陳敏希深指,刻泰 逮刑部獄、坐斬。泰奏辯、大理卿兪士悅亦具狀以聞。皆不聽。

同 爲 知劉安代寧遠伯任禮巡備涿、易、眞、保諸城,命泰以右僉都御史參其軍務。三年兼巡撫 事官,從總兵官顧興祖築關隘自効。 景帝監國,赦復官。于謙薦守紫荆關。也先入犯,關門不守,復論死。景帝宥之,命充 景泰元年擢大理右少卿,守備白羊口。 四月,都督

保定六府。 尋命督治河道。 自儀眞至淮安,濬渠百八十里,日塞決口九,築壩三,役六萬

人,數月而畢。 七年移撫蘇、松。

故官,往巡撫。 天順改元,罷巡撫官,改廣東副使,以憂去。 八年進右副都御史,總督漕運兼巡撫淮、楊諸府。 四川盜起,有言泰嘗莅其地,有威名,乃復 莅淮三年,謝政歸。 成化

六年卒。

中。 剛嚴懾下。棠與辯論是非,譴訶不爲動。 己帥下,令行政舉。 景帝嗣位,超擢本部侍郎。 李棠,字宗楷,縉雲人。宣德五年進士。 未幾,巡撫廣西,提督軍務。所部多寇,棠以次討平之。 濂亦器之,進員外郎。 授刑部主事,為尚書魏源所器。 錄囚南畿,多所平反,進郞 金濂代源,以 正

京師,上書請帝廢太子立己子。帝大喜,立擢玹都督同知,出其子於獄。 土司傳。 爲亂告。 景泰三年,思明土知府黃珮老,子鈞嗣。 棠檄右參政會翬、 棠旣不得竟黃珠獄,鬱鬱累疏謝病歸。 副使劉仁宅按其事。 爾庶兄弦使其子殺堈父子,滅其家,而以 不攜嶺表一物,以清節 **灣等誘執 域父子下之獄**。 顯。 事具懷獻太子及 他盜 使走

列

郎。 尚書金濂器之,俾典奏牘。 曾翬, 字時升,泰和人。 宣德八年進士。 有重獄,諸郎不能決,輒以屬聲。 治秦府永興王葬,却有司饋遺。 秦王訐巡撫陳鎰狎妓。翬 歷刑 部員外

按得其情,劾藩府誣大臣,鎰得白。

清軍者利得軍,多枉及民,聲辨釋甚衆。 子。 撫安之。 幾,球以上書擢都督同知,父子俱出獄,聲等太息而已。尋以憂去。 **] 跋使人持千金賄於道,且擁精兵挾之。二人佯許諾,已,誘執] ] 下之獄。** 正統十三年進郎中。 以何文淵薦, 擢廣西右參政。 南陽諸府多流戶,衆議驅逐,人情惶急,聲與巡撫 李棠檄翬及副使劉仁宅按黃竑父 服闋,起官河南御史。 棠以聞。 未

江,回考察官吏,奏罷不職者百餘人,他弊政多所釐革。 饑 曜日:「祖制,民墾荒田,永不科稅,奈何奪之。」 使者奏如言,乃免。 計開封積聚多,奏請平糶,貧民賴以濟。召拜刑部左侍郎,仍食從二品俸。 **肇操行謹,所至有聲。** 天順 五年遷山東右布政使。 及歸,生計蕭然,絕跡公府,鄉人以爲賢。 民墾田無賦者,姦民指爲閒田,獻諸戚畹。 還朝,久之,謝病去。 成化初,轉左。 部使者來勘, 尋巡視)浙 河南 歲

賈銓,字秉鈞,邯鄲人。 永樂末進士。 宣德四年授禮科給事中,數有參駁。

能償。 知府。 擢。 治司事。正統十二年,左布政使闕,軍民數萬人頌銓,參贊軍務侍郎侯璡等亦疏請,銓遂得 土官十餘部,歲當貢馬輸差發銀及海肥,八府民歲當輸食鹽米鈔,至景泰初,皆積逋不 英宗踐阼,旣肆赦,復命讞在京重囚,多所原宥。從銓請,推之南京。 王驥征麓川,饋運有勞。 **銓等為言除之。治行聞,** |驥薦之。|麓川平,擢雲南左參政,仍知府事。尋以驥言,還 賜誥旌異。景泰七年,九載滿,當入都,軍民乞留。 秩滿,出爲大理

還任。

康督師遼東,召<u></u> 经署院事。中官唐愼等從征荆、襄還,杖死淮安知事谷淵,自奏丐免。 河南。山東歲侵,請召還清軍御史。河南饑,請停徵課馬。皆許之。 名,未見其人也。」及是來觀,帝命賢視之,還奏貌寢。乃以爲右副都御史巡撫 天順四年與梁檠等舉政績卓異。戶部初闕尚書,王翺欲擢銓。帝問李賢,賢曰:「聞其 乃付愼等司禮監,命法司罪其從人。未幾,卒官。 諡恭靖。 成化初,左都御史李 山東,尋兼無 |銓請

|銓在||雲南,治行爲一時冠。 比爲巡撫,清靜不自表暴,吏民亦安之。

南京 戶部 王宇,字仲宏,祥符人。 主事。 秩 滿當轉郞中,吏部以宇才,特用爲撫州知府。 童丱時, 日記萬言,巡撫侍郎于謙奇之。 爲政簡靜,而 登正統四年進士,授 鋤 强 遏

不可

犯,一

府大治。

論其 爲 遷右副都御史,巡撫宣府。 解 字弁劾尚書沈固 宇剛介,所至有盛名。 姦, ,帝切責深。 天順 乞置之法。 元年,所司 尋 等。 命兼撫大同。 上其治行,詔賜誥命。 疏 雖 皆輸罪。 亦 行, 居大理,平反爲多。 中官嚴順、 聞者敬憚。 石亨及從子彪 遭喪,起復 都督張林等令家 頃之,擢山東右布政使,命撫恤所屬饑民。 督餉. 爲 七年卒。 大 、驕恣, 郎中楊 理 卿。 大同 人承 益 固 不能 辭,不許。 納 其舊鎭地 備 芻藁 9 字劾奏, ,爲宇所 徴索尤 劾。 横。 都 御 史寇深 宇 戶 部庇 抗 明 疏

溥薦 之,請約計歲 擢 崔 恭, 萊州 字 輸外, 知府。 克讓, 餘以充本府軍餉, 廣宗 內 地 人。 輸遼東 正統 布,悉貯 元年進士。 遂放遣守者八百人。 郡 庫 歲歲 除戶部主 久 朽敞,守者多 事。 也先犯京師 出 理 破家。 延綏 倉儲,有能 ,遣民兵數千入援。 恭別構屋三十 學。 楹 以

廷議 城臨清,檄 發役夫。 居府六年,萊人以比漢楊震。

流 庫,官吏乾沒五十萬。 民 擅 景 相 泰 殺,恭 中 超 下 遷 湖廣 令願 |恭白於巡撫韓雍,典守者咸獲罪。 附籍者聽, 右 布 政 使。 否則迨秋遣歸, 諸 司 供給,率取之民。 衆遂定。 恭 定均徭 尋遷 與僚佐約 法, 江西左布 酌輕 、悉罷 重,十年一役,遂 政使。 之。 公安、監利 司有 廣 濟

爲定例

乃罷 松諸府。 忱奏定耗羨則例 四千二百餘丈。 大治吳淞 去,悉如忱舊 天順 江 按部,進耆老言利病 二年,寧王奠培不法,恭劾之。 起崑山夏界口 李秉改定以 又沒曹家港、蒲 ,至上海白鶴江 賦之輕重 ,爲興革。與都督徐恭浚儀眞 匯塘、新涇諸水。 遞盈縮。 削其護衞,王稍戢。遷右副都御史,代李秉巡撫蘇 ,又自白鶴江至嘉定卞家渡,迄莊家涇,凡浚萬 其例甚平, 民賴其利,目曹家港爲 漕河, 而難於稽算, 又沒常 鎭 「都堂浦」。初, 吏不勝煩 河 ",避江 險。已, 周

一概,而 因 父憂起復。 此 得罪,急言於輅,以恭代康。越五月,母喪歸。服除,起南京吏部,劾罷諸 吏 北人居言路者,謂時 部 缺右侍郎,李賢、王翺舉恭。 憲宗 即位,乞致仕。 實逐秉,喧謗於朝。 不允。 遂召 成化五 用。 時稱疾不出,侍讀尹直 年,尚書李秉 置勸 懲簿,有聞皆識之。 罷 ,商輅欲用 以時、概皆己鄉 姚 | 翻甚倚恭, 司 夔,彭時 不職者數 | 欲用王 轉左 人,恐

列

年春命參贊機務。 居三年,致仕。 叉二年卒。 贈太子少保,諡莊 敏。

**|孜馳奏,乞斬言者以定人心。期滿當代,朝議邊務方殷,復留一歲。** 劉孜,字顯孜,萬安人。 正統十年進士。 授御史,出按遼東。景帝卽位,有建南遷議者。 再按畿輔。 時方築滄

州城,以孜言罷。

擢山東按察使。

猶征 民間 稱便。 民戶償納荒租。 史巡撫江南十府。蘇、松財賦,自周忱立法後,代者多紛更。政首訪忱遺蹟,斟酌行之,民 多 鈔。 天順四年,吏部舉天下治行卓異,按察使惟孩一人,遷左布政使。 積困。 成化元年,應天饑,方振貸,而江北饑民就食者衆。 上元、 瀕江官田久廢沒,仍責輸賦。蘇、松、杭、嘉諸府僉補富戶。南京廊房旣傾圮, 六合、江浦官牛歲徵犢。 江寧農民代河泊所網戶採鰣魚。 **孜皆疏罷之。** 應天都稅宣課諸司額外增稅。 **孜請盡發諸縣廩,全活無算。** 明年春,以右副都御 江陰諸縣

**政**廉愼,治事精審。 然持法過嚴,時議其刻。 傑爲人長者。 居二年,罷去,而邢宥代。

四年致仕,道卒。

召拜南京刑部尙書,以宋傑代。

四三四一

書。居半歲,遂以右僉都御史代傑巡撫。開<u>丹陽河,築奔牛閘,省</u>免運亢費,民以爲便。尋 州。姦民攬納秋賦,置之法,得其贓萬緡,以隄沙河,甓官道。大水,民饑,不待奏輒發米 **兼理兩浙鹽政,考察屬吏,奏黜不職者百七十餘人。居數載,引疾歸。** 二十萬斛以振。宥素廉介,及治蘇,嚴而不苛。傑薦於朝,詔加浙江左參政仍理府事,賜璽 爲緩之,果得眞盜。天順中,出爲台州知府,有治績,坐累謫晉江丞。憲宗復其職,改知蘇 宥,文昌人。正統十三年進士。授御史,出巡福建。民十人被誣爲盜,當刑呼冤。宥

後。侃因言避難偸生者,宜嚴譴以厲臣節。上皇將還,與同官劉福等言禮宜從厚。忤旨, 民累。皆報許。時父母在容城,侃曉夜悲泣,乞假,冒險迎之。景泰初,議錄扈從死事諸臣 用戰車三事。也先逼京師,議者欲焚城外馬草。侃言敵輕剽,無持久心,乞勿焚,免復斂爲 李侃,字希正,東安人。正統七年進士。授戶科給事中。景帝監國,陳簡將才、募民壯、

論 濂,下之吏。 石亨從子彪侵民業,侃請置重典,幷嚴禁勳戚、中官不得豪奪細民,有司隱 再遷都給事中。軍興,滅天下學校師儒俸廩。侃奏復之。戶部尚書金濂違詔徵租,侃

列

傳第

四十七

劉孜

李侃

被詰,尚書胡濙爲解,乃已。

胏

諸大臣唯唯。 者同罪。 帝宥亨、彪,餘如其請。 侃泣言東宮無失德,聰與御史朱英亦言不可,時議壯之。擢詹事府丞 時給事中敢言者,林聰稱首,侃亦矯抗有直聲。廷議易儲,

喪歸,軍民擁泣,至不得行。服除,遂不出,家居十餘年卒。 堪任事者,臣悉退之,臣亦當罷。」詔不許。侃性剛方,力振風紀,貪墨者屛跡。 其年冬以母 獲宥。六年考察屬吏,奏罷布政使王允、李正芳以下百六十人。因言:「諸臣年與臣若、不 交便,戎備得修。」時不能用。 奏發巡按|李傑罪,傑亦訐侃。 寒,聞寇股栗。 「塞北之地,與窮荒無異。 天順元年改太常丞, 進太僕卿。[5] 明年復設山西巡撫, 遷侃右僉都御史任之。奏言: 而北人戍南,亦不耐暑,多潛逃。宜令南北清勾之軍,各就本土補伍, 非生長其間者,未有能寧居而狎敵者也。今南人戍西北邊,怯風 按傑事有驗,除名。 侃無贓罪,

明、<br />
李侃學行事功,<br />
彰著耳目,並<br />
並<br />
思諡。 侃事親孝,好學安貧,歿幾不能殮。 弘治初,國子生江紀等言,前祭酒胡儼,都御史高 寢不行。侃二子:德恢,嚴州知府;德仁,河東鹽

路陷縣治,復與參將<br />
范信討斬之。 雷復,字景陽,湖廣寧遠人。 成化初以大臣會薦、擢山東右布政使。 正統初進士。授行人,歷官廣西副使。 七年徵拜禮部右 藤縣民胡趙成構

侍郎。 夏卒於官。 帑振贍。」 帝從之。 及發金三萬不足, 請鬻鹽四十萬引, 并令民入粟授散官。 皆報可。 十年 違,饑民疾病流離,困悴萬狀,而應輸綾帛、藥果諸物,又不下萬計。 乞依山東例蠲除,仍發 烟寺溝、石人村、賜敕獎勞。時山西大祲、而廷議以陝西用兵,令預徵芻餉,轉輸楡林。復 上言:「自山西至楡林,道路險絕,民齎銀往易,價騰踴,不免稱貸,償責多破產。今雨雪愆 尋改右副都御史,巡撫山西。繼李侃後,端恪守法,得軍民心。 敗寇紅沙烟,再敗之

朝。帝特命賜祭葬,不爲令。綱淸剛似李侃,爲時所重。 平江伯陳銳共事。踰年卒。|銳見笥中惟敝衣,揮涕曰:「君子也。」爲具棺斂,聞其淸節於 集陝西延綏土兵。還,遷太僕寺少卿,巡畿輔馬政,盡却有司饋。按冀州,遇盜問隸人曰: 「太僕李公耶?是何從得金。」不啓篋而去。成化十三年遷右僉都御史。轉左,出督漕運,與 年進士,授御史。歷按南畿、浙江,劾去浙江贓吏至四百餘人,時目爲「鐵御史」。奉敕編 李綱,字廷張,長淸人。幼從父入都,墜車下,車轢體過,竟不傷,人咸異之。登天順元

開 誅 ,革其護衞。 中鹽引入米 劇盜,姦宄斂跡 振饑。 治行聞,賜誥旌異,遷 復按順天諸府。 疏入,爲部所格,景帝卒從傑議 大水,牧官馬者乏芻,馬多斃, 山東左布 政使。 超擢江西按察使。 有司 責償 發寧王奠培淫亂 傑請発之,

之。 河遷決不常,彼陷則此淤。 傑請獻者謫戍, 幷罪受獻者。從之。 成化二年就拜右副都御史,巡撫其地。 軍民就淤墾種,姦徒指爲園場屯地,獻王府邀賞,王府輒據 江西盜起,以傑嘗再莅其地得民,詔往治。 歲凶振救、民無流移。 召爲戶部左侍郎。 時黄 捕戮

用 河,與竹山、上津、房咸隸新府。又於西安增山陽,南陽增南召、桐柏, 縣附之。 四達,去襄陽五百餘里,山林阻深,將東鮮至,猝有盜賊,府難遙制,乃拓其城,置鄖陽府,以 十一萬三千有奇,口四十三萬八千有奇。其初至,無產及平時頑梗者,驅還其鄉,而附籍者 編氓,可實裹、鄧戶口,俾數百年無患。 六百餘人,餘悉解散。 **偏歷山谿,宣朝廷德意,諸流民欣然願附籍。** 輕則定田賦。 荆、襄流民數十萬,朝廷以爲憂。 且置湖廣行都司,增兵設戍,而析竹山置竹谿,析鄖置鄖西,析漢中之洵陽置 民大悦。因相地勢,以襄陽所轄鄖縣,居竹、房、上津、商、洛諸縣中,道 改左副都御史,還佐院事 祭酒周洪謨嘗著流民圖說,謂當增置府縣,聽附籍爲 都御史李賓以聞。帝善之。十二年,遂命傑出撫 於是大會湖廣、河南、陝西撫、按官籍之,得戶 汝州增伊陽,各隸其

列 傳 第 四 十 七 彭 誼

治鄖陽 將還, 舊府。 以地界湖廣 制旣定,薦知鄧州吳遠爲鄖陽知府,諸縣皆擇鄰境良吏爲之。 、襄陽、 荆州 、河南、陝西、事無統紀, 南陽、 西安、 漢中六府。 因薦御史吳道宏自代。 鄖陽之有撫治,自此始也。 詔卽擢 流人得所,四境乂安。 道宏大理 傑以功進右 少卿,無 都

兵部 子太保,錄其子宗敏爲國 缺尚書,以傑任之。 條數敭歷於外,旣居內臺,不 子生。 傑疏辭。 ·欲出。 不許。 荆、襄之命,非其意也。 遂卒於南陽,年六十一。 事竣, 順、襄民爲立祠、詔贈太 急請還朝。 會南京

御

史。

用 薦 改御 彭誼,字景宜,東莞人。 史。 從尙 .書石璞塞沙灣決河,進秩二等。 正統中,由鄉舉除工部司務。 復決,再往 嘗與尚書辯 塞之。 事,無所阿。景帝立,

築白馬閘障 誼者,下遷紹興 御史,提督紫荆 景泰 五年,以從大學士王文巡視江、淮,擒 海 潮 (知府。 倒馬諸關。 歷 九載,多惠政。 歲饑,輒發廩振貸。 劾都指揮胡璽納 超擢 山東左布政使,入爲工部左侍郎 吏白當俟朝命,誼 賄 養蘇州 縱軍罪。 賊 褶 天順 大理寺丞。 日:「民方急,安得 初, 罷 巡撫官 明 年二月擢右僉都 循 中 故 朝 公事耶?」 有 不 悅

經巡撫審定者,所司毋輒行,虐焰爲息。十年冬,戶部檄所司開黑山金場。 稱,可於大臣中求之。」乃改誼右副都御史以往。 成化 四年,遼東巡撫張岐得罪,東部舉代者。 鎭守中官橫徵諸屬衞。 帝曰:「遼東自王翺後, 屢更巡撫, **誼下令,凡文牒不** 誼奏永樂中太

年,軍令振肅。 誼好古博學,通律曆、占象、水利、兵法之屬。平居謙厚簡默,臨事毅然有斷。 年未老,四疏告歸,家居四十餘年卒。 鎭遼八

監王彥等開是山,督夫六千人,三閱月止得金八兩,請罷之。 遂止

**吏皆聳。**天順元年出爲福建僉事。 牟俸, 巴人。 景泰初進士。 授御史, 巡按雲南。 南寧伯毛勝鎭金齒, 棒列其違縱罪, 將 成化初,進秩副使。久之,遷江西按察使,政尙嚴厲,入

爲太僕卿

遣復業。又乞開中淮、浙鹽百萬引,盡蠲州縣逋課。 之。至七月,俸又言公私困竭,救荒靡策,乞開納粟例,令胥吏得就選,富民授散官,且截留 振。皆從之。時大饑,雖獲振,饑民衆,轉徙益多。 八年以左僉都御史巡撫山東。歲祲, 請發濟南倉儲減價以糶,令臨淸關稅收米麥濟 俸請敕鄰境撫、按隨所在安輯,秋成資 韶如所請, 更命移臨淸倉粟十萬石振

傳第四十七 牟佭 夏頌

列

夏燻,字宗成,天台人。景泰二年進士。授御史。

漕糧 而 棉。」帝皆嘉納。 米振濟,奏請伏專擅罪。 別給銀爲邊餉,山東輸京租二十萬石,給本地用。十年又饑,請發倉儲出貸。 ]備振。十月復言:「今救荒者止救其饑,不謀其寒。 俸又檄發東昌、濟寧倉粟十萬餘石爲軍士月糧,而以德州、臨淸寄庫銀易 帝特宥之。已,復以俸奏免柴夫折價銀,移河南輸邊粟濟山東, 縱得食,終不殆僵死,乞貸貧民布 撫山東五

年,盡心荒政,活饑民不可勝數。

宗有所關說,幷下獄。詞連僉事吳幂等十餘人,俱被逮。繫獄半歲,謫戍湖廣。 先是,所親學士江朝宗除服還朝,俸迓之九江,聯舟並下,所至,有司供張頗盛。 布 出 穀備 政陳鉞負氣不相下。後鉞從容言俸短,直信之。十四年,俸議事至京,直請執俸下詔獄。 以右副都御史改撫蘇、松。 振動千計,怨謗紛然。中官汪直有事南京,或譖俸。 俸性嚴。以所部多巨室,欲故摧抑之,乃禁索私租,勸富家 直歸,未發也。 俸初在山東,與 直因謂朝

**|俸在||江西時,共成||許聰獄,人多議其深文。** 至是被禍,皆知爲直誣,然無白其冤者。 踰

年,卒戍所。

天順初,巡按福建,繼淸軍江西,發

遣之。

鎭守中官葉達 恣横狀,達爲斂威。 以薦超擢廣東按察使。 時用師歲久, 役民守城, **壎至悉** 

被脅之衆自聞風來歸。」帝深納其言。 增,以易搖之人心,責無窮之軍費,恐外患未除,內變先作。 百,脅從萬千,進則驅之當前,退則殺以抒憤,害常在民,而 成化初、奏:「瑶、僮弗靖、用兵無功,由有司撫字乖方,賊因得誘良民爲徒黨。 尋遷布政使,調江西。 利常在彼。 請慎選監司守令,撫綏遺民,彼 况用兵不已,供敛 劇 寇數 H

已,奏所部將校多犯法,奏請踰 餘,居爛土久, 八年以右 副都御史巡撫四 時議逐之, 燻謂非計。 時,輒至遁逸。 苗、僚時爲寇。 松潘參將堯彧請益戍兵三千,又力陳不可。 請先逮繫,然後奏聞。 燻立互知會捕法,賊爲之戢。 帝可之。 古州苗萬 皆得寢。

詩 . 勸 歸,燻 燻 剛介,善聽斷,所至民不冤。 欣然納焉。 年未五十,即求退。 在蜀二年,民夷畏服。 章四上,得請。 旣歸, 然厭繁劇,與時 杜門養親, 多齟 不接賓客。 龉。 子鍭 獻 叉

五.

年卒。

獄,得釋。 鍭 舉進士。 **外之,除南京大理評事。** 弘治四年謁選 入都,上書請復李文祥、鄒智等官,罷大學士劉吉。 疏論賦斂、徭役、馬政、鹽課利弊,及宗藩、戚里侵漁狀。 件旨,下

不報。 餱素無宦情。居官僅歲餘,念母老,乞侍養,遂歸。家居三十餘年,竟不復出。

切諫。 止坐妖言律。皆報許。 「戍邊,防誣訴也。今訴不誣,法止當杖。」民有爲妖言者,吏貪功,誣以謀反。明按無反狀, 高 有指揮爲大臣所陷,論死,辯出之。徐州民訴有司於朝。時例,越訴者戍邊。明言: 明,字上達,貴溪人。幼事母以孝聞。登景泰二年進士,授御史。聞內苑造龍舟,

誅,僮僕皆收。明言不宜,坐觅者百人。擢大理寺丞。 御史劾,下之獄。四年,御史趙明等劾天下朝覲官,觸帝怒,詰草疏主名。衆大懼,明獨自 都御史寇深言:「頻年章疏、盡出明手、幸勿以細故加罪。」帝意解,反稱明能。 石亨旣 巡按河南,黜屬東六十人。再按畿輔,入總諸道章奏。天順初,尚書陳汝言有罪,偕諸

萬餘人,明請區別。薦郎中孫瓊、陳鴻漸、梅倫、何宜,主事宋瑛,皆端方廉潔,恬於進取,宜 憲宗立,拜南京右僉都御史。以留都春夏淫雨,請修人事以回天意。時納馬入監者至

顯擢以風有位。疏下所司。

列傳第四

十七七

高明

成化三年,揚州鹽寇起,守兵失利,詔明討之。造巨艦,名曰籌亭,往來江上督戰,並

江置邏堡候望。 賊蹤跡無所匿,遂平之。 內官鬻私鹽,據法沒入, 鹽政大治。 因條上利病

十餘事,多議行。仍還原任,以親老乞終養歸。

接江西、廣東,盜易嘯聚,請析置永定縣。 十四年,上杭盜發。 詔起巡撫福建,督兵往討。 移疾徑歸。 擒誅首惡, 久之,卒。 餘皆減死遣戍。 以上杭地

「吾二人並當死。汝母老,鮮兄弟,以我代盜,庶全汝母子命。」禮泣謝,從之。文桎梏詣部, 櫛沐,全活甚衆。 楊繼宗,字承芳,陽城人。天順初進士。 又善辨疑獄。 河間獲盜,遣里民張文、郭禮送京師,盜逸。 授刑部主事。 囚多疫死,爲時其食飲,令三日 |文謂禮曰:

繼宗察非盜,竟辨出之。

賓禮。 詣府報名。」<br />
懦怒。繼宗入見曰:「爲治有體。公但剔姦弊,勸懲官吏。 事,非憲體也。」儒不能難,而心甚銜之。瀕行,突入府署,發篋視之,敝衣數襲而已,儒慙 時時集父老問疾苦,爲祛除之。大興社學。民間子弟八歲不就學者,罰其父兄。遇學官以 成化初,用王鰯薦,擢嘉興知府。以一僕自隨,署齋蕭然。 師儒競勸,文教大興。御史孔儒清軍,里老多撻死。繼宗榜曰:「御史杖人至死者, 性剛廉孤峭,人莫敢犯。 若比戶稽核,則有司 m

列傳第四十七 楊繼宗

而去。 印券。」中官咋舌不敢受。入覲,汪直欲見之,不可。 憲宗問直朝覲官孰廉,直對曰:「天 中官過者,繼宗遺以菱芡、曆書。中官索錢,繼宗卽發牒取庫金,曰:「金具在,與我

下不愛錢者,惟楊繼宗一人耳。」

出,止驛亭下,盡籍廨中器物付有司。惟攜一僕、書數卷而還。 :「得非不私一錢之楊繼宗乎。」敏惶恐,遺書慶曰:「善遇之,上已知其人矣。」聞母喪,立 九載秩滿,超遷浙江按察使。數與中官張慶忤。 慶兄敏在司禮,每於帝前毀繼宗。帝

所嫉。治中陳翼訐其過,權貴因中之,左遷雲南副使。 武備大飭。星變,應詔陳言,歷指中官及文武諸臣貪殘狀,且請召還中官出鎭者,益爲權貴 服除,以右僉都御史巡撫順天。畿內多權貴莊田,有侵民業者,輒奪還之。按行關塞,

居無何,復以僉都御史巡撫雲南。三司多舊僚,相見歡然。旣而出位揖之曰:「明日有公事, 孝宗立、遷湖廣按察使。旣至,命汲水百斛,洗滌廳事而後視事,曰:「吾以除穢也。」

諸君幸相諒。」遂劾罷不職者八人。未幾卒。

坐缺糧繋獄,至鬻子女以償。繼宗欲寬之而無由。 或言不可,笑曰:「此朝廷法服也,此而不服,將安用之。」爲浙江按察時,倉官十餘人 繼宗力持風節,而居心慈厚,自處必以禮。爲知府,謁上官必衣繡服,朝覲謁吏部亦 一日,送月俸至,命量之,則溢原數。較

獲釋。 他司 亦然。 嘗監鄉 因悟 試得二卷,具朝服 倉 吏缺糧之由,將具實以聞。 再拜曰:「二子當大魁天下, 衆懼,請於繼宗,願捐俸代償。 吾爲朝廷得人賀耳。」及拆卷, 由是十人者

王華、李旻也、後果相繼爲狀元。

人服其鑑。

天啓初、諡貞肅

浙。 均有可紀。 貪濁,安善良,惟巡撫得以便宜從事。 或參贊軍務。 義等二十六人巡行天下,安撫軍民,事竣還朝,不爲經制。 越數年,而江西、河南諸省以次專設巡撫官。天順初,暫罷復設,諸邊亦稍用廷臣出 贊曰:明初以十五布政司分治天下,諸邊要害則遣侯伯勳臣鎭扼之。 于謙、周忱巡撫最爲有名,而勳業尤盛,故別著焉。 蓋以地大物衆,法令滋章,三司謹奉敎條,修其常職,而 熊概 以下諸 人,强幹者立聲威, 宣德初,始 命熊概 興利除弊,均賦 愷悌者流惠愛,政績 永樂之季,敕蹇 巡撫蘇、松、 税,擊 鎭 兩

#### 校勘記

濬渠百八十 條、國權卷三一頁一九九九補。 里 原脫 「百」字,據明史稿傳四四陳泰傳、 英宗實錄卷二五八景泰六年九月戊子 記

四三五三

尋巡視浙江 巡視,原作「巡撫」。 據本書卷一 三憲宗紀、憲宗實錄卷七六成化六年二月辛未

條改。

<u>~</u> = ∪ 進太僕卿

卿。

明史稿傳四四李侃傳、 憲宗實錄卷二七〇成化二十一年九月庚申條都作進太僕少

按明官制太僕寺卿從三品,少卿正四品,都察院左右僉都御史正四品。

如李侃由太僕卿

遷右僉都御史,不是遷陞,反而降了一級,作進太僕少卿是。

## 明史卷一百六十

## 列傳第四十八

王彰 魏源 金濂 石璞 王卺 羅 通 羅綺

張固

張瑄 張鵬 李裕

王彰,字文昭,鄭人。洪武二十年舉於鄉,補國子生。 使山東平糴,以廉幹稱, 擢吏科

女償 源 士。[1] 踰年, 革源士, 改給事中, 累遷山西左參政。 賦。 永樂五年召爲禮部侍郎。 彰奏爲蠲除,贖還所鬻。 父喪,服除,改戶部。 改右副都御史。 陝西大疫,奉使祀西嶽。

新安民鬻子

巡。 脉 枉 彰有 陝西 法, 文獻盜銀課,及金吾指揮李嚴逐母不養,皆坐死。 母年八十餘矣,命歸省,賜其母冠服金幣。 愈事馬英激肅州番爲變,殺御史及都指揮。 諭之曰:「君子居官不忘親,居家不忘 彰劾英,置極典。 他所論劾甚衆。十一年從帝北 又劾御史陳孟旭受

列

傅

第四十

八

王彰

凡所過,民安否,東賢不肖,悉以聞。」彰還,奏事稱旨。 **外之,進右都御史。** 

徵十餘事,招復流民,發廩振貸,多所全活。 土者,彰與葉春而已。 十九年,帝遣廷臣二十六人巡撫天下,彰與給事中王勵往河南。 河南水災,民多流亡,長吏不加恤 還朝,命督餉北征。 彰奏黜貪刻者百餘 仁宗卽位,河溢開封,命彰 終明世,大臣得 人,罷不急之 撫 鄕

與都指揮李信往振

恤。

以聞。 帝命逮治。 同體,勿有所疑。」尋召還,命與都督山雲巡山海至居庸諸關隘。 巡歷皆不以告,故遣彰往視。 宣德元年五月命彰自良鄉抵南京巡撫軍民。 復諭侍臣曰:「兩京相距數千里,驛使往來爲擾,或遘水旱,小民失所,朝使還及御史 遂命兵部三月一遣御史、給事中點閱。 今所奏多細故。 大臣如此, 朕復 專以所言率常事,降敕切責,令詳具利病 明年四月卒於官。 何望。 踰二月還,奏將士擅離者, 卿等當悉朕意, 君臣

人謂隊公而不恕,觀私而不刻云。 彰嚴介自持,請托皆絕,然用法過刻。 其母 屡以爲言,不能改。 時劉觀爲左都御史。

魏源,字文淵, 建昌縣人。 永樂四年進士。 除監察御史。 辨松江知府黃子威誣, 奏減

四三五七

浙東瀕海漁課。 今民疫妨農,請輸鈔代兩稅之半。」從之。 巡按陝西。 西安大疫,療活甚衆。 涼州土寇將爲變。亟請剿,亂遂息。 奏言:「諸府倉粟積一千九十餘萬石,足 兩

遭喪,俱起復。

洪熙元年出為浙江按察副使。

永豐民夏九旭等據大盤山爲亂。帝以源江西人,命撫之,都督任禮帥兵隨其後。未至,官 發倉廩,発逋賦雜役,流民漸歸。雨亦旋降,歲大豐。居三年,召還,授刑部左侍郎。 政使,俾馳驛之任。時侍郎許廓往撫輯,廷議又起丁憂布政使李昌祺原官。源與廓、昌祺 宣德三年召署刑部右侍郎。五年,河南旱荒,民多轉徙。帝以源廉正有爲,命爲左布 明年,

軍擒九旭,因命二人採木四川,兼飭邊務。

且言源爲御史嘗犯贓,乃冒領誥命。帝以源有勞,置不問。事竣還朝,與都御史陳智相詈 參贊。朝廷以謙方撫山西、河南,不聽。于是言官以臨邊擅易置大臣爲源罪,合疏劾之。 者悉括歸伍。尋以宣、大軍務久弛,請召還巡撫僉都御史盧睿,而薦兵部侍郎于謙爲鎭守 修開平、龍門城,自獨石抵宣府,增置墩堠。 免屯軍租一年,儲火器爲邊備,諸依權貴避役 真、楊洪充左右參將協鎮,諸將肅然。按行天城、朔州諸險要,令將吏分守。設威遠衞,增 事李謙守獨石,楊洪副之,劾萬全衞指揮杜衡戍廣西。明年奏大同總兵官譚廣老,帝命黃 英宗卽位,進尙書。正統二年五月命整飭大同、宣府諸邊,許便宜行事。源遣都督僉

列

傅

於直廬。智以聞,詔兩責之。

宥,復以上遼王貴烚罪狀,不言其內亂事,與三司官皆繫詔獄。累月,釋還 歲旱,錄上疑獄,且請推行於天下,報可。 旋坐決獄不當,與侍郎何文淵俱下獄。 職

施行。六年以足疾命朝朔望。八年致仕,卒。 言深刻,奏寢之。郎中林厚言禁刁訟、告訐及擇理刑官、勘重囚務憑贓具四事,皆以源議得 源在刑部人,議獄多平恕。陝西僉事計資言,武臣雜犯等罪,予半俸,謫極邊。源以所

史察廉能者,如洪武間故事,遣使勞賚,則淸濁分,循良勸。帝嘉納之。用薦遷陝西副使。 江西、浙江。捕巨盗不獲,坐免。盜就執,乃復官。嘗言郡縣吏貪濁,宜敕按察司、巡按御 金濂,字宗瀚,山陽人。永樂十六年進士。授御史。宣德初,巡按廣東,廉能最。改按

**伯、石灰三渠淤。濂請濬之,溉蕪田一千三百餘頃。時詔富民輸米助邊,千石以上褒以璽** 都御史,參贊寧夏軍務。濂有心計,善籌畫,西陲晏然。寧夏舊有五渠,而鳴沙洲七星、漢 濂言邊地栗貴, 請幷旌不及額者, 儲由此充。 正統元年上書請補衞所缺官,益寧夏守兵,設漢中鎭守都指揮使,多議行。三年擢僉 六年詔僉都御史盧睿與濂更代。明年,

| 睿召還,濂復出鎭。 尋加右副都御史,與睿代者再。

諉,言官劾濂及戶部尙書王佐,右都御史陳鎰,侍郎丁鉉、馬昂, 八年秋拜刑部尚書 ,侍經筵。 十一年, 安鄉伯張安 與弟爭祿, 副都御史丁璿、 韶逮治。 法司 程富等,俱 與戶部相

下獄。

數日,釋之。

寇,而 孫據 陽侯陳懋等爲將軍往討,以濂參軍務。 九龍山,拒官軍。 福 留濂擊平餘賊未 建 賊鄧茂七等爲亂,都督劉聚、都御史張楷征之,不克。十三年十一月大發兵,命 下者。 濂與衆謀,羸師誘之出, 會英宗北狩,兵事棘,召還。 比至,御史丁瑄已大破賊,茂七死,餘賊擁其兄子伯 伏精兵,入其壘,遂擒伯孫。 言者交劾濂無功,景帝 帝乃移楷討浙 不問, 加

濂太子賓客,給二俸。

尋改戶部尙書,進太子太保。

事。 部查理。 十之三。 帛,詔書未載,若概減줲,國 也先請 帝欲宥之,而侃與御史王允力爭,遂下都察院獄。 時 遣 四方用兵,需餉急,濂綜核無遺,議上撙節便宜十六事,國用得無乏。 濂檄 使往· 濂內慚,抵無有。 來 有司,但減米麥,其折收銀布絲帛者徵 如初。 帝堅意絕之。 給事 用 何資。」於是給事 中李侃等請詰 濂再疏諫。 天下 中御史劾濂失信於民,爲國斂怨, 不聽。 有司違詔故。 如故。 越三日釋之,削宮保,改工部。 初,帝卽位,韶免景泰二年天下租 三年二月,學士江淵以爲言,命 濂恐事敗,乃言:「銀布絲 未幾,上皇還 且許 吏部 其 陰

列

尙 ,書何文淵言理財非濂不可,乃復還戶部。 尋復條· 上節軍匠及僧道冗食共十事。五年卒官,以軍功追封沭陽伯,諡榮襄。 濂上疏自理,遂乞骸骨,帝慰留之。 東宮建,復

詘,頗厚斂以足用云。 濂 剛果有才,所至以嚴辦稱,然接下多暴怒。 在刑部持法稍深。 及爲戶部,值兵興財

石璞,字仲玉,臨漳人。永樂九年舉於鄉,入國學。 選授御史。

比明, 乎。」童子首實,果二道士匿婦槁麥中。立捕,論如法。 婦翁訟婿殺女,誣服論死。 正統初,歷任江西按察使。三年坐逸囚,降副使。 械囚趣行刑。未出,一童子窺門屏間。捕入,則道士徒也。叱曰:「爾師令爾偵事 蹼薦於神, 夢神示以麥字。蹼曰:「麥者, 兩人夾一人也。」 璞善斷疑獄。 在江西數年,風紀整肅,雖婦豎無不 民娶婦,三日歸寧,失

令官買辦,庶官用可完,民亦不擾。從之。 七年遷山西布政使。 明年,以朝廷歲用物料,有司科派擾民,請于折糧銀內歲存千

知石憲使者。

工部尚書王登以不能屈意王振,十三年致仕去。璞爲振所善,遂召爲尚書。 明年,處

州賊葉宗留作亂,總兵官徐恭等往討,以璞參其軍事。師未至,宗留已爲其黨陳鑑胡所殺。

巡撫張驥招降鑑胡,賊勢稍息。璞等逗遛無功,爲御史張洪等所劾,詔俟師旋以聞。

法司劾璞嘗賂英,遂并下璞獄,當斬,特宥之,出理大同軍餉。敵犯馬營,命提督宣府軍務。 已而景帝嗣位,召還。論功,兼大理寺卿。尋出募天下義勇,還朝。 會中官金英下獄,

至則寇已退,還理部事。加太子太保,給二俸。

殺水勢,決乃塞。璞還言:「京師盜賊多出軍伍,間有獲者,輒云『糧餉虧減,妻孥饑凍故』。 故。 夜行畫伏,艱苦萬狀。今邊疆未靖,宜增餉以作士氣,乃反減其月糧,此實啓盜悞國之端, 非節財足用之術。」帝深納其言。沙灣復決,璞再往治之。以母憂歸,起復。 又聞兩畿、山東、河南被災窮民多事剽掠,不及今拊循,恐方來之憂甚於邊患。口外守軍, 乃命内官黎賢等偕御史彭誼助之。于沙灣築石堤以禦決河,開月河二,引水益運河以 河決沙灣,命治之。璞以決口未易塞,别濬渠,自黑洋山至徐州,以通漕艘,而決口如

之。天順元年以捷聞。召還,命致仕。既而論功,賜鈔幣。四年冬用李賢薦,召爲南京左 都御史。時璞已老聵,不能任事。七年爲錦衣衞指揮僉事門達所劾罷,歸卒。 六年改兵部尚書,與于謙協理部事。明年,湖廣苗亂,命璞總督軍務,與南和伯方瑛討

永樂中鄉薦、歷山東左布政使,所至有惠政。 正統六年入爲工部侍郎,代

吳中爲尚書。歸家十五年卒。

汪琳中交通爲奸利,通劾奏,逮治之。三殿災,偕同官何忠等極陳時政闕失。忤旨,出爲交 羅通,字學古,吉水人。永樂十年進士。授御史,巡按四川。都指揮郭贇與清軍御史

**阯清化知州**。

例五分之二,則人自樂輸,餉足而兵不疲。」帝可之。 軍運一石,又當以騎士護行,計所費率二石七斗而致一石。今軍民多願輸米易鹽,請捐舊 若盡忠死。」乃與忠益固守。賊久攻不下,令降將察福說降,通登陴大罵。賊知城不可拔,引 去。及還京,宣宗大獎勞之。改戶部員外郎,出理宣府軍餉。 堅守,乘間破賊,殺傷甚衆。賊將遁而檄至,通曰:「吾輩殺賊多,出城必無全理,與就縛,曷 宣德元年,黎利反,王通戰敗,擅傳檄割清化迤南畀賊。己賊方圍清化,通與指揮打忠 奏言:「朝議儲餉開平,令每

所覺。 正統初,遷兵部郎中,從尚書王驥整飭甘肅邊務。 驥遣通奏邊情,即疏通罪。下獄,謫廣西容山閘官。已,調東莞河泊所官。 從破敵于兀魯乃還,以貪淫事爲驥

督僉事曹儉薦其有文武才,乞收用。 吏部執不可。

御史。 景帝監 也先犯京師、別部攻居庸甚急。天大寒,通汲水灌城,水堅不得近。 國,以于謙、陳循薦,起兵部員 外郎,守居庸關。 俄進郎中。 帝卽位, 七日遁走,追擊 進右 副都

他。 萬六千餘人。輦下且然,何況塞外。且韓信起自行伍,穰苴拔於寒微,宜博搜將士中如信 營務,俾專治部事。」疏下廷議。廷臣共言謙及石亭、楊洪實堪其任,又謂通志在滅賊,無 得六萬之多。通以爲濫,宜將臣及亭等陞爵削奪。 門外官軍升級,惟武清侯石亭功次册當先者萬九千八百餘人,及陣亡三千餘人而已,安所 與議也。」意蓋詆謙與石亨輩。 苴者,與議軍事。 調,飾詐以惑朝廷,遇賊數十輒稱殺敗數千。向者德勝等門外不知斬馘幾何,而獲官者至六 知兵用,不宜理院事 帝兩解之。 景泰元年召還。時楊洪督京營,命通參軍務兼理院事。言:「諸邊報警,率由守將畏徵 尋敕謙錄功,不得如從前冒濫,蓋因通言而發也。給事中厚浩等言通本以 若今腰玉珥貂,皆苟全性命保爵祿之人,憎賢忌才,能言而不能行,未足 ,乃解其兼職 |謙疏辨,言:「概責邊報不實,果有警,不奏必致悞事。 有如韓信、穰苴者,乞卽命指薦,幷罷臣 德勝

塞上軍民多為寇所掠。 通請榜諸邊能自歸者,軍免戍守三年,民復徭役終身。 叉請懸

列傳第

四

+

八

川形 封爵 乞敕廷臣各舉所知,命總兵官楊洪、副將孫鏜同臣考驗。」詔皆行之。 勢者可使導軍,能騰高越險者可使覘敵,能風角鳥占者可使備變。 重賞,募能擒斬也先、伯顏帖木兒、喜寧者。已,又言:「古之將帥務搜拔衆才, 今軍中未見其人, 如 知 川

懷來、宣府,以邊儲不敷,召還。六月,于謙以山西近寇,請遣大臣往鎮,楊洪亦乞遣重 日,奏乞躬往。 雁門關護餉大同。 宣府有警,總兵官朱謙告急。廷推都督同知范廣帥兵往,以通提督軍務。 帝不允,卒命通。 帝以命通。 通不欲行,請得與謙、洪俱。 通本謙所舉,而每事牴牾,人由是不直通 謙言國家多難,非臣子辭勞之 寇退, 臣從 駐師

計,寢通奏。 酬之。 年召還,仍贊軍務。 價增則後來益衆,此亦强中國弱外裔之一策。」帝以所貢馬率不堪用,若增價正墮賊 四年進右都御史,贊軍務如故。 東宮改建, 加太子少保。上言:「貢使攜馬四萬餘匹, 宜量 一增價

天順 初, 通好大言, 自陳預謀迎駕,恐爲石亭等所掩,乃授其二子所鎭撫。 遇人輒談兵。 自陳殺賊功, 求世襲武職,爲給事中王竑 三年致仕。 所劾。 成化六年卒。 帝 釋 不罪。

賜祭葬如例。

羅綺 磁州人。 宣德五年進士。 英宗即位,授御史,按直隸、福建有能名。

尙 贖,振改令錦衣衞再鞫。 擢 書于謙 綺 大 理 不法 正 右寺 統 事, 、金濂薦、召復故官、進右 九年參贊寧夏軍務。 丞 下總兵官黃眞覆覈。 ,參贊如故。 指揮同 常以事劾指揮任信、陳斌。 踰年當代,軍民詣鎮守都御史陳鎰乞留。 知馬順鍛錬成獄,謫 少卿,副李實使瓦剌 眞謂綺常詈宦官爲老奴, 戍遼東。 二人皆王振黨。 景帝立,綺訴冤,不聽。 以激怒振。 十 一 以聞,命復任。 召還京。 年 四月 ?,信、斌 法司 葬 用 擬

制 賊首卓勞糾他砦阿兒結等頻爲寇, ,綺搗水巢誅之。 上皇還,以勞擢刑部左侍郎。 又敗黑虎諸塞番,斬馘三百五十。 明年二月,出督雲南、四川 綺擒斬之。 土官王永、 在鎭七年,威名甚震 高茂林、 軍儲。 董敏 E, 相響殺, 代寇深鎮守松潘。 守將不能

史耿 黜。 約 局。 自京還, 奏上,捕綺下 九疇使之,幷下獄,降廣東參政。己為鞅鞅未赴。 憲宗立,赦爲民,還其資產。 天順初, 與綺 召爲左副都御史,以功賜二品祿。 言天子仍寵宦官 吏,坐死,籍其家,陳所籍財賄于文華門示百官,家屬戍邊,婦女沒入院衣 刻香木為王振 形 御史張鵬、楊瑄劾石亨。 以 交葬, 明年閏二月, 綺微笑云:「朝廷 綺鄉 亨謂綺 失政, 人告磁 與右 致 州 吾輩 同 都 知 降 酯 御

中。 **鎰等舉屬官出身掾吏者爲知府。自是掾吏不得歷知府,著爲例。英宗將北征,** 載道,固盡心振卹,盜賊弭散。還,卒於官。固在諫職敢言,大臣多被彈劾, 固 大理右少卿,鎭建昌。 復辟,追念之,已卒。遣使諭祭,官其一子。子臟,仕至廣西按察使。 改吏科,奉命撫裕州流民。景泰改元,給事中李實請於四川行都司設鎭守大臣, 時 與綺先後鎭四川者,張固,字公正,新喻人。宣德八年進士。 有政績。三年還理寺事。山東盜起,奉命督捕。適霖潦災,流人 正統初,授刑科給事 又劾都御史陳 偕同官疏

老皆言神爲祟,請復之。暄怒,不許,疾亦愈。歲大饑,陳牒上官,不俟報,輒發廩振貸 景泰時,賜敕爲吉安知府。俗尙巫,迎神無休日。暄遇諸途,投神水中。 俄 遗危疾, 父

<u>張瑄,字廷璽,江浦人。正統七年進士。授刑部主事,歷郎中,有能聲。</u>

周公轉 築廣州新會諸城垣一十二。民德瑄,惟恐其去。旣轉左布政使,會滿九載,當赴京,軍民相 瑄轉餉勞,賜銀幣,給俸如初。 居 八年,用薦擢廣東右布政使。廣西賊莫文章等越境陷連山,瑄擊斬之。又破陽山賊 圖新興賊鄧李保等。 旣而大藤峽賊頻陷屬邑,瑄坐停俸。成化初,韓雍平賊,錄 瑄按行所部,督建預備倉六十二,修陂塘圩岸四千六百,增

率乞留。巡撫陳濂等爲之請,乃仍故任。

首葉旺、葉春等負險。 民、振滯才十八事,所司多議行。 八年始以右副都御史巡撫福建。 瑄捕誅之,餘盡解散。 黄河水溢,瑄請振, 平城林壽六、魏懷三等。 帝降敕勞之,改撫河南。 且移王府祿米於他所,留應輸楡林餉 福安、壽寧諸縣鄰江、浙,賊 議事 入都, 陳撫流

濟荒,石取直八錢輸楡林,民稱便。

年,給事御史復劾之,遂落職。 還理院事。 尋遷南京刑部侍郎。 久之,進尙書。 孝宗立,復官,致仕。 二十年,星變,被劾,帝弗問。

鎭 是足 勸。」帝立報可,且命諸邊槪行之。 毎遇 軍 ?聖節,或進羊馬錦綺,交錯殿廷。 國哉?宜一切停罷,塞諂諛奔競之途。」疏凡四事,帝頗採用。 士 張鵬,字騰霄,淶水人。景泰二年進士。授御史。 一\敝衣菲食,病無藥,死無棺,乞官給醫藥棺槥,設義塚,俾饗厲祭,死者蒙恩,則生者 奏停潍、揚征賦,給牛種。 自非貧賄,安有餘財充進奉? 上疏言:「懷利事君,人臣所戒。 出按大同、宣府,奏、「 且陛下富有四海,豈藉 比 兩

天順 列 元 佴 年, 第 四 同官楊瑄劾石亨、曹吉祥。 + 八 張 瑄 燛 鵬 鵬亦偕劉泰、魏瀚、康驥論劾。 四三六七 俱得罪,下詔獄

誻 御史多謫官,而 鵬、瑄戍遼東。 頃之赦免,復戍南丹。 憲宗立,廷臣交薦,召復原官,尋超

擢福建按察使。

事。 改督 成 化四年,以右僉都御史巡撫廣西, |漕運、棄撫淮、揚四府。 **尋解漕務,專理巡撫事。** 剿蠻寇有功。其冬罷巡撫官, 復還南院,進副都御史,巡撫寧 命還理南京都察院

夏。召還,歷兵部左、右侍郎。

作威厲氣,請悉停其役。」詔可。尋加太子少保。 拨。 鵬等執不可。 執 不 鵬等言:「大同士馬四萬已足用,所請宜勿許。 可,帝竟許之。南北印馬,率遣勛臣、內侍,後以災傷止遣御史。是年,帝復欲遣內侍, 十八年代陳鉞爲兵部尚書。 帝勉從之,命俟後仍如故事。 守珠池宦官韋助乞往來高、肇、瓊、廉,會守巡官捕寇。 鎭守大同中官汪直言小王子將大舉,請發京兵 且京軍困營造,精力銷沮,猝有急,何以 鵬

餘 還。」廷臣 章瑾獻珍寶,得爲錦衣鎭撫。 人,乞悉令閒住,非軍功毋濫授。 輩專營私 鵬 初為 亦交以請,下兵部覆覈。 鵬循 (御史,剛直尙氣節,有盛名。 後數歷 ·職而已,不能有所匡救。 二十一年,星變,鵬偕僚屬言:「傳奉武 理刑缺,鵬所上不允。 鵬畏中官,不敢堅其議,帝逐盡留之。 四方鎭守、監槍、守備內官,非正統問原設者, 一中外,惟事安靜。羣小竊柄,閣臣 知帝意屬瑾,卽推用焉。 時論皆咎鵬。 萬安、 臺諫劾大 職至八百 悉宜召 奸 劉

彪 濫 報首 李裕,字資德,豐城人。 功, 詔 裕覈實。 彪從父序以書抵裕、裕焚之,以實聞。 景泰五年進士。 授御史。 天順中,巡按陝西,上安邊八事。 亨亦 旋敗。 由是有 强直聲。 石

寨七 十餘 以 方擢 裕 山東按察使。 捕戮其魁,縱脅從,除其逋負,亂遂平。 重 囚二百餘人,或經十餘年未判,裕旬月間決遣殆盡。 大峴山賊

都

御

史寇深遇僚屬嚴,惟裕不爲屈。

裕 在 撫 淮六歲 與 江 北 郎 成 化 中 諸 ,毎歳 楊恭等謀,易 府。 初, 遷陝西左布政使, 濬白塔、 入計 事,陳利病,多施行。 孟瀆 以石,遂爲永利。 二河以便漕。 入爲順天府 淮、 父憂歸,服除,留佐院 張秋 尹。 鳳方饑, 南 政聲 旺 及淮安西湖舊編木 一大著。 而 太僕徴 進右副都御史, 事 預 備 馬 二萬匹。 捏衝 激, 總督漕運兼巡 裕論 勞費無已。 罷之。

倪, 之。 奪俸。 御 史 九年代戴縉爲右 有過 叉 坐累, 一,或遭 調 **金捷**, 南京都察院。 都 御史。 由 是 得誇。 縉附 考績赴都,留爲工部尚書。 汪直, 汪直 敗, 嘗請復立 偕副 都御 西 史屠滽請 廠者也, 雪 在臺綱紀 一諸忤直得罪者。 不立。 裕 帝不 欲振

列

軟。乞立『才力不及』一途,以寓愛惜人才之意。」帝善之,遂著爲令。孝宗立,言官交章劾 事,考察目有四:日老疾,日罷軟,日貪酷,日不謹。裕言:「人材質不同。偏執類酷,遲鈍類 鄉人,乃協謀去耿裕,以裕代之。裕本廉介負時望,以孜省故,名頗損。其銓敍亦平。 俗進由改省。俗不平,爲辨誣録,連疏乞休去。正德中卒,年八十八。 初,吏部尚書尹旻罷,耿裕代之。以持正不爲萬安所喜。而李孜省方貴幸用事,欲引

可紀。書稱「與人不求備」,春秋之義善善長,則諸人固不失爲國家幹濟材歟。 贊曰:王彰等或以性行未純,爲時訾議。 綜其生平,瑕瑜互見。 然敭歷中外,勞績多有

#### 校勘記

(一) 擢吏科源士 吏科,原作「吏部」,據明史稿傳四四王彰傳、宣宗實録卷二七宣德二年四月己未

條改。

割清化迤南畀賊 九頁一三一一、萬曆武功録頁四一〇莫茂洽列傳改。 迤南,原作「迤西」,據宣宗實録卷二三宣德元年十二月甲子條、國権卷一 記

○□〕降廣東參政 廣東,明史稿傳四四羅絲傳、憲宗實録卷一天順八年正月己卯條、 國維卷三四頁

二一六四都作「廣西」。

縣屬肇慶府。

(日) 又破陽山賊周公轉 陽山,

明史稿傳五六韓雍傳附張瑄傳作「陽江」。陽山縣屬廣州府,

陽江

## 明史卷一百六十一

### 列傳第四十九

周 新 李昌祺 蕭省身 陳 士啓 應履平 林碩 況 鍾 朱勝

陳本深 羅以禮 **莫**愚 趙泰 彭勖 孫鼎 夏時 黄潤 无

葉錫 趙亮 劉實 陳選 夏寅 陳壯

## 張昺 宋端儀

楊瓚

王懋

諸生貢入太學。 周新,南海 人。 授大理寺評事,以善決獄稱。 初名志新,字日新。 成祖常獨呼「新」,遂爲名,因以志新字。 洪武 中以

其名怖小兒,輒皆奔匿。 成祖卽位,改監察御史。敢言,多所彈劾。 巡按福建,奏請都司衞所不得凌府州縣,府衞官相見均禮,武人爲 貴戚震懼,目爲「冷面寒鐵」。 京師 中至以

列

傅

第四

+

九

周

新

北京 之戢 行 改 部 或巡 按 北 京 按 詳 允 時 就遣, 令吏民罪徒流者耕北京閒田、監禁詳 以発淹滯。 從之。 且 一命畿 內罪 擬, 人應決者許 往復 待報 收 贖。 多 | 頻死。 帝 知 新 新 所 請 奏 從

無不允。

獨 廣 之。 商 劫 驟歸 市 滅 初,新 僧寺有之。 布, 還 金叢 所 朝, 視 私 印 卽擢雲南按察使。 祠 入 文 尙 石 境,羣蚋 匿 F, 合者捕鞫之, 寺去城遠,新意 妻所 歸 以語 迎馬頭,跡得死 聞 商 其 語 妻。 盡獲諸盜 未赴,改浙江。 ,夜取 僧殺人。 旦往求 之。 人榛 金不得, 中 發樹 妻 日 與所 一視事 身繫 冤民繫久,聞 、果見 私皆論 訴 小 ,旋 婦 木 於 新 即。 人屍。 風 死。 吹 新 新 葉 新 其 至,喜曰:「我得生矣。」至 召 鞫 墜 驗 他 案前 商 實,磔僧 即 一發奸摘 ٠, 妻訊之,果商 知 葉 死 伏 異 者故 门当此 他 商 樹 布 妻 暮 商 類 有 歸 詢 也 所 左右, 恐遇 密 果 私 令 雪

千 以 狀 廉 人, 聞 使名聞 告獄 新 累敗官 新 微 奏 天下。 服 吏 之。 行 日言 軍 部,件縣 夏原吉為 我按察使也。」令驚謝 新督兵捕之,列木栅諸港 令。 居 令欲拷治之,聞 任 解。 帝 命覆 罪, 劾罷 視 汊 廉 使且 得蠲 之。 賊陸走, 至,繫之獄 振 永樂十年 如新 追躡 言。 之桃源 嘉 浙 新 興 西 從 ,
繋以 賊 大 獄 倪 水,通政 中 弘三 詢 獻 諸 劫 囚 趙 當 旁郡 得得 居 是時 令 任 貪 黨 匿 周 數 汚

錦 衣 衛指揮紀綱使千戶緝事浙江,攫賄作威福 新欲按治之, 遁去。 頃之, 新齎文册

在道榜掠無完膚。 入京,遇千戶涿州,捕繫州獄,脫走訴於綱,綱誣奏新罪。 旣至, 伏陛前抗聲曰:「陛下詔按察司行事, 與都察院同。 帝怒,命逮新。 旗校皆錦衣私 臣奉詔擒奸

惡,奈何罪臣。」帝愈怒,命戮之。 臨刑大呼曰:「生爲直臣,死當作直鬼」,竟殺之。

矣。」後帝若見人緋衣立日中,曰「臣周新已爲神,爲陛下治奸貪吏」云。後紀綱以罪誅,事 他日,帝悔,問侍臣曰:「周新何許人。」對曰:「南海。」 帝嘆曰:「嶺外乃有此人, 枉殺之

益白。

易其 終日餒耶?」時時賙給之。 、衣飾。 妻有節操。 新死 無子。 新未遇時,縫紉自給。 妻歸,貧甚。 妻死,浙人仕廣東者皆會葬。 廣東巡撫楊信民曰:「周志新當代第一人,可使其夫人 及貴、偶赴同官妻內讌、荆布如田家婦。 諸婦慚,

侍 與右布政使蕭省身繩豪猾,去貪殘,疏滯舉廢,救災恤貧,數月政化大行。 事,人多就質。 郎魏源代。 李昌祺,名禛,以字行,廬陵人。 而是時河南大旱,廷臣以昌祺廉潔寬厚,河南民懷之,請起昌祺。 擢禮部郎中,遷廣西左布政使。 永樂二年進士。 。坐事謫役,尋宥還。 選庶吉士。 洪熙元年起故官河南 預修永樂大典,僻書疑 憂歸,宣宗已命 命奪喪赴

祺

列傳

第四

官、撫恤甚至。 正統改元,上書言三事,皆報可。 四年致仕。 家居二十餘年,屛跡不入公

府、故廬裁蔽風雨、伏臘不充。景泰二年卒。

願 以給父。 蕭省身,泰和人。 帝嘉而許之,後遂爲例。 與昌祺同舉進士。 居河南十二年,治行與昌祺等。 洪熙元年,布政考滿,當給誥命。 奏父年八十餘,

陳士啓,名雷,以字行,泰和人。永樂二年進士。 選庶吉士,擢禮部郎中。 尚書呂震險

**忮,屬吏皆憚之,承奉唯謹,士啓獨不少徇** 

山 數 饑民倍。 東右參政。 人手,其簡廷臣賢能者,分別用之。」於是諸曹郎、給事中出爲監司者二十餘人,而 十二年三月,東部言布、按二司多缺官。 士啓復 盡心吏事,不爲察察名。 上疏,先出粟予民,謂使者曰:「有罪吾獨任。」廷議竟從之。 督徭賦,不峻期約。 帝曰:「布政、按察,吾方岳臣,方數千里地 青州饑,疏請振 之粟。 使至,而 士啓得 懸

高 <u>煦</u>旣執,從薛祿、張本錄餘黨,撫安人民。 坐 唐 賽兒亂 下獄。 數月,釋還職。 高煦謀不軌,士啓自靑州暮 事竣,命清理 山東軍籍。 馳 宣德六年卒於官。 歸語三司,密聞於朝。

應履 平,奉化人。 建文二年進士。 授德化知縣。 歷官吏部郎中,出爲常德知府。

平抗疏言:「勘合之設,所以防詐偽。 合,下都司,不敢輒下衞。 宣宗. 初 ,擢貴州按察使。 至是軍府寖橫,使者挾關文四 所至祛除奸蠹 今右軍府遣發至黔者,不遵故事,小 一,數論時政。 馳,歷諸衞 舊制,都督府遣使於外,必領內勘 胶 軍 伍。 人憑勢橫求,詐冒 宣德七 年,履

何 從省。」宣宗善其言,都督陳政引罪。 帝令諸司永守之,軍府爲之戢。

軍萬

人,春秋更代,還多逃亡,則取原衞軍以補,不

逃

Щ

三雲鎭廣西以備蠻,歲調貴州

不數 者。 年,貴州軍伍盡空,邊釁 履平 奏「貴州 四境皆苗蠻,軍 且起。」帝乃 伍 虚,有急孰 命雲嚴責廣西諸衞,追還逃軍,俟足用,卽 與戰守? 今衞軍逃於廣西,而 以在 遺 衞 者補 歸 罷

日陳。雲大驚,引罪。帝宥之。

貴州

戍卒。

雲,名將,鎭粤有功,輕履平書生。

正統元年,履平劾雲弄權,擅作威福,帝令雲

便。 明 軍 年,上書言 ·衛糧 支於 四 事。 重慶,舟楫不 一,鎭遠六府,自湖廣改屬貴州,當食川鹽,去蜀道遠,仍食准鹽 通, 易就輕資多耗 費, 請以鎭遠秋糧輸湖廣 者就近支給。

,停黎平諸府 歲辦黃 八白蠟。 貴州初開,三司月俸止一石, 今糧 漸充裕, 請增給。 並

列傅

第四

+

九

陳

士啓

應

履

平

從之。

仕

歸。

請 者,入粟缺儲所贖罪。 令衞所官旂犯雜死及徒流者,俱送鎭將立功,期滿還伍,邊軍犯盜及土官民與官 時 方面以公事行部者,例不給驛。履平言僦車舟必擾民,請給驛便。 並從之。 三年遷雲南左布政使。 時麓川用兵,屢奏勞績。 又以軍伍不足, 旂 八年致 罪輕

林碩、字懋弘、閩縣人。永樂十年進士。授御史、出按山東。

耳。」立釋碩,復其官,敕責可烈。碩在浙久,人懷其惠。 法。 夜淬勵,思報上恩。小人不便,欲去臣,唯陛下裁察。」 中官誣碩毀詔書,被逮。 宣德初,按浙江。爲治嚴肅,就擢按察使。千戶湯某結中官裴可烈爲奸利,碩將繩以 傾叩頭言:「臣前爲御史,官七品。 帝動容曰:「朕固未之信,召汝面訊 **今擢按察使**,官三品。 H

及 任 而卒。 正 統三年誤引赦例出 其後寧波知府鄭珞劾可烈不法,可烈竟罷去。 人死,僉事耿定劾之。 逮訊,輸贖還職。 其冬遷廣東布政使,未

況鍾,字伯律,靖安人。初以吏事尚書呂震,奇其才,薦授儀制司主事。 遷郎中。

補 鍾用 五年,帝以郡守多不稱職,會蘇州等九府缺,皆雄劇地,命部、院臣舉其屬之廉能 尚書蹇義、胡濙等薦,擢知蘇州,賜敕以遣之。

鍾 儒 宜 者。 佯 |行,若止我;某事宜止,若强我行;若輩舞文久,罪當死。」立捶殺數人,盡斥屬僚之貪虐庸 蘇州 不省,左右顧問,惟吏所欲行止。 一府大震,皆奉法。踵乃蠲煩苛,立條敎,事不便民者,立上書言之。 賦 (役繁重,豪猾舞文爲奸利,最號難治。 東大喜,謂太守闇易欺。 越三日,召詰之曰:「前某事 鍾乘傳至府。 初視事,羣吏環立請判牒。

十 Ш 格 七 有 十七 ·四萬 畝 諸 :,然自是頗蠲減。 又言:「近奉詔募人佃官民荒田,官田準民田起科,無人種者除賦額。崑 本 徵至三石者,輕重 縣 身者千二百四十人。 淸 萬 九千餘石。 民 軍御史李立勾軍暴,同知張徽承風指,動以酷刑抑配平人。 九 以死徙從軍除籍者,凡三萬三千四百餘戶,所遺官田二千九百八十餘 千石有奇。 其他官田沒海者,賦額猶存,宜皆 不均如此。 其中民糧 屬縣逋賦四年,凡七百六十餘萬石。 止十五萬三千餘石,而官糧乃至二百六十二萬五千餘石, 洪、永間、令出馬役於北方諸驛,前後 如詔書從事。 鍾請量折以鈔、為 臣所領七縣,秋糧二百 鍾疏免百六十人,役止 四百餘匹,期三歲 頃,應減 部議 所 稅

列

傅

第

四

遣還,今已三十餘歲矣。馬死則補,未有休時。工部征三梭闊布八百匹,<br />
浙江十一府止百

匹,而蘇州乃至七百,乞敕所司處置。」帝悉報許

孅悉周密。 政,鍾皆協力成之。 當是時,屢詔減蘇、松重賦。鍾與巡撫周忱悉心計畫,奏免七十餘萬石。 嘗置二簿識民善惡,以行勸懲。又置通關勘合簿,防出納奸僞。 所積濟農倉粟歲數十萬石,振荒之外,以代民間雜辦及逋租。 置綱運簿,防 凡忱所行善 其爲政,

運夫侵盜。 先是,中使織造採辦及購花木禽鳥者踵至。郡佐以下,動遭笞縛。 置館夫簿,防非理需求。 興利除害,不遺餘力。 鋤豪强,植良善,民奉之若神 而衞所將卒,時凌

虐 小民。 鍾在, 斂跡不敢肆。 雖上官及他省吏過其地者,咸心憚之。

或爲匿名書毀亮。 鍾 雖 起刀筆,然重學校,禮文儒,單門寒士多見振贍。 鍾曰「是欲我速成亮名耳」, 立奏之朝。 有鄒亮者,獻詩於鍾。 召授吏、刑二部司務。 鍾欲薦 遷

御史。

甚恭,且令二子給侍,曰:「非無僕隸,欲籍是報公耳。」思忠家素貧,未嘗緣故誼有所干。 初, 鍾爲東時,吳江平思忠亦以吏起家,爲吏部司務,遇鍾有恩。至是鍾數延見,執禮

兩賢之。

鍾嘗丁母憂,郡民詣闕乞留。 詔起復。 正統六年,秩滿當遷,部民二萬餘人,走訴巡按

御史張文昌,乞再任。 韶進正三品俸,仍視府事。 明年十二月卒於官。 吏民聚哭,爲立祠。

鍾 剛正廉潔,孜孜愛民,前後守蘇者莫能及。 随之後李從智、朱勝相繼知蘇州,咸奉敕

李從智,宜賓人。

從事

,然敕書委寄不如鍾矣。

朱勝、金華人。勝廉靜精敏,下不能欺。 嘗曰「吏貪,吾不多受牒。 隸貪, 吾不行杖。

獄卒貪,吾不繫囚。」由是公庭淸肅,民安而化之。 居七年,超遷江南左布政使。

戶部郎中羅以禮知西安,兵部郎中趙豫知松江,工部郎中莫愚知常

初,與鍾同薦者,

州,戶部員外郎邵旻知武昌,刑部員外郎馬儀知杭州,陳本深知吉安,御史陳鼎知建昌 文淵知溫州,皆賜敕乘傳行。 何

人,亡匿,有司繫無辜十八人於獄。 陳本深,字有源,鄞 永樂初,由鄉舉入國子監。 本深以計獲盜,十八人皆免。 授刑部主事。 遷員 外郎。 善發奸。 畿內盜殺

與況鍾等同受敕爲 知府,本深知吉安。 吉安多豪强,好訐訟。 巨猾彭摶等十九人橫閭

列傳第四十

九

陳本

深

大盜曾子良據大盤山,衆萬餘。本深設伏大破之,斬子良。 里,本深遣人與相結。爲具召與飲,伏壯士後堂,拉殺之,皆曳其屍以出,一府大驚。

郡人肖像祀之。 聲,笑曰:「吾來時,乳下兒也。 今且嫁,我尙留此耶。」遂請老。前後守吉安十八年,旣去, 久之,民恥爭訟。 尤折節士人,飾治學宮,奏新先儒歐陽修、周必大、楊邦义、胡銓、楊萬里、 而 文天祥祠廟。正統六年,滿九載當遷,郡人乞留,詔予正三品俸。 本深爲政舉大綱,不屑苛細。大猾旣殲,府中無事。晨起,鼓而升堂,吏無所白, 間有所訟、呼至楊前、析曲直遣之、亦不受狀。有抑不伸者、雖三尺童子、皆得往白。 廨前民嫁女,本深聞鼓樂 輒鼓

有惠愛。歷三郡,凡二十七年,乃致仕。 不稱職,部民追思,乞以禮於朝。詔起復視事。 羅 以禮,桂陽人。永樂十三年進士。 由郎中知西安府。 歲滿,進秩復任。已,移知建昌。所至皆 遭喪,補紹興。 再以喪去。代

司以爲從論,當斬。愚疏言:「小兒依其父兄,非爲從比。令全家舟居,將舉家坐耶。」宣宗 嚴核上官薦劾之實。皆報可。郡民陳思保年十二,世業漁。其父兄行劫,思保在舟中,有 莫愚,臨桂人。由鄉舉,以郞中出知常州。 奏請減宜興歲進茶數,禁公差官凌虐有司,

建寧朱子故宅,有祠無祭。 非巫者,五郎非邪神,初捐地築城人也,事載郡志中。 官弟子率禱祀,勖撤而焚之。 魘魅,以舍旁 童五郎祠爲徵。 工部郎中,命塞東昌決河。、忱薦爲協同都運,益勤其職。 濬孟瀆、得勝二河,作魏村閘。 命釋之,謂廷臣曰:「爲守能言此,可謂有仁心矣。」正統六年秩滿,郡民乞留, 諸生翕然嚮學。 永樂十三年舉進士。 與愚同時爲同知者,潞城趙泰,字熙和。 韶進二階復任。 字祖期,永豐人。七歲,入佛寺不拜。 + 九 彭 親老,乞近地以養,除南雄府教授。學舍後有祠,數現光怪。 勖 勖疏請春秋祭,蠲子孫徭。 又創尊賢堂,祀胡安國、蔡沈、眞德 增怒,置序家七人重罪,下近祠居民獄四百家。 滿考,補建寧教授。 周忱、況鍾議滅蘇州重糧、泰亦檢常州官田租、請並滅之。遷 由鄉舉入國子監。 副使王增有疾,醫者許宗道誣諸生游亨 僧强之, 叱曰:「彼不衣冠而袒跣, 何拜 增愕,索圖經證之,大慚悔,事得解。 亡何,疾卒。 歷事都察院,授常州同知 四三八三 勖抗論游氏 巡撫周忱以

彭勖,

列 傳

第 四 聞。

振。 罷 賢墳祠。 厚軫恤。 給 以直不容於時,致仕歸。 僧尼度牒。」又言:「真定、保定、山東民逃鳳陽、潁州以萬計,皆守令匿災暴斂所致,乞 疏言:「國朝祠祭,載在禮官。 正 統 守令課績,宜以戶口 母憂歸,以孫鼎代。 元年,以楊士奇薦,召授御史。時初設提學官,命督南畿學校。 **勖起復,改吏部考功郎中,出爲山東副使。 土木之變,數言兵** 增耗爲殿最。」又請設南京諸衞武學。 修齋起梁武帝,設醮起宋徽宗,宜一切除之。禁立庵院, 皆報可。 詳立教條,士風大 所至葺治先

諸門。 僧、閱,學繼侏、程,宜起居論思之職。」帝不允。天順元年卒於家。 狩,鼎試罷,謂諸生曰:「故事當簪花宴,今臣子枕戈之秋,不敢陷諸君不義。」 設茗飲,步送 乙。諸生試歸,榜已揭通衢,請託者無所措手。 學政。 孫鼎,字宜鉉,廬陵人。 置本源錄,錄諸生善行。行部不令人知,單輿猝至。諸生謁,輒閉門試之,卽日定甲 旣而詣闕上書,請隨所用效死。 永樂問舉人。歷松江教授。正統八年,楊溥薦爲御史,董南畿 不報。 未幾,以親老致仕。 通州旱饑,奏蠲糧三千四百餘石。 知府張瑄疏言。『鼎孝追 英宗北

夏時,字以正,錢塘人。永樂十六年進士。授戶科給事中。

帝思時言,命侍皇太子祀孝陵,所過有災傷,輒白太子,發粟以振。留署南京戶科。 洪熙元年議改鈔法。時力言其擾市肆,無裨國用,疏留中。 鈔果大沮,民多犯禁,議竟

命覈後湖黃册,陳便宜十四事。邳、徐、濟寧、臨淸、武淸旱,以時請,遣官振之。 宣德初,一日三上封事。稱旨,命署尚寶司,兼理吏、禮、兵、刑四科,視七篆,無留事。 尋擢江西

愈 事

時,進知州柯暹所撰教民條約及均徭册式,刊爲令,人皆便之。 逮按枉法官吏。」從之。遷參議。七年奏恤民六事,多議行。十二年以大臣薦,超擢廣西左 布政使。前後所上又十餘疏,雖不盡用,天下壯其敢言。年未七十,致仕歸,卒。其爲僉事 正統三年奏:「今守令多刻刑無辜,傷和干紀。乞令御史、按察司官遍閱罪囚,釋冤滯,

黃潤玉,字孟清,鄞人。五歲,侍母疾,夜不就寢。十歲,道見遺金不拾。永樂初,徙南 時爲人廉潔好義。親歿、廬墓有異徵。歿而鄉人祀之,名其祠曰「孝廉」。

夏 時 黄 潤 玉

列傳第四十九

方富民實光京,潤玉請代父行,官少之。 對曰:「父去,日益老,兒去,日益長。」官異其言,

許之。

十八年舉順天鄉試。授建昌府學訓導。父喪除,改官南昌。 宣德中,用薦擢交阯道御

史。出按湖廣、斥兩司以下不職者至百有二十人。

妄掠子女萬餘口,潤玉劾而歸之。 正統初,詔推舉提學官。 以楊士奇薦,擢廣西僉事,提督學政。 副使李立入民死罪至數百人,亦爲辨釋。 時寇起軍興,有都指揮 南丹衞處萬山

以年老歸。 母憂歸,起官湖廣。 歸二十年,年八十有九卒。 論罷巡撫李實親故二人。實憤,奏潤玉不諳刑律,坐謫含山知縣。 學者稱南山先生。

中,成卒冒瘴多死,爲奏徙夷曠地

額。 孫多犯令。瓚請立戶稽出入,由是始遵約束。瓚言民間子弟可造者多,請增廣生員 計天下羣吏,始命舉治行卓異者,瓚及王懋、葉錫、趙亮等與焉。 禮部採瓚言,考取附學。天下學校之有附學生,由瓚議始。 楊瓚,蠡縣人。永樂末進士。 知趙城縣,課績爲山西最,超擢鳳陽知府。 鳳陽帝鄉,勛臣及諸將子 正統十年大 毋限

擢浙江右布政使。與鎮守侍郎孫原貞共平陶得二之亂。景泰二年, 瓚以湖州 諸府官

田 賦 重,請均之民田賦輕者,而嚴禁詭寄之弊。 詔與原貞督之,田賦稱平。 久之,卒官。

王懋、修武 人。 永樂末進士,爲海豐知縣。 後超擢西安知府,亦有聲。

宴賚。 詣 闕頌錫,乃令視事 葉錫 時人以爲榮。 永嘉 人。 宣德 如故,抵誣者罪。 秩滿,擢知本縣。 五年進士。 爲吳縣知縣,舉卓異遷。 尋擢寧國知府。 而趙亮爲慶雲典史,亦在舉 奸民計於朝,將逮繫,吳人羣 中,同被

判。 劉實, 仍歲荒旱,請蠲 字嘉秀,安福人。 租,且贖還饑民子女。 宣德五年舉進士。 義門鄭氏族大,不能自 居三年,選庶吉士。 給, 又買馬出丁, 供山 正統初, 授金華府通 兀

郵傳,困甚,亦以實言獲免。 母喪歸,廬墓 三載,起順天府治中。

稍 遜。 景泰時,侍臣薦其文學。 然頗 自是。 見同曹所纂不當,輒大笑,聲徹廷陛,人亦以此忌之。 召修宋元通鑑綱目。 實爲人耿介,意所不 可,雖達官貴人不

入譖言, 天順 府僚參謁, 初,還原任。 留實 四 年擢 折辱之, 知南雄府。 民競前擁之出。 商稅巨萬,舊皆入守橐,實無所私。 中官慚,將召謝之,實不往。 中官 中官去,至 至南雄,

列

傅

第四

十

九

楊

쨥

劉實

四三八七

使。」帝覽書,意稍解,且釋之,而實竟瘐死 上書言:「臣官三十年,未嘗以妻子自隨,食麤衣敝,爲國家愛養小民,不忍困之,以是忤朝 州 聞韶 人言南雄守且訟於朝矣,懼, 馳奏,誣實毀敕,大不敬,逮下詔獄 0 實從獄中

丙 自有傳。 實 苦節自持。 政務紛逐,未嘗廢書, 士大夫重其學行。 其歿也,南雄人哀而祠之。 孫

賄,都督范雄病不能治軍,皆劾罷之。 而 四十餘人。 福建亦寇盜甫息,員韜所至,拊循敎養,得士民心。 陳選,字士賢,臨海人。父員韜,宣德五年進士。 正統末,大軍征鄧茂七,往撫其民,釋被誣爲賊者千餘家。 歷廣東右參政,福建右布政使。 爲御史,出按四川,黜貪獎廉,雪死 廣東值黃蕭養 都指揮蔣貴 要所部 一亂後, 囚

黜貪殘 選 吏。 自 幼 時人語曰:「前有韓雍,後有陳選。」廣寇流入赣州,奏聞,不待報,造 端慤寡 言笑,以聖賢自期。 |天順 四年會試第一,成進士。 授御史,巡按江西,盡 兵平之。

不 盡行,一 憲宗 即位 時憚其風采。 了<br />
嘗劾尚書馬昂、<br />
侍郎吳復、鴻臚卿齊政,救修撰羅倫, 已,督學南畿,頒冠、婚、祭、射儀於學宮,令諸生以時肄之。 學士倪謙 錢 溥。 作小 言 雖

學集註以敎諸生。 按部常止宿學宮,夜巡兩廡,察諸生誦讀。 除試牘糊名之陋,曰:「己不

自信,何以信於人。」

獨長揖。 成化六年遷河南副使。 直問何官,選曰:「提學副使。」直曰:「大於都御史耶。」選曰:「提學何可比都御史, 尋改督學政,立教如南畿。 汪直出巡,都御史以下皆拜謁,選

所假。 但忝人師,不敢自詘辱。」選詞氣嚴正,而諸生亦羣集署外。直氣懾,好語遣之。 久之, 進按察使。決遣輕緊數百人, 重囚多所平反, 囹圄爲空。 然受賂百金以上者,坐六七鐶而止。或問之,曰:「奸人惜財亦惜命,若盡挈所賂以 治尙簡易,獨於贓吏無

貨要人,卽法撓矣。」歷廣東左、右布政使。肇慶大水,不待報,輒發粟振之。

以進。選疏言不可許,恐遺笑外番,輕中國。帝納其言,而眷憾選甚。 許之,選立逐之去。撒馬兒罕使者自甘肅貢獅子,將取道廣東浮海歸,云欲往滿喇加更市 命與其半,眷由是怒選。番人馬力麻詭稱蘇門答刺使臣欲入貢,私市易。眷利其厚賄,將 二十一年詔減省貢獻,而市舶中官韋眷奏乞均徭戶六十人添辦方物。 選持詔書爭,帝

令誣証選。 襲堅不從,執裴拷掠無異辭。 行、同愛畏眷,竟坐選如眷奏,與瑤俱被徵。 士民 爲貪墨。詔遣刑部員外郎李行會巡按御史徐同愛訊之。選有所黜吏張褧,眷意其怨選,引 先是,番禺知縣高瑤沒眷通番資鉅萬,選移檄獎之,且聞於朝。至是眷誣奏選、瑤朋比

四三九〇

數萬號泣遮留,使者辟除乃得出。 至南昌,病作。 行阻其醫藥,竟卒。 年五十八。

編 修 張元禛爲選治喪,殮之。 **褧聞選死,哀悼,乃上書日** 

本小 **姜爲夏姬,詬伯夷爲莊蹻也。** 心。 御史宋旻及同愛怯勢養奸,致眷横行胸臆,穢衊淸流。 地。 傍眷語,文致其詞,劾選勘災不實,擅便發倉,曲庇屬官,意圖報謝。 **眷知臣不可誘,嗾行等逮臣致理,拷掠彌月。** 吏, 詿誤觸法, 太監眷通番敗露,知縣瑤按法持之。 臣聞 口能鑠金,毁足銷骨。 被選黜罷,實臣 竊見故罪人選,抱孤忠,孑處羣邪之中,獨立衆憎 自取。 選移文獎厲,以激貪懦,固賢監司 **眷意臣憾選,厚賂噉臣,臣雖胥役,敢昧素** 臣忍死籲天,終無異口。 勘官行頤指鍛煉,竟無左証 必如所云,是毁洪 事 行等乃依 也。 更更 之 都

非 聞 之日,密走報眷,小人佞毒,一 有 知。 他 頃年嶺外地震水溢,漂民廬舍,屬郡交牒報災,老弱引領待哺,而撫、按、藩臬若問 也。 選獨 選故 抱隱憂,食不 剛正,不堪 下咽。 屈辱,憤懣. 至於此!臣擯黜罪人,秉耒田野,百無所圖,誠痛忠良銜 謂展轉行勘,則民命垂絕,所以便宜 旬日,嬰疾 而 殂。 行幸其殞身,阻其醫療。 議振, 志在 L 救 民 訖 命

屈,而爲聖朝累也。

|戴不可而止。|弘治初,主事||林沂疏雪選冤,詔復官禮葬。||正德中,追贈光祿卿,諡忠愍。 員韜德性,四時皆備,選得其秋焉。嘗割田百四十畝贍其族人,暨卒,族人以選子戴貧還之, 員韜父子皆持操甚潔。而員韜量能容物,選務克己,因自號克菴,遇物亦稍峻。人謂

夏寅,字正夫,松江華亭人。正統十三年舉進士。授南京吏部主事。力學,爲文以宏

奧稱。進郞中。

聲勢聯絡,倉猝可以制變。」章下所司行之,唯不設文武官。 淮、徐、濟寧軍士,赴京操練,然其地實南北要衝,宜各設文武官鎮守,訓兵屯田,常使兩京 撫,蠲租發廩。沿途貢船,丁夫不足,役及老稚。而所載官物僅一箱,餘皆私齎,乞嚴禁絕。 成化元年考滿入都,上言:「徐州旱澇,民不聊生,饑餒切身,必爲盜賊,乞特遣大臣鎭

檄招之,衆皆解散。 久之,進山東右布政使。 弘治初,致仕歸。 遷江西副使,提督學校。其敎務先德行。進浙江右參政。 處州民苦虐政,走山谷。寅

寅清直無黨援。嘗語人曰:「君子有三惜。此生不學,一可惜。此日閒過,二可惜。此

列傅第四十九 夏寅

身一敗,三可惜。」世傳爲名言。

書陳翌請以馬豆代百官俸,壯言飼馬之物,不可養士大夫。 八年進士,授南京御史。編修章懋等建言得罪, 陳壯,字直夫,日其先浙江山陰人。 祖坐事謫戍交阯,後調京衛, 抗疏救之。 事乃寢。 帝遣中官采花木,復疏諫。 遂家焉。 壯舉天順 尙

致仕。 家居十餘年,弘治中,以尚書張悅薦,起官福建。 之,擢河南副使。 壯家素寠,常祿外一無所取。父母歿,廬墓側,居喪一循古禮。 巡撫孫需奏留之。又二年,竟致仕去。 歲荒振饑,民懷其惠。 愈都御史林俊謝病,舉以自代。 居二年,又乞致仕。 時倪岳爲吏部,素賢 歷江西僉事,致仕歸。 未及遷,而壯叉乞

流出 言樹 獄。 樹間。 有 張昺,字仲明,慈谿人,都御史楷孫也。 有嫁女者,及壻門而失女,互以訟於官,不能決。 神巢其巔。 昺不聽,率衆往伐。 。有衣冠三人拜道左。昺叱之,忽不見。 巢中墮二婦人, 言狂風吹至樓上。 舉成化八年進士,授鉛山知縣。 昺行邑界, 見大樹妨稼, 其一卽前所嫁女 性 欲伐之。 比伐樹,血 剛 明, 善治 民

列傳第四十九 陳壯 張昺

隍神。 也。」爲文以祭,改葬焉,天遂大雨。諸異政多類此。 跪之。 湯藥者。 虎伏不動,房射殺之,以畀節婦,一縣稱神。鉛山俗,婦人夫死輒嫁,有病未死,先受聘供 也。 鞭之,立死。 有巫能隱形,淫人婦女。 民傅四妻祝誓死守,舅姑給令跪「羞」木下,昺判從之,就投後園池中死。邑大旱,昺 及期,二虎伏庭下,昺叱曰:「孰傷吾民,法當死。無罪者去。」一虎起,斂尾去。 乃盡毁諸淫祠。 寡婦惟一子,爲虎所噬,訴於昺。曷與婦期五日,乃齋戒祀城 局執巫痛杖之,無所苦。已,並巫失去。<br/>
局馳縛以歸,印巫背

矣,仍聞有蟒衣牛斗之織,淫巧其漸作乎? 端 莊 學將怠之漸也。 衣 復興之漸 田 捶楚之辱,是言路將蹇之漸也。經筵旣舉矣,而封章累進,卒不能回寒暑停觅之說,是聖 詩云『靡不有初,鮮克有終』,願陛下以爲戒。」帝嘉納之。 又 擢 、賜皇親,是驕縱姻婭之漸也。左道雖斥,而符書尙揭於官禁,番僧旋復於京師,是異 南京御史。 也。 內倖雖斥梁芳,而賜祭仍及便辟,是復啓寵倖之漸也。外戚雖罪萬喜,而 傳奉雖革,而千戶復除張質,通政不去張苗,是傳奉復啓之漸也。織造停 弘治元年七月偕同官上言「邇臺諫交章論事矣,而扈蹕糾儀者不免錦 寶石廢矣,又聞有戚里不時之賜,珍玩其漸崇

吉銜之。 下!」再疏爭,言官亦論救。 下內閣, 先是,昺以雷震孝陵柏樹,與同官劾大學士劉吉等十餘人,給事中周紘亦與同官劾吉, 吉修隙, 其冬,昺、紘 擬黜之外。 奉 命閱軍,軍多缺伍,兩人欲劾奏守備中官蔣琮 乃調 尚書王恕抗章曰:「不治失伍之罪,而罪執法之臣,何以服天 昺南京通政司 經歷,紘南京光祿 寺署丞 ,琮先事劾兩 人。

令鉛 娛。 守備 炊烟屢絕,處之澹如。 都 川 中官某將 所 御史王璟以振荒至, 之,昺用薦遷 取 士也,旦夕候起居,爲具蔬食。 進術 士周慧於朝,昺擒慧,論徙之極邊。 四 及卒,含斂不具,洪爲經紀其喪。 川僉事。 飽昺百金。 富豪殺 人,屢以賄免。 堅拒不得,授下戶饑民粟以答其意。 昺曰:「吾誠不自給,奈何以此煩令君。」卒弗受。 歲餘,引疾歸。 御史檄昺治,果得其情。 環 堵蕭然,擁經史自 知 縣丁洪,昺 尋進副使。

(儀) 吏先期洩之。 宋端儀,字孔時,莆田 端儀 Ħ 人。 啓事未登,已喧衆口, 成化十七年進士。 人 官禮部主事。 (其謂我干乞乎!」力辭之。 雲南缺提學官, 已,進主 部議屬端 一客員

外郎,貢使以贄見,悉却不納。

初 在國學,爲祭酒丘濬所知。 及濟柄政,未嘗一造其門。 廣東提學缺,部以端儀名上,

潛竟沮之。 濬卒,始以按察僉事督廣東學校。

端儀慨建文朝忠臣湮沒,乃搜輯遺事,爲革除錄。 卒官。 建文忠臣之有錄,自端儀始也。

能於其職。 以見公正之服人者至,而直道之終不泯也。 者,比比也。 重內輕外之勢成矣。 贊曰: 明初重監司守牧之任。 所謂承宣德化,爲天子分憂者,非耶? 守牧稱職,增秩或至二品。 夫賦政於外,於民最親。 尚書有出爲布政使,而侍郞爲參政者,監司之入爲卿貳 天順而後,巡撫之寄專,而監司守牧不得自展布, 李昌祺、陳本深之屬,靜以愛民,況鍾、張昺 周新、陳選,冤死爲可哀。 讀張褧書,又

#### 校勘記

陳壯字直夫 直夫,原作「直大」,據明史稿傳四六陳壯傳、國朝獻徵錄卷九二陳公壯傳改。

記

# 明史卷一百六十二

### 列傳第五十

尹昌隆 耿通 陳諤 戴綸 林長懋 陳祚 郭循 劉 球 子鉞

釪

子源 盛顋等

陳鑑

何觀

鍾同

孟玘

楊集

章綸

子玄應

廖莊

尹昌隆,字彥謙,泰和人。洪武中進士及第。 倪敬 盛晁等 楊瑄

惠帝初即位,視朝晏。

昌隆疏諫曰:「高皇帝雞鳴而起,昧爽而朝,未日出而

臨百官,故

授修撰,改監察御史。

社 能 日 一稷福 Ŀ 庶績咸熙,天下乂安。 數刻,猶未臨朝。 也。」帝曰:「昌隆言切直,禮部其宣示天下,使知朕過。」未幾,以地震上言,謫福寧知 羣臣宿衞,疲於伺候,曠職廢業,上下懈弛。 陛下嗣守大業,宜追繩祖武,兢兢業業,憂勤萬幾。今乃卽於晏安, 播之天下,傳之四裔,非

四三九七

列

傅 第

五.

+

尹

昌

隆

舉位 縣。 遊譲之。 燕兵既 若沈吟不斷,進退失據,將求爲丹徒布衣且不可得。 逼,昌隆以北來奏章動引周公輔成王爲詞,勸帝罷兵,許王入朝。 成祖入京師,昌隆名在奸 設有蹉跌,便

臣

中,以前奏貸死,命傅世子於北平。

昌隆 下 葬 密謀深計,官屬相戒,無敢白事者。 同 詔 遇赦復官。 日 獄者率輿以從,謂之隨駕重囚,昌隆與焉。 退白太子,取令旨行之。 改昌隆禮部主事。 永樂二年册世子爲皇太子,擢昌隆左春坊左中允。 父憂起復,謁震,震溫言接之。 **尙書呂震方用事,性刻忮。當其獨處精思,以手指刮眉尾,則必有** 震大怒,奏昌隆假托宮僚,陰欲樹結,潛蓄無君心。 昌隆前白事,震怒不 入理前奏,復下錦衣衞獄,籍其家。帝凡巡幸, 隨事匡諫,太子甚重之。解縉之黜, 應。 移時又白之,震愈怒,拂衣起。 逮 下獄。

[震 行打之。 後 数年 獄具,置極刑死,夷其族。 ,谷王謀反事發。 以王前奏昌隆爲長史,坐以同謀,詔公卿雜問。 後震病且死,號呼「尹相」,言見昌隆守欲殺之云。 昌隆辯不已,

直 一敢言。 耿 通 嘗劾都御史陳瑛,御史袁綱、覃珩朋比爲蒙蔽,搆陷無辜,綱、珩已下獄,暎長官, ,齊東人。 洪武中舉於鄉。授襄陽教授。 永樂初,擢刑科給事中,歷左右給事。剛

四三九九

宋禮不卹下,匠役滿,不卽遣歸,多至失所。一暎等皆被鐫責。當是時,給事中敢言者,通與 不宜獨宥。又言驍騎諸衞倉壞,工部侍郎陳壽不預修,糧至無所受,多損耗病民,工部尚書

陳諤,舉朝憚其風采。久之,擢大理寺右丞。

之極刑。」廷臣不敢爭,竟論姦黨,磔死。 言通受請托故出人罪者。帝震怒,命都察院會文武大臣鞫之午門,曰:「必殺通無赦。」羣臣 事,率多更置。通從容諫帝:「太子事無大過誤,可無更也。」數言之。帝不悅。十年秋,有 如旨,當通罪斬。帝曰:「失出,細故耳,通爲東宮關說,壞祖法,離間我父子,不可恕,其置 帝北巡,太子監國。漢王高煦謀奪嫡,陰結帝左右爲讒間,宮僚多得罪者。 監國所行

嘗言事忤旨,命坎瘞奉天門,露其首。七日不死,赦出還職。已,復忤旨,罰修象房。貧不 避。每奏事,大聲如鐘。帝令餓之數日,奏對如故。曰:「是天性也。」每見,呼爲「大聲秀才」。 能僱役、躬自操作。適駕至、問爲誰。一譯匍匐前、具道所以。帝憐之、命復官。 陳諤,字克忠,番禺人。永樂中,以鄉舉入太學,授刑科給事中。 遇事剛果,彈劾無所

位,遇赦當還故官。 歷任順天府尹,政尙嚴鷙,執政忌之,出爲湖廣按察使。改山西,坐事落職。仁宗卽 帝以諤前在湖廣頗摭楚王細故,謫海鹽知縣。遷荆王長史,爲王府所

列傳

厭苦。宣德三年遷鎭江同知。致仕歸,卒。

爲帝言之。 好之,時出騎射。 中允、渝德。仁宗卽位,太孫爲太子,遷洗馬,仍侍講讀。 戴綸,高密人。 他日,太孫侍,帝問三宮臣相得者誰也。」太孫以編對。 倫與長懋以太孫春秋方富,不宜荒學問而事游畋,時時進諫。 永樂中,自昌邑訓導擢禮科給事中,與編修林長懋俱侍皇太孫說書。歷 始成祖命太孫習武事, 因出編奏付之,太孫由 太孫亦雅 綸又具疏

長懋者,莆田人。 以鄉薦歷靑州教授,擢編修。 仁宗初,進中允。爲人剛嚴,累進直言,

與綸善。

此怨綸。

辯,觸帝怒,立箠死,籍其家。 自南京來,後至,亦出爲鬱林知州。 宣宗卽位,加恩宮僚,擢編兵部侍郎。 諸父河南知府賢、太僕寺卿希文皆被繫。 無何,坐怨望,並逮至京,下錦衣衞獄。 頃之,復以諫獵忤旨,命參贊交阯軍務。 帝臨鞫之,綸抗 而長懋

而長懋在獄十年,英宗立,乃得釋。 復其官,還守鬱林,有惠政。 其卒也,州人立廟

祀之。

第五十 戴綸 陳祚

列

傳

言建都北京非便,並謫均州太和山佃戶。躬耕力作,處之晏然。仁宗立,詔選用遷謫諸臣, 陳祚,字永錫,吳人。 永樂中進士。 擢河南參議。十五年與布政使周文褒、王文振合疏

祚在選中。 會帝崩,不果用。

面 大 東多被彈擊,禁止和買,閩人德之。還奏白塔河上通邵伯湖,下注大江,蘇、松舟楫,多 宣德二年命憲臣卽均州羣試之,祚策第一。試吏部,復第一。遂擢御史,巡按福建。方

從往來,淺狹凐塞,請開濬。從之,轉漕果便。尋出按江西。

蕩 聖 晰。 至此, **逮其家人十餘口,隔別禁繫者五年,其父竟瘐死。其時,刑部主事郭循諫拓西內皇城修雕** 讀書。 無得 間 真德秀大學衍義一書,聖賢格言,無不畢載。願於聽政之暇,命儒臣講說,非有大故, 時 心者自見疎遠,天下人民受福無窮矣。」帝見疏大怒曰:「豎儒謂朕未讀大學耶!薄朕 不可不誅。」學士陳循頓首曰:「俗士處遠,不知上無書不讀也。」帝意稍解。下祚獄, 斷。 陛下雖有聖德,而經筵未甚興舉,講學未有程度,聖賢精微,古今治亂,豈能周知洞 天下承平,帝頗事遊獵玩好。

祚馳疏勸勤聖學。其略曰:「帝王之學先明理,明理在 使知古今若何而治,政事若何而得,必能開廣聰明,增光德業,而邪佞之以奇巧

四四〇二

宮,逮入面詰之。 循抗辯不屈,亦下獄。 英宗立,祚與循皆得釋復官。

尋改南京,遷福建按察使僉事。 舉 振 概杖之。 非 用事,法務嚴峻,祚上言:「乃者法司論獄,多違定律。 其 祚再按湖廣。 人律,乃坐以奏事有規避律斬。 一事如此,餘可推矣。 以奏遼王貴烚罪有所隱,與巡撫侍郎 天時不順,災沴數見,未必非此。」帝是之,以其章示法司 有威惠,神 及輒自經死,獄官獄卒罪應遞減,乃援 祠 不載祀典者悉撤 吳政逮至京,下獄。 如侍郎吳璽誤舉主 去。 **外之,以疾歸,卒。** 事吳軏,宜 尋赦出。 不應為 重罪 時圧

日 不舉火。 祚 天資嚴毅,雖子弟罕接其言笑,獨重里人邢量。 **祚數挾册就質疑,往往至暮。** 量博學· 士,隱於卜, 敝屋敷椽,

郭循,字循初,廬陵人。 居官有才譽。 旣復職,進郎中,以尚書魏源薦,擢廣東參政,有

剿寇功。景泰初卒。

淡薦特經筵,與修宣宗實錄,改翰林侍講。 劉 球,字廷振,安福 人。 永樂 十九年進士。家居讀書十年,從學者甚衆。授禮部 從弟毗知莆田,遺一夏布。 球封還,貽書戒之。 主事。胡

不 克,退修德教以待其降。至於玁狁,則命南仲城朔方以備之。漢征南越不利, 帝王之馭四裔,必宥其小而防其大,所以適緩急之宜,爲天下久安計也。 周伐崇 卽罷

兵賜書通好。至於匈奴,雖已和親,猶募民徙居塞下,入粟實邊,復命魏尚守雲中拒之。 今麓川**碊寇思任發素本羈屬,以邊將失馭,致勤大兵。雖渠魁未殲,亦多戮羣**醜,

險 謂宜緩天誅,如周、漢之於崇、越也。 欲屯十二萬衆於雲南,以趣其降,不降則攻之。不慮王師不可輕出,蠻性不可驟馴,地 爲誅爲舍,無繫輕重。璽書原其罪釁,使得自新,甚盛德也。邊將不達聖意,復議大舉, 不可用衆,客兵不可久淹。況南方水旱相仍,軍民交困,若復動衆,紛擾爲憂。 臣竊

卒 ·然有警,何以爲禦?臣竊以爲宜愼防遏,如周、漢之於玁狁、匈奴也。 至於瓦剌,終爲邊患。及其未卽騷動,正宜以時防禦。逎欲移甘肅守將以事南征,

害,結木邦諸蠻以爲援,乘間進攻,因便撫諭,寇自可服。 視,濬築溝垣,增繕城堡,勤訓練,嚴守望,以防不虞,有備無患之道也。 伏望陛下罷大舉之議,推選智謀將帥,輔以才識大臣,量調官軍,分屯金齒諸要 至於西北障塞,當敕邊臣巡

皇下兵部。謂南征已有成命,不用)球言。

列

傳

第五十

劉球

八年五月雷震奉天殿。球應詔上言所宜先者十事。其略曰:

宗日視三朝,時召大臣於便殿裁決庶政,權歸總於上。皇上臨御九年,事體日熟,願 務使學問功至,理欲判然,則聖心正而天心自順。夫政由己出,則權不下移。太祖、太 古聖王不作無益,故心正而天不違之。臣願皇上勤御經筵,數進儒臣,講求至道,

守二聖成規,復親決故事,使權歸於一。

自爲計。勿輒繫,庶不乖共天職之意。 以待大臣也。自今擇任大臣,宜允愜衆論。 死。今用大臣未嘗皆出公論,及有小失,輒桎梏箠楚之。然未幾時,又復其職,甚非所 古之擇大臣者,必詢諸左右、大夫、國人。及其有犯,雖至大辟亦不加刑,第賜之 小犯則置之。果不可容,下法司定罪,使

今之太常,即古之秩宗,必得淸愼習禮之臣,然後可交神明。今卿貳皆缺,宜選擇

儒臣,使領其職。

洪、永間亦嘗行之。今久不舉,故吏多貪虐,民不聊生,而軍衞尤甚。宜擇公明廉幹之 古者省方巡狩,所以察吏得失,問民疾苦。 兩漢、唐、宋盛時,數遣使巡行郡縣,

古人君不親刑獄,必付理官,蓋恐徇喜怒而有所輕重也。邇法司所上獄,多奉敕

臣,分行天下。

四四〇五

增 減 輕重,法司不能執奏,及訊他囚,又觀望以爲輕重,民用多冤,宜使各舉其職。 至

運磚輸米諸例,均非古法,尤宜罷之。

春秋營築悉書,戒勞民也。 京師興作五六年矣,曰不煩民而役軍,軍獨非國家赤

子乎。況營作多完,宜罷工以蘇其力。

**免,使不致失業。** 各處水旱,有司旣不振救,請減租稅,或亦徒事虛文。 宜令戶部以時振濟,量加減

任發。 致怒, 麓 與之則兩蠻坐大,是減一麓川生二麓川也。 果擒以歸,不過梟諸通衢而已。緬將挾以爲功,必求與木邦共分其地。 JI連年用兵,死者十七八,軍貲爵賞不可勝計。今又遣蔣貴遠征緬甸,責獻思 設有蹉跎,兵事無已。臣見皇上每 不與則

任發首來獻,仍敕思機發盡削四境之地,分於各寨新附之蠻,則一方可寧矣。 地 ,豈不有乖於好生之仁哉。 況思機發已嘗遣人來貢,非無悔過乞免之意。 若敕緬斬

錄重囚,多宥令從軍,仁心若此。今欲生得一失地之竄寇,而驅數萬無罪之衆以就死

使借工各廠,服役私家。 迤 北貢使日增,包藏禍 公武舉之選以求良將,定召募之法以來武勇,廣屯田,公鹽 心,誠爲難測。宜分遣給事、御史閱視京邊官軍,及時訓練,

列

傳

法,以

厚儲蓄,庶武備

無缺,而外患有防。

疏 祀 入, 事 下 廷 議 言 球 所奏, 惟擇太常官宜從, 令吏部推舉。 修撰董璘遂乞改官太常,

蹴 高 下 攜 「此指公耳。」振 之曰:「老賊,令爾 。璘從旁竊 郵 皆匿 小 人。 初 校持 |球|| 不奏,倚振勢爲 有孝行。 刀至球所。 血裙遺球 麓川事,振 益大怒。 獄 他 解 家。 日 球方臥, 姦,公卿多趨謁,球絕 固已銜之。 ,遂歸,不復出 會璘疏 禍逾 後其 我 子 上,振 起立,大呼太祖 1 , 鉞求得 我 欽天監正彭德清者,球鄉人也,素爲振腹心。 劉 逐指 球 也。 球 臂,裹裙以 同 不 謀,並 太宗。 與 順驚悸。 通。德淸恨 逮下 殮。 俄 頸 斷, 詔 而子死,小 順 之, 獄 有 體猶植。 ,屬指揮馬順 逐摘 学 病人,忽起捽順 疏 校亦死。 中攬 遂支解之, 殺球。 權 隣,字德文**,** 語, 凡天文有 謂振 髮, 順 瘞 深 拳且 獄 戶 夜

下 獄 論 球 斬 死 尋 數年,瓦剌 瘐 死。 果入寇。 詔 戮 其屍。 英宗北狩,振被殺。 景帝憐球忠, 贈翰林學士,諡 朝 士立擊順,斃之。 忠愍,立 祠 而 於鄉 德清自土木遁

廣 東參政 球 二子,長 舒,雲南按察使。 鉞、 次野。 皆篤 學,躬耕養母。 球旣得卹, 兄弟乃出應舉,先後成進士。

四四〇七

列

傅

第 五

+

陳 鑑 宣德二年進士。

出 陳鑑,字貞明,高安人。 .按順天。言京師風俗澆瀉,其故有五:一,事佛過甚;二,營喪破家;三,服食靡麗;四, 授行人。 正統中,擢御史。

優 倡爲蠹 ,五,博塞成風。 章下禮部,格不行。

州宣 無敢 兵連 禁旅。 仕 ·歸,卒。 不解 一慰司 ,諫者。十四年正月,鑑抗疏言賊酋遠遁,不爲邊患,宜專責雲南守臣相機剿滅,無遠勞 改按貴州。 王振怒,欲困之,改鑑雲南參議,使赴騰衝招賊。 '隸貴州,爲**鑑罪,令兵部劾之,論死繫獄**。 、雲、貴軍民疲敝。 時麓川

曾思任發子思機發遁孟養,

屢上書求宥罪通貢。不許,復大舉遠征, 苗乘機煽動,閩、<br />
浙問盜賊大起。<br />
奉朝皆知其不可,懲劉球禍, 景帝嗣位,乃得赦。 已,復摭鑑爲巡按時嘗請改 尋授河南參議。 四川 播 致

爭 子發憤 自正 上書。 統中,劉球以忤王振冤死,鑑繼下獄,中外莫敢言事者數年。至景帝時,言路始開, 有何觀者,復以言得罪去。

見權 上奸語,以爲侵己,激帝怒,下科道參議。 觀 以善書爲中書舍人。 景泰二年劾尚書王直輩正統時阿附權奸, 吏科毛玉主奏稿,力詆觀, 林聰、 不宜在左右。 葉盛持之,乃 中貴

溪衞經歷。

删 削 奏上。 會御史疏亦上,中有「觀考滿不遷,私憾吏部」語。 帝怒,下觀韶獄, 杖之,謫九

歐陽修、楊邦义諸人,歎曰:「死不入此,非夫也。」 曰:「早知爾,曷若與劉君偕死。」同幼聞母言,卽感奮,思成父志。嘗入吉安忠節祠,見所祀 爲!」球出歎曰:「彼乃謀及婦人。」遂獨上奏,竟死。 居無何,復亦病死。 妻深悔之, 每哭 輒 約與俱,復妻勸止之。 球詣復邸,邀偕行。 復已他往,妻從屛間詈曰:「汝自上疏,何累他人 鍾同,字世京,吉安永豐人。父復,宣德中進士及第。歷官修撰,與劉球善。球上封事,

朝、語及沂王、皆泣下,因與約疏請復儲。五年五月、同因上疏論時政,遂及復儲事,其略曰: 景泰二年舉進士,明年授御史。懷獻太子旣薨,中外望復沂王於東宮。同與郎中章綸早 時犯顏有人,必能諫止上皇之行,何至有蒙塵之禍。 今者之言,何以異此。臣草茅時,聞寺人搆惡,戕戮直臣劉球,遂致廷臣箝口。假使當 寒心,而廟堂大臣皆恬不介意。昔秦伐趙,諸侯自若,孔子順獨憂之,人皆以爲狂。臣 近得賊諜,言也先使偵京師及臨淸虛實,期初秋大舉深入,直下河南。臣聞之不勝

陛下赫然中興,鋤奸黨,旌忠直,命六師禦敵於郊,不戰而三軍之氣自倍。臣謂陛

取鑒前車,厚自奮厲。毋徇貨色,毋甘嬉遊。 下方且鞭撻四裔,坐致太平,奈何邊氛甫息,瘡痍未復,而侈心遽生,失天下望。 伏願 親庶政以總威權,敦倫理以厚風俗,辨邪

賢將以訓士。 一以專委任,嚴賞罰以彰善惡,崇風憲以正紀綱。去浮費,罷冗員,禁僧道之蠹民,擇 然後親率羣臣,謝過郊廟,如成湯之六事自責,唐太宗之十漸卽改,庶幾

正

天

(意可回,國勢可振。

儀,建復儲位,實祖宗無疆之休。 即陛下之子。| 沂王天資厚重,足令宗社有託。伏望擴天地之量,敦友于之仁,獨吉具 **父有天下,固當傳之於子。乃者太子薨逝,足知天命有在。臣竊以爲上皇之子,** 

臣所以撫膺流涕,爲今日妨賢病國者醜也。 大臣之排抑尤甚,所舉者率多親舊富厚之家。 之計。平時尙爾,一旦有急,將何策制之。夫禦敵之方,莫先用賢。陛下求賢若渴,而 陛下命將帥各陳方略,經旬踰時,互相委責。及石亨、柳溥有言,又不過庸人孺子 卽長材屈抑,孰肯爲言。朝臣欺謾若此,

列 傅

第 五. +

鍾 同

予杖。 留之。 疏入,帝不懌,下廷臣集議。 越數日,章綸亦疏言復儲事,遂並下詔獄。 左右言事由同倡,帝乃封巨梃就獄中杖之,同竟死。 寧陽侯陳懋、吏部尙書王直等請帝納其言,因引罪求罷。 明年八月,大理少卿廖莊亦以言沂王事 時年三十二。 帝慰

乃行。 同之上疏也,策馬出,馬伏地不肯起。 同死、馬長號數聲亦死。 同叱曰:「吾不畏死,爾奚爲者。」馬猶盤辟再四,

與球聯位,竟如同初志。 給舟車路費。 英宗復位,贈同大理左寺丞,錄其子啓爲國子生,尋授咸寧知縣。 成化中,授次子越通政知事,給同妻羅氏月廩。 尋賜同諡恭愍,從祀忠節祠, 啓請父遺骸歸葬,詔

等叉下獄矣,脫諸 知忌諱,要爲有膽,當進一官處之。」乃以集知安州。 人黃玹獻議易儲,不過為逃死計耳,公等遽成之。 方同下獄時,有禮部郎孟玘者,亦疏言復儲事。 人死杖下,而公等坐享崇高,如清議何」謙以書示王文。|文曰:「書生不 。公國家柱石,獨不思所以善後 **玘,閩人;集,常熟人也。** 帝不罪。 而進士楊集 上書于謙曰:「奸 乎? 今同

章編 ,字大經,樂淸人。 正統四年進士。 授南京禮部主事

鹽運 也先旣議 一判官 景泰 初, 濟南楊浩除官未行,亦上 和,請力圖修攘以待其變。 召爲儀制 郎中。 綸 見國家多故,每慷慨 章 諫。 中官興安請帝建大隆福寺成,將臨幸,綸具疏 帝卽罷幸。 論事。 浩後累官副都御史,巡撫延綏。 嘗上太平十六策,反覆萬餘言 諫。河東 綸 叉

因災異請求致變之由,語頗切至。

儲位 語。 傳旨自門隙中出,立執論 宮之詔 百行 不可 見延和 之父也。 之本。 ,定天下之大本。 干外政,佞臣不可假事權,後宮不可盛聲色。 會 五年 |大風 門,以展友于之情,實天下之至願也。 曰『禮惟 陛下親受册封,是上皇之臣也。 五月,鍾同上奏請復儲。 揚 願退朝後朝謁 沙 ', 晝晦, 加 而 無替 如此則 獄得稍緩, 令錮之。 及鍾 ,義以卑而奉尊。』 兩宮皇太后,修問安視膳之儀。 和 同 氣 下詔獄。 充溢 越二日,綸亦抗疏陳修德弭災十四事。 一,災沴自弭。」疏入,帝大怒。 榜掠慘酷,逼引主使及交通南宫狀。 陛下與上皇,雖殊形體,實同 明年杖廖莊闕下,因封杖就獄 望陛下允蹈斯言,或朔望, 更請復 凡陰盛之屬,請悉禁罷。」又言:「孝弟者 汪后於中宮,正天下 上皇君臨天下 時日 或節 已暝,宮門閉。 之母儀,還沂王之 十有四年,是天下 人。 中杖綸、同各百 其大者謂:「內官 旦,率羣 伏讀奉 瀕死, 迎還 臣 朝

剢

同竟死,綸長

弊

如

故

命內侍檢前 復位 疏 ,不得。 郭 登 言編 內侍 與廖莊、林聰、左鼎 從旁誦數語 ,帝嗟歎 、 倪敬等皆直言忤時,宜 再  $\equiv$ 擢禮 部 右侍 郎 加 旌 擢。 帝乃立 釋編

綸 旣 以 大 節 爲帝 所重,而性亢直,不能諧俗。 石亨貴倖招 公卿飲,綸辭不往,又數與尚

書楊 善 論 事 亦 合。 亨、善共 短編 ,乃調 南 京 禮部,就改吏部

憲宗 卽位,有司以遺 部詩 大婚。綸言:「山 . 陵尙新,元朔未改,百日從吉,心寧自安。陛下

踐阼 之初 ,當以孝治天下,三綱五常實原 於此。 乞俟來春舉行。」 議 雖 不從,天 下 咸 重其言

協。 清、 御史楊智等因劾綸 疏旣 成 化 Ŀ 元年, 下盛等。 綸 兩維饑, 復 獨奏給 奏救荒四事。 命侍 事中王 郎葉盛勘之。 讓 不赴考察, 連章劾綸 皆報可。 明 且言明 年, 四年 綸 秋, 剛愎 及 愈都御 子玄應以冒籍 自用, 史高 己言多不 明 考察庶官 舉 京闡。 見從, 乞與 給 兩 事 人 中朱 明 議 俱 不

玄 應 實冒籍 臣 帝宥 鄕 郡 奎大得 綸 而 所 奏他事,亦悉不問。 民 心 解官之日,士民三萬人哭泣攀轅,留 未 幾,復轉禮部。 溫 州 十八 知 府 ,日乃得· 范奎被 論 去。請還 調官

罷。

章

並

於是讓及下考諸臣

綸

亦屢疏

水罷。

帝

不聽。

旣

而

盛

等

勘

|綸| 温州

之以慰 民望。」章下所司 ",竟報 寢

其妻張氏上其奏稿,且乞恩。 綸 性 戆, 好直言,不爲當 事者 帝嘉歎,贈南京禮部尚書,諡恭毅,官一子鴻臚典簿 所喜。 爲侍郎 三十 ·年,不 得 遷, 清老 去。 久 之卒。 居 製年,

玄應後舉進士,爲南京給事中。 偕同官論陳鉞罪,忤旨停俸。 孝宗嗣位,上治本五事。

仕終廣東布政使。

官出 活甚衆。還奏寬卹九事,多議行。 使襲錢亦請 修荒政,兼徵民逋。 英宗 廖莊,字安止,吉水人。宣德五年進士。八年改庶吉士,與知縣孔友諒等七人歷事六科。 初,授刑科給事中。 如詔書宥盜犯之未獲者,法司亦寢不行。 莊慮使者督趣困民,請寬災傷州縣,俟秋成,從之。 正統二年,御史元亮請如 楊士奇家人犯法,偕同官論列。或曰 脏以 詔書蠲邊軍侵沒糧餉, 詔書當信,上章爭之。 『獨不爲楊公地乎。』 振荒陝西, 不允。 五年詔京 按察

曰:「正所以爲楊公也。」 八年命與御史張驥 同署大理寺事。 踰月,授左寺丞。

郎 齊韶 十一年遷南京 納 ,欲奪福官與之,爲莊所駁。 大理 少卿。 踰二年,奸人陳共者,與所親賈福 韶捶福至死,被逮,趺亦誣莊,俱徵 爭襲指揮職。 下 南京刑部侍 詔獄。會韶

他罪並發,棄市,莊乃得釋。

列

傳

第

五十

麔

莊

景泰五 年七月上疏曰:「臣襲在朝,見上皇遣使册封陛下,每遇慶節, 必令羣臣朝謁東

祖宗 |莊 下。 宮,或 待 天地之心亦安矣。 廡 以 皇 恩禮 創業 嗣 母 仁宗、宣宗繼體守成者,此天下也。 一講明家法,或商略治道,歲 喪, 之生,使天下臣民曉然知陛 隆 之艱難,思所以係 一治,羣 赴京關 臣 給勘 太子者,天下之本。 皆感歎,謂上皇兄弟友愛如此。 合, 詣東 屬天下之人心,卽弭災召祥之道莫過於此。」疏 角門朝見。 時 下有 令節,俾羣臣朝 上皇之子,陛下之猶子也。 公天下之心,豈不美歟? 上皇北征,亦爲此天下也。 帝憶莊前疏,命廷杖 見, 今陛下奉天下以事 以慰上皇之心, 蓋 八十,謫定羌驛 宜 天下者,太祖、太宗之天 今陛下撫 一令親 則 上皇,願時時朝 祖宗在 入,不 儒臣,習書策,以 而 丞 報 有之, 天之神 明 宜念 見南

禮 部右侍郎,改 天 順 初,召還。 刑 部。 時母喪未終,復遭父喪, 成化 初,召爲 刑部左侍 特予祭葬,命起復, 郎。 逾年卒。 贈尚書,諡 仍官南京。 恭敏 天順 五. 年 就

勸稍 屛 莊 謝往 性 剛 喜 來,遠嫌 面 折 疑。 人過,而實坦 莊 笑日 ·「昔人有言『臣 懷無芥蔕。 不屑 阿如 細 市,臣 (謹,好 存謝賓客爲歡 心如如 水』, 吾無媳 狎。 吾心而已。」卒 既官 法司 或或

之

日

無以

爲

斂,衆夏錢

助其

喪。

**亟召入,乃言:「上皇臨御歲久,)沂王嘗位儲副,天下臣民仰戴。宜遷置所封之地,以絕人望** 同 章編 初 景帝 與 旗 時 ,英宗在南宮,左右 相 繼力言,皆得罪,然帝頗 為離 間。 感悟。六年七月辛巳,刑科給 及懷憲太子薨,羣 小恐沂王 事中徐正 復立,讒 構 請 愈 間 甚 一。故

3 体 第 Ŧi. + 倪 敬 四 四 Ŧi.

**迨英宗** 未解 別選親 復辟,于謙、王文以謀立外藩,誅死,其事遂不白云。 王子育之宮中。」帝驚愕,大怒,立叱出之,欲正其罪。 已,復得其淫穢事,謫戍 《鐵嶺 衞。 蓋帝 雖怒同等所言過激,而小人之言亦未遽聽也。 慮駭衆,乃命謫遠任,而帝怒

物濫 相 悉按治,豪猾斂迹。 租,戶部持 慶。 取 倪敬,字汝敬,無錫人。正統十三年進士。 代還,留 於民者。 不 可。 家四月,逮治,尋復 鎮守內臣戴細保貪橫, 再 再按福建。 疏爭,竟得請。 時議將復銀冶,敬 職 巡按 敬 山西。 列其罪以聞。 時有 擢御史。 未行,抗疏論,得寢。 入粟補官令,敬奏罷 帝召細保還,命敬捕治其黨,吏民 景泰初,畿輔饑,命出視。 旣至,奏罷諸 之。 戍將侵餉者, 請蠲 司 器 田

輟宴佚之娛,止 少 櫛 言 ,非所以養聖躬 風 「府庫 以沐雨 六年七月,以時多災異,偕同官吳江盛泉、江陰杜宥、蕪湖黃讓 之邊卒, 之財,不 興作 趨事 也。 宜 無故 之役,寬直臣之囚。」帝得疏不懌,下之禮部。 章編 急公之貧民,又何 而 鍾 子;遊觀 同 直言見忤, 之事,不宜非 以濟之?近聞 逐 錮 時 **一**踰年, ·而行。 造龍舟,作燕室, 非所以 曩以齊僧,屢出 昭 部臣 聖 、安福羅俊、固始 德 稱其忠愛。 也 營繕 帑金易米, 願 日增,嬉遊不 罷 桑門之供, 帝報聞, 汪清 不 知 F

焉 然意終不釋。 ,皆謫爲典史,敬得廣西宜 未幾,詔都御史蕭維禎考察其屬,諭令去之。 Щ 英宗復辟、詔皆授知縣,乃以敬知祥符。安遠侯柳溥器敬, 御史罷黜者十六人, 而敬等預

西征,請以自隨,改都督府都事。

踰年師還卒。

士類惜之。

四川, 都事。 盡,宥死守不下。 爲羅江知縣,擢敍州 盛泉等五人,皆進士。 有廉聲。 以撻錦衣衞隸,爲門達所語,戍廣西。 仕終南雄知府。 夜縋 知府,並有禦寇功。 死士焚其營,賊始驚潰。 泉雋爽負氣。 杜宥為英德知縣。 嘗按廣東,劾巡撫侍郎揭稽不職,稽 赦還,復冠帶。 移韶州通判,謝病歸。 鄰境多寇,創立 貧甚,課耕自給。 黃讓知安岳,遷中 縣城。嘗被圍 坐左遷。泉 羅俊嘗巡按 府 糧 後

楊瑄,字廷獻,豐城人。景泰五年進士。 帝不允。 瑄與同官錢雖、樊英等約疏爭,會「奪門」事起,乃已。 授御史。 剛直 尚氣節。景帝不豫,廷臣請立東

帝語大學士李賢、徐有貞曰:「眞御史也。」遂遣官按覈,而命吏部識瑄名,將擢用。吉祥聞之 天順 初,印馬畿內。 至河間,民訴曹吉祥、石亨奪其田。瑄以聞,並列二人怙 竉 專權

懼,訴於帝,請罪之。不許。

亦下獄。論瑄、鵬死,餘遣戍。 下瑄、鵬及諸御史於獄。榜掠備至,詰主使者,瑄等無所引,乃坐都御史耿九疇、羅綺主謀, 對、神色自若。至冒功濫職,帝詰之曰:「彼帥將士迎駕,朝廷論功行賞,何云冒濫。」」斌曰: 永報響。明日疏入,帝大怒,收鵬及瑄。御文華殿,悉召諸御史,擲彈章,俾自讀。斌且讀且 博、彭烈、張奎、李人儀、邵銅、鄭冕、陶復及御史劉泰、魏翰、康驥將劾亨、吉祥諸違法事。先 「當時迎駕止數百人,光祿賜酒饌,名數具在。今超遷至數千人,非冒濫而何?」帝默然,竟 一日,給事中王鉉洩於亨。亨與吉祥泣訴帝,誣鵬等爲已誅內官張永從子,結黨排陷,欲爲 未幾,亨西征還,適彗星見,十三道掌道御史張鵬、盛顋、周斌、費廣、張寬、王鑑、趙文

往,復謫戍南丹。 **理、順等亦得無調。暄、鵬行半道,適承天門災,肆赦放還。或謂當詣亨、吉祥謝,二人卒不** 亦言上天示警,宜恤刑獄。於是帝感悟,戍瑄、鵬鐵嶺衞,餘貶知縣,泰、翰、驥三人復職,而 拔木發屋,須臾大雨雹。亨、吉祥家大木俱折,二人亦懼。掌欽天監禮部侍郎楊序本亨黨, 事中何玘等十三人,御史吳禛等二十三人。詔以迅等爲州判官,禛等爲知縣。會大風震雷, 享等復譖諸言官。帝諭吏部,給事、御史年踰三十者留之,餘悉調外。尚書王鰯列上給

列

縣田 海鹽堤岸二千三百丈,民得奠居。 四十六萬頃,時堙塞過半,瑄請浚之。設防置牐,以利灌漑,功未就,卒。 即位,並還故官。 瑄尋遷浙江副使。 爲副使十餘年,政績卓然,進按察使。 按行海道,禁將校私縱戍卒。 西湖水舊可漑諸 修捍 海鹽 海塘, 人祠祀

予,親元老大臣,日事講習,克修厥德,以弭災變。」疏下禮部,尚書張昇等稱源忠愛。 第三曰天機,不愛百姓,驟興征徭則不明。第四曰天權,號令不當則不明。伏願陛下祗畏 天戒,安居深宮,絕嬉戲,禁遊畋,罷騎射,停工作,申嚴號令,毋輕出入,抑遠寵倖,裁節賜 星,明不如常。第二日天璇,后妃之象。后妃不得其寵則不明,廣營宮室妄鑿山陵則不明。 占曰:『人主不安,國有憂。』意者陛下輕舉逸遊,弋獵無度,以致然也。又北斗第二第三第四 角及心宿中星動搖不止。大角,天王之坐,心宿中星,天王正位也,俱宜安靜,今乃動搖。其 子源,字本清,幼習天文,授五官監候。 正德元年,劉瑾等亂政,源上言:「自八月初,大

譬甚切。瑾怒,矯旨杖三十,釋之。又上言:「自正德二年來,占得火星入太微垣帝座前,或

迨十月,霾霧時作,源言:「此衆邪之氣,陰冒於陽,臣欺其君,小人擅權,下將叛上。」引

東或西,往來不一,乞收攬政柄,思患預防。」蓋專指選也。選大怒,召而叱之曰:「若何官,

列 傳 第 五 + 楊 瑄 亦學爲忠臣。]源厲聲曰:「官大小異,忠一也。」又矯旨杖六十,謫戍肅州。 行至河陽驛,以

創卒。 其妻斬蘆荻覆之,葬驛後。

楊氏父子以忠諫名天下,爲士論重。 而源小臣抗節,尤人所難。 天啓初,賜諡忠懷。

盛顯,字時望,無錫人。 周斌,字國用,昌黎人。王鑑,太原人。趙文博,代州人。彭烈,

斌,江陰,鑑,膚施,文博,淳化,烈,江浦,人儀,襄陽,銅,博羅 冕,衡山。 並有善政。

峽江人。

李人儀,隆昌人。

邵銅,閩縣人。

鄭冕,樂平人。

皆進士,授御史。顒降東鹿

知縣;

郊外有隙地,爭來築室居之,遂成市,號爲「淸官店」。 任,益不用鞭扑。訟者,諭之,輒叩頭不復辯。鄰邑訟不決,亦皆赴訴,片言折之,各心厭去。 束鹿徭役苦不均,顒爲立九則法,繼者莫能易。 母憂去。 服除,民相率詣闕乞還。顋再

斌 在江陰,有惠政。 民歌曰:「旱爲災,周公禱之甘露來,水爲患,周公禱之陰雨散。」天

順 所排,又能稱職,其悉予郡。」於是擢 七年,先以薦擢開封 知府。 而甌等至憲宗嗣位,所司 題知邵武,鑑,延安,文博,衛輝 以治行聞。 帝曰:「諸臣直諫爲權倖 烈 河南; 人儀,荆州,

鲖 溫州 。 冕,衡州。 顒 復 以 任治劇, 調延平。 巡按御史上顒政績,陝西、湖廣守臣亦上鑑

人儀居縣時治行,皆特賜封誥。

霑漑,稿禾 七年召爲刑 顒 累遷陝西左布政使。 復蘇。 部右侍郎。 舉救荒之政,旣振,餘粟尚百餘萬石。 居二年,山東旱饑,盜起,改甌左副都御史往巡撫。 時三邊多警,歲復將饑。 **顒經畫餽餉無缺,軍民悉安。** 叉推行 九則法於諸府、黜暴除苛, 顒 至露 高,大 成化

民甚德之。

居三年,以老致仕。

弘治中卒。

止 爲 御 史,嘗於左順 文博,終巡撫河南右副都御史。 斌、歷廣東右布 門面 政使。 斥中官非 初去江陰,民立生祠。 禮。 烈,廣東左布政使。 中官怒甚,因考察屬都御 及自開封遷去,民亦涕泣追送焉。 費廣等無考。 史蕭維頑 去之, 維順 不可 鑑,初 而

遊獵 耿通陷於 贊曰:直言敢諫之士,激於事變,奮不顧身,獲罪固其所甘心耳。然觀尹昌隆死於呂震; 陳祚 高煦 詩勤 學, 劉 球之斃,陳鑑 鍾同、章編、廖莊倡復儲,倪敬等直言時事,皆用賈禍。 之繫,由於王 振 ,楊瑄之戍,厄於石亨、 曹吉祥; 忠臣之志抑而 乃至 戴 綸諫 不

伸,亦

可悲夫。

